

SCRIPTORUM CLASSICORUM
BIBLIOTHECA OXONIENSIS



OXONII
E TYPOGRAPHEO CLARENDONIANO
LONDINI ET NOVI EBORACI
APUD HUMPHREDUM MILFORD

LVCRETI
DE RERVM NATVRA
LIBRI SEX

RECOGNOVIT
BREVIQVE ADNOTATIONE CRITICA INSTRVXIT

CYRILLVS BAILEY

COLLEGII DE BALLIOLO SOCIVS

EDITIO ALTERA

BOSTON COLLEGE LIBRARY
CHESTNUT HILL, MASS.


OXONII
E TYPOGRAPHEO CLARENDONIANO

OXONII

Excudebat Fridericus Hall

Typographus academicus

PA6105,
S8 L8



208188

PRAEFATIO

AD EDITIONEM PRIMAM

LVCRETIANI carminis qui exstant codices ab uno exemplari deducti sunt omnes, quod demonstravit Carolus Lachmann quarto aut quinto saeculo scriptum fuisse et in regno Francico servatum. Huius exemplaris, quod iam pridem est amissum, tria, quoad scimus, scripta sunt apographa, quorum duo inter ceteros Isaaci Vossii libros adepta est Vniversitatis Leidensis bibliotheca. Codex alter saeculo nono scriptus, qui unde a Vossio comparatus sit non satis constat, Oblongus nominatus est: alter saeculo decimo scriptus Quadrati nomen accepit: hunc antequam Vossii in manus venit, in usum Lambini editionem suam parantis aliqua ex parte excusserat Turnebus. Horum duorum codicum testimonio, quamvis negligentius scripti sint et permulta contineant errata, nititur praecipue textus Lucretianus. Codici Quadrato simillimae exstant Hauniae octo schedae quae prius Gottorpiae servatae fuerunt, Vindobonae decem.

Tertium codicum genus, numero maximum sed auctoritate his multo inferius, ex Italia ortum est. Eiusdem archetypi apographum saeculo quinto decimo possedit Poggius Florentinus. Huius antequam perditum est unum

PRAEFATIO AD EDITIONEM PRIMAM

scripsit apographum Nicolaus Nicoli in bibliotheca Laurentiana adhuc servatum, alia nonnulla Itali alii : existunt Florentiae octo exemplaria, sex Romae in bibliotheca Vaticana, unum apud Monacenses, quod nonnullis in locis ceteris videtur praestare, in Anglicis nostris bibliothecis non minus septem. Sed haec omnia, si Nicolianum exceperis, non multi sunt aestimanda cum et mendosa sint et negligentius vel ex mera coniectura emendata : codex Nicolianus accuratius procul dubio scriptus saepe Poggianum fideliter videtur repraesentare.

Cum codicum Leidensium excellentiam primus demonstrasset Lachmann, hunc ita secuti sunt ceteri Lucretiani carminis editores ut illis codicibus maior usque adtribueretur fides. Quare debet hodie si quis carmen edere voluit illos quam maxime sequi, Italorum et editorum quam rarissime proferre auctoritatem. In hac igitur editione paranda quoties Leidensium testimonium probavi, inferiorum codicum lectiones et virorum doctorum coniecturas non commemoravi. Quoties obelisco dignum locum iudicavi, et codicum scripturas et editorum coniecturas in notis addidi. Quoties autem correctiones in textum recepi, et praelatae lectionis auctoritatem notavi et Leidensium repudiatam scripturam adieci, siquidem aut ipsa intelligi potest aut alias textus emendationes suppeditavit. Mera errata quae simili modo omnes correxerunt saepe praetermisi, sed ubi solita codicum menda exhibere videbantur cuiusque errati generis dignissima ferme notatione exempla animadverti.

Lacunis, seclusionibus, uncinis, versuum traiectionibus rarius fortasse quam ceteri editores idcirco usus sum, quod et huiusmodi remediis saepe violatum potius fuisse textum

PRAEFATIO AD EDITIONEM PRIMAM

quam emendatum iudicem et optimorum codicum fidem legentibus praestare maluerim quam poema instaurare quale ipse scilicet scripserit poeta vel potius quale scripturus fuisse videatur, si perfecisset et perpolivisset. In his rebus admirabile, ut mihi videtur, exemplar nuper prae-buit R. Heinze in libro tertio recognoscendo.

Tralaticiam carminis orthographiam, quam e codicibus Leidensibus deduxit Lachmann singula quaeque verba sicut in iis invenerat referendo, deserere ausus sum. Cum enim constantis scribendi rationis omnino expertes sint codices, ego et legenti commodius fore arbitratus sum et re vera minus ineptum si orthographiam cum se ipsa constantiorem reddiderim et usitatae Latinitatis normae similiorem.

In hac editione perraro invenientur quae nova sint aut non prius temptata. Malui editorum laboribus fretus libellum bene sanatum proferre quam nova adhibendo medicamina aut nova vulnera adferre aut vetera adgravare.

Scribebam Oxonii

in mense Novembr. A.S. MDCCCXCVIII

SIGLA

- O* = Codex Leidensis 30 (Oblongus)
Q = Codex Leidensis 94 (Quadratus)
L = Codex Laurentianus xxxv. 30 (Nicolianus)
l 29, l 31, l 32 = Codices Laurentiani, xxxv. 29, 31, 32
C = Codex Cantabrigiensis
Vat. 1706, &c. = Codex Vaticanus 1706 &c.
Mon. = Codex Monacensis
G = Fragmentum Gottorpiense
] = lectionem Leidensium in textu conservatam

T. LVCRETI CARI DE RERVVM NATVRA

LIBER PRIMVS

AENEADVIV genetrix, hominum divumque voluptas,
alma Venus, caeli subter labentia signa
quae mare navigerum, quae terras frugiferentis
concelebras, per te quoniam genus omne animantum
concupitur visitque exortum lumina solis : 5
te, dea, te fugiunt venti, te nubila caeli
adventumque tuum, tibi suavis daedala tellus
summittit flores, tibi rident aequora ponti
placatumque nitet diffuso lumine caelum.
nam simul ac species patefactast verna diei 10
et reserata viget genitabilis aura favoni,
aeriae primum volucres te, diva, tuumque
significant initum percussae corda tua vi.
inde ferae pecudes persultant pabula laeta [15]
et rapidos tranant amnis : ita capta lepore 15 [14]
te sequitur cupide quo quamque inducere pergis.
denique per maria ac montis fluviosque rapaces
frondiferasque domos avium camposque virentis
omnibus incutiens blandum per pectora amorem
efficis ut cupide generatim saecula propagent. 20

14, 15 *hunc versuum ordinem habet L*
16 *pergis O corr. : tergis OQ*

14 *ferae] fere Wakefield*

T. LVCRETI CARI

quae quoniam rerum naturam sola gubernas
 nec sine te quicquam dias in luminis oras
 exoritur neque fit laetum neque amabile quicquam,
 te sociam studeo scribendis versibus esse
 quos ego de rerum natura pangere conor 25
 Memmiadae nostro, quem tu, dea, tempore in omni
 omnibus ornatum voluisti excellere rebus.
 quo magis aeternum da dictis, diva, leporem.
 effice ut interea fera moenera militiae
 per maria ac terras omnis sopita quiescant. 30
 nam tu sola potes tranquilla pace iuvare
 mortalis, quoniam belli fera moenera Mavors
 armipotens regit, in gremium qui saepe tuum se
 reicit aeterno devictus vulnere amoris,
 atque ita suspiciens tereti cervice reposta 35
 pascit amore avidos inhians in te, dea, visus,
 eque tuo pendet resupini spiritus ore.
 hunc tu, diva, tuo recubantem corpore sancto
 circumfusa super, suavis ex ore loquelas
 funde petens placidam Romanis, incluta, pacem. 40
 nam neque nos agere hoc patriai tempore iniquo
 possumus aequo animo nec Memmi clara propago
 talibus in rebus communi desse saluti.

*

quod superest, vacuas auris (animumque sagacem) 50
 semotum a curis adhibe veram ad rationem,
 ne mea dona tibi studio disposta fideli,
 intellecta prius quam sint, contempta relinquo.
 nam tibi de summa caeli ratione deumque
 disserere incipiam et rerum primordia pandam, 55

27 ornatum *O corr.* : orlatum *OQ* 32 fera moenera *Lambinus* :
 fera moenia *interpres Statii* : feram onera *OQ* 33 regit *L* : regium
OQ 34 reicit *QG* : reficit *O* 43 desse *O corr.* : id esse *OQ*
 44-49 = ii. 646-651 *seclusit Pontanus, lacunam indicavit Lachmann*
 50 vacuas auris animumque sagacem *interpres Vergilii apud Maium* :
 ut uacuas auris *OQ*

unde omnis natura creet res auctet alatque
 quove eadem rursum natura perempta resolvat,
 quae nos materiem et genitalia corpora rebus
 reddunda in ratione vocare et semina rerum
 appellare suemus et haec eadem usurpare 60
 corpora prima, quod ex illis sunt omnia primis.

Humana ante oculos foede cum vita iaceret
 in terris oppressa gravi sub religione
 quae caput a caeli regionibus ostendebat
 horribili super aspectu mortalibus instans, 65
 primum Graius homo mortalis tollere contra
 est oculos ausus primusque obsistere contra,
 quem neque fama deum nec fulmina nec minitanti
 murmure compressit caelum, sed eo magis acrem
 irritat animi virtutem, effringere ut arta 70
 naturae primus portarum claustra cupiret.
 ergo vivida vis animi pervicit, et extra
 processit longe flammantia moenia mundi
 atque omne immensum peragravit mente animoque,
 unde refert nobis victor quid possit oriri, 75
 quid nequeat, finita potestas denique cuique
 quanam sit ratione atque alte terminus haerens.
 quare religio pedibus subiecta vicissim
 obteritur, nos exaequat victoria caelo.

Illud in his rebus vereor, ne forte rearis 80
 impia te rationis inire elementa viamque
 indugredi sceleris. quod contra saepius illa
 religio peperit scelerosa atque impia facta.
 Aulide quo pacto Triviai virginis aram
 Iphianassai turparunt sanguine foede 85
 ductores Danaum delecti, prima virorum.

66 tollere] tendere *Nonius*

gere l 29 : confringere *OQ*

74 omne *O corr.* : omnem *OQ*

84 Triviai *O corr.* : triuia ad *O* : triuiat *Q*

Iphianassa *OQ*

68 fama] fana *Bentley*

71 cupiret *O corr.* : cuperet *OQ*

77 quanam *O corr.* : quantum *OQ*

85 Iphianassai *O corr.* :

T. LVCRETI CARI

cui simul infula virgineos circumdata comptus
 ex utraque pari malarum parte profusast,
 et maestum simul ante aras adstare parentem
 sensit et hunc propter ferrum celare ministros 90
 aspectuque suo lacrimas effundere civis,
 muta metu terram genibus summissa petebat.
 nec miserae prodesse in tali tempore quibat
 quod patrio princeps donarat nomine regem.
 nam sublata virum manibus tremibundaque ad aras 95
 deductast, non ut sollemni more sacrorum
 perfecto posset claro comitari Hymenaeo,
 sed casta incestu nubendi tempore in ipso
 hostia concideret mactatu maesta parentis,
 exitus ut classi felix faustusque daretur. 100
 tantum religio potuit suadere malorum.

Tutemet a nobis iam quovis tempore vatum
 terriloquis victus dictis desciscere quaeres.
 quippe etenim quam multa tibi iam fingere possunt
 somnia quae vitae rationes vertere possint 105
 fortunasque tuas omnis turbare timore!
 et merito. nam si certam finem esse viderent
 aerumnarum homines, aliqua ratione valerent
 religionibus atque minis obsistere vatum.
 nunc ratio nulla est restandi, nulla facultas, 110
 aeternas quoniam poenas in morte timendumst.
 ignoratur enim quae sit natura animai,
 nata sit an contra nascentibus insinuetur,
 et simul intereat nobiscum morte dirempta
 an tenebras Orci visat vastasque lacunas 115
 an pecudes alias divinitus insinuet se,
 Ennius ut noster cecinit qui primus amoeno
 detulit ex Helicone perenni fronde coronam,

104 iam O : me QG possunt Marullus : possum OQ 111
 timendumst Orelli : timendum OQ

per gentis Italas hominum quae clara clueret ;
 etsi praeterea tamen esse Acherusia templa 120
 Ennius aeternis exponit versibus edens,
 quo neque permaneant animae neque corpora nostra,
 sed quaedam simulacra modis pallentia miris ;
 unde sibi exortam semper florentis Homeri
 commemorat speciem lacrimas effundere salsas 125
 coepisse et rerum naturam expandere dictis.
 quapropter bene cum superis de rebus habenda
 nobis est ratio, solis lunaeque meatus
 qua fiant ratione, et qua vi quaeque gerantur
 in terris, tunc cum primis ratione sagaci 130
 unde anima atque animi constet natura videndum,
 et quae res nobis vigilantibus obvia mentis
 terrificet morbo adfectis somnoque sepultis,
 cernere uti videamur eos audireque coram,
 morte obita quorum tellus amplexitur ossa. 135

Nec me animi fallit Graiorum obscura reperta
 difficile inlustrare Latinis versibus esse,
 multa novis verbis praesertim cum sit agendum
 propter egestatem linguae et rerum novitatem ;
 sed tua me virtus tamen et sperata voluptas 140
 suavis amicitiae quemvis efferre laborem
 suadet et inducit noctes vigilare serenas
 quaerentem dictis quibus et quo carmine demum
 clara tuae possim praepandere lumina menti,
 res quibus occultas penitus convisere possis. 145

Hunc igitur terrorem animi tenebrasque necessest
 non radii solis neque lucida tela diei
 discutiant, sed naturae species ratioque.
 principium cuius hinc nobis exordia sumet,
 nullam rem e nilo gigni divinitus unquam. 150

122 permaneant] permanent *Politianus* : perveniant *Marullus*
 126 coepisse et *Q* corr. : coepisset *OQ* 130 tunc] tum *l 31*
 141 efferre] sufferre *l 32 marg.*

T. LVCRETI CARI

quippe ita formido mortalis continet omnis,
quod multa in terris fieri caeloque tuentur
quorum operum causas nulla ratione videre
possunt ac fieri divino numine rentur.

quas ob res ubi viderimus nil posse creari 155 [156]
de nilo, tum quod sequimur iam rectius inde [157]
perspiciemus, et unde queat res quaeque creari [158]
et quo quaeque modo fiant opera sine divum. [155]

Nam si de nilo fierent, ex omnibu' rebus
omne genus nasci posset, nil semine egeret. 160
e mare primum homines, e terra posset oriri
squamigerum genus et volucres erumpere caelo;
armenta atque aliae pecudes, genus omne ferarum,
incerto partu culta ac deserta tenerent.

nec fructus idem arboribus constare solerent, 165
sed mutarentur, ferre omnes omnia possent.

quippe ubi non essent genitalia corpora cuique,
qui posset mater rebus consistere certa? *Quid dicitur.*

at nunc seminibus quia certis quaeque creantur,
inde enascitur atque oras in luminis exit, 170

materies ubi inest cuiusque et corpora prima;
atque hac re nequeunt ex omnibus omnia gigni,
quod certis in rebus inest secreta facultas.

praeterea cur vere rosam, frumenta calore,
vitis autumnno fundi suadente videmus, 175

si non, certa suo quia tempore semina rerum
cum confluerunt, patefit quodcumque creatur,
dum tempestates adsunt et vivida tellus
tuto res teneras effert in luminis oras?

quod si de nilo fierent, subito exorerentur 180
incerto spatio atque alienis partibus anni,
quippe ubi nulla forent primordia quae genitali

155-158 *hunc versuum ordinem restituit Marullus* 157 et
Marullus: ut OQ 168 certa O *corr.*: derta O: terta Q 175
vitis] uvas *Pontanus* 176 quia l 31: qui OQ 177 creatur O *corr.*:
orcatu O: ora cantu Q

concilio possent arceri tempore iniquo.
 nec porro augendis rebus spatio foret usus
 seminis ad coitum, si e nilo crescere possent. 185
 nam fierent iuvenes subito ex infantibu' parvis
 e terraque exorta repente arbusta salirent.
 quorum nil fieri manifestum est, omnia quando
 paulatim crescunt, ut par est, semine certo
 crescentesque genus servant; ut noscere possis 190
 quidque sua de materia grandescere aliquae.
 huc accedit uti sine certis imbribus anni
 laetificos nequeat fetus summittere tellus
 nec porro secreta cibo natura animantum
 propagare genus possit vitamque tueri; 195
 ut potius multis communia corpora rebus
 multa putes esse, ut verbis elementa videmus,
 quam sine principiis ullam rem exsistere posse.
 denique cur homines tantos natura parare
 non potuit, pedibus qui pontum per vada possent 200
 transire et magnos manibus divellere montis
 multaque vivendo vitalia vincere saecula,
 si non, materies quia rebus reddita certast
 gignundis e qua constat quid possit oriri?
 nil igitur fieri de nilo posse fatendumst, 205
 semine quando opus est rebus quo quaeque creatae
 aeris in teneras possint proferrier auras.
 postremo quoniam incultis praestare videmus
 culta loca et manibus meliores reddere fetus,
 esse videlicet in terris primordia rerum 210
 quae nos fecundas vertentes vomere glebas
 terraique solum subigentes cimus ad ortus.
 quod si nulla forent, nostro sine quaeque labore

190 crescentesque (*sc. res cf. 56, 57*) *OQ*: crescere resque *Lachmann*: crescunt atque *Nencini*: lacunam ante hunc versum indicavit *Munro in ed. min.*, postea inter verba est et semine (189) 191 quicque *Q*: quaeque *O* 207 possint *Pontanus*: possent *OQ*

sponte sua multo fieri meliora videres.

Huc accedit uti quidque in sua corpora rursum 215

dissoluat natura neque ad nilum interimat res.

nam si quid mortale <e> cunctis partibus esset,

ex oculis res quaeque repente erepta periret.

nulla vi foret usus enim quae partibus eius

discidium parere et nexus exsolvere posset. 220

quod nunc; aeterno quia constant semine quaeque,

donec vis obiit quae res diverberet ictu

aut intus penetret per inania dissoluatque,

nullius exitium patitur natura videri.

praeterea quaecumque vetustate amovet aetas, 225

si penitus perimit consumens materiem omnem,

unde animale genus generatim in lumina vitae

redducit Venus, aut reductum daedala tellus

unde alit atque auget generatim pabula praebens?

unde mare ingenui fontes externaque longe 230

flumina suppeditant? unde aether sidera pascit?

omnia enim debet, mortali corpore quae sunt,

infinita aetas consumpse anteacta diesque.

quod si in eo spatio atque anteacta aetate fuere

e quibus haec rerum consistit summa resecta, 235

immortali sunt natura praedita certe ;

haud igitur possunt ad nilum quaeque reverti.

denique res omnis eadem vis causaque vulgo

conficeret, nisi materies aeterna teneret,

inter se nexu minus aut magis indupedita. 240

tactus enim leti satis esset causa profecto,

quippe ubi nulla forent aeterno corpore quorum

contextum vis deberet dissolvere quaeque.

at nunc, inter se quia nexus principiorum

dissimiles constant aeternaque materies est, 245

215 quicque *Lambinus* : quicquid *O* : quidquid *QG*

L 230 externaque] extentaque *Lachmann*

Bernays 240 nexu *O corr.* : nexus *OQ*

217 e *add.*
longe] large

incolumi remanent res corpore, dum satis acris
vis obeat pro textura cuiusque reperta.

haud igitur redit ad nilum res ulla, sed omnes
discidio redeunt in corpora materialia.

postremo pereunt imbres, ubi eos pater aether 250
in gremium matris terrai praecipitavit;

at nitidae surgunt fruges ramique virescunt

arboribus, crescunt ipsae fetuque gravantur;

hinc alitur porro nostrum genus atque ferarum,

hinc laetas urbis pueris florere videmus 255

frondiferasque novis avibus canere undique silvas;

hinc fessae pecudes pingui per pabula laeta

corpora deponunt et candens lacteus umor

uberibus manat distentis; hinc nova proles

artubus infirmis teneras lasciva per herbas 260

ludit lacte mero mentis percussa novellas.

haud igitur penitus pereunt quaecumque videntur,

quando alid ex alio reficit natura nec ullam

rem gigni patitur nisi morte adiuta aliena.

Nunc age, res quoniam docui non posse creari 265

de nilo neque item genitas ad nil revocari,

nequa forte tamen coeptes diffidere dictis,

quod nequeunt oculis rerum primordia cerni,

accipe praeterea quae corpora tute necessest

confiteare esse in rebus nec posse videri. 270

principio venti vis verberat incita pontum

ingentisque ruit navis et nubila differt,

interdum rapido percurrens turbine campos

arboribus magnis sternit montisque supremos

silvifragis vexat flabris: ita perfurit acri 275

cum fremitu saevitque minaci murmure ventus.

257 pingui *Iun. Philargyrius*: pinguis *OQ*

263 alid ex alio *L*:

alit ex alto *O*: alit alo *Q*: alia ex alio *Q* corr.

264 adiuta *O* corr.:

adluta *OQ*

271 pontum *Marullus*: cortus *OQ*: portus *l* 29

276 ventus *Markland*: pontus *OQ*: fortasse *Corus* (*vid. C. Q. xv. p. 18*)

sunt igitur venti nimirum corpora caeca
 quae mare, quae terras, quae denique nubila caeli
 verrunt ac subito vexantia turbine raptant,
 nec ratione fluunt alia stragemque propagant 280
 et cum mollis aquae fertur natura repente
 flumine abundanti, quam largis imbribus auget
 montibus ex altis magnus decursus aquai
 fragmina coniciens silvarum arbustaque tota,
 nec validi possunt pontes venientis aquai 285
 vim subitam tolerare: ita magno turbidus imbri
 molibus incurrit validis cum viribus amnis.
 dat sonitu magno stragem volvitque sub undis
 grandia saxa ruit †qua quidquid† fluctibus obstat.
 sic igitur debent venti quoque flamina ferri, 290
 quae veluti validum cum flumen procubuere
 quamlibet in partem, trudunt res ante ruuntque
 impetibus crebris, interdum vertice torto
 corripiunt rapideque rotanti turbine portant.
 quare etiam atque etiam sunt venti corpora caeca, 295
 quandoquidem factis et moribus aemula magnis
 amnibus inveniuntur, aperto corpore qui sunt.
 tum porro varios rerum sentimus odores
 nec tamen ad naris venientis cernimus umquam,
 nec calidos aestus tuimur nec frigora quimus 300
 usurpare oculis nec voces cernere suemus;
 quae tamen omnia corporea constare necessest
 natura, quoniam sensus impellere possunt.
 tangere enim et tangi, nisi corpus, nulla potest res.
 denique fluctifrago suspensae in litore vestes 305
 uvescunt, eadem dispansae in sole serescunt.

282 quam . . . auget *Lachmann*: quem . . . auget *O Q corr.* (uugget
Q: urget *O corr.*): quom . . . urget *Woltjer* 289 ruit qua quid-
 quid *OQ*: ruitque ita quidquid *Lachmann*: ruit qua quicquid *Munro*:
fortasse ruitque, et quidquid (cf. trudunt . . . ruuntque 292) 294
 rapide *Lachmann*: rapidi *O Q corr.*: rapidisque *Q*

at neque quo pacto persederit umor aquai
 visumst nec rursum quo pacto fugerit aestu.
 in parvas igitur partis dispergitur umor, ¹¹³⁵
 quas oculi nulla possunt ratione videre. 310
 quin etiam multis solis redeuntibus annis
 anulus in digito subter tenuatur habendo,
 stilicidi casus lapidem cavat, uncus aratri
 ferreus occulte decrescit vomer in arvis,
 strataque iam vulgi pedibus detrita viarum 315
 saxea conspiciamus; tum portas propter aena
 signa manus dextras ostendunt attenuari
 saepe salutantum tactu praeterque meantum.
 haec igitur minui, cum sint detrita, videmus.
 sed quae corpora decedant in tempore quoque, 320
 invida praeclusit speciem natura videndi.
 postremo quaecumque dies natura rebus
 paulatim tribuit, moderatim crescere cogens,
 nulla potest oculorum acies contenta tueri,
 nec porro quaecumque aevo macieque senescunt; 325
 nec, mare quae impendent, vesco sale saxa peresa
 quid quoque amittant in tempore cernere possis.
 corporibus caecis igitur natura gerit res.

Nec tamen undique corporea stipata tenentur
 omnia natura; namque est in rebus inane. 330
 quod tibi cognosse in multis erit utile rebus
 nec sinet errantem dubitare et quaerere semper
 de summa rerum et nostris diffidere dictis.
 quapropter: locus est intactus inane vacansque.
 quod si non esset, nulla ratione moveri 335
 res possent; namque officium quod corporis exstat,
 officere atque obstare, id in omni tempore adesset
 omnibus; haud igitur quicquam procedere posset,
 principium quoniam cedendi nulla daret res.
 at nunc per maria ac terras sublimaque caeli 340

multa modis multis varia ratione moveri
 cernimus ante oculos, quae, si non esset inane,
 non tam sollicito motu privata carerent
 quam genita omnino nulla ratione fuissent,
 undique materies quoniam stipata quiesset. 345
 praeterea quamvis solidae res esse putentur,
 hinc tamen esse licet raro cum corpore cernas.
 in saxis ac speluncis permanat aquarum
 liquidus umor et uberibus flent omnia guttis.
 dissipat in corpus sese cibus omne animantum. 350
 crescunt arbusta et fetus in tempore fundunt,
 quod cibus in totas usque ab radicibus imis
 per truncos ac per ramos diffunditur omnis.
 inter saepta meant voces et clausa domorum
 transvolitant, rigidum permanat frigus ad ossa, 355
 quod, nisi inania sint, qua possent corpora quaeque
 transire, haud ulla fieri ratione videres.
 denique cur alias aliis praestare videmus
 pondere res rebus nilo maiore figura?
 nam si tantundemst in lanae glomere quantum 360
 corporis in plumbo est, tantundem pendere par est,
 corporis officiumst quoniam premere omnia deorsum,
 contra autem natura manet sine pondere inanis.
 ergo quod magnumst aequae leviusque videtur,
 nimirum plus esse sibi declarat inanis; 365
 at contra gravius plus in se corporis esse
 dedicat et multo vacui minus intus habere.
 est igitur nimirum id quod ratione sagaci
 quaerimus, admixtum rebus, quod inane vocamus.
 Illud in his rebus ne te deducere vero 370
 possit, quod quidam fingunt, praecurrere cogor.

347 licet *L* : liceret *OQ*
locum sic interpunxit Gifanius
L corr. : aut OQ

349 flent *L* : fient *OQ* 356, 357
 357 fieri *O* : ualerent *Q* 366 at
 367 vacui *Pontanus* : uacuum *O* : vacuim *Q*

cedere squamigeris latices nitentibus aiunt
 et liquidas aperire vias, quia post loca pisces
 linquant, quo possint cedentes confluere undae.
 sic alias quoque res inter se posse moveri 375
 et mutare locum, quamvis sint omnia plena.
 scilicet id falsa totum ratione receptumst.

nam quo squamigeri poterunt procedere tandem,
 ni spatium dederint latices? concedere porro
 quo poterunt undae, cum pisces ire nequibunt? 380

aut igitur motu privandumst corpora quaeque
 aut esse admixtum dicendumst rebus inane
 unde initum primum capiat res quaeque movendi.

postremo duo de concursu corpora lata
 si cita dissiliant, nempe aer omne necessest, 385
 inter corpora quod fiat, possidat inane.

is porro quamvis circum celerantibus auris
 confluat, haud poterit tamen uno tempore totum
 compleri spatium; nam primum quemque necessest
 occupet ille locum, deinde omnia possideantur. 390

quod si forte aliquis, cum corpora dissiluire,
 tum putat id fieri quia se condenseat aer,
 errat; nam vacuum tum fit quod non fuit ante
 et repletur item vacuum quod constitit ante,
 nec tali ratione potest denserier aer, 395

nec, si iam posset, sine inani posset, opinor,
 ipse in se trahere et partis conducere in unum.

Quapropter, quamvis causando multa moreris,
 esse in rebus inane tamen fateare necessest.
 multaque praeterea tibi possum commemorando 400
 argumenta fidem dictis corradere nostris.
 verum animo satis haec vestigia parva sagaci
 sunt per quae possis cognoscere cetera tute.

383 initum *Q* corr. : initium *OQ*
 concurso *OQ*
 serier *O* corr. : condenserier *OQ*

384 concursu *G prim. man.* :
 389 quenque *Pontanus* : quisque *OQ*

395 den-

namque canes ut montivagae persaepe ferarum
 naribus inveniunt intectas fronde quietes, 405
 cum semel institerunt vestigia certa viai,
 sic alid ex alio per te tute ipse videre
 talibus in rebus poteris caecasque latebras
 insinuare omnis et verum protrahere inde.
 quod si pigraris paulumve recesseris ab re, 410
 hoc tibi de plano possum promittere, Memmi:
 usque adeo largos haustus e fontibu' magnis
 lingua meo suavis diti de pectore fundet,
 ut verear ne tarda prius per membra senectus
 serpat et in nobis vitae claustra resolvat, 415
 quam tibi de quavis una re versibus omnis
 argumentorum sit copia missa per auris.

Sed nunc ut repetam coeptum pertexere dictis,
 omnis, ut est igitur per se, natura duabus
 constitit in rebus; nam corpora sunt et inane, 420
 haec in quo sita sunt et qua diversa moventur.
 corpus enim per se communis dedicat esse
 sensus; cui nisi prima fides fundata valebit,
 haud erit occultis de rebus quo referentes
 confirmare animi quicquam ratione queamus. 425
 tum porro locus ac spatium, quod inane vocamus,
 si nullum foret, haud usquam sita corpora possent
 esse neque omnino quoquam diversa meare;
 id quod iam supera tibi paulo ostendimus ante.
 praeterea nil est quod possis dicere ab omni 430
 corpore seiunctum secretumque esse ab inani,
 quod quasi tertia sit numero natura reperta.
 nam quodcumque erit, esse aliquid debebit id ipsum;
 cui si tactus erit quamvis levis exiguusque, [435]

404 ferarum *O corr.*: ferare *OO*: ferai *Q corr.* 411 de plano
l 31: deptano *OO* 412 magnis *O corr.*: magnes *O*: amnes *Q* 433
 aliquid] aliquo *Brieger* 435 ante 434 *Lachmann*: ordinem servat
Brieger

augmine vel grandi vel parvo denique, dum sit, 435 [434]
 corporis augebit numerum summamque sequetur.
 sin intactile erit, nulla de parte quod ullam
 rem prohibere queat per se transire meantem,
 scilicet hoc id erit, vacuum quod inane vocamus.
 praeterea per se quodcumque erit, aut faciet quid 440
 aut aliis fungi debebit agentibus ipsum
 aut erit ut possint in eo res esse gerique.
 at facere et fungi sine corpore nulla potest res
 nec praebere locum porro nisi inane vacansque.
 ergo praeter inane et corpora tertia per se 445
 nulla potest rerum in numero natura relinqui,
 nec quae sub sensus cadat ullo tempore nostros
 nec ratione animi quam quisquam possit apisci.

Nam quaecumque cluent, aut his coniuncta duabus
 rebus ea invenies aut horum eventa videbis. 450
 coniunctum est id quod nusquam sine perituali
 discidio potis est seiungi seque gregari,
 pondus uti saxis, calor ignist, liquor aquai,
 tactus corporibus cunctis, intactus inani.
 servitium contra paupertas divitiaeque, 455
 libertas bellum concordia, cetera quorum
adventu manet incolumis natura abituque,
 haec soliti sumus, ut par est, eventa vocare.
 tempus item per se non est, sed rebus ab ipsis
 consequitur sensus, transactum quid sit in aevo, 460
 tum quae res instet, quid porro deinde sequatur.
 nec per se quemquam tempus sentire fatendumst
semotum ab rerum motu placidaque quiete.
 denique Tyndaridem raptam belloque subactas
 Troiugenas gentis cum dicunt esse, videndumst 465

442 possint l 31: possunt OQ 450 horum] harum Bernays (in
 commentario) 453 saxis] saxist Lachmann ignist Bockemüller:
 ignis OQ aquai O corr. Q: aquae O 454 seclut Lachmann
 455 divitiae O corr.: diuiae OQ

ne forte haec per se cogant nos esse fateri,
 quando ea saecula hominum, quorum haec eventa fuerunt,
 irrevocabilis abstulerit iam praeterita aetas.
 namque aliud terris, aliud regionibus ipsis
 eventum dici poterit quodcumque erit actum. 470

denique materies si rerum nulla fuisset
 nec locus ac spatium, res in quo quaeque geruntur,
 numquam Tyndaridis forma conflatus amoris
 ignis, Alexandri Phrygio sub pectore gliscens,
 clara accendisset saevi certamina belli, 475
 nec clam durateus Troianis Pergama partu
 inflammasset equus nocturno Graiugenarum;
 perspicere ut possis res gestas funditus omnis
 non ita uti corpus per se constare neque esse,
 nec ratione cluere eadem qua constet inane, 480
 sed magis ut merito possis eventa vocare
 corporis atque loci, res in quo quaeque gerantur.

Corpora sunt porro partim primordia rerum,
 partim concilio quae constant principiorum.
 sed quae sunt rerum primordia, nulla potest vis 485
 stinguere; nam solido vincunt ea corpore demum.
 etsi difficile esse videtur credere quicquam
 in rebus solido reperiri corpore posse.
 transit enim fulmen caeli per saepta domorum,
 clamor ut ac voces; ferrum candescit in igni 490
 dissiliuntque fero ferventia saxa vapore;
 tum labefactatus rigor auri solvitur aestu;
 tum glacies aeris flamma devicta liquescit;
 permanat calor argentum penetralesque frigis,
 quando utrumque manu retinentes pocula rite 495

467 fuerunt *O corr.*: fuerit *OQ* 469 terris] per sest *Lachmann*:
 Teucris *Munro*: saeculis *Bernays*: alii alia 473 forma] formae
O corr. amoris *Bockemüller*: amore *OQ* 480 cluere *Q corr.*:
 fluere *O*: luere *Q* constet *O*: constat *QG* 484 quae *Q corr.*:
 qua *OQ* 489 fulmen *O corr.* *Q corr.*: flumen *OQ* 490 ac
Avancius: ad *OQ* 491 fero] fere *Wakefield* ferventia *Marullus*:
 feruenti *OQ* 492 tum editio *Brixensis*: cum *OQ*

sensimus infuso lympharum rore superne.
 usque adeo in rebus solidi nil esse videtur.
 sed quia vera tamen ratio naturaue rerum
 cogit, ades, paucis dum versibus expediamus
 esse ea quae solido atque aeterno corpore constant, 500
 semina quae rerum primordiaque esse docemus,
 unde omnis rerum nunc constet summa creata.

Principio quoniam duplex natura duarum
 dissimilis rerum longe constare repertast,
 corporis atque loci, res in quo quaeque geruntur, 505
 esse utramque sibi per se puramque necessest.
 nam quacumque vacat spatium, quod inane vocamus,
 corpus ea non est; qua porro cumque tenet se
 corpus, ea vacuum nequaquam constat inane.
 sunt igitur solida ac sine inani corpora prima. 510
 praeterea quoniam genitis in rebus inanest,
 materiem circum solidam constare necessest,
 nec res ulla potest vera ratione probari
 corpore inane suo celare atque intus habere,
 si non, quod cohibet, solidum constare relinquant. 515
 id porro nil esse potest nisi materiali
 concilium, quod inane queat rerum cohibere.
 materies igitur, solido quae corpore constat,
 esse aeterna potest, cum cetera dissoluantur.
 tum porro si nil esset quod inane vacaret, 520
 omne foret solidum; nisi contra corpora certa
 essent quae loca complerent quaecumque tenerent,
 omne quod est spatium vacuum constaret inane.
 alternis igitur nimirum corpus inani
 distinctumst, quoniam nec plenum naviter exstat 525
 nec porro vacuum. sunt ergo corpora certa
 quae spatium pleno possint distinguere inane.

500 constant *Q* corr. : constet *OQ*
 verum *Bernays* : circum *Purmann*
 post 524 lacunam indicavit *Brieger*
 distinctum *OQ*
 inani *OQ*

517 rerum] tectum *Marullus* :
 520 essed *O* corr. : est *OQ*
 525 distinctumst *Lambinus* :
 poena *OQ* inane *Marullus* :

haec neque dissolui plagis extrinsecus icta
 possunt nec porro penitus penetrata retexi
 nec ratione queunt alia temptata labare ; 530
 id quod iam supra tibi paulo ostendimus ante.
 nam neque collidi sine inani posse videtur
 quicquam nec frangi nec findi in bina secando
 nec capere umorem neque item manabile frigus
 nec penetralem ignem, quibus omnia conficiuntur. 535
 et quo quaeque magis cohibet res intus inane,
 tam magis his rebus penitus temptata labascit.
 ergo si solida ac sine inani corpora prima
 sunt ita uti docui, sint haec aeterna necessest.
 praeterea nisi matries aeterna fuisset, 540
 antehac ad nilum penitus res quaeque redissent
 de niloque renata forent quaecumque videmus.
 at quoniam supra docui nil posse creari
 de nilo neque quod genitum est ad nil revocari,
 esse immortalis primordia corpore debent, 545
 dissolui quo quaeque supremo tempore possint,
 matries ut suppeditet rebus reparandis.
 sunt igitur solida primordia simplicitate
 nec ratione quocumque alia servata per aevum
 ex infinito iam tempore res reparare. 550

Denique si nullam finem natura parasset
 frangendis rebus, iam corpora materiai
 usque redacta forent aevo frangente priore,
 ut nil ex illis a certo tempore posset
 conceptum <ad> summum aetatis pervadere finem. 555
 nam quidvis citius dissolvi posse videmus
 quam rursus refici ; quapropter longa diei

533 findi *l 31*: fundi *OQ* 542 que renata *Lambinus*: quaeranta
OQ 553 forent *Q corr.*: fouent *OQ* 555 ad summum . . . finem
scripsi: summum *OQ* (*cf. ii. 1116*) . . . finem *Q corr.* finis *O* fine *Q*:
 summum . . . florem *Lambinus*: summa . . . finis *Lachmann*: ad
 summum . . . finis *Brieger*: ad summam . . . finem *Keller*: alii alia

infinita aetas anteacti temporis omnis
 quod fregisset adhuc disturbans dissoluensque,
 numquam reliquo reparari tempore posset. 560
 at nunc nimirum frangendi reddita finis
 certa manet, quoniam refici rem quamque videmus
 et finita simul generatim tempora rebus
 stare, quibus possint aevi contingere florem.
 huc accedit uti, solidissima material 565
 corpora cum constant, possint tamen omnia reddi,
 mollia quae fiunt, aer aqua terra vapores,
 quo pacto fiant et qua vi quaeque gerantur,
 admixtum quoniam semel est in rebus inane.
 at contra si mollia sint primordia rerum, 570
 unde queant validi silices ferrumque creari
 non poterit ratio reddi; nam funditus omnis
 principio fundamenti natura carebit.
 sunt igitur solida pollentia simplicitate
 quorum condenso magis omnia conciliatu 575
 artari possunt validasque ostendere viris.
 porro si nullast frangendis reddita finis
 corporibus, tamen ex aeterno tempore quaeque
 nunc etiam superare necessest corpora rebus,
 quae nondum clueant ullo temptata periclo. 580
 at quoniam fragili natura praedita constant,
 discrepat aeternum tempus potuisse manere
 innumerabilibus plagis vexata per aevum.

Denique iam quoniam generatim reddita finis
 crescendi rebus constat vitamque tenendi, 585
 et quid quaeque queant per foedera naturai,
 quid porro nequeant, sancitum quandoquidem exstat,
 nec commutatur quicquam, quin omnia constant
 usque adeo, variae volucres ut in ordine cunctae

562 refici *O corr.* : refice *OQ* videmus *Q corr.* : demus *OQ*
 566 possint] possit *Munro* 578 quaeque] quaedam *Lambinus*
 585 crescendi *Q corr.* : crescendis *OQ* 588 comutatur *Q corr.* :
 commutatur *O* : comitatur *Q* constant] constant *Lachmann*

ostendant maculas generalis corpore inesse, 590
 immutabili' materiae quoque corpus habere
 debent nimirum. nam si primordia rerum
 commutari aliqua possent ratione revicta,
 incertum quoque iam constet quid possit oriri,
 quid nequeat, finita potestas denique cuique 595
 quanam sit ratione atque alte terminus haerens,
 nec totiens possent generatim saecula referre
 naturam mores victum motusque parentum.

Tum porro quoniam est extremum quodque cacumen

*

corporis illius quod nostri cernere sensus 600
 iam nequeunt, id nimirum sine partibus exstat
 et minima constat natura nec fuit umquam
 per se secretum neque posthac esse valebit,
 alterius quoniamst ipsum pars, primumque et una,
 inde aliae atque aliae similes ex ordine partes 605
 agmine condense naturam corporis explent,
 quae quoniam per se nequeunt constare, necessest
 haerere unde queant nulla ratione revelli.
 sunt igitur solida primordia simplicitate
 quae minimis stipata cohaerent partibus arte, 610
 non ex illarum conventu conciliata,
 sed magis aeterna pollentia simplicitate,
 unde neque avelli quicquam neque diminui iam
 concedit natura reservans semina rebus.
 praeterea nisi erit minimum, parvissima quaeque 615
 corpora constabunt ex partibus infinitis,
 quippe ubi dimidia partis pars semper habebit
 dimidiam partem nec res praefiniet ulla.
 ergo rerum inter summam minimamque quid escit?

591 inmutabili' *Lachmann*: inmutabiles *OQ* 599 * 600 lacunam
indicavit Munro 608 nulla *l 31*: ulla *OQ* ut nequeant ulla
Q corr. 611 illarum *Winckelmann*: illorum *OQ* fortasse recte (*sc.*
 cacuminum) 613 iam *O corr.*: tam *OQ* 619 escit *Q*: essit *O*

nil erit ut distet ; nam quamvis funditus omnis 620
 summa sit infinita, tamen, parvissima quae sunt,
 ex infinitis constabunt partibus aequae.

quod quoniam ratio reclamationem vera negatque
 credere posse animum, victus fateare necessest
 esse ea quae nullis iam praedita partibus exstent 625

et minima constant natura. quae quoniam sunt,
 illa quoque esse tibi solida atque aeterna fatendum.

denique si minimas in partis cuncta resolvi

cogere consuesset rerum natura creatrix,

iam nil ex illis eadem reparare valeret 630

propterea quia, quae nullis sunt partibus aucta,

non possunt ea quae debet genitalis habere

materies, varios conexus pondera plagas

concursus motus, per quae res quaeque geruntur.

Quapropter qui materiem rerum esse putarunt 635

ignem atque ex igni summam consistere solo,

magno opere a vera lapsi ratione videntur.

Heraclitus init quorum dux proelia primus,

clarus (ob) obscuram linguam magis inter inanis

quamde gravis inter Graios qui vera requirunt. 640

omnia enim stolidi magis admirantur amantque,

inversis quae sub verbis latitantia cernunt,

veraue constituunt quae belle tangere possunt

auris et lepido quae sunt fucata sonore.

Nam cur tam variae res possent esse requiro, 645

ex uno si sunt igni puroque creatae.

nil prodesset enim calidum denserier ignem

nec rarefieri, si partes ignis eandem

naturam quam totus habet super ignis haberent.

acrior ardor enim conductis partibus esset, 650

626 constant *Marullus* : constant *OQ* 634 quae *Marullus*
 quas *OQ* : quos *Wakefield* 639 ob add. *Q* corr. 645 possent]
 possint *Munro* 646 uno *Q* corr. : uro *OQ* 649 haberent *L* :
 haberet *O* : habere *QG*

languidior porro disiectis disque sipatis.
 amplius hoc fieri nil est quod posse rearis
 talibus in causis, nedum variantia rerum
 tanta queat densis rarisque ex ignibus esse.
 id quoque, si faciant admixtum rebus inane, 655
 denseri poterunt ignes rarique relinqui.
 sed quia multa sibi cernunt contraria t̄muset
 et fugitant in rebus inane relinquere purum,
 ardua dum metuunt, amittunt vera viai,
 nec rursum cernunt exempto rebus inani 660
 omnia denseri fierique ex omnibus unum
 corpus, nil ab se quod possit mittere raptim;
 aestifer ignis uti lumen iacit atque vaporem,
 ut videas non e stipatis partibus esse.
 quod si forte alia credunt ratione potesse 665
 ignis in coetu stingui mutareque corpus,
 scilicet ex nulla facere id si parte reparcent,
 occidet ad nilum nimirum funditus ardor
 omnis et (e) nilo fient quaecumque creantur.
 nam quodcumque suis mutatum finibus exit, 670
 continuo hoc mors est illius quod fuit ante.
 proinde aliquid superare necesse est incolume ollis,
 ne tibi res redeant ad nilum funditus omnes
 de niloque renata vigescat copia rerum.
 nunc igitur quoniam certissima corpora quaedam 675
 sunt quae conservant naturam semper eandem,
 quorum habitu aut aditu mutatoque ordine mutant
 naturam res et convertunt corpora sese,
 scire licet non esse haec ignea corpora rerum.

651 disque *O* corr. : que *OQ* 657 muse *O* : mu *QG* : mussant
 131 : adesse *Lachmann* : amussim *Bernays* : nasci *Munro* : rursum
Winckelmann : alii alia 660 inani *O* corr. : inane *OQ* 662
 raptim *Pontanus* : raptis *OQ* 665 alia *Lachmann* : mia *OQ* :
 ulla *Marullus* 666 coetu *Pontanus* : coetus *OQ* mutare
Marullus : musare *OQ* 668 funditus *Q* corr. : funditur *OQ*
 ardor *O* corr. *Q* corr. : amor *O* : arbor *Q* 669 e add. *Lachmann*
 674 vigescat *Heinsius* : uiuescat *OQ*

nil referret enim quaedam decedere, abire, 680
 atque alia attribui, mutarique ordine quaedam,
 si tamen ardoris naturam cuncta tenerent;
 ignis enim foret omnimodis quodcumque crearent.
 verum, ut opinor, itast: sunt quaedam corpora quorum
 concursus motus ordo positura figurae 685
 efficiunt ignis, mutatoque ordine mutant
 naturam neque sunt igni simulata neque ulli
 praeterea rei quae corpora mittere possit
 sensibus et nostros adiectu tangere tactus.

Dicere porro ignem res omnis esse neque ullam 690
 rem veram in numero rerum constare nisi ignem,
 quod facit hic idem, perdelirum esse videtur.
 nam contra sensus ab sensibus ipse repugnat
 et labefactat eos, unde omnia credita pendent,
 unde hic cognitus est ipsi quem nominat ignem. 695
 credit enim sensus ignem cognoscere vere,
 cetera non credit, quae nilo clara minus sunt.
 quod mihi cum vanum tum delirum esse videtur.
 quo referemus enim? quid nobis certius ipsis
 sensibus esse potest, qui vera ac falsa notemus? 700
 praeterea quare quisquam magis omnia tollat
 et velit ardoris naturam linquere solam,
 quam neget esse ignis, (aliam) tamen esse relinquat?
 aequa videtur enim dementia dicere utrumque.

Quapropter qui materiem rerum esse putarunt 705
 ignem atque ex igni summam consistere posse,
 et qui principium gignundis aera rebus *Anaximander*
 constituere, aut umorem quicumque putarunt *Thales*
 fingere res ipsum per se, terramve creare *Plato*
 omnia et in rerum naturas vertier omnis, *the old way* 710

680 decedere *Lambinus*: descendere *OQ*: discedere *O corr.* 681
 alia *Marullus*: alio *OQ* 683 crearent *Lambinus*: crearet *OQ*
 703 aliam *add.* *Q marg.*: om. *OQ*: summam *add.* *L*: quidvis *add.*
Lachmann 708 putarunt *Q corr.*: putant *O*: putantur *Q* 710
 vertier *Q corr.*: verti *OQ*

magno opere a vero longe derrasse videntur.
 adde etiam qui conduplicant primordia rerum
 aera iungentes igni terramque liquori,
 et qui quattuor ex rebus posse omnia rentur
 ex igni terra atque anima procreare et imbri.
 quorum Acragantinus cum primis Empedocles est,
 insula quem triquetris terrarum gessit in oris,
 quam fluitans circum magnis anfractibus aequor
 Ionium glaucis aspergit virus ab undis,
 angustoque fretu rapidum mare dividit undis
 Italiae terrarum oras a finibus eius.
 hic est vasta Charybdis et hic Aetnaea minantur
 murmura flammaram rursum se colligere iras,
 faucibus eruptos iterum vis ut vomat ignis
 ad caelumque ferat flammai fulgura rursum.
 quae cum magna modis multis miranda videtur
 gentibus humanis regio visendaque fertur,
 rebus opima bonis, multa munita virum vi,
 nil tamen hoc habuisse viro praeclarius in se
 nec sanctum magis et mirum carumque videtur.
 carmina quin etiam divini pectoris eius
 vociferantur et exponunt praeclara reperta,
 ut vix humana videatur stirpe creatus.

Hic tamen et supra quos diximus inferiores
 partibus egregie multis multoque minores,
 quamquam multa bene ac divinitus invenientes
 ex adyto tamquam cordis responsa dedere
 sanctius et multo certa ratione magis quam
 Pythia quae tripodi a Phoebi lauroque profatur,
 principiis tamen in rerum fecere ruinas
 et graviter magni magno cecidere ibi casu ;

711 longe *Vat.* 3275 : longi *OQ*
 undis] undans *Lachmann*
O corr. : Aeoliae *Heinsius*
 vomat *Lambinus* : omniat *OQ*

derrasse *QG* : errasse *O* 720
 721 Italiae *L* : haeliae *OQ* : haeoliae
 724 eruptos] eructans *Brieger*
 741 casu *O corr.* : causa *OQ*

primum quod motus exempto rebus inani
 constituunt et res mollis rarasque relinquunt,
 aera solem ignem terras animalia fruges,
 nec tamen admiscent in eorum corpus inane; 745
 deinde quod omnino finem non esse secandis
 corporibus faciunt neque pausam stare fragori
 nec prorsum in rebus minimum consistere quicquam;
 cum videamus id extremum cuiusque cacumen
 esse quod ad sensus nostros minimum esse videtur, 750
 conicere ut possis ex hoc, quae cernere non quis
 extremum quod habent, minimum consistere (in illis).
 huc accedit item, quoniam primordia rerum
 mollia constituunt, quae nos nativa videmus
 esse et mortali cum corpore funditus, utqui 755
 debeat ad nilum iam rerum summa reverti
 de niloque renata vigescere copia rerum;
 quorum utrumque quid a vero iam distet habebis.
 deinde inimica modis multis sunt atque veneno
 ipsa sibi inter se; quare aut congressa peribunt 760
 aut ita diffugient ut tempestate coacta
 fulmina diffugere atque imbris ventosque videmus.

Denique quattuor ex rebus si cuncta creantur
 atque in eas rursus res omnia dissoluuntur,
 qui magis illa queunt rerum primordia dici 765
 quam contra res illorum retroque putari?
 alternis gignuntur enim mutantque colorem
 et totam inter se naturam tempore ab omni.
 sin ita forte putas ignis terraeque coire 770
 corpus et aerias auras roremque liquoris,
 nil in concilio naturam ut mutet eorum,
 nulla tibi ex illis poterit res esse creata,

744 solem] rorem *Christ* 747 faciunt *l 31*: facient *OQ* 748
 quicquam *Mariullus*: qui *OQ* 752 in illis *add. Munro*: alii alia
 753 accedit *O corr.*: accidit *OQ* 758 habebis *O corr.*: habes
OQ 759 veneno *Wakefield*: uene *OQ*: uenena *O corr.*: venenum
Merrill 769 = 762 *secl. O corr.* 772 ut *Q corr.*: et *OQ*

non animans, non exanimo cum corpore, ut arbor.
quippe suam quidque in coetu variantis acervi
naturam ostendet mixtusque videbitur aer
cum terra simul atque ardor cum rore manere.

at primordia gignundis in rebus oportet
naturam clandestinam caecamque adhibere,
emineat nequid quod contra pugnet et obstat
quominus esse queat proprie quodcumque creatur.

Quin etiam repetunt a caelo atque ignibus eius
et primum faciunt ignem se vertere in auras
aeris, hinc imbrem gigni terramque creari
ex imbri retroque a terra cuncta reverti,
umorem primum, post aera, deinde calorem,
nec cessare haec inter se mutare, meare
a caelo ad terram, de terra ad sidera mundi.
quod facere haud ullo debent primordia pacto.
immutabile enim quiddam superare necessest,
ne res ad nilum redigantur funditus omnes.
nam quodcumque suis mutatum finibus exit,
continuo hoc mors est illius quod fuit ante.
quapropter quoniam quae paulo diximus ante
in commutatum veniunt, constare necessest
ex aliis ea, quae nequeant convertier usquam,
ne tibi res redeant ad nilum funditus omnes.
quin potius tali natura praedita quaedam
corpora constituas, ignem si forte crearint,
posse eadem demptis paucis paucisque tributis,
ordine mutato et motu, facere aeris auras,
sic alias aliis rebus mutarier omnis?

‘At manifesta palam res indicat’ inquis ‘in auras

774 animans *Pontanus*: animas *OQ* 775 quicque in coetu
Marullus: quisque in coetum *OQ* 776 ostendet *l. 31*: ostendit *OQ*
777 atque ardor *Lambinus*: et quodam *OQ*: atque vapor *coni.*
Merrill 780 emineat *Naugerius*: demineat *OQ* 781 creatur
O corr.: creatas *OQ* 784, 785 imbrem . . . imbri . . . a terra
Marullus: ignem . . . igni . . . in terram *OQ* 789 pacto *Mon.*:
facto *OQ*

aeris e terra res omnis crescere alique ;
et nisi tempestas indulget tempore fausto 805
imbribus, ut tabe nimborum arbusta vacillent,
solque sua pro parte fovet tribuitque calorem,
crescere non possint fruges arbusta animantes.
scilicet et nisi nos cibus aridus et tener umor
adiuvet, amisso iam corpore vita quoque omnis 810
omnibus e nervis atque ossibus exsoluatur.
adiutamur enim dubio procul atque alimur nos
certis ab rebus, certis aliae atque aliae res.
nimirum quia multa modis communia multis
multarum rerum in rebus primordia mixta 815
sunt, ideo variis variae res rebus aluntur.
atque eadem magni refert primordia saepe
cum quibus et quali positura contineantur
et quos inter se dent motus accipiantque ;
namque eadem caelum mare terras flumina solem 820
constituunt, eadem fruges arbusta animantis,
verum aliis alioque modo commixta moventur.
quin etiam passim nostris in versibus ipsis
multa elementa vides multis communia verbis,
cum tamen inter se versus ac verba necessest 825
confiteare et re et sonitu distare sonanti.
tantum elementa queunt permutato ordine solo.
at rerum quae sunt primordia, plura adhibere
possunt unde queant variae res quaeque creari.
Nunc et Anaxagorae scrutemur homoeomerian 830
quam Grai memorant nec nostra dicere lingua
concedit nobis patrii sermonis egestas,
sed tamen ipsam rem facilest exponere verbis.
principio, rerum quam dicit homoeomerian,
ossa videlicet e paucillis atque minutis 835

806 ut *Priscianus* : et *OQ* 814 multa modis *Lambinus* : multi-
modis *OQ* 815 mixta *O* : multa *Q* 824 verbis *Q* *corr.* : bellis
OQ 834 quam] quom *Lachmann* 835 e *O* *corr.* : de *OQ*

ossibus hic et de paucillis atque minutis
 visceribus viscus gigni sanguenque creari
 sanguinis inter se multis coeuntibu' guttis
 ex aurique putat micis consistere posse
 aurum et de terris terram concreescere parvis, 840
 ignibus ex ignis, umorem umoribus esse,
 cetera consimili fingit ratione putatque.
 nec tamen esse ulla idem <ex> parte in rebus inane
 concedit neque corporibus finem esse secandis.
 quare in utraque mihi pariter ratione videtur 845
 errare atque illi, supra quos diximus ante.
 adde quod imbecilla nimis primordia fingit;
 si primordia sunt, simili quae praedita constant
 natura atque ipsae res sunt aequaeque laborant
 et pereunt neque ab exitio res ulla refrenat. 850
 nam quid in oppressu valido durabit eorum,
 ut mortem effugiat, leti sub dentibus ipsis?
 ignis an umor an aura? quid horum? sanguen an ossa?
 nil, ut opinor, ubi ex aequo res funditus omnis
 tam mortalis erit quam quae manifesta videmus 855
 ex oculis nostris aliqua vi victa perire.
 at neque reccidere ad nilum res posse neque autem
 crescere de nilo testor res ante probatas.
 praeterea quoniam cibus auget corpus alitque,
 scire licet nobis venas et sanguen et ossa 860

*

sive cibos omnis commixto corpore dicent
 esse et habere in se nervorum corpora parva
 ossaque et omnino venas partisque cruoris,
 fiet uti cibus omnis, et aridus et liquor ipse,

837 sanguenque *Charisius*: sanguem *O*: sanguē *Q* 841 ex
 ignis] exiguis *Brieger*, *versum ante* 841 *intercidisse arbitratus* 843
 ex *add. Lachmann*: ulla parte idem *L marg.* 846 illi supra quos
l 32 marg.: illis uira quod *O* (quo *Q*) 852 effugiat *Q corr.*: efficiat
OQ 853 sanguen an ossa *l 32 marg.*: sanguis an os *OQ*
 860*861 *versum intercidisse indicavit Lambinus* 861 sive *l 31*: sine
OQ corpore *L*: core *OQ* 862 esse et *L*: esset *OQ*

ex alienigenis rebus constare putetur, 865
 ossibus et nervis sanieque et sanguine mixto.
 praeterea quaecumque e terra corpora crescunt
 si sunt in terris, terram constare necessest
 ex alienigenis, quae terris exoriuntur.
 transfer item, totidem verbis utare licebit. 870
 in lignis si flamma latet fumusque cinisque,
 ex alienigenis consistant ligna necessest.
 praeterea tellus quae corpora cumque alit, auget

*

ex alienigenis, quae lignis exoriuntur.

Linquitur hic quaedam latitandi copia tenvis, 875
 id quod Anaxagoras sibi sumit, ut omnibus omnis
 res putet immixtas rebus latitare, sed illud
 apparere unum cuius sint plurima mixta
 et magis in promptu primaque in fronte locata.
 quod tamen a vera longe ratione repulsumst. 880
 conveniebat enim fruges quoque saepe, minaci
 robore cum saxi franguntur, mittere signum
 sanguinis aut aliquid, nostro quae corpore aluntur,
 cum lapidi in lapidem terimus, manare cruorem.
 consimili ratione herbas quoque saepe decebat 885
 et latices dulcis guttas similique sapore
 mittere, lanigeras quali sunt ubere lactis,
 scilicet, et glebis terrarum saepe friatis
 herbarum genera et fruges frondisque videri
 dispertita inter terram latitare minute, 890
 postremo in lignis cinerem fumumque videri,
 cum prae fracta forent, ignisque latere minutos.
 quorum nil fieri quoniam manifesta docet res,

866 sanieque] venisque *Avanci* mixto *Lachmann*: mixta
OQ 873*874 *lacunam indicavit Munro*: 873 *secl. Brieger* 874
 exoriuntur *l 31*: oriuntur *OQ*: his oriuntur *Munro*: alii alia 882
 cum saxi *Marullus*: cum in saxi *OQ* 884 in] *om. Lachmann*
 terimus *L*: tenemus *OQ* 885 herbas *Marullus*: herbis *OQ*
 886 latices] laticis *l 31*: salices *Bruno* 887 quali *Q*: qualis *O*
 890, 891 *om. Q* 890 inter *Lachmann*: in *O* 893 res *add. Q corr.*

scire licet non esse in rebus res ita mixtas,
verum semina multimodis immixta latere
multarum rerum in rebus communia debent.

895

‘At saepe in magnis fit montibus’ inquis ‘ut altis
arboribus vicina cacumina summa terantur
inter se, validis facere id cogentibus austris,
donec flammai fulserunt flore coorto.’

900

scilicet et non est lignis tamen insitus ignis,
verum semina sunt ardoris multa, terendo
quae cum confluxere, creant incendia silvis.

quod si facta foret silvis abscondita flamma,
non possent ullum tempus celarier ignes,
conficerent vulgo silvas, arbusta cremarent.

905

iamne vides igitur, paulo quod diximus ante,
permagni referre eadem primordia saepe
cum quibus et quali positura contineantur
et quos inter se dent motus accipiantque,
atque eadem paulo inter se mutata creare
ignis et lignum? quo pacto verba quoque ipsa
inter se paulo mutatis sunt elementis,
cum ligna atque ignis distincta voce notemus.

910

denique iam quaecumque in rebus cernis apertis
si fieri non posse putas, quin materiali
corpora consimili natura praeditaingas,
hac ratione tibi pereunt primordia rerum:
fiet uti risu tremulo concussa cachinnent
et lacrimis salsis umectent ora genasque.

920

Nunc age quod superest cognosce et clarius audi.
nec me animi fallit quam sint obscura; sed acri
percussit thyrsos laudis spes magna meum cor
et simul incussit suavem mi in pectus amorem
musarum, quo nunc instinctus mente vigenti

925

906 conficerent *Q* corr.: conficeret *QQ*
Naugerius (cf. 818): contingantur *QQ*
918 hac *Q* corr.: haec *QQ*

909 contineantur
912 et *Q* corr.: e *QQ*
919 tremulo *L*: taemulo *QQ*

avia Pieridum peragro loca nullius ante
 trita solo. iuvat integros accedere fontis
 atque haurire, iuvatque novos decerpere flores
 insignemque meo capiti petere inde coronam
 unde prius nulli velarint tempora musae; 930
 primum quod magnis doceo de rebus et artis
 religionum animum nodis exsolvere pergo,
 deinde quod obscura de re tam lucida pango
 carmina, musaeo contingens cuncta lepore.
 id quoque enim non ab nulla ratione videtur; 935
 sed veluti pueris absinthia taetra medentes
 cum dare conantur, prius oras pocula circum
 contingunt mellis dulci flavoque liquore,
 ut puerorum aetas improvida ludificetur
 labrorum tenuis, interea perpotet amarum 940
 absinthii laticem deceptaque non capiatur,
 sed potius tali pacto recreata valescat,
 sic ego nunc, quoniam haec ratio plerumque videtur
 tristior esse quibus non est tractata, retroque
 vulgus abhorret ab hac, volui tibi suaviloquenti 945
 carmine Pierio rationem exponere nostram
 et quasi musaeo dulci contingere melle,
 si tibi forte animum tali ratione tenere
 versibus in nostris possem, dum perspicis omnem
 naturam rerum qua constet compta figura. 950

Sed quoniam docui solidissima materiai
 corpora perpetuo volitare invicta per aevum,
 nunc age, summai quaedam sit finis eorum
 necne sit, evolvamus; item quod inane repertumst
 seu locus ac spatium, res in quo quaeque gerantur, 955
 pervideamus utrum finitum funditus omne
 constet an immensum pateat vasteque profundum.

Omne quod est igitur nulla regione viarum

931 magnis *Q* corr.: magis *QQ*
 943 videtur *Q* corr.: uidet *QQ*

942 pacto *Heinsius*: facto *QQ*
 954 necne *Pontanus*: nec *QQ*

finitumst; namque extremum debebat habere.
 extremum porro nullius posse videtur 960
 esse, nisi ultra sit quod finiat; ut videatur
 quo non longius haec sensus natura sequatur.
 nunc extra summam quoniam nil esse fatendum,
 non habet extremum, caret ergo fine modoque.
 nec refert quibus adsistas regionibus eius; 965
 usque adeo, quem quisque locum possedit, in omnis
 tantundem partis infinitum omne relinquit.
 praeterea si iam finitum constituatur
 omne quod est spatium, siquis procurrat ad oras
 ultimus extremas iaciatque volatile telum, 970
 id validis utrum contortum viribus ire
 quo fuerit missum mavis longeque volare,
 an prohibere aliquid censes obstareque posse?
 alterutrum fatearis enim sumasque necessest.
 quorum utrumque tibi effugium praecludit et omne 975
 cogit ut exempta concedas fine patere.
 nam sive est aliquid quod probeat efficiatque
 quominu' quo missum est veniat finique locet se,
 sive foras fertur, non est a fine profectum.
 hoc pacto sequar atque, oras ubicumque locaris 980
 extremas, quaeram quid telo denique fiat.
 fiet uti nusquam possit consistere finis
 effugiumque fugae prolatet copia semper.
 postremo ante oculos res rem finire videtur; [998]
 aer dissaeptis collis atque aera montes, 985 [999]
 terra mare et contra mare terras terminat omnis; [1000]
 omne quidem vero nil est quod finiat extra. [1001]
 Praeterea spatium summai totius omne [984]
 undique si inclusum certis consisteret oris [985]
 finitumque foret, iam copia materiai 990 [986]

971 id validis *Lambinus*: invalidis *OO* 977 efficiat] officiat
Gryphius Lugdunensis 981 fiat *L*: fier *OO* 988 spatium *O*
corr.: scatium *O*: catium *Q* 989 inclusum *L*: inclusus *OO*
 [998-1001] hos versus huc transtulit *Munro*

undique ponderibus solidis confluet ad imum
 nec res ulla geri sub caeli tegmine posset
 nec foret omnino caelum neque lumina solis,
 quippe ubi materies omnis cumulata iaceret
 ex infinito iam tempore subsidendo. 995 [991]

at nunc nimirum requies data principiorum
 corporibus nullast, quia nil est funditus imum
 quo quasi confluere et sedis ubi ponere possint.
 semper in assiduo motu res quaeque geruntur
 partibus (e) cunctis infernaque suppeditantur 1000 [996]
 ex infinito cita corpora materiai. [997]

est igitur natura loci spatiumque profundi,
 quod neque clara suo percurrere fulmina cursu
 perpetuo possint aevi labentia tractu
 nec prorsum facere ut restet minus ire meando; 1005
 usque adeo passim patet ingens copia rebus
 finibus exemptis in cunctas undique partis.

Ipsa modum porro sibi rerum summa parare
 ne possit, natura tenet, quae corpus inani
 et quod inane autem est finiri corpore cogit, 1010
 ut sic alternis infinita omnia reddat,
 aut etiam alterutrum, nisi terminet alterum eorum,
 simplice natura pateat tamen immoderatum.

*

nec mare nec tellus neque caeli lucida templa
 nec mortale genus nec divum corpora sancta 1015
 exiguum possent horai sistere tempus.
 nam dispulsa suo de coetu materiai
 copia ferretur magnum per inane soluta,
 sive adeo potius numquam concreta creasset
 ullam rem, quoniam cogi disiecta nequisset. 1020
 nam certe neque consilio primordia rerum
 ordine se suo quaeque sagaci mente locarunt

991 confluet l 31: confluit OQ 997 nullast Politianus:
 nullas OQ 998 possint ed. Aldina: possit OQ 1000 e add.
 Mon. infernaque] aeternaque Marullus: inferneque Postgate
 1008 ipsa Q corr.: ipso OQ 1013 * 1014 lacunam indicavit
 Marullus 1017 coetu Q corr.: coetum OQ

T. LVCRETI CARI

nec quos quaeque (darent motus pepigere profecto)
 sed quia multa modis multis mutata per omne
 ex infinito vexantur percita plagis, 1025
 omne genus motus et coetus experiundo .
 tandem deveniunt in talis disposituras,
 qualibus haec rerum consistit summa creata,
 et multos etiam magnos servata per annos
 ut semel in motus coniectast convenientis, 1030
 efficit ut largis avidum mare fluminis undis
 integrent amnes et solis terra vapore
 fota novet fetus summissaque gens animantum
 floreat et vivant labentes aetheris ignes ;
 quod nullo facerent pacto, nisi materiai 1035
 ex infinito suboriri copia posset,
 unde amissa solent reparare in tempore quaeque.
 nam veluti privata cibo natura animantum
 diffluit amittens corpus, sic omnia debent
 dissolui simul ac defecit suppeditare 1040
 materies aliqua ratione aversa viai.
 nec plagae possunt extrinsecus undique summam
 conservare omnem quaecumque est conciliata.
 cudere enim crebro possunt partemque morari,
 dum veniant aliae ac suppleri summa queatur. 1045
 interdum resilire tamen coguntur et una
 principiis rerum spatium tempusque fugai
 largiri, ut possint a coetu libera ferri.
 quare etiam atque etiam suboriri multa necessest,
 et tamen ut plagae quoque possint suppetere ipsae, 1050
 infinita opus est vis undique materiai.

Illud in his rebus longe fuge credere, Memmi,
 in medium summae quod dicunt omnia niti,

1023 darent motus pepigere profecto *Marullus* (= v. 421): sagaci
 mente locarunt (*ex* 1022) *OQ* 1028 rerum *Faber*: rebus *OQ*
 1033 summissa *Pontanus*: summa *OQ* 1034 floreat *O corr.*:
 floreat *OQ* 1037 amissa *O corr.*: amissa *O*: admissa *O*
 1040 dissolui *Q corr.*: dissoluit *OQ* 1041 viai *Q corr.*: uia *OQ*:
 viaque *Lachmann* 1047 principiis *Marullus*: principium *OQ*

atque ideo mundi naturam stare sine ullis
 ictibus externis neque quoquam posse resolvi 1055
 summa atque ima, quod in medium sint omnia nixa
 (ipsum si quicquam posse in se sistere credis):
 et quae pondera sunt sub terris omnia sursum
 nitier in terraque retro requiescere posta,
 ut per aquas quae nunc rerum simulacra videmus. 1060
 et simili ratione animalia suppa vagari
 contendunt neque posse e terris in loca caeli
 reccidere inferiora magis quam corpora nostra
 sponte sua possint in caeli templa volare:
 illi cum videant solem, nos sidera noctis 1065
 cernere, et alternis nobiscum tempora caeli
 dividere et noctes parilis agitare diebus.
 sed vanus stolidis haec
 amplexi quod habent perv
 nam medium nil esse potest 1070
 infinita. neque omnino, si iam
 possit ibi quicquam consistere
 quam quavis alia longe ratione
 omnis enim locus ac spatium, quod in
 per medium, per non medium, concedere 1075
 aequae ponderibus, motus quacumque feruntur.
 nec quisquam locus est, quo corpora cum venere,
 ponderis amissa vi possint stare (in) inani;
 nec quod inane autem est ulli subsistere debet,

1058 sunt] sint *Brieger* 1068-1075 *hos versus quos omittunt*
QG, mutilos habet O, sic restituit Munro:

sed vanus stolidis haec error falsa probavit,
 amplexi quod habent perversa rem ratione;
 nam medium nil esse potest, quando omnia constant
 infinita. neque omnino, si iam medium sit,
 possit ibi quicquam consistere eam magis ob rem,
 quam quavis alia longe ratione repelli:
 omnis enim locus ac spatium, quod inane vocamus,
 per medium, per non medium concedere debet

1071 neque *Marullus*: denique *O* 1076 aequae *editio Juntina*:
 aequis *OQ* 1077 venere *ed. Aldina*: uener *O*: uenir *Q*: venerunt
Lachmann 1078 in *add. Marullus*

quin, sua quod natura petit, concedere pergat. 1080
 haud igitur possunt tali ratione teneri
 res in concilium medii cuppedine victae.

Praeterea quoniam non omnia corpora fingunt
 in medium niti, sed terrarum atque liquoris,
 umorem ponti magnasque e montibus undas, 1085 [1086]
 et quasi terreno quae corpore contineantur, [1085]
 at contra tenuis exponunt aeris auras
 et calidos simul a medio differrier ignis,
 atque ideo totum circum tremere aethera signis
 et solis flammam per caeli caerula pasci, 1090
 quod calor a medio fugiens se ibi colligat omnis,
 nec prorsum arboribus summos frondescere ramos
 posse, nisi a terris paulatim cuique cibatum

*

ne volucris ritu flammarum moenia mundi
 diffugiant subito magnum per inane soluta
 et ne cetera consimili ratione sequantur
 neve ruant caeli tonitralia templa superne 1105
 terraque se pedibus raptim subducatur et omnis
 inter permixtas rerum caelique ruinas
 corpora solventis abeat per inane profundum,
 temporis ut puncto nil exstet reliquiarum
 desertum praeter spatium et primordia caeca. 1110
 nam quacumque prius de parti corpora desse
 constitues, haec rebus erit pars ianua leti,
 hac se turba foras dabit omnis material.

Haec sic pernosces parva perductus opella;
 namque alid ex alio clarescet nec tibi caeca 1115
 nox iter eripiet quin ultima naturai
 pervideas: ita res accendent lumina rebus.

1082 concilium] concilio Marullus victae] vinctae Bentley:
 vectae Lachmann post 1084 lacunam indicavit Ussing 1086,
 1085 inverso ordine Marullus 1091 se ibi Wakefield: sibi OQ
 1093*1102 octo versuum spatium vacuum relinquit O 1105 toni-
 tralia Lambinus: tonetralia OQ: penetralia L 1106 omnis]
 omnia Lachmann: omne Bernays 1108 abeat Marullus: aueant
 OQ: abeant Lachmann 1114 sic] sei L prob. Munro, lacuna post
 hunc versum indicata: scio Lachmann: sis Bernays

T. LVCRETI CARI
DE RERVVM NATVRA

LIBER SECVNDVS

SVAVE, mari magno turbantibus aequora ventis,
e terra magnum alterius spectare laborem ;
non quia vexari quemquamst iucunda voluptas,
sed quibus ipse malis careas quia cernere suave est.
suave etiam belli certamina magna tueri 5 [6]
per campos instructa tua sine parte pericli. [5]
sed nil dulcius est, bene quam munita tenere
edita doctrina sapientum templa serena,
despicere unde queas alios passimque videre
errare atque viam palantis quaerere vitae, 10
certare ingenio, contendere nobilitate,
noctes atque dies niti praestante labore
ad summas emergere opes rerumque potiri. Σ
o miseras hominum mentis, o pectora caeca !
qualibus in tenebris vitae quantisque periclis 15
degitur hoc aevi quodcumquest ! nonne videre
nil aliud sibi naturam latrare, nisi utqui
corpore seiunctus dolor absit, mente fruatur
iucundo sensu cura semota metuque ?
ergo corpoream ad naturam pauca videmus 20
esse opus omnino, quae demant cumque dolorem,

5, 6 hunc versuum ordinem restituit Avancius 18 mente] menti'
Lachmann : mensque Marullus • 19 semota] semotu' Lambinus
21-3 locum sic interpunxit Lachmann : alii aliter

delicias quoque uti multas substernere possint.
 gratius interdum neque natura ipsa requirit,
 si non aurea sunt iuvenum simulacra per aedes
 lampadas igniferas manibus retinentia dextris, 25
 lumina nocturnis epulis ut suppeditentur,
 nec domus argento fulget auroque renidet ✓
 nec citharae reboant laqueata aurataque templa,
 cum tamen inter se prostrati in gramine molli
 propter aquae rivum sub ramis arboris altae 30
 non magnis opibus iucunde corpora curant,
 praesertim cum tempestas arridet et anni
 tempora conspergunt viridantis floribus herbas.
 nec calidae citius decedunt corpore febres,
 textilibus si in picturis ostroque rubenti 35
 iacteris, quam si in plebeia veste cubandum est.
 quapropter quoniam nil nostro in corpore gazae
 proficiunt neque nobilitas nec gloria regni,
 quod superest, animo quoque nil prodesse putandum;
 si non forte tuas legiones per loca campi 40
 fervere cum videas belli simulacra cientis,
 subsidiis magnis tepicuri† constabilitas,
 ornatas armis titastuast† pariterque animatas,
 fervere cum videas classem lateque vagari, 43^a
 his tibi tum rebus timefactae religiones
 effugiunt animo pavidae; mortisque timores 45
 tum vacuum pectus linquunt curaque solutum.
 quod si ridicula haec ludibriaque esse videmus,
 re veraque metus hominum curaeque sequaces

27 fulget] fulgenti *Lachmann* 28 aurataque] ornataque *Lach-*
mann: arquataque *Bernays* templa] tecta *citat Macrobin* 41
 fervere l 31: frueri O: eruere Q 42, 43 ut corruptos incialibus
 literis scriptos habet O: om. Q, trium versuum spatium post 41
 relicto 42 epicuri O: que elephantis *Lachmann*: hastatis *Bernays*:
 et eum vi *Munro*: equitatus *Bouterwek* 43 itastatuas O: itastuas
 O corr.: itasiuas G: validas *Lachmann*: pariter *Bernays*: ornatasque
 . . . statuas *Munro*: porro *Merrill* pariter] tariter O 43^a a
Nonio citatum hic posuit Lambinus: post 46 *Munro* 45 pavidae O:
 pauide Q 46 pectus *Lambinus*: tempus OQ

nec metuunt sonitus armorum nec fera tela
 audacterque inter reges rerumque potentis 50
 versantur neque fulgorem reverentur ab auro
 nec clarum vestis splendorem purpureai,
 quid dubitas quin, omni' sit haec rationi' potestas?
 omnis cum in tenebris praesertim vita laboret.
 nam veluti pueri trepidant atque omnia caecis 55
 in tenebris metuunt, sic nos in luce timemus
 interdum, nilo quae sunt metuenda magis quam
 quae pueri in tenebris pavitant finguntque futura.
 hunc igitur terrorem animi tenebrasque necessest
 non radii solis neque lucida tela diei 60
 discutiant, sed naturae species ratioque.

Nunc age, quo motu genitalia materialia
 corpora res varias gignant genitasque resolvant
 et qua vi facere id cogantur quaeque sit ollis
 reddita mobilitas magnum per inane meandi, 65
 expediam: tu te dictis praebere memento.
 nam certe non inter se stipata cohaeret
 materies, quoniam minui rem quamque videmus
 et quasi longinquo fluere omnia cernimus aevo
 ex oculisque vetustatem subducere nostris, 70
 cum tamen incolumis videatur summa manere
 propterea quia, quae decedunt corpora cuique,
 unde abeunt minuunt, quo venere augmine donant,
 illa senescere at haec contra florescere cogunt,
 nec remorantur ibi. sic rerum summa novatur 75
 semper, et inter se mortales mutua vivunt.
 augescunt aliae gentes, aliae minuuntur,
 inque brevi spatio mutantur saecula animantium
 et quasi cursores vitae lampada tradunt.

Si cessare putas rerum primordia posse 80
 cessandoque novos rerum progignere motus,

52 purpureai *L*: purpura *O*: purpurai *Q* 54 laboret *Q* *corr.*:
 roboret *O*: raboret *Q* 68 quamque videmus *Q* *corr.*: quam-
 quidemus *OO* 73 augmine *Q* *corr.*: agmine *OO*

avius a vera longe ratione vagaris.
 nam quoniam per inane vagantur, cuncta necessest
 aut gravitate sua ferri primordia rerum
 aut ictu forte alterius. nam <cum> cita saepe 85
 obvia confluxere, fit ut diversa repente
 dissiliant; neque enim mirum, durissima quae sint
 ponderibus solidis neque quicquam a tergo ibus obstet.
 et quo iactari magis omnia materiai
 corpora pervideas, reminiscere totius inum 90
 nil esse in summa, neque habere ubi corpora prima
 consistant, quoniam spatium sine fine modoquest
 immensumque patere in cunctas undique partis
 pluribus ostendi et certa ratione probatumst.
 quod quoniam constat, nimirum nulla quies est 95
 reddita corporibus primis per inane profundum,
 sed magis assiduo varioque exercita motu
 partim intervallis magnis confulta resultant,
 pars etiam brevibus spatiis vexantur ab ictu.
 et quaecumque magis condenso conciliatu 100
 exiguis intervallis convecta resultant,
 indupedita suis perplexis ipsa figuris,
 haec validas saxi radices et fera ferri
 corpora constituunt et cetera <de> genere horum.
 cetera, quae porro magnum per inane vagantur, 105
 paucula dissiliunt longe longeque recursant
 in magnis intervallis; haec aera rarum
 sufficiunt nobis et splendida lumina solis.
 multaque praeterea magnum per inane vagantur,
 conciliis rerum quae sunt reiecta nec usquam 110
 consociare etiam motus potuere recepta.

85 quom *add. Wakefield* 86 confluxere *Lambinus*: con-
 flexere *OQ* 88 tergo ibus *Vossius*: tergibus *OQ* 95 nulla *L*:
 multa *OQ* 98 confulta] consulta *ed. Veronensis*: conflictata *Vatt.*:
 contusa *Lambinus*: compulsata *Heinsius* 99 brevibus *L*: brevis *OQ*
 104 de *add. l 31* 104-6 alii aliter interpunxerunt 105 cetera
 (ex 106) *Merrill*: paucula *OQ*: parvola *Hoerschelmann* post 105 la-
 cunam indicavit *Brieger* 106 paucula (ex 105) *Merrill*: cetera *OQ*:
 corpora *Hoerschelmann*

cuius, uti memoro, rei simulacrum et imago
 ante oculos semper nobis versatur et instat.
 contemplator enim, cum solis lumina cumque
 inserti fundunt radii per opaca domorum: 115
 multa minuta modis multis per inane videbis
 corpora misceri radiorum lumine in ipso
 et velut aeterno certamine proelia pugnās
 edere turmatim certantia nec dare pausam,
 conciliis et discidiis exercita crebris; 120
 conicere ut possis ex hoc, primordia rerum
 quale sit in magno iactari semper inani.
 dumtaxat rerum magnarum parva potest res
 exemplare dare et vestigia notitiae.
 hoc etiam magis haec animum te advertere par est 125
 corpora quae in solis radiis turbare videntur,
 quod tales turbae motus quoque materiai
 significant clandestinos caecosque subesse.
 multa videbis enim plagis ibi percita caecis
 commutare viam retroque repulsa reverti 130
 nunc huc nunc illuc in cunctas undique partis.
 scilicet hic a principiis est omnibus error.
 prima moventur enim per se primordia rerum;
 inde ea quae parvo sunt corpora conciliatu
 et quasi proxima sunt ad viris principiorum, 135
 ictibus illorum caecis impulsa cientur,
 ipsaque proporro paulo maiora laccessunt.
 sic a principiis ascendit motus et exit
 paulatim nostros ad sensus, ut moveantur
 illa quoque, in solis quae lumine cernere quimus 140
 nec quibus id faciant plagis apparet aperte.

Nunc quae mobilitas sit reddita materiai
 corporibus, paucis licet hinc cognoscere, Memmi.

112 memoro *Vat. 1706*: memoror *OQ* simulacrum *Ital.*: simu-
 lacra *OQ* 114 cumque] seque *Merrill* 134 conciliatu *L*: con-
 ciliata *OQ* 137 proporro *Turnebus*: porro *OQ*

primum aurora novo cum spargit lumine terras
 et variae volucres nemora avia pervolitantes 145
 aera per tenerum liquidis loca vocibus opplent,
 quam subito soleat sol ortus tempore tali
 convestire sua perfundens omnia luce,
 omnibus in promptu manifestumque esse videmus.
 at vapor is quem sol mittit lumenque serenum 150
 non per inane meat vacuum; quo tardius ire
 cogitur, aerias quasi dum diverberat undas.
 nec singillatim corpuscula quaeque vaporis
 sed complexa meant inter se conque globata;
 quapropter simul inter se retrahuntur et extra 155
 officiuntur, uti cogantur tardius ire.
 at quae sunt solida primordia simplicitate,
 cum per inane meant vacuum nec res remoratur
 ulla foris atque ipsa suis e partibus una
 unum in quem coepere locum conixa feruntur, 160
 debent nimirum praecellere mobilitate
 et multo citius ferri quam lumina solis
 multiplexque loci spatium transcurrere eodem
 tempore quo solis pervulgant fulgura caelum.

*

nec persectari primordia singula quaeque, 165
 ut videant qua quidque geratur cum ratione.

At quidam contra haec, ignari materiai,
 naturam non posse deum sine numine credunt
 tanto opere humanis rationibus admoderate
 tempora mutare annorum frugesque creare, 170
 et iam cetera, mortalis quae suadet adire
 ipsaque deducit dux vitae dia voluptas

152 diuerberat Q: diuernerat O: diverberet *Lambinus* 155
 retrahuntur *Priscianus*: trahuntur OQ 158 remoratur *Pontanus*:
 remorauit O: semoraū Q 159 una *Munro*: unum OQ 160
 connixa *ed. Veronensis*: conixa OQ 164* 165 lacunam suspicatus
est Pontanus 166 videant L: deant OQ post 167 versum
 omissum suspicatus est *Brieger* 168 credunt *Pontanus*: reddi OQ:
 rentur *Marullus*: reddunt *Reid*

et res per Veneris blanditur saecula propagent,
 ne genus occidat humanum. quorum omnia causa
 constituisse deos cum fingunt, omnibu' rebus 175
 magno opere a vera lapsi ratione videntur.
 nam quamvis rerum ignorem primordia quae sint,
 hoc tamen ex ipsis caeli rationibus ausim
 confirmare aliisque ex rebus reddere multis,
 nequaquam nobis divinitus esse creatam 180
 naturam mundi: tanta stat praedita culpa.
 quae tibi posterius, Memmi, faciemus aperta.
 nunc id quod superest de motibus expediemus.

Nunc locus est, ut opinor, in his illud quoque rebus
 confirmare tibi, nullam rem posse sua vi 185
 corpoream sursum ferri sursumque meare;
 ne tibi dent in eo flammaram corpora fraudem.
 sursus enim versus gignuntur et augmina sumunt
 et sursum nitidae fruges arbustaque crescunt,
 pondera, quantum in se est, cum deorsum cuncta ferantur. 190
 nec cum subsiliunt ignes ad tecta domorum
 et celeri flamma degustant tigna trabesque,
 sponte sua facere id sine vi subiecta putandum est.
 quod genus e nostro cum missus corpore sanguis
 emicat exsultans alte spargitque cruorem. 195
 nonne vides etiam quanta vi tigna trabesque
 respuat umor aquae? nam quo magis ursimus alte
 derecta et magna vi multi pressimus aegre,
 tam cupide sursum revomit magis atque remittit,
 plus ut parte foras emergant exsiliantque. 200
 nec tamen haec, quantum est in se, dubitamus, opinor,
 quin vacuum per inane deorsum cuncta ferantur.
 sic igitur debent flammae quoque posse per auras

181 tanta stat (cf. v. 199) *Lachmann*: quamquam *OQ*: alii alia
 193 subiecta (sc. flammaram corpora 187) *OQ*: subigente *Lambinus*:
 subeunte *Bernays* 198 derecta *Q*: directa *O*: deiecta *Lachmann*
 199 revomit *Pontanus*: remouet *OQ* 203 debent flammae quoque
editio Aldina prima: quoque debent flammae *OQ*

aeris expressae sursum succedere, quamquam
 pondera, quantum in sest, deorsum deducere pugnent. 205
 nocturnasque faces caeli sublime volantis
 nonne vides longos flammaram ducere tractus
 in quascumque dedit partis natura meatum?
 non cadere in terram stellas et sidera cernis?
 sol etiam (caeli) de vertice dissipat omnis 210
 ardorem in partis et lumine conserit arva;
 in terras igitur quoque solis vergitur ardor.
 transversosque volare per imbris fulmina cernis;
 nunc hinc nunc illinc abrupti nubibus ignes
 concursant; cadit in terras vis flammea vulgo. 215

Illud in his quoque te rebus cognoscere avemus,
 corpora cum deorsum rectum per inane feruntur
 ponderibus propriis, incerto tempore ferme
 incertisque locis spatio depellere paulum,
 tantum quod momen mutatum dicere possis. 220
 quod nisi declinare solerent, omnia deorsum,
 imbris uti guttae, caderent per inane profundum,
 nec foret offensus natus nec plaga creata
 principiis: ita nil umquam natura creasset.

Quod si forte aliquis credit graviora potesse 225
 corpora, quo citius rectum per inane feruntur,
 incidere ex supero levioribus atque ita plagas
 gignere quae possint genitalis reddere motus,
 avius a vera longe ratione recedit.
 nam per aquas quaecumque cadunt atque aera rarum, 230
 haec pro ponderibus casus celerare necessest
 propterea quia corpus aquae naturaque tenvis
 aeris haud possunt aequae rem quamque morari,

205 in sest . . . deducere *Marullus*: inest . . . ducere *OQ* 209
 cadere *O corr.*: caderem *OQ* terram *L*: terra *OQ* 210 caeli
add. Bernays 218 se *post* propriis *add. Munro* ferme *l 31*:
 firme *OQ* 219 locis spatio] loci spatiis *Lachmann* depellere]
 decedere *Marullus*: se pellere *Avancius*: decellere *Lachmann*
 226 feruntur] ferantur *Victorius* 227 plagas *Q corr.*: plag *OQ*
 233 aeris haud *L*: haeraut *O*: haeraud *QG*: aer haud *O corr. Q corr.*

sed citius cedunt gravioribus exsuperata.
 at contra nulli de nulla parte neque ullo 235
 tempore inane potest vacuum subsistere rei,
 quin, sua quod natura petit, concedere pergat;
 omnia quapropter debent per inane quietum
 aequae ponderibus non aequis concita ferri.
 haud igitur poterunt levioribus incidere umquam 240
 ex supero graviora neque ictus gignere per se
 qui varient motus per quos natura gerat res.
 quare etiam atque etiam paulum inclinare necessest
 corpora; nec plus quam minimum, ne fingere motus
 obliquos videamur et id res vera refutet. 245
 namque hoc in promptu manifestumque esse videmus,
 pondera, quantum in sest, non posse obliqua meare,
 ex supero cum praecipitant, quod cernere possis.
 sed nil omnino <recta> regione viai
 declinare quis est qui †possit cernere sese†? 250

Denique si semper motus conectitur omnis
 et vetere exoritur <semper> novus ordine certo
 nec declinando faciunt primordia motus
 principium quoddam quod fati foedera rumpat,
 ex infinito ne causam causa sequatur, 255
 libera per terras unde haec animantibus exstat,
 unde est haec, inquam, fati avulsa voluntas
 per quam progredimur quo ducit quemque voluptas,
 declinamus item motus nec tempore certo
 nec regione loci certa, sed ubi ipsa tulit mens? 260
 nam dubio procul his rebus sua cuique voluntas
 principium dat et hinc motus per membra rigantur.
 nonne vides etiam patefactis tempore puncto

234 exsuperata *Marullus*: exsuperate *OQ*: exsuperatae *L* 240
 poterunt *l 31*: potuerunt *OQ* 247 sest *l 31*: est *OQ* 249 recta
add. L 250 possit *OQ*: praestet *Lachmann*: poscat *Winckel-*
mann sese *OQ*: sensus *Bernays*: sensu *Giussani* 251 motus
l 31: motu *OQ* 252 semper *add. L* 257, 258 voluntas...
 voluptas *Lambinus*: uoluptas... uoluntas *OQ*: potestas... volun-
 tas *Lachmann*

carceribus non posse tamen prorumpere equorum
 vim cupidam tam de subito quam mens avet ipsa? 265
 omnis enim totum per corpus material
 copia conciri debet, concita per artus
 omnis ut studium mentis conixa sequatur;
 ut videas initum motus a corde creari
 ex animique voluntate id procedere primum, 270
 inde dari porro per totum corpus et artus.
 nec similest ut cum impulsī procedimus ictu
 viribus alterius magnis magnoque coactu.
 nam tum materiem totius corporis omnem
 perspicuumst nobis invitīs ire rapique, 275
 donec eam refrenavit per membra voluntas.
 iamne vides igitur, quamquam vis externa multos
 pellat et invitos cogat procedere saepe
 praecipitesque rapi, tamen esse in pectore nostro
 quiddam quod contra pugnare obstareque possit? 280
 cuius ad arbitrium quoque copia material
 cogitur interdum flecti per membra per artus
 et proiecta refrenatur retroque residit.
 quare in seminibus quoque idem fateare necessest,
 esse aliam praeter plagas et pondera causam 285
 motibus, unde haec est nobis innata potestas,
 de nilo quoniam fieri nil posse videmus.
 pondus enim prohibet ne plagis omnia fiant
 externa quasi vi. sed ne mens ipsa necessum
 intestinum habeat cunctis in rebus agendis 290
 et devicta quasi cogatur ferre patique,
 id facit exiguum clinamen principiorum
 nec regione loci certa nec tempore certo.

Nec stipata magis fuit umquam material

264 equorum *ed. Brixensis*: quorum *OQ* 268 conixa *Gifanius*
 (*cf.* 160): conexa *OQ* 275 perspicuumst nobis *Lachmann*: per-
 spicuum nobis *st OQ* 279 in pectore nostro *Antonius*: in iectore *O*:
 in iectore no *Q* 281 copia *l 31*: cona *OQ* 289 mens *Lambinus*:
 res *OQ* 291 quasi *L*: quaei *OQ*: quasi id *Lachmann*: quasi hoc
Munro

copia nec porro maioribus intervallis. 295
 nam neque adaugescit quicquam neque deperit inde.
 quapropter quo nunc in motu principiorum
 corpora sunt, in eodem ante acta aetate fuere
 et posthac semper simili ratione ferentur,
 et quae consuerint gigni gignentur eadem 300
 condicione et erunt et crescent vique valebunt,
 quantum cuique datum est per foedera naturai.
 nec rerum summam commutare ulla potest vis;
 nam neque, quo possit genus ullum materiai
 effugere ex omni, quicquam est <extra>, neque in omne 305
 unde coorta queat nova vis irrumpere et omnem
 naturam rerum mutare et vertere motus.

Illud in his rebus non est mirabile, quare,
 omnia cum rerum primordia sint in motu,
 summa tamen summa videatur stare quiete, 310
 praeterquam siquid proprio dat corpore motus.
 omnis enim longe nostris ab sensibus infra
 primorum natura iacet; quapropter, ubi ipsa
 cernere iam nequeas, motus quoque surpere debent;
 praesertim cum, quae possimus cernere, celent 315
 saepe tamen motus spatio diducta locorum.
 nam saepe in colli tondentes pabula laeta
 lanigerae reptant pecudes quo quam(que) vocantes
 invitant herbae gemmantes rore recenti,
 et satiati agni ludunt blandeque coruscant; 320
 omnia quae nobis longe confusa videntur
 et velut in viridi candor consistere colli.
 praeterea magnae legiones cum loca cursu
 camporum complent belli simulacra cientes,
 fulgor ibi ad caelum se tollit totaque circum 325
 aere renidescit tellus subterque virum vi

299 posthac *ed. Juntina*: post haec *OQ* 305 extra *add. Munro*:
alii alia 313 ipsa *Gifanius*: ipsum *OQ* 314 surpere *Pontanus*:
 asurpere *OQ* 318 quamque *O corr.*: quam *OQ* 322 velut
Lachmann: veluti *OQ* 325 ibi *Marullus*: ubi *OQ*

excitur pedibus sonitus clamoreque montes
 icti reiectant voces ad sidera mundi
 et circumvolitant equites mediosque repente
 transmittunt valido quatientes impete campos. 330
 et tamen est quidam locus altis montibus (unde)
 stare videntur et in campis consistere fulgor.

Nunc age iam deinceps cunctarum exordia rerum
 qualia sint et quam longe distantia formis
 percipe, multigenis quam sint variata figuris; 335
 non quo multa parum simili sint praedita forma,
 sed quia non vulgo paria omnibus omnia constant.
 nec mirum; nam cum sit eorum copia tanta
 ut neque finis, uti docui, neque summa sit ulla,
 debent nimirum non omnibus omnia prorsum 340
 esse pari filo similique adfecta figura.

praeterea genus humanum mutaeque natantes
 squamigerum pecudes et laeta armenta feraeque
 et variae volucres, laetantia quae loca aquarum
 concelebrant circum ripas fontisque lacusque, 345
 et quae pervulgant nemora avia pervolitantes;
 quorum unum quidvis generatim sumere perge,
 invenies tamen inter se differre figuris.

nec ratione alia proles cognoscere matrem
 nec mater posset prolem; quod posse videmus. 350
 nec minus atque homines inter se nota cluere.
 nam saepe ante deum vitulus delubra decora
 turicremas propter mactatus concidit aras
 sanguinis exspirans calidum de pectore flumen.
 at mater viridis saltus orbata peragrans 355

†non quitt† humi pedibus vestigia pressa bisulcis,

331 unde *add. L* 337 constant *L*: constat *OQ* 342 prae-
 terea *O corr.*: praetere *OQ*: parturiunt *Lachmann*: praeter eat
Munro 343 armenta *Bentley*: arbusta *OQ* 347 quidvis *Lach-*
mann: quodvis *OQ* 356 non quit *O*: oinquit *Q*: oinquit *G*:
 linquit *Q corr.*: noscit *Lachmann*: novit *Brieger*: fortasse quaerit
 (*vid. C. R. xvi p. 330*)

omnia convisens oculis loca si queat usquam
 conspicere amissum fetum, completque querelis
 frondiferum nemus adsistens et crebra revisit
 ad stabulum desiderio perfixa iuveni, 360
 nec tenerae salices atque herbae rore vigentes
 fluminaque illa queunt summis labentia ripis
 oblectare animum subitamque avertere curam,
 nec vitulorum aliae species per pabula laeta
 derivare queunt animum curaque levare : 365
 usque adeo quiddam proprium notumque requirit.
 praeterea teneri tremulis cum vocibus haedi
 cornigeras norunt matres agnique petulci
 balantum pecudes : ita, quod natura reposcit,
 ad sua, quisque fere decurrunt ubera lactis. 370
 postremo quodvis frumentum non tamen omne
 quique suo genere inter se simile esse videbis,
 quin intercurrat quaedam distantia formis.
 concharumque genus parili ratione videmus
 pingere telluris gremium, qua mollibus undis 375
 litoris incurvi bibulam pavit aequor harenam.
 quare etiam atque etiam simili ratione necessest,
 natura quoniam constant neque facta manu sunt
 unius ad certam formam primordia rerum,
 dissimili inter se quaedam volitare figura. 380

Perfacile est animi ratione exsolvere nobis
 quare fulmineus multo penetratior ignis
 quam noster fuat e taedis terrestribus ortus.
 dicere enim possis caelestem fulminis ignem
 subtilem magis e parvis constare figuris 385
 atque ideo transire foramina quae nequit ignis
 noster hic e lignis ortus taedaque creatus.

359 adsistens *Q* corr. : adsittens *OQ* : adsidueis *Lachmann* : ab-
 sistens *Munro* : subsistens *Brieger* 362 illa] ulla *O* corr. 363
 subitam] solitam *Lachmann* : sumptam *Munro* olim : dubiam *Bernays* :
 subito *Brieger* 372 quique *Lachmann* : quidque *OQ* 381 animi]
 tali *Lachmann* : parili *Bernays* 383 fuat *Faber* : fluat *OQ*

praeterea lumen per cornum transit, at imber
 respuitur. quare? nisi luminis illa minora
 corpora sunt quam de quibus est liquor almus aquarum. 390
 et quamvis subito per colum vina videmus
 perfluere; at contra tardum cunctatur olivum,
 aut quia nimirum maioribus est elementis
 aut magis hamatis inter se perque plicatis,
 atque ideo fit uti non tam diducta repente 395
 inter se possint primordia singula quaeque
 singula per cuiusque foramina permanare.

Huc accedit uti mellis lactisque liquores
 iucundo sensu linguae tractentur in ore;
 at contra taetra absinthii natura ferique 400
 centauri foedo pertorquent ora sapore;
 ut facile agnoscas e levibus atque rotundis
 esse ea quae sensus iucunde tangere possunt,
 at contra quae amara atque aspera cumque videntur,
 haec magis hamatis inter se nexa teneri 405
 proptereaque solere vias rescindere nostris
 sensibus introituque suo perrumpere corpus.

Omnia postremo bona sensibus et mala tactu
 dissimili inter se pugnant perfecta figura;
 ne tu forte putes, serrae stridentis acerbum 410
 horrorem constare elementis levibus aequae
 ac musaea mele, per chordas organici quae
 mobilibus digitis expergefata figurant;
 neu simili penetrare putes primordia forma
 in naris hominum, cum taetra cadavera torrent, 415
 et cum scena croco Cilici perfusa recens est
 araque Panchaeos exhalat propter odores;
 neve bonos rerum simili constare colores
 semine constituas, oculos qui pascere possunt,

390 almus *Q* corr.: alimus *OQ* 397 cuiusque] coli usque *Bruno*
 403 iucunde tangere *L*: iucundet tacere *OQ* 413 mobilibus
Politianus: nobilibus *OQ* 414 penetrare *Q* corr.: penetrare *OQ*

et qui compungunt aciem lacrimareque cogunt 420
aut foeda specie diri turpesque videntur.

omnis enim, sensus quae mulcet cumque, 〈figura〉
haud sine principali aliquo levore creatast;
at contra quaecumque molesta atque aspera constat,
non aliquo sine materiae squalore repertast. 425

sunt etiam quae iam nec levia iure putantur
esse neque omnino flexis mucronibus unca,
sed magis angellis paulum prostantibus 〈utqui〉
titillare magis sensus quam laedere possint;
fecula iam quo de genere est inulaeque sapes. 430

denique iam calidos ignis gelidamque pruinam
dissimili dentata modo compungere sensus
corporis, indicio nobis est tactus uterque.

tactus enim, tactus, pro divum numina sancta,
corporis est sensus, vel cum res externa sese 435

insinuat, vel cum laedit quae in corpore natast
aut iuvat egrediens genitalis per Veneris res,
aut ex offensu cum turbant corpore in ipso
semina confundunt〈que〉 inter se concita sensum;

ut si forte manu quamvis iam corporis ipse 440
tute tibi partem ferias atque experiare.

quapropter longe formas distare necessest
principiis, varios quae possint edere sensus.

Denique quae nobis durata ac spissa videntur,
haec magis hamatis inter sese esse necessest 445
et quasi ramosis alte compacta teneri.

in quo iam genere in primis adamantina saxa
prima acie constant ictus contemnere sueta
et validi silices ac durum robora ferri

aeraque quae claustris restantia vociferantur. 450

421 diri *Lachmann*: di *OQ*: alii alia 422 figura *Schneidewin*:
videntur *OQ* (ex 421): alii alia 427 uncaque *OQ* 428 utqui
add. *Howard*: unde *Bernays* 430 inulaeque *Lambinus*: inuiaque
OQ 437 egrediens *l 31*: grediens *OQ* 439 que add. *Marullus*

illa quidem debent e levibus atque rotundis
 esse magis, fluvido quae corpore liquida constant;
 namque papaveris haustus itemst facilis quasi aquarum;
 nec retinentur enim inter se glomeramina quaeque
 et percussus item proclive volubilis exstat. 455
 omnia postremo quae puncto tempore cernis
 diffugere, ut fumum nebulas flammisque, necessest,
 si minus omnia sunt e levibus atque rotundis,
 at non esse tamen perplexis indupedita,
 pungere uti possint corpus penetrareque saxa 460
 nec tamen haerere inter se; quodcumque videmus
 †sensibu' sedatum†, facile ut cognoscere possis
 non e perplexis sed acutis esse elementis.
 sed quod amara vides eadem quae fluvida constant,
 sudor uti maris est, minime mirabile habeto. 465
 nam quod fluvidus est, e levibus atque rotundis
 est, et squalida multa creant admixta dolores
 corpora; nec tamen haec retineri hamata necessumst;
 scilicet esse globosa tamen, cum squalida constent,
 provolvi simul ut possint et laedere sensus. 470
 et quo mixta putes magis aspera levibus esse
 principiis, unde est Neptuni corpus acerbum;
 est ratio discernendi, sorsumque videndi
 umor dulcis, ubi per terras crebrius idem
 percolatur, ut in foveam fluat ac mansuescat; 475
 linquit enim supera taetri primordia viri,
 aspera cum magis in terris haerescere possint.

Quod quoniam docui, pergam conectere rem quae

453 *secl. Lambinus* quasi *Haupt*: quod *OQ* 454 ante 453 collo-
 cavit *Goebel*, post 455 *Brieger* 455 percussus] procursus *ed. Juntina*
 458 omnia] omnibu' *Muretus* 460 saxa] sese *Lachmann*: vesca
Munro: laxa *Munro olim* 461 videmus] venenumst *Lachmann*
 462 sensibus sedatum *OQ prob. Munro*: sensibu' sed rarum *Lach-*
mann: ventis esse datum *Bernays*: * sensibus esse datum *Brieger*
 465 habeto *Munro*: debet *OQ* 467 et squalida multa creant
Munro: e levibus atque rotundi (*ex 466*) *OQ*: et levibu' sunt aliunde
Lachmann: et squalida sunt illis *Bernays* dolores *scripsi*: doloris
OQ 468 necessumst *Lachmann*: necessu *OQ* 471 quo *Pon-*
tanus: quod *OQ* 477 quom *Munro*: quo *OQ*

ex hoc apta fidem ducat, primordia rerum
 finita variare figurarum ratione. 480
 quod si non ita sit, rursum iam semina quaedam
 esse infinito debebunt corporis auctu.
 namque in eadem una cuiusvis iam brevitate
 corporis inter se multum variare figurae
 non possunt: fac enim minimis e partibus esse 485
 corpora prima tribus, vel paulo pluribus auge;
 nempe ubi eas partis unius corporis omnis,
 summa atque ima locans, transmutans dextera laevis,
 omnimodis expertus eris, quam quisque det ordo
 formai speciem totius corporis eius, 490
 quod superest, si forte voles variare figuras,
 addendum partis alias erit; inde sequetur,
 assimili ratione alias ut postulet ordo,
 si tu forte voles etiam variare figuras:
 ergo formarum novitatem corporis augmen 495
 subsequitur. quare non est ut credere possis
 esse infinitis distantia semina formis,
 ne quaedam cogas immani maximitate
 esse, supra quod iam docui non posse probari.
 iam tibi barbaricae vestes Meliboeaque fulgens 500
 purpura Thessalico concharum tacta colore,
 aurea pavonum ridenti imbuta lepore
 saecla, novo rerum superata colore iacerent
 et contemptus odor smyrnae mellisque saporēs,
 et cycnea mele Phoebeaque daedala chordis 505
 carmina consimili ratione oppressa silerent.
 namque aliis aliud praestantius exoreretur.
 cedere item retro possent in deteriores
 omnia sic partis, ut diximus in meliores.
 namque aliis aliud retro quoque taetrius esset 510
 naribus auribus atque oculis orisque saporī.

483 eadem] eodem, *Munro* iam *Brieger*: in *OQ* 499 probari
 ed. *Aldina*: probare *OQ* 501 tacta *Lachmann*: tecta *OQ*:
 infecta *Winckelmann*: tincta ed. *Juntina* 502 ridenti *Fr. Medices*:
 rident *OQ* 503 novo *Fr. Medices*: noua *OQ*

quae quoniam non sunt, (sed) rebus reddita certa
 finis utrimque tenet summam, fateare necessest
 materiem quoque finitis differre figuris.
 denique ab ignibus ad gelidas [†]hiemisquet[†] pruinas 515
 finitumst retroque pari ratione remensumst.
 omnis enim calor ac frigus, mediique tepores
 interutrasque iacent explentes ordine summam.
 ergo finita distant ratione creata,
 ancipiti quoniam mucroni utrimque notantur, 520
 hinc flammis illinc rigidis infesta pruinis.

Quod quoniam docui, pergam conectere rem quae
 ex hoc apta fidem ducat, primordia rerum,
 inter se simili quae sunt perfecta figura,
 infinita cluere. etenim distantia cum sit 525
 formarum finita, necesse est quae similes sint
 esse infinitas aut summam materiai
 finitam constare, id quod non esse probavi
 versibus [†]ostendam[†] corpuscula materiai
 ex infinito summam rerum usque tenere, 530
 undique protelo plagarum continuato.
 nam quod rara vides magis esse animalia quaedam
 fecundamque minus naturam cernis in illis,
 at regione locoque alio terrisque remotis
 multa licet genere esse in eo numerumque repleri; 535
 sicut quadrupedum cum primis esse videmus
 in genere anguimanus elephantos, India quorum
 milibus e multis vallo munitur eburno,
 ut penitus nequeat penetrari: tanta ferarum
 vis est, quarum nos perpauca exempla videmus. 540
 sed tamen id quoque uti concedam, quamlibet esto

512 sed *add. Lachmann* 514 finitis *O corr.*: infinitis *O*
 515 hiemisque *OQ*: iter usque *Lachmann*: hiemum usque *Munro*
 (*in commentario*): spatium usque *Reid*: brumae usque *Merrill* 51
 omnis] finis *codd. Ital.*: finit *Lambinus*: ambit *Lachmann* 52
 infesta *Lachmann*: infessa *OQ* 529 ostendam *OQ*: ostenden
Munro: ostendi *Brieger*, lacuna post 528 indicata 533 minus *Lam*
binus: magis *OQ* 536 sicut *Bentley*: sicuti *OQ* 541 quam
 lubet *Q corr.*: quam iubet *OQ*

unica res quaedam nativo corpore sola,
 cui similis toto terrarum 〈non〉 sit 〈in〉 orbe;
 infinita tamen nisi erit vis materiai
 unde ea progigni possit concepta, creari 545
 non poterit, neque, quod superest, procreare aliquē.
 quippe etenim sumam hoc quoque uti finita per omne
 corpora iactari unius genitalia rei,
 unde ubi qua vi et quo pacto congressa coibunt
 materiae tanto in pelago turbaque aliena? 550
 non, ut opinor, habent rationem conciliandi
 sed quasi naufragiis magnis multisque coortis
 disiectare solet magnum mare transtra cavernas
 antemnas proram malos tonsasque natantis,
 per terrarum omnis oraꝝ fluitantia aplustra 555
 ut videantur et indicium mortalibus edant,
 infidi maris insidias virisque dolumque
 ut vitare velint, neve ullo tempore credant,
 subdola cum ridet placidi pellacia ponti,
 sic tibi si finita semel primordia quaedam 560
 constitues, aevum debebunt sparsa per omnem
 disiectare aestus divēsi materiai,
 numquam in concilium ut possint compulsa coire
 nec remorari in concilio nec crescere adaucta;
 quorum utrumque palam fieri manifesta docet res, 565
 et res progigni et genitas procreare posse.
 esse igitur genere in quovis primordia rerum
 infinita palam est unde omnia suppeditantur.
 Nec superare queunt motus itaque exitiales
 perpetuo neque in aeternum sepelire salutem, 570
 nec porro rerum genitales auctificique
 motus perpetuo possunt servare creata.

543 non sit in orbi *Q* corr. : sit orbi *O* : orbi *Q* 547 sumam hoc
 quoque uti *Munro* : sumant oculi *OQ* : sumantur uti *Winckelmann* :
alii alia 553 cavernas *Q* corr. : cauerna *OQ* : gubernata *Lachmann*
 555 aplustra *Politianus* : plaustra *OQ* 560 finita *Q* corr. : infinita
OQ 563, 564 *inverso ordine Q*

sic aequo geritur certamine principiorum
ex infinito contractum tempore bellum.

nunc hic nunc illic superant vitalia rerum 575
et superantur item. miscetur funere vago
quem pueri tollunt visentes luminis oras ;
nec nox ulla diem neque noctem aurora secutast
quae non audierit mixtos vagitibus aegris
ploratus mortis comites et funeris atri. 580

Illud in his obsignatum quoque rebus habere
convenit et memori mandatum mente tenere,
nil esse, in promptu quorum natura videtur,
quod genere ex uno consistat principiorum,
nec quicquam quod non permixto semine constet ; 585
et quodcumque magis vis multas possidet in se
atque potestates, ita plurima principiorum
in sese genera ac varias docet esse figuras.
principio tellus habet in se corpora prima
unde mare immensum volventes frigora fontes 590
assidue renovent, habet ignes unde oriantur.
nam multis succensa locis ardent sola terrae,
ex imis vero furit ignibus impetus Aetnae.
tum porro nitidas fruges arbustaque laeta
gentibus humanis habet unde extollere possit, 595
unde etiam fluvios frondis et pabula laeta
montivago generi possit praebere ferarum.
quare magna deum mater materque ferarum
et nostri genetrix haec dicta est corporis una.

Hanc veteres Graium docti cecinere poetae 600

*

sedibus in curru biiugos agitare leones,
aeris in spatio magnam pendere docentes
tellurem neque posse in terra sistere terram.

586 quodcumque *Lachmann* : quaecumque *OQ* 593 ex imis
OQ prob. Giussani : eximiis *Avancius* 600 * 601 duos versus
excidisse indicat Q 601 sedibus] sublimem *Lambinus* : alii alia

adiunxere feras, quia quamvis efferā proles
 officiis debet molliri victa parentum. 605
 muralique caput summum cinxere corona,
 eximiis munita locis quia sustinet urbis;
 quo nunc insigni per magnas praedita terras
 horrifice fertur divinae matris imago.
 hanc variae gentes antiquo more sacrorum 610
 Idaeam vocitant matrem Phrygiasque catervas
 dant comites, quia primum ex illis finibus edunt
 per terrarum orbem fruges coepisse creari.
 gallos attribuunt, quia, numen qui violarint
 matris et ingrati genitoribus inventi sint, 615
 significare volunt indignos esse putandos,
 vivam progeniem qui in oras luminis edant.
 tympana tenta tonant palmis et cymbala circum
 concava, raucisonoque minantur cornua cantu,
 et Phrygio stimulat numero cava tibia mentis, 620
 telaque praeportant violenti signa furoris,
 ingratos animos atque impia pectora vulgi
 conterrere metu quae possint numini' divae.
 ergo cum primum magnas invecta per urbis
 munificat tacita mortalis muta salute, 625
 aere atque argento sternunt iter omne viarum
 largifica stipe ditantes ninguntque rosarum
 floribus umbrantes matrem comitumque catervas.
 hic armata manus, Curetas nomine Grai
 quos memorant Phrygios, inter se forte (quod armis) 630
 ludunt in numerumque exsultant sanguine laeti
 terrificas capitum quatientes numine cristas,
 Dictaeos referunt Curetas qui Iovis illum

605 molliri *L*: moliri *QQ* 607 eximiis *Avancius*: ex imis *QQ*
 613 orbem *Pontanus*: obes *O*: orbes *Q* 615 matris *Q corr.*: matri
QQ sint *Lambinus*: sunt *QQ* 623 numini' *amicus quidam*
Havercampi: numine *QQ* 626 iter omne viarum *Turnebus*: ite
 omnia uirum *QQ* 630 quod armis *Lachmann*: cateruas *O (ex*
 628): catenas *Q* 631 laeti *Pontanus*: fleti *QQ*: sanguinolenti
Bentley

vagitum in Creta quondam occultasse feruntur,
 cum pueri circum puerum pernice chorea 635
 armati in numerum pulsarent aeribus aera, 637
 ne Saturnus eum malis mandaret adeptus
 aeternumque daret matri sub pectore vulnus.
 propterea magnam armati matrem comitantur, 640
 aut quia significant divam praedicere ut armis
 ac virtute velint patriam defendere terram
 praesidioque parent decorique parentibus esse.
 quae bene et eximie quamvis disposta ferantur,
 longe sunt tamen a vera ratione repulsa. 645
 omnis enim per se divum natura necessest
 immortalis aeo summa cum pace fruatur
 semota ab nostris rebus seiunctaque longe.
 nam privata dolore omni, privata periculis,
 ipsa suis pollens opibus, nil indiga nostri, 650
 nec bene promeritis capitur neque tangitur ira.
 terra quidem vero caret omni tempore sensu,
 et quia multarum potitur primordia rerum,
 multa modis multis effert in lumina solis.
 hic si quis mare Neptunum Cereremque vocare 655
 constituet fruges et Bacchi nomine abuti
 mavult quam laticis proprium proferre vocamen,
 concedamus ut hic terrarum dictitet orbem
 esse deum matrem, dum vera re tamen ipse 659
 religione animum turpi contingere parcat. 660 [680]
 Saepe itaque ex uno tondentes gramina campo 661 [660]
 lanigerae pecudes et equorum duellica proles
 buceriaeque greges eodem sub tegmine caeli
 ex unoque sitim sedantes flumine aquai

636 armat et in numerum pernice chorea ex 637, 635 conflatum secl.
 Pontanus 652-4 post 660 [680] collocavit Munro 656 con-
 stituet] constituit Lachmann 660 [680] post 659 locavit Lachmann
 657 parcat Lachmann: parato OQ: parat Q corr. 664 sedantes
 Q corr.: sedentes OQ

dissimili vivunt specie retinentque parentum 665 [664]
 naturam et mores generatim quaeque imitantur.
 tanta est in quovis genere herbae materiali
 dissimilis ratio, tanta est in flumine quoque.
 hinc porro quamvis animantem ex omnibus unam
 ossa cruor venae calor umor viscera nervi 670 [669]
 constituunt; quae sunt porro distantia longe,
 dissimili perfecta figura principiorum.
 tum porro quaecumque igni flammata cremantur,
 si nil praeterea, tamen haec in corpore condunt
 unde ignem iacere et lumen summittere possint 675 [674]
 scintillasque agere ac late differre favillam.
 cetera consimili mentis ratione peragrans
 invenies igitur multarum semina rerum
 corpore celare et varias cohibere figuras.
 denique multa vides quibus et color et sapor una 680 [679]
 reddita sunt cum odore. in primis pleraque dona

*

haec igitur variis debent constare figuris;
 nidor enim penetrat qua fucus non it in artus,
 fucus item sorsum, (sorsum) sapor insinuatur
 sensibus; ut noscas primis differre figuris. 685
 dissimiles igitur formae glomeramen in unum
 conveniunt et res permixto semine constant.
 quin etiam passim nostris in versibus ipsis
 multa elementa vides multis communia verbis,
 cum tamen inter se versus ac verba necesse est 690
 confiteare alia ex aliis constare elementis;
 non quo multa parum communis littera currat
 aut nulla inter se duo sint ex omnibus isdem,

665 retinentque parentum *l 31*: retinente parente *OQ* 669 unam
Lambinus: una *OQ* 674 condunt *Munro*: traduntur *OQ*: alii
 alia 675 ignem *L*: igne *OQ*: ignes *Q corr.* 681 dona] poma
Bruno 681 * 682 lacunam indicavit *Bernays* 683, 684 fucus
Lachmann: sucus *OQ* 684 sorsum add. *G. Vossius* 685
 primis] privis *Vossius* 693 isdem *Lambinus*: idem *OQ*: nulli ...
 idem (*sc. versus*) *Lachmann*

sed quia non vulgo paria omnibus omnia constant.
 sic aliis in rebus item communia multa 695
 multarum rerum cum sint primordia, verum
 dissimili tamen inter se consistere summa
 possunt; ut merito ex aliis constare feratur
 humanum genus et fruges arbustaque laeta.

Nec tamen omnimodis coniecti posse putandum est 700
 omnia. nam vulgo fieri portenta videres,
 semiferas hominum species existere et altos
 interdum ramos egigni corpore vivo,
 multaque coniecti terrestria membra marinis,
 tum flammam taetro spirantis ore Chimaeras 705
 pascere naturam per terras omniparentis.
 quorum nil fieri manifestum est, omnia quando
 seminibus certis certa genetrice creata
 conservare genus crescentia posse videmus.
 scilicet id certa fieri ratione necessust. 710
 nam sua cuique cibus ex omnibus intus in artus
 corpora discedunt conexaque convenientis
 efficiunt motus. at contra aliena videmus
 reicere in terras naturam, multaque caecis
 corporibus fugiunt e corpore percita plagis, 715
 quae neque coniecti quoquam potuere neque intus
 vitalis motus consentire atque imitari.
 sed ne forte putes animalia sola teneri
 legibus hisce, eadem ratio res terminat omnis.
 nam veluti tota natura dissimiles sunt 720
 inter se genitae res quaeque, ita quamque necessest
 dissimili constare figura principiorum;
 non quo multa parum simili sint praedita forma,
 sed quia non vulgo paria omnibus omnia constant.

694 constant *Q*: constet *O*: constant *O* corr. • 696 verum *Pontanus*: rerum *OQ*: eorum *Brieger* 716 intus *Lachmann*: inte
OQ: inter *Q* corr.: in se *Bernays*: inde *Brieger* 719 hisce
Bernays: his *OQ* eadem ratio res terminat *Lambinus*: quaedam
 ratio disterminat *O*: quidam ratio disterminat *Q*: alii alia 721
 quanque *ed. Juntina*: cumque *OQ*

semina cum porro distent, differre necessust 725
 intervalla vias conexus pondera plagas
 concursus motus, quae non animalia solum
 corpora seiungunt, sed terras ac mare totum
 secernunt caelumque a terris omne retentant.

Nunc age dicta meo dulci quaesita labore 730
 percipe, ne forte haec albis ex alba rearis
 principiis esse, ante oculos quae candida cernis,
 aut ea quae nigrant nigro de semine nata;
 nive alium quemvis quae sunt imbuta colorem,
 propterea gerere hunc credas, quod materiai 735
 corpora consimili sint eius tincta colore.
 nullus enim color est omnino materiai
 corporibus, neque par rebus neque denique dispar.
 in quae corpora si nullus tibi forte videtur
 posse animi iniectus fieri, procul avius erras. 740
 nam cum caecigeni, solis qui lumina numquam
 dispexere, tamen cognoscant corpora tactu
 ex ineunte aevo nullo coniuncta colore,
 scire licet nostrae quoque menti corpora posse
 verti in notitiam nullo circumlita fuco. 745
 denique nos ipsi caecis quaecumque tenebris
 tangimus, haud ullo sentimus tincta colore.
 quod quoniam vinco fieri, nunc esse docebo

*

Omnis enim color omnino mutatur in omnis;
 quod facere haud ullo debent primordia pacto. 750
 immutabile enim quiddam superare necessest,
 ne res ad nilum redigantur funditus omnes.
 nam quodcumque suis mutatum finibus exit,
 continuo hoc mors est illius quod fuit ante.

734 colorem *L*: colore *OQ* 741 lumina *l 31*: numina *OQ*
 742 dispexere *L corr.*: despexere *OQ* 743 post 748 locavit
Bentley 748* 749 lacunam indicavit *Munro* 749 in *l 31*: et *OQ*

proinde colore cave contingas semina rerum, 755
ne tibi res redeant ad nilum funditus omnes.

Praeterea si nulla coloris principiis est
reddita natura et variis sunt praedita formis,
e quibus omne genus gignunt variantque colores
propterea, magni quod refert semina quaeque 760
cum quibus et quali positura contineantur
et quos inter se dent motus accipiantque,
perfacile extemplo rationem reddere possis
cur ea quae nigro fuerint paulo ante colore,
marmoreo fieri possint candore repente; 765
ut mare, cum magni commorunt aequora venti,
vertitur in canos candenti marmore fluctus.
dicere enim possis, nigrum quod saepe videmus,
materies ubi permixta est illius et ordo
principiis mutatus et addita demptaque quaedam, 770
continuo id fieri ut candens videatur et album.
quod si caeruleis constarent aequora ponti
seminibus, nullo possent albescere pacto.
nam quocumque modo perturbes caerulea quae sint,
numquam in marmoreum possunt migrare colorem. 775
sin alio atque alio sunt semina tincta colore
quae maris efficiunt unum purumque nitorem,
ut saepe ex aliis formis variisque figuris
efficitur quiddam quadratum unaque figura,
conveniebat, ut in quadrato cernimus esse 780
dissimilis formas, ita cernere in aequore ponti
aut alio in quovis uno puroque nitore
dissimilis longe inter se variosque colores.
praeterea nil officiunt obstantque figurae
dissimiles quo quadratum minus omne sit extra; 785

759 omne genus *Lachmann*: omnigenus *OQ* 760 propterea
L corr.: praeterea *OQ* 763 extemplo *editio Brixensis*: exemplo
OQ 765 possint *Lambinus*: possunt *OQ* 779 figura *L*: figuras
OQ 780 ut *Lachmann*: uti *OQ* 783 colores *L*: calores *OQ*

at varii rerum impediunt prohibentque colores
quominus esse uno possit res tota nitore.

Tum porro quae ducit et inlicit ut tribuamus
principiis rerum nonnumquam causa colores,
occidit, ex albis quoniam non alba creantur, 790
nec quae nigra cluent de nigris sed variis ex.
quippe etenim multo proclivius exorientur
candida de nullo quam nigro nata colore
aut alio quovis qui contra pugnet et obstat.

Praeterea quoniam nequeunt sine luce colores 795
esse neque in lucem existunt primordia rerum,
scire licet quam sint nullo velata colore.

qualis enim caecis poterit color esse tenebris?
lumine quin ipso mutatur propterea quod
recta aut obliqua percussus luce refulget; 800

pluma columbarum quo pacto in sole videtur,
quae sita cervices circum collumque coronat;
namque alias fit uti claro sit rubra pyropo,
interdum quodam sensu fit uti videatur
inter curalium viridis miscere zmaragdos. 805

caudaque pavonis, larga cum luce repleta est,
consimili mutat ratione obversa colores;

qui quoniam quodam gignuntur luminis ictu,
scire licet, sine eo fieri non posse putandum est.

et quoniam plagae quoddam genus excipit in se 810
pupula, cum sentire colorem dicitur album,

atque aliud porro, nigrum cum et cetera sentit,
nec refert ea quae tangas quo forte colore
praedita sint, verum quali magis apta figura,
scire licet nil principiis opus esse colore, 815

788 et Q: om. O inlicit ut *Lambinus*: inlicitu QQ 790
creantur L: creatur QQ 791 nec quae l 31: neque QQ ex
Wakefield: ea QQ 802 cervicem] cervicemst *Brieger* 803 rubra
l 31: rubro O: robro Q 805 curalium *Wakefield*: caeruleum QQ
806 larga Q corr.: largo QQ 814 sint ed. *Aldina*: sunt QQ
815 colore] colores cit. *Nonius*

sed variis formis variantis edere tactus.

Praeterea quoniam non certis certa figuris
est natura coloris et omnia principiorum
formamenta queunt in quovis esse nitore,
cur ea quae constant ex illis non pariter sunt 820
omne genus perfusa coloribus in genere omni?
conveniebat enim corvos quoque saepe volantis
ex albis album pinnis iactare colorem
et nigros fieri nigro de semine cygnos
aut alio quovis uno varioque colore. 825

Quin etiam quanto in partis res quaeque minutas
distrahitur magis, hoc magis est ut cernere possis
evanescere paulatim stinguique colorem;
ut fit ubi in parvas partis discerpitur austrum:
purpura poeniceusque color clarissimu' multo, 830
filatim cum distractum est, disperditur omnis;
noscere ut hinc possis prius omnem efflare colorem
particulas quam discedant ad semina rerum.

Postremo quoniam non omnia corpora vocem
mittere concedis neque odorem, propterea fit 835
ut non omnibus attribuas sonitus et odores.
sic oculis quoniam non omnia cernere quimus,
scire licet quaedam tam constare orba colore
quam sine odore ullo quaedam sonituque remota,
nec minus haec animum cognoscere posse sagacem 840
quam quae sunt aliis rebus privata notare.

Sed ne forte putes solo spoliata colore
corpora prima manere, etiam secreta teporis
sunt ac frigoris omnino calidique vaporis,
et sonitu sterila et suco ieiuna feruntur, 845
nec iaciunt ullum proprium de corpore odorem.

821 omne genus *Lachmann*: omnigenus *OQ* 829 ostrum
Wakefield: aurum *OQ* 831 disperditur] dispergitur *Lachmann*
841 notare *Lachmann*: notaque *OQ* 845 ieiuna *l 31*: et una *OQ*
846 proprium] proprio *ed. Juntina*

sicut amaracini blandum stactaeque liquorem
et nardi florem, nectar qui naribus halat,
cum facere instituas, cum primis quaerere par est,
quoad licet ac possis reperire, inolentis olivi 850
naturam, nullam quae mittat naribus auram,
quam minime ut possit mixtos in corpore odores
concoctosque suo contractans perdere viro,
propterea tandem debent primordia rerum
non adhibere suum gignundis rebus odorem 855
nec sonitum, quoniam nil ab se mittere possunt,
nec simili ratione saporem denique quemquam
nec frigus neque item calidum tepidumque vaporem,
cetera ; quae cum ita sunt tamen ut mortalia constent,
molli lenta, fragosa putri, cava corpore raro, 860
omnia sint a principiis seiuncta necessest,
immortalia si volumus subiungere rebus
fundamenta quibus nitatur summa salutis ;
ne tibi res redeant ad nilum funditus omnes. ||

Nunc ea quae sentire videmus cumque necessest 865
ex insensilibus tamen omnia confiteare
principiis constare. neque id manifesta refutant
nec contra pugnant, in promptu cognita quae sunt,
sed magis ipsa manu ducunt et credere cogunt
ex insensilibus, quod dico, animalia gigni. 870
quippe videre licet vivos exsistere vermis
stercore de taetro, putorem cum sibi nacta est
intempestivis ex imbribus umida tellus ;
praeterea cunctas itidem res vertere sese.
vertunt se fluvii frondes et pabula laeta 875
in pecudes, vertunt pecudes in corpora nostra
naturam, et nostro de corpore saepe ferarum
augescunt viris et corpora pennipotentum.

850 quoad *Lambinus* : quod *OQ* 853 contractans *Priscianus* :
contractas *OQ* 854 propterea tandem *Marullus* : propterea eandem
Q : propter eandem *O* : propter eandem rem *Lachmann* post 858
versus excidissee nonnullos suspicatus est Giussani 859 cum ita sint]
comitant *Brieger* 875 frondes *Lambinus* : in frondes *OQ*

ergo omnis natura cibos in corpora viva
 vertit et hinc sensus animantium procreat omnis, 880
 non alia longe ratione atque arida ligna
 explicat in flammās et (in) ignis omnia versat.
 iamne vides igitur magni primordia rerum
 referre in quali sint ordine quaeque locata
 et commixta quibus dent motus accipiantque? 885

Tum porro quid id est, animum quod percutit ipsum,
 quod movet et varios sensus expromere cogit,
 ex insensilibus ne credas sensile gigni?
 nimirum lapides et ligna et terra quod una
 mixta tamen nequeunt vitalem reddere sensum. 890
 illud in his igitur rebus meminisse decebit,
 non ex omnibus omnino, quaecumque creant res
 sensilia, extemplo me gigni dicere sensus,
 sed magni referre ea primum quantula constent,
 sensile quae faciunt, et qua sint praedita forma, 895
 motibus ordinibus posituris denique quae sint.
 quarum nil rerum in lignis glaebisque videmus;
 et tamen haec, cum sunt quasi putrefacta per imbris,
 vermiculos pariunt, quia corpora materiali
 antiquis ex ordinibus permota nova re 900
 conciliantur ita ut debent animalia gigni.
 deinde ex sensilibus qui sensile posse creari
 constituunt porro ex aliis sentire suetis,

*

molliā cum faciunt. nam sensus iungitur omnis
 visceribus nervis venis, quaecumque videmus 905
 molliā mortali consistere corpore creta.
 sed tamen esto iam posse haec aeterna manere:
 nempe tamen debent aut sensum partis habere

882 in *add. l 31* 889 lapides] latices *Giussani* 891 rebus
Avancius: fedus *O*: sedus *Q* decebit *Q corr.*: decedit *OQ* 893
 sensilia] sensile *L*: sensile et *Naugeri* 903 suetis *Lambinus*:
 sueti *OQ* 903 *904 lacunam indicavit *Christ* 905 cumque] cuncta
Lachmann: cuique *Munro*

aut simili totis animalibus esse putari.

at nequeant per se partes sentire necesse est; 910

namque ad nos sensus membrorum respicit omnis,

nec manus a nobis potis est secreta neque ulla

corporis omnino sensum pars sola tenere.

linquitur ut totis animantibus assimulentur.

sic itidem quae sentimus sentire necessest, 915 [923]

vitali ut possint consentire undique sensu. [915]

qui poterunt igitur rerum primordia dici [916]

et leti vitare vias, animalia cum sint, [917]

atque animalia sint mortalibus una eademque? [918]

quod tamen ut possint, at coetu concilioque 920 [919]

nil facient praeter vulgum turbamque animantum, [920]

scilicet ut nequeant homines armenta feraeque [921]

inter sese ullam rem gignere conveniundo. [922]

quod si forte suum dimittunt corpore sensum

atque alium capiunt, quid opus fuit attribui id quod 925

detrahitur? tum praeterea, quod vidimus ante,

quatenus in pullos animalis vertier ova

cernimus alituum vermisque effervere, terram

intempestivos cum putor cepit ob imbris,

scire licet gigni posse ex non sensibu' sensus. 930

Quod si forte aliquis dicet dumtaxat oriri

posse a non sensu sensum mutabilitate,

aut aliquo tamquam partu quo proditur extra,

huic satis illud erit planum facere atque probare

non fieri partum nisi concilio ante coacto 935

nec quicquam commutari sine conciliatu.

principio nequeunt ullius corporis esse

909 simili *Lachmann*: similis *O* (sc. partes): similes *Q* 911 ad
nos scripsi (vid. *C. R.* xxiv p. 120): alios *O*: alius *Q*: alio *Lach-*
mann: nam ratio *Hermann* respicit *Lachmann*: respuit *OQ*
915 [923] huc transposuit *Bernays* 919 animalia sint *Lachmann*:
animalibus *OQ* 920 at coetu *Mon.*: ab eoretu *OQ* 926 vidimus
Purmann: fugimus *OQ*: sumpsimus *Merrill*: alii alia 928 effer-
vere *Marullus*: offeruere *OQ* 929 cum *Marullus*: quam *OQ*
932 a *Q* corr.: ea *OQ*: ex *Lambinus* sensum *Lambinus*: sensus
OQ 933 quo proditur (*Pontanus*) extra *Brieger*: quod proditum
extra *OQ*: quod protinus extent *Lachmann*: alii alia

sensus ante ipsam genitam naturam animantis,
 nimirum quia materies disiecta tenetur
 aere fluminibus terris terraque creatis, 940
 nec congressa modo vitalis convenienti
 contulit inter se motus, quibus omnituentes
 accensi sensus animantem quamque tuentur.

Praeterea quamvis animantem grandior ictus,
 quam patitur natura, repente adfligit et omnis 945
 corporis atque animi pergit confundere sensus.
 dissoluuntur enim positurae principiorum
 et penitus motus vitales impediuntur,
 donec materies, omnis concussa per artus,
 vitalis animae nodos a corpore solvit 950
 dispersamque foras per caulas eicit omnis.
 nam quid praeterea facere ictum posse reamur
 oblatum, nisi discutere ac dissolvere quaeque?
 fit quoque uti soleant minus oblato acriter ictu
 reliqui motus vitales vincere saepe, 955
 vincere, et ingentis plagae sedare tumultus
 inque suos quicquid rursus revocare meatus
 et quasi iam leti dominantem in corpore motum
 discutere ac paene amissos accendere sensus.
 nam quare potius leti iam limine ab ipso 960
 ad vitam possint collecta mente reverti,
 quam quo decursum prope iam siet ire et abire?

Praeterea quoniam dolor est ubi materiali
 corpora vi quadam per viscera viva per artus
 sollicitata suis trepidant in sedibus intus, 965
 inque locum quando remigrant, fit blanda voluptas,
 scire licet nullo primordia posse dolore
 temptari nullamque voluptatem capere ex se;
 quandoquidem non sunt ex ullis principiorum

938 ipsam *l* 31: lesam *OQ* 941 vitalis] vitali *Goebel* con-
 venienti *Lambinus*: conuenientes *OQ* 943 animantem quamque
 tuentur] animantum concuterentur *Lachmann*: animante in quaque
 cientur *Purmann* 951 caulas *Q* corr.: cauias *OQ* eicit *L*:
 eiecit *OQ* 961 possint] possit *Lachmann* conlecta *Lambinus*:
 coniecta *OQ*

corporibus, quorum motus novitate laborent 970
aut aliquem fructum capiant dulcedinis almae.
haud igitur debent esse ullo praedita sensu.

Denique uti possint sentire animalia quaeque,
principiis si iam est sensus tribuendus eorum,
quid, genus humanum propritim de quibus auctumst? 975

scilicet et risu tremulo concussa cachinnant
et lacrimis spargunt rorantibus ora genasque
multaque de rerum mixtura dicere callent
et sibi proporro quae sint primordia quaerunt;
quandoquidem totis mortalibus assimilata 980

ipsa quoque ex aliis debent constare elementis,
inde alia ex aliis, nusquam consistere ut ausis:
quippe sequar, quodcumque loqui ridereque dices
et sapere, ex aliis eadem haec facientibus ut sit.
quod si delira haec furiosaque cernimus esse 985

et ridere potest non ex ridentibus auctus
et sapere et doctis rationem reddere dictis
non ex seminibus sapientibus atque disertis,
qui minus esse queant ea quae sentire videmus
seminibus permixta carentibus undique sensu? 990

Denique caelesti sumus omnes semine oriundi;
omnibus ille idem pater est, unde alma liquentis
umoris guttas mater cum terra recepit,
feta parit nitidas fruges arbustaque laeta
et genus humanum, parit omnia saecula ferarum, 995
pabula cum praebet quibus omnes corpora pascunt
et dulcem ducunt vitam prolemque propagant;
quapropter merito maternum nomen adepta est.
cedit item retro, de terra quod fuit ante,
in terras et quod missumst ex aetheris oris, 1000
id rursus caeli rellatum templa receptant.

975 quibus auctumst] quibu' factumst *Lambinus* 982 alia *cd.*
Veronensis: alii O: ali Q 985 delira l 31: det ira OQ 986
auctus] factus *Lambinus* 998 adepta Q *corr.*: adempta OQ
1000 missumst *Lactantius*: missus OQ

T. LVCRETI CARI

nec sic interimit mors res ut material
 corpora conficiat, sed coetum dissipat ollis.
 inde aliis aliud coniungit et efficit omnes
 res ita convertant formas mutantque colores 1005
 et capiant sensus et puncto tempore reddant,
 ut noscas referre eadem primordia rerum
 cum quibus et quali positura contineantur
 et quos inter se dent motus accipiantque,
 neve putes aeterna penes residere potesse 1010
 corpora prima quod in summis fluitare videmus
 rebus et interdum nasci subitoque perire.
 quin etiam refert nostris in versibus ipsis
 cum quibus et quali sint ordine quaeque locata;
 namque eadem caelum mare terras flumina solem 1015
 significant, eadem fruges arbusta animantis;
 si non omnia sunt, at multo maxima pars est
 consimilis; verum positura discrepant res.
 sic ipsis in rebus item iam material 1019
 concursus motus ordo positura figurae 1021
 cum permutantur, mutari res quoque debent.

Nunc animum nobis adhibe veram ad rationem.
 nam tibi vementer nova res molitur ad auris
 accidere et nova se species ostendere rerum. 1025
 sed neque tam facilis res ulla est quin ea primum
 difficilis magis ad credendum constet, itemque
 nil adeo magnum neque tam mirabile quicquam
 quod non paulatim minuant mirarier omnes.
 principio caeli clarum purumque colorem, 1030
 quaeque in se cohibet, palantia sidera passim,
 lunamque et solis praeclara luce nitorem;

1002 res ut *Marullus* : ut res *OQ* 1004 coniungit et efficit] con-
 iungitur, et fit ut *Lachmann* : coniungit, et effit ut *Munro* 1005 ita]
 ut *Marullus* 1007 eadem *Avancius* : earum *OQ* 1015-16
 (= i. 820, 821 nisi significant pro constituunt) *secl. Lachmann* 1017
 sunt *Lachmann* : sint *OQ* 1020 = 726 *secl. Lachmann* 1024
 vementer *Avancius* : uehementes *OQ* 1025 accidere *Marullus* :
 accedere *OQ* 1029 minuant] mittant *Lachmann* : alii alia mira-
 rier *Ital.* : miralier *O* : miraliter *Q* 1030 principio] percipito
Lachmann : suspicito *Bernays*

omnia quae nunc si primum mortalibus essent,
 ex improvise si sint obiecta repente,
 quid magis his rebus poterat mirabile dici 1035
 aut minus ante quod auderent fore credere gentes?
 nil, ut opinor: ita haec species miranda fuisset.
 quam tibi iam nemo, fessus satiate videndi,
 suspicere in caeli dignatur lucida templa!
 desine quapropter novitate exterritus ipsa 1040
 exspuere ex animo rationem, sed magis acri
 iudicio perpende et, si tibi vera videntur,
 dede manus, aut, si falsum est, accingere contra.
 quaerit enim rationem animus, cum summa loci sit
 infinita foris haec extra moenia mundi, 1045
 quid sit ibi porro quo prospicere usque velit mens
 atque animi iactus liber quo pervolet ipse.

Principio nobis in cunctas undique partis
 et latere ex utroque (supra) subterque per omne
 nulla est finis; uti docui, res ipsaque per se 1050
 vociferatur, et elucet natura profundi.
 nullo iam pacto veri simile esse putandumst,
 undique cum versum spatium vacet infinitum
 seminaque innumero numero summaque profunda
 multimodis volitent aeterno percita motu, 1055
 hunc unum terrarum orbem caelumque creatum,
 nil agere illa foris tot corpora materiai;
 cum praesertim hic sit natura factus, ut ipsa
 sponte sua forte offensando semina rerum
 multimodis temere incassum frustra coacta 1060
 tandem coluerunt ea quae coniecta repente
 magnarum rerum fierent exordia semper,
 terrai maris et caeli generisque animantum.

1033 essent] extent *Orelli* 1034 sint] nunc *Munro* 1047 iactus
Gronovius: tactus *OQ* 1049 supra supterque *Lachmann*: super-
 que *OQ* 1052 veri simile *Ital.*: uerist mile *O*: uerist mille *Q*
 1058 ut *Munro*: et *OQ* 1061 coluerunt *Lachmann*: colerunt *OQ*:
 colarunt *L* coniecta] convecta *Lachmann*: concreta *Brieger* 1062
 exordia *Marullus*: ex ordine *OQ*

quare etiam atque etiam talis fateare necesse est
 esse alios alibi congressus materiai, 1065
 qualis hic est, avido complexu quem tenet aether.

Praeterea cum materies est multa parata,
 cum locus est praesto nec res nec causa moratur
 ulla, geri debent nimirum et confieri res.
 nunc et seminibus si tanta est copia quantam 1070
 enumerare aetas animantium non queat omnis,
 vis(que) eadem (et) natura manet quae semina rerum
 conicere in loca quaeque queat simili ratione
 atque huc sunt coniecta, necesse est confiteare
 esse alios aliis terrarum in partibus orbis 1075
 et varias hominum gentis et saecula ferarum.

Huc accedit ut in summa res nulla sit una,
 unica quae gignatur et unica solaque crescat,
 quin alicuiu' siet saeculi permultaque eodem
 sint genere. in primis animalibus inice mentem; 1080
 inuenies sic montivagum genus esse ferarum,
 sic hominum genitam prolem, sic denique mutas
 squamigerum pecudes et corpora cuncta volantum.
 quapropter caelum simili ratione fatendumst
 terramque et solem lunam mare, cetera quae sunt, 1085
 non esse unica, sed numero magis innumerali;
 quandoquidem vitae depactus terminus alte
 tam manet haec et tam nativo corpore constant,
 quam genus omne quod hic generatimst rebus abundans.

Quae bene cognita si teneas, natura videtur 1090
 libera continuo dominis privata superbis
 ipsa sua per se sponte omnia dis agere expers.
 nam pro sancta deum tranquilla pectora pace

1072 visque *Marullus*: uis *OQ*: quis *Lachmann*: sique *Brieger*,
lacuna ante hunc versum indicata et add. *Marullus* 1073 quae-
 que queat *l 31*: quaequeat *O*: quaequead *Q* 1079 aliquoiu' siet
Gronovius: aliquoiuis siet *Q*: alioquoiuis *O* 1080 inice mentem
Lipsius: indice mente *OQ*: inclute Memini *Gronovius* 1081 in-
 venies *Pontanus*: inuenisse *OQ* 1082 genitam *Marullus*:
 geminam *OQ* 1089 hic generatimst *Munro*: his generatim *Q*:
 his generat in *O*: est generatim *Lachmann*

quae placidum degunt aevum vitamque serenam,
 quis regere immensi summam, quis habere profundi 1095
 indu manu validas potis est moderanter habenas,
 quis pariter caelos omnis convertere et omnis
 ignibus aetheriis terras suffire feraces,
 omnibus inve locis esse omni tempore praesto,
 nubibus ut tenebras faciat caelique serena 1100
 concutiat sonitu, tum fulmina mittat et aedes
 saepe suas disturbet et (in) deserta recedens
 saeviat exercens telum quod saepe nocentis
 praeterit exanimatque indignos inque merentis?

Multaque post mundi tempus genitale diemque 1105
 primigenum maris et terrae solisque coortum
 addita corpora sunt extrinsecus, addita circum
 semina quae magnum iaculando contulit omne;
 unde mare et terrae possent augescere et unde
 appareret spatium caeli domus altaque tecta 1110
 tolleret a terris procul et consurgeret aer.
 nam sua cuique locis ex omnibus omnia plagis
 corpora distribuuntur et ad sua saecula recedunt,
 umor ad umorem, terreno corpore terra
 crescit et ignem ignes procudunt aetheraque (aether), 1115
 donec ad extremum crescendi perfica finem
 omnia perduxit rerum natura creatrix;
 ut fit ubi nilo iam plus est quod datur intra
 vitalis venas quam quod fluit atque recedit.
 omnibus hic aetas debet consistere rebus, 1120
 hic natura suis refrenat viribus auctum.
 nam quaecumque vides hilario grandescere adauctu
 paulatimque gradus aetatis scandere adultae,
 plura sibi assumunt quam de se corpora mittunt,

1102 in *add. Q corr.* 1110 appareret *L*: appariret *OQ* 1115
 aether *add. l 31*: aeraque aer *Lachmann* 1116 extremum (*cf. i. 555*)
 extremam *Lachmann* 1120 hic *Munro*: his *OQ* 1124 corpora
Q corr.: cora *OQ*

dum facile in venas cibus omnis inditur et dum 1125
 non ita sunt late dispessa ut multa remittant
 et plus dispendi faciant quam vescitur aetas.
 nam certe fluere atque recedere corpora rebus
 multa manus dandum est; sed plura accedere debent,
 donec alescendi summum tetigere cacumen. 1130
 inde minutatim viris et robur adultum
 frangit et in partem peiorem liquitur aetas.
 quippe etenim quanto est res amplior, augmine adempto,
 et quo latior est, in cunctas undique partis
 plura modo dispergit et ab se corpora mittit, 1135
 nec facile in venas cibus omnis diditur ei
 nec satis est, pro quam largos exaestuat aestus,
 unde queat tantum suboriri ac suppeditare.
 iure igitur pereunt, cum rarefacta fluendo
 sunt et cum externis succumbunt omnia plagis, 1140
 quandoquidem grandi cibus aevo denique defit,
 nec tuditantia rem cessant extrinsecus ullam
 corpora conficere et plagis infesta domare.
 sic igitur magni quoque circum moenia mundi
 expugnata dabunt labem putris(que) ruinas. 1145
 omnia debet enim cibus integrare novando
 et fulcire cibus, (cibus) omnia sustentare,
 nequiquam, quoniam nec venae perpetiuntur
 quod satis est neque quantum opus est natura ministrat.
 iamque adeo fracta est aetas effetaque tellus 1150
 vix animalia parva creat quae cuncta creavit
 saecula deditque ferarum ingentia corpora partu.
 haud, ut opinor, enim mortalia saecula superne
 aurea de caelo demisit funis in arva
 nec mare nec fluctus plangentes saxa crearunt, 1155

1126 dispessa *Munro*: dispersa *OQ* 1129 debent *l31*: debet *OQ*
 1136 diditur *Marullus*: deditur *OQ* 1138 queat *Marullus*:
 queant *OQ* ante 1139 versus 1146-9 collocavit *Goebel* 1145 que
 add. *Q* corr. 1147 cibus add. *Vossius* 1150 fracta *Q* corr.:
 facta *OQ* 1153 enim mortalia *Marullus*: et immortalia *O*:
 e immortalia *Q*

sed genuit tellus eadem quae nunc alit ex se.
 praeterea nitidas fruges vinetaque laeta
 sponte sua primum mortalibus ipsa creavit,
 ipsa dedit dulcis fetus et pabula laeta ;
 quae nunc vix nostro grandescunt aucta labore, 1160
 conterimusque boves et viris agricolarum,
 conficimus ferrum vix arvis suppeditati :
 usque adeo parcunt fetus augentque laborem.
 iamque caput quassans grandis suspirat arator
 crebrius, incassum magnos cecidisse labores, 1165
 et cum tempora temporibus praesentia confert
 praeteritis, laudat fortunas saepe parentis.
 tristis item vetulae vitis sator atque <vietae>
 temporis incusat momen caelumque fatigat,
 et crepat, antiquum genus ut pietate repletum 1170
 perfacile angustis tolerarit finibus aevum,
 cum minor esset agri multo modus ante viritim.
 nec tenet omnia paulatim tabescere et ire
 ad †scopulum† spatio aetatis defessa vetusto.

1162 suppeditati] suppetiati *Ellis* : suppeditat iam *Brieger*, qui post
 conficimus *interpunxit* 1163 laborem *Pius* : labore *OQ* 1165
 magnos *Q* *corr.* : magnum *OQ* : manuum *Vossius* labores] laborem
Goebel ante 1168 versus 1170-2 collocavit *Bergk* 1168 vie-
 tae *Heinsius* : fatigat *OQ* (ex 1169) : caducae *Merrill* 1169 momen
Pius : nomen *OQ* caelum *Wakefield* : saeclum *OQ* 1174 scopu-
 lum *O* : copulum *Q* : capulum *Vossius*

T LVCRETI CARI DE RERVVM NATVRA

LIBER TERTIVS

E tenebris tantis tam clarum extollere lumen
qui primus potuisti inlustrans commoda vitae,
te sequor, o Graiae gentis decus, inque tuis nunc
ficta pedum pono pressis vestigia signis,
non ita certandi cupidus quam propter amorem 5
quod te imitari aveo ; quid enim contendat hirundo
cycnis, aut quidnam tremulis facere artubus haedi
consimile in cursu possint et fortis equi vis?
tu pater es, rerum inventor, tu patria nobis
suppeditas praecepta, tuisque ex, inclute, chartis, 10
floriferis ut apes in saltibus omnia libant,
omnia nos itidem depascimur aurea dicta,
aurea, perpetua semper dignissima vita.
nam simul ac ratio tua coepit vociferari
naturam rerum, divina mente coorta, 15
diffugiunt animi terrores, moenia mundi
discedunt, totum video per inane geri res.
apparet divum numen sedesque quietae
quas neque concutiunt venti nec nubila nimbis
aspergunt neque nix acri concreta pruina 20
cana cadens violat semper(que) innubilus aether

1 E *Mon.*: O O: *om.* Q 11 libant *Avancius*: limant OQ
15 coorta *Orelli*: coortam O: coartam Q 21 semperque *L corr.*:
semper OQ

integit, et large diffuso lumine ridet.

omnia suppeditat porro natura neque ulla

res animi pacem delibat tempore in ullo.

at contra nusquam apparent Acherusia templa

25

nec tellus obstat quin omnia dispiciantur,

sub pedibus quaecumque infra per inane geruntur.

his ibi me rebus quaedam divina voluptas

percipit atque horror, quod sic natura tua vi

tam manifesta patens ex omni parte resecta est.

30

Et quoniam docui, cunctarum exordia rerum

qualia sint et quam variis distantia formis

sponte sua volitent aeterno percita motu

quove modo possint res ex his quaeque creari,

hasce secundum res animi natura videtur

35

atque animae claranda meis iam versibus esse

et metus ille foras praeceptis Acheruntis agendus,

funditus humanam qui vitam turbat ab imo

omnia suffundens mortis nigrore neque ullam

esse voluptatem liquidam puramque relinquit.

40

nam quod saepe homines morbos magis esse timendos

infamemque ferunt vitam quam Tartara leti

et se scire animi naturam sanguinis esse

aut etiam venti, si fert ita forte voluntas,

[46]

nec prorsum quicquam nostrae rationis egere,

45 [44]

hinc licet advertas animum magis omnia laudis

[45]

iactari causa quam quod res ipsa probetur,

extorres idem patria longeque fugati

conspectu ex hominum, foedati crimine turpi,

omnibus aerumnis adfecti denique vivunt,

50

et quocumque tamen miseri venere parentant

et nigras mactant pecudes et manibu' divis

22 ridet] rident *Lachmann* 28 ibi *Pontanus*: ubi *OQ* 29 sic
 natura *Avancius*: signatura *OQ* 33 aeterno *Bentley*: alterno *O*:
 alterna *Q* 43 animi *O*: anime *Q*: animae *Lachmann* 44 [46] hic
locavit Bentley

inferias mittunt multoque in rebus acerbis
acrius advertunt animos ad religionem.
quo magis in dubiis hominem spectare periculis 55
convenit adversisque in rebus noscere qui sit ;
nam verae voces tum demum pectore ab imo
eliciuntur (et) eripitur persona, manet res.
denique avarities et honorum caeca cupido
quae miseros homines cogunt transcendere finis 60
iuris et interdum socios scelerum atque ministros
noctes atque dies niti praestante labore
ad summas emergere opes, haec vulnera vitae
non minimam partem mortis formidine aluntur.
turpis enim ferme contemptus et acris egestas 65
semota ab dulci vita stabilique videtur
et quasi iam leti portas cunctarier ante ;
unde homines dum se falso terrore coacti
effugisse volunt longe longeque remosse,
sanguine civili rem conflant divitiasque 70
conduplicant avidi, caedem caede accumulantes ;
crudeles gaudent in tristi funere fratris
et consanguineum mensas odere timentque.
consimili ratione ab eodem saepe timore
macerat invidia ante oculos illum esse potentem, 75
illum aspectari, claro qui incedit honore,
ipsi se in tenebris volvi caenoque queruntur.
intereunt partim statuarum et nominis ergo.
et saepe usque adeo, mortis formidine, vitae
percipit humanos odium lucisque videndae, 80
ut sibi consciscant maerenti pectore letum
obliti fontem curarum hunc esse timorem,
hunc vexare pudorem, hunc vincula amicitiai

58 eliciuntur] eiciuntur *Lambinus* et *add. Ital.* manet res *l 31* :
manare *OQ* : mala re *Hcinze* : homini re *Merrill* 66 videtur]
videntur *Lambinus* 72 fratris *Macrobius* : fratres *OQ* 78 statua-
rum *l 31* : statum *OQ* 81 consciscant *L* : conisciscant *OQ*

rumpere et in summa pietatem evertere †suadet†.
 nam iam saepe homines patriam carosque parentis 85
 prodiderunt, vitare Acherusia templa petentes.
 nam veluti pueri trepidant atque omnia caecis
 in tenebris metuunt, sic nos in luce timemus
 interdum, nilo quae sunt metuenda magis quam
 quae pueri in tenebris pavitant finguntque futura. 90
 hunc igitur terrorem animi tenebrasque necessest
 non radii solis neque lucida tela diei
 discutiant, sed naturae species ratioque.

Primum animum dico, mentem quam saepe vocamus,
 in quo consilium vitae regimenque locatum est, 95
 esse hominis partem nilo minus ac manus et pes
 atque oculi partes animantis totius exstant.

*

sensum animi certa non esse in parte locatum,
 verum habitum quendam vitalem corporis esse,
 harmoniam Grai quam dicunt, quod faciat nos 100
 vivere cum sensu, nulla cum in parte siet mens ;
 ut bona saepe valetudo cum dicitur esse
 corporis, et non est tamen haec pars ulla valentis.
 sic animi sensum non certa parte reponunt ;
 magno opere in quo mi diversi errare videntur. 105
 saepe itaque in promptu corpus quod cernitur aegret,
 cum tamen ex alia laetamur parte latenti ;
 et retro fit uti contra sit saepe vicissim,
 cum miser ex animo laetatur corpore toto ;
 non alio pacto quam si, pes cum dolet aegri, 110
 in nullo caput interea sit forte dolore.

84 suadet OQ, retinet Munro post 82 versum intercidisse indicans :
 fraude Lachmann : clade Bernays : suesse Merrill 94 quam Chari-
 sius : quem OQ 95 locatum Marullus : uocatum OQ 97 * 98
 lacunam indicaverunt editores veteres 106 aegret Lachmann (au-
 ctore grammatico Vindobonensi Eichenfeldii) : aegrum OQ 108 uti
 Lambinus : ubi OQ 110 aegri] aeger Bockemüller

praeterea molli cum somno dedita membra
 effusumque iacet sine sensu corpus onustum,
 est aliud tamen in nobis quod tempore in illo
 multimodis agitur et omnis accipit in se 115
 laetitiae motus et curas cordis inanis.

nunc animam quoque ut in membris cognoscere possis
 esse neque harmonia corpus sentire solere,
 principio fit uti detracto corpore multo
 saepe tamen nobis in membris vita moretur; 120
 atque eadem rursum, cum corpora pauca caloris
 diffugere forasque per os est editus aer,
 deserit extemplo venas atque ossa relinquit;
 noscere ut hinc possis non aequas omnia partis
 corpora habere neque ex aequo fulcire salutem, 125
 sed magis haec, venti quae sunt calidique vaporis
 semina, curare in membris ut vita moretur.

est igitur calor ac ventus vitalis in ipso
 corpore qui nobis moribundos deserit artus.
 quapropter quoniam est animi natura reperta 130
 atque animae quasi pars hominis, redde harmoniai
 nomen, ad organicos alto delatum Heliconi;
 sive aliunde ipsi porro traxere et in illam
 transtulerunt, proprio quae tum res nomine egebat.
 quidquid (id) est, habeant: tu cetera percipe dicta. 135

Nunc animum atque animam dico coniuncta teneri
 inter se atque unam naturam conficere ex se,
 sed caput esse quasi et dominari in corpore toto
 consilium quod nos animum mentemque vocamus.
 idque situm media regione in pectoris haeret. 140
 hic exultat enim pavor ac metus, haec loca circum
 laetitiae mulcent; hic ergo mens animusquest.
 cetera pars animae per totum dissita corpus

113 honustum *Q* corr.: honestum *OO* 118 sentire *Wakefield*:
 interire *OO*: alii *aha* 132 alto *O* corr.: altu *O*: saltu *Q* 135
 id add. l 31

paret et ad numen mentis momenque movetur.
 idque sibi solum per se sapit, <id> sibi gaudet, 145
 cum neque res animam neque corpus commovet una.
 et quasi, cum caput aut oculus temptante dolore
 laeditur in nobis, non omni concruciamur
 corpore, sic animus nonnumquam laeditur ipse
 laetitiaque viget, cum cetera pars animai 150
 per membra atque artus nulla novitate cietur.
 verum ubi vementi magis est commota metu mens,
 consentire animam totam per membra videmus
 sudoresque ita palloremque exsistere toto
 corpore et infringi linguam vocemque aboriri, 155
 caligare oculos, sonere auris, succidere artus,
 denique concidere ex animi terrore videmus
 saepe homines; facile ut quivis hinc noscere possit
 esse animam cum animo coniunctam, quae cum animi <vi>
 percussast, exim corpus propellit et icit. 160

Haec eadem ratio naturam animi atque animai
 corpoream docet esse. ubi enim propellere membra,
 corripere ex somno corpus mutareque vultum
 atque hominem totum regere ac versare videtur,
 quorum nil fieri sine tactu posse videmus 165
 nec tactum porro sine corpore, nonne fatendumst
 corporea natura animum constare animamque?
 praeterea pariter fungi cum corpore et una
 consentire animum nobis in corpore cernis.
 si minus offendit vitam vis horrida teli 170
 ossibus ac nervis disclusis intus adacta,
 at tamen insequitur languor terraeque petitus
 suavis et in terra mentis qui gignitur aestus,

145 id *add. Wakefield* : et *L* 146 una] ulla *Havercamp* 154 ita
 palloremque *L* : itaque pallorem *OO* 159 vi *add. Q corr.* 170
 offendit *Q corr.* : offendis *OO* teli *Marullus* : leti *OO* 173 suavis]
 suppus *Lachmann* : saevus *Bernays* : segnis *Munro* in terra] in-
 terea *Brieger*

interdumque quasi exsurgendi incerta voluntas.
ergo corpoream naturam animi esse necessest, 175
corporeis quoniam telis ictuque laborat.

Is tibi nunc animus quali sit corpore et unde
constiterit pergam rationem reddere dictis.
principio esse aio persubtilem atque minutis
perquam corporibus factum constare. id ita esse 180
hinc licet advertas animum ut pernoscere possis.
nil adeo fieri celeri ratione videtur,

quam sibi mens fieri proponit et incohat ipsa.
ocius ergo animus quam res se perciet ulla,
ante oculos quorum in promptu natura videtur. 185

at quod mobile tanto operest, constare rotundis
perquam seminibus debet perquamque minutis,
momine uti parvo possint impulsa moveri.
namque movetur aqua et tantillo momine flutat
quippe volubilibus parvisque creata figuris. 190

at contra mellis constantior est natura
et pigri latices magis et cunctantior actus ;
haeret enim inter se magis omnis materiali
copia, nimirum quia non tam levibus exstat
corporibus neque tam subtilibus atque rotundis. 195

namque papaveris aura potest suspensa levisque
cogere ut ab summo tibi diffluat altus acervus :
at contra lapidum collectum spicarumque
noenu potest. igitur parvissima corpora proquam
et levissima sunt, ita mobilitate fruuntur. 200

at contra quaecumque magis cum pondere magno
asperaque inveniuntur, eo stabilita magis sunt.
nunc igitur quoniam (est) animi natura reperta
mobilis egregie, perquam constare necessest

176 corporeis *Q* corr. : corporis *OO* 183 sibi *Wakefield* : si *OO*
198 conlectum *Muretus* : coniectum *OO* spicarumque] spiclorum-
que *Lambinus* : cauru' movere *Bernays* : ipse euru' movere *Munro* :
alii alia 203 est add. *Pontanus*

corporibus parvis et levibus atque rotundis. 205
 quae tibi cognita res in multis, o bone, rebus
 utilis invenietur et opportuna cluebit.
 haec quoque res etiam naturam dedicat eius,
 quam tenui constet textura quamque loco se
 contineat parvo, si possit conglomerari, 210
 quod simul atque hominem leti secura quies est
 indepta atque animi natura animaeque recessit,
 nil ibi libatum de toto corpore cernas
 ad speciem, nil ad pondus: mors omnia praestat
 vitalem praeter sensum calidumque vaporem. 215
 ergo animam totam perparvis esse necessest
 seminibus, nexam per venas viscera nervos;
 quatenus, omnis ubi e toto iam corpore cessit,
 extima membrorum circumcaesura tamen se
 incolumem praestat nec defit ponderis hilum. 220
 quod genus est Bacchi cum flos evanuit aut cum
 spiritus unguenti suavis diffugit in auras
 aut aliquo cum iam sucus de corpore cessit;
 nil oculis tamen esse minor res ipsa videtur
 propterea neque detractum de pondere quicquam, 225
 nimirum quia multa minutaque semina sucos
 efficiunt et odorem in toto corpore rerum.
 quare etiam atque etiam mentis naturam animaeque
 scire licet perquam paucillis esse creatam
 seminibus, quoniam fugiens nil ponderis aufert. 230
 Nec tamen haec simplex nobis natura putanda est.
 tenuis enim quaedam moribundos deserit aura
 mixta vapore, vapor porro trahit aera secum.
 nec calor est quisquam, cui non sit mixtus et aer.
 rara quod eius enim constat natura, necessest 235
 aeris inter eum primordia multa moveri.

210 si *L*: se *OQ* 222 unguenti *Q* *corr.*: unguente *O*: un-
 guentes *Q* 224 nihil *OQ*: nilo *Heinsius* 232 tenuis *Q* *corr.*:
 tenuis *OQ* 236 multa moveri *O* *corr.*: multam quaeri *O*: multam
 queri *Q*

iam triplex animi est igitur natura reperta ;
 nec tamen haec sat sunt ad sensum cuncta creandum,
 nil horum quoniam recipit mens posse creare
 sensiferos motus †quaedamque mente volutat†. 240
 quarta quoque his igitur quaedam natura necessest
 attribuatur. east omnino nominis expers ;
 qua neque mobilius quicquam neque tenvius exstat,
 nec magis e parvis et levibus ex elementis ;
 sensiferos motus quae didit prima per artus. 245
 prima cietur enim, parvis perfecta figuris ;
 inde calor motus et venti caeca potestas
 accipit, inde aer ; inde omnia mobilitantur,
 concutitur sanguis, tum viscera persentiscunt
 omnia, postremis datur ossibus atque medullis 250
 sive voluptas est sive est contrarius ardor.
 nec temere huc dolor usque potest penetrare neque acre
 permanare malum, quin omnia perturbentur
 usque adeo (ut) vitae desit locus atque animai
 diffugiant partes per caulas corporis omnis. 255
 sed plerumque fit in summo quasi corpore finis
 motibus : hanc ob rem vitam retinere valemus.

Nunc ea quo pacto inter sese mixta quibusque
 compta modis vigeant rationem reddere aventem
 abstrahit invitum patrii sermonis egestas ; 260
 sed tamen, ut potero summatim attingere, tangam.
 inter enim cursant primordia principiorum
 motibus inter se, nil ut secernier unum
 possit nec spatio fieri divisa potestas,
 sed quasi multae vis unius corporis exstant. 265
 quod genus in quovis animantum viscere vulgo

239 mens] res *Bernays* 240 quaedamque mente volutat *O* :
 (quaedamque) *Q* : qui dant quae mente volutes *Vossius* : nedum (*Polle*)
 quae mente volutat *Giussani* (volutas *Postgate*) : quoscumque in mente
 volutat *Merrill* : alii alia 244 ex (cf. vi. 353)] est *Wakefield* 249
 sanguis, tum *Pontanus* : tum sanguis *OQ* 254 ut add. *Lambinus*
 257 retinere *O corr.* : retinemus *OQ* 258 sese] se sint *Brieger*

est odor et quidam calor et sapor, et tamen ex his
 omnibus est unum perfectum corporis augmen.
 sic calor atque aer et venti caeca potestas
 mixta creant unam naturam et mobilis illa 270
 vis, initum motus ab se quae dividit ollis,
 sensifer unde oritur primum per viscera motus.
 nam penitus prorsum latet haec natura subestque
 nec magis hac infra quicquam est in corpore nostro
 atque anima est animae proporro totius ipsa. 275
 quod genus in nostris membris et corpore toto
 mixta latens animi vis est animaeque potestas,
 corporibus quia de parvis paucisque creatast.
 sic tibi nominis haec expers vis facta minutis
 corporibus latet atque animae quasi totius ipsa 280
 proporrost anima et dominatur corpore toto.
 consimili ratione necessest ventus et aer
 et calor inter se vigeant commixta per artus
 atque aliis aliud subsit magis emineatque
 ut quiddam fieri videatur ab omnibus unum, 285
 ni calor ac ventus sorsum sorsumque potestas
 aeris interimant sensum diductaque solvant.
 est etiam calor ille animo, quem sumit, in ira
 cum fervescit et ex oculis micat acrius ardor.
 est et frigida multa comes formidinis aura 290
 quae ciet horrorem membris et concitat artus.
 est etiam quoque pacati status aeris ille,
 pectore tranquillo qui fit vultuque sereno.
 sed calidi plus est illis quibus acria corda
 iracundaque mens facile effervescit in ira. 295
 quo genere in primis vis est violenta leonum,
 pectora qui fremitu rumpunt plerumque gementes

267 calor] color *Lambinus* 284 aliis] alias *Brieger* 288 etiam]
 etenim *Faber* 289 acrius] acribus *Lambinus* 293 qui fit
Marullus : fit qui *OQ*

nec capere irarum fluctus in pectore possunt.
 at ventosa magis cervorum frigida mens est
 et gelidas citius per viscera concitat auras 300
 quae tremulum faciunt membris existere motum.
 at natura boum placido magis aere vivit,
 nec nimis irai fax umquam subdita percit
 fumida, suffundens caecae caliginis umbra,
 nec gelidis torpet telis perfixa pavoris : 305
 interutrasque sitast, cervos saevosque leones.
 sic hominum genus est. quamvis doctrina politos
 constituat pariter quosdam, tamen illa relinquit
 naturae cuiusque animi vestigia prima.
 nec radicitus evelli mala posse putandumst, 310
 quin proclivius hic iras decurrat ad acris,
 ille metu citius paulo temptetur, at ille
 tertius accipiat quaedam clementius aequo.
 inque aliis rebus multis differre necessest
 naturas hominum varias moresque sequaces ; 315
 quorum ego nunc nequeo caecas exponere causas
 nec reperire figurarum tot nomina quot sunt
 principiis, unde haec oritur variantia rerum.
 illud in his rebus video firmare potesse,
 usque adeo naturarum vestigia linqui 320
 parvula quae nequeat ratio depellere nobis,
 ut nil impediât dignam dis degere vitam.

Haec igitur natura tenetur corpore ab omni
 ipsaque corporis est custos et causa salutis ;
 nam communibus inter se radicibus haerent 325
 nec sine perniciē divelli posse videntur.
 quod genus e thuris glæbis evellere odorem

303 nimis *l* 31: minus *OQ* 304 fumida suffundens *O corr.*:
 fumidas effundens *O* (fumides *Q*) umbra *Q*: umbram *O* 305
 pavoris *O corr.*: uaporis *OQ* 306 sitast *Avancius*: sitas *OQ* 317
 quot *O corr.*: quod *OQ* 319 video] videor *Faber* firmare
ed. Veronensis: formare *OQ* 321 nobis *Lachmann*: noctis *O*:
 noctes *Q*

haud facile est quin intereat natura quoque eius.
 sic animi atque animae naturam corpore toto
 extrahere haud facile est quin omnia dissoluantur. 330
 implexis ita principiis ab origine prima
 inter se fiunt consorti praedita vita
 nec sibi quaeque sine alterius vi posse videtur
 corporis atque animi sorsum sentire potestas,
 sed communibus inter eas conflatur utrimque 335
 motibus accensus nobis per viscera sensus.
 praeterea corpus per se nec gignitur umquam
 nec crescit neque post mortem durare videtur.
 non enim, ut umor aquae dimittit saepe vaporem
 qui datus est, neque ea causa convellitur ipse, 340
 sed manet incolumis, non, inquam, sic animai
 discidium possunt artus perferre relictī,
 sed penitus pereunt convulsi conque putrescunt.
 ex ineunte aevo sic corporis atque animai
 mutua vitalis discunt contagia motus 345
 maternis etiam membris alvoque reposta,
 discidium (ut) nequeat fieri sine peste maloque;
 ut videas, quoniam coniunctast causa salutis,
 coniunctam quoque naturam consistere eorum.
 Quod superest, siquis corpus sentire refutat 350
 atque animam credit permixtam corpore toto
 suscipere hunc motum quem sensum nominamus,
 vel manifestas res contra verasque repugnat.
 quid sit enim corpus sentire quis adferet umquam,
 si non ipsa palam quod res dedit ac docuit nos? 355
 at dimissa anima corpus caret undique sensu;
 perdit enim quod non proprium fuit eius in aevo,
 multaque praeterea perdit cum expellitur aevo.

332 fiunt consorti *O corr.*: consorti fiunt *OQ* vita *Marullus*:
 uitae *OQ* 335 eas *Lachmann*: eos *OQ*: se coni. *Merrill* 346 re-
 posta *Arancius*: reposto *OQ* 347 ut add. *Marullus* 350 refutat]
 renutat *Lambinus* 358 perdit cum expellitur aevo *l 31*: per-
 ditum expellitur aevo quam *OQ*: perdit quam expellitur ante *Munro*

Dicere porro oculos nullam rem cernere posse,
 sed per eos animum ut foribus spectare reclusis, 360
 difficilest, contra cum sensus ducat eorum;
 sensus enim trahit atque acies detrudit ad ipsas;
 fulgida praesertim cum cernere saepe nequimus,
 lumina luminibus quia nobis praepediuntur.
 quod foribus non fit; neque enim, qua cernimus ipsi, 365
 ostia suscipiunt ullum reclusa laborem.

praeterea si pro foribus sunt lumina nostra,
 iam magis exemptis oculis debere videtur
 cernere res animus sublatis postibus ipsis.

Illud in his rebus nequaquam sumere possis, 370
 Democriti quod sancta viri sententia ponit,
 corporis atque animi primordia singula privis
 apposita alternis variare, ac nectere membra.
 nam cum multo sunt animae elementa minora
 quam quibus e corpus nobis et viscera constant, 375
 tum numero quoque concedunt et rara per artus
 dissita sunt dumtaxat; ut hoc promittere possis,
 quantula prima queant nobis iniecta ciere
 corpora sensiferos motus in corpore, tanta
 intervalla tenere exordia prima animai. 380
 nam neque pulveris interdum sentimus adhaesum
 corpore nec membris incussam sidere cretam,
 nec nebulam noctu neque aranei tenvia fila
 obvia sentimus, quando obretimur euntes,
 nec supera caput eiusdem cecidisse vietam 385
 vestem nec plumas avium papposque volantis
 qui nimia levitate cadunt plerumque gravatim,
 nec repentis itum cuiusviscumque animantis
 sentimus nec priva pedum vestigia quaeque,

361 difficilest] desiperest *Lambinus* ducat] dicat *Lambinus*
 365 qua] quia *Lachmann*: qui *Merrill* 372 privis *Bentley*: primis *OQ*
 378, 380 prima] priva *Bentley* 383 aranei *Marullus*: arani *OQ*

corpore quae in nostro culices et cetera ponunt. 390
 usque adeo prius est in nobis multa ciendum,
 quam primordia sentiscant concussa animai
 semina corporibus nostris immixta per artus,
 et quam in his intervallis tuditantia possint
 concursare coire et dissultare vicissim. 395

Et magis est animus vitae claustra coercens
 et dominantior ad vitam quam vis animai.
 nam sine mente animoque nequit residere per artus
 temporis exiguam partem pars ulla animai,
 sed comes insequitur facile et discedit in auras 400
 et gelidos artus in leti frigore linquit.

at manet in vita cui mens animusque remansit.
 quamvis est circum caesis lacer undique membris
 truncus, adempta anima circum membrisque remota
 vivit et aetherias vitalis suscipit auras. 405

si non omnimodis, at magna parte animai
 privatus, tamen in vita cunctatur et haeret;
 ut, lacerato oculo circum si pupula mansit
 incolumis, stat cernundi vivata potestas,
 dummodo ne totum corrumpas luminis orbem 410
 et circum caedas aciem solamque relinquis;
 id quoque enim sine perniciē non fiet eorum.
 at si tantula pars oculi media illa peresa est,
 occidit extemplo lumen tenebraeque sequuntur,
 incolumis quamvis alioquid splendidus orbis. 415
 hoc anima atque animus vincti sunt foedere semper.

Nunc age, nativos animantibus et mortalis
 esse animos animasque levis ut noscere possis,
 conquisita diu dulcique reperta labore
 digna tua pergam disponere carmina vita. 420

391 ciendum *Avancius*: ciendo *OQ* 394 quam in his *Lachmann*:
 quantis *OQ*: quam sis *Heinze* 400 et *Q* corr.: e *OQ* 403 cir-
 cum *l 31*: cretum *OQ* 404 remota *Q* corr.: remot *Q*: remotus *O*
 405 aetherias] aerias *Lachmann* 412 eorum] et orbei *Munro*
 415 alioquid *Kannengisser*: alioqui *OQ*: aliquoi sit *Munro* 420
 vita] cura *Lachmann*

tu fac utrumque uno sub iungas nomine eorum,
 atque animam verbi causa cum dicere pergam,
 mortalem esse docens, animum quoque dicere credas,
 quatenus est unum inter se coniunctaque res est.
 principio quoniam tenuem constare minutis 425
 corporibus docui multoque minoribus esse
 principiis factam quam liquidus umor aquai
 aut nebula aut fumus—nam longe mobilitate
 praestat et a tenui causa magis icta movetur;
 quippe ubi imaginibus fumi nebulaeque movetur. 430
 quod genus in somnis sopiti ubi cernimus alte
 exhalare vaporem altaria ferreque fumum;
 nam procul haec dubio nobis simulacra geruntur—
 nunc igitur quoniam quassatis undique vasis
 diffluere umorem et laticem discedere cernis 435
 et nebula ac fumus quoniam discedit in auras,
 crede animam quoque diffundi multoque perire
 ocius et citius dissolvi (in) corpora prima,
 cum semel ex hominis membris ablata recessit.
 quippe etenim corpus, quod vas quasi constitit eius, 440
 cum cohibere nequit conquassatum ex aliqua re
 ac rarefactum detracto sanguine venis,
 aere qui credas posse hanc cohiberier ullo,
 corpore qui nostro rarus magis †incohibescit†?
 Praeterea gigni pariter cum corpore et una 445
 crescere sentimus pariterque senescere mentem.
 nam velut infirmo pueri teneroque vagantur
 corpore, sic animi sequitur sententia tenvis.
 inde ubi robustis adolevit viribus aetas,
 consilium quoque maius et auctior est animi vis. 450
 post ubi iam validis quassatum est viribus aevi

421 nomine *Q* corr.: nome *OQ* 428 nam] iam *Lachmann*
 430 movetur *Marullus*: mouentur *OQ* 431 alte *Lachmann*:
 alta *OQ* 432 vaporem *Lachmann*: uapore *OQ* 433 haec]
 hinc *Bentley* geruntur] genuntur *Lambinus*: feruntur *Creech* 438
 in *add. Q* corr. 441 cum] quam *Marullus* 444 incohibescit *OQ*:
 is cohibessit? *Lachmann*: (mage) sit, cohibessit? *Winckelmann*: in-
 cohibensquest *Nenciini*: incohibens sit *Woltjer*: alii alia 450 auctior
Q corr.: auctor *OQ*

corpus et obtusis ceciderunt viribus artus,
 claudicat ingenium, delirat lingua, (labat) mens,
 omnia deficiunt atque uno tempore desunt.

ergo dissolui quoque convenit omnem animai 455
 naturam, ceu fumus, in altas aeris auras ;
 quandoquidem gigni pariter pariterque videmus
 crescere et, (ut) docui, simul aevo fessa fatisci.

Huc accedit uti videamus, corpus ut ipsum
 suscipere immanis morbos durumque dolorem, 460
 sic animum curas acris luctumque metumque ;
 quare participem leti quoque convenit esse.

quin etiam morbis in corporis avius errat
 saepe animus ; dementit enim deliraque fatur
 interdumque gravi lethargo fertur in altum 465

aeternumque soporem oculis nutuque cadenti,
 unde neque exaudit voces nec noscere vultus
 illorum potis est, ad vitam qui revocantes
 circumstant lacrimis rorantes ora genasque.

quare animum quoque dissolui fateare necessest, 470
 quandoquidem penetrant in eum contagia morbi.

nam dolor ac morbus leti fabricator uterquest,
 multorum exitio perdocti quod sumus ante. 473

denique cur, hominem cum vini vis penetravit 476

acris et in venas discessit diditus ardor,
 consequitur gravitas membrorum, praepediuntur
 crura vacillanti, tardescit lingua, madet mens,
 nant oculi, clamor singultus iurgia gliscunt, 480

et iam cetera de genere hoc quaecumque sequuntur,

cur ea sunt, nisi quod vemens violentia vini
 conturbare animam consuevit corpore in ipso?

at quaecumque queunt conturbari inque pediri,

453 labat *add. Lachmann* : madet *O corr.* : alii alia 456 aeris
edd. vett. : acris *OQ* 458 ut *add. Q corr.* fatisci *L* : faetis *OQ* ;
 fatiscit *Q corr.* 470 fateare *Ital.* : fatere *OQ* 472 dolor *L* :
 polor *OQ* 474 = 510, 475 et pariter mentem sanari corpus inani
secl. Lambinus 476 cur *Q corr.* : cor *OQ* 482 cur ea *L* :
 curba *OQ*

significant, paulo si durior insinuarit 485
 causa, fore ut pereant aevo privata futuro.
 quin etiam subito vi morbi saepe coactus
 ante oculos aliquis nostros, ut fulminis ictu,
 concidit et spumas agit, ingemit et tremit artus,
 desipit, extentat nervos, torquetur, anhelat 490
 inconstanter, et in iactando membra fatigat.
 nimirum quia vis morbi distracta per artus
 turbat agens animam spumans† in aequore salso
 ventorum validis fervere viribus undae.
 exprimitur porro gemitus, quia membra dolore 495
 adficiuntur et omnino quod semina vocis
 eiciuntur et ore foras glomerata feruntur
 qua quasi consuerunt et sunt munita viai.
 desipientia fit, quia vis animi atque animai
 conturbatur et, ut docui, divisa seorsum 500
 disiectatur eodem illo distracta veneno.
 inde ubi iam morbi reflexit causa reditque
 in latebras acer corrupti corporis umor,
 tum quasi vacillans primum consurgit et omnis
 paulatim redit in sensus animamque receptat. 505
 haec igitur tantis ubi morbis corpore in ipso
 iactentur miserisque modis distracta laborent,
 cur eadem credis sine corpore in aere aperto
 cum validis ventis aetatem degere posse?
 et quoniam mentem sanari, corpus ut aegrum, 510
 cernimus et flecti medicina posse videmus,
 id quoque praesagit mortalem vivere mentem.
 addere enim partis aut ordine traicere aequumst
 aut aliquid prorsum de summa detrudere hilum,
 commutare animum quicumque adoritur et infit 515

492 vis] vi *Brieger* (? *O prim. man.*): vist *Tohte* 493 animam
 spumans *OQ*: animam spumat, quasi *Lachmann*: anima spumas, ut
Heinze: animam, spumans ut *Brieger*: animam spumas ut *Merrill*
 497 eiciuntur *Lambinus*: eliciuntur *OQ* ^

aut aliam quamvis naturam flectere quaerit.
 at neque transferri sibi partis nec tribui vult
 immortale quod est quicquam neque defluere hilum.
 nam quodcumque suis mutatum finibus exit,
 continuo hoc mors est illius quod fuit ante. 520
 ergo animus sive aegrescit, mortalia signa
 mittit, uti docui, seu flectitur a medicina.
 usque adeo falsae rationi vera videtur
 res occurrere et effugium praecludere cuncti
 ancipitique refutatu convincere falsum. 525

Denique saepe hominem paulatim cernimus ire
 et membratim vitalem deperdere sensum;
 in pedibus primum digitos livescere et unguis,
 inde pedes et crura mori, post inde per artus
 ire alios tractim gelidi vestigia leti. 530
 scinditur atque animae haec quoniam natura nec uno
 tempore sincera exsistit, mortalis habendast.
 quod si forte putas ipsam se posse per artus
 introrsum trahere et partis conducere in unum
 atque ideo cunctis sensum deducere membris, 535
 at locus ille tamen, quo copia tanta animai
 cogitur, in sensu debet maiore videri;
 qui quoniam nusquamst, nimirum ut diximus <ante>,
 dilaniata foras dispergitur, interit ergo.
 quin etiam si iam libeat concedere falsum 540
 et dare posse animam glomerari in corpore eorum,
 lumina qui linquunt moribundi particulatim,
 mortalem tamen esse animam fateare necesse,
 nec refert utrum pereat dispersa per auras
 an contracta suis e partibus obbrutescat, 545
 quando hominem totum magis ac magis undique sensus

523 rationi *Marullus*: rationis *OQ* 525 refutatu *Q* *corr.*:
 refutatur *OQ* 531 atque] atqui *Lambinus*: aequae *Bernays*: itque
Munro animae *Lambinus*: animo *OQ* 535 deducere *C*:
 diducere *OQ* 538 ante *add. L*

deficit et vitae minus et minus undique restat.

Et quoniam mens est hominis pars una, loco quae
fixa manet certo, velut aures atque oculi sunt
atque alii sensus qui vitam cumque gubernant, 550
et veluti manus atque oculus naresve seorsum
secreta ab nobis nequeunt sentire neque esse,
sed tamen in parvo liquuntur tempore tabe,
sic animus per se non quit sine corpore et ipso
esse homine, illius quasi quod vas esse videtur 555
sive aliud quid vis potius coniunctius ei
fingere, quandoquidem conexu corpus adhaeret.

Denique corporis atque animi vivata potestas
inter se coniuncta valent vitaeque fruuntur;
nec sine corpore enim vitalis edere motus 560
sola potest animi per se natura nec autem
cassum anima corpus durare et sensibus uti.
scilicet avulsus radicibus ut nequit ullam
dispicere ipse oculus rem sorsum corpore toto,
sic anima atque animus per se nil posse videtur. 565
nimirum quia 〈per〉 venas et viscera mixtim,
per nervos atque ossa, tenentur corpore ab omni
nec magnis intervallis primordia possunt
libera dissultare, ideo conclusa moventur
sensiferos motus quos extra corpus in auras 570
aeris haud possunt post mortem eiecta moveri
propterea quia non simili ratione tenentur.
corpus enim atque animans erit aer, si cohibere
sese anima atque in eos poterit concludere motus
quos ante in nervis et in ipso corpore agebat. 575
quare etiam atque etiam resolutio corporis omni

553 liquuntur *Vossius*: linguntur *OQ*: lincuntur *Lachmann* tabi
Vossius: tali *OQ* 555 vas esse *L*: uasse *O*: uase *Q* 564 ipse
oculus *l 31*: oculus ipse *OQ* 566 per *add. L* mixtim *L*:
mixti *O*: mixta *Q* 571 moveri *Lambinus*: mouere *OQ* 573
animans erit *Lambinus*: animam serit *OQ* 574 sese anima *O*:
esse anima *Q*: in se animam *Wakefield* eos] eo *Faber* 576 quare
Q corr.: quae *O*: que *Q*

tegmine et eiectis extra vitalibus auris
dissolui sensus animi fateare necessest
atque animam, quoniam coniunctast causa duobus.

Denique cum corpus nequeat perferre animai 580
discidium quin in taetro tabescat odore,
quid dubitas quin ex imo penitusque coorta
emanarit uti fumus diffusa animae vis,
atque ideo tanta mutatum putre ruina
conciderit corpus, penitus quia mota loco sunt 585
fundamenta, foras anima emanante per artus
perque viarum omnis flexus, in corpore qui sunt,
atque foramina? multimodis ut noscere possis
dispertitam animae naturam exisse per artus
et prius esse sibi distractam corpore in ipso, 590
quam prolapsa foras enaret in aeris auras.
quin etiam finis dum vitae vertitur intra,
saepe aliqua tamen e causa labefacta videtur
ire anima ac toto solui de corpore (velle)
et quasi supremo languescere tempore vultus 595
molliaque exsanguis (trunco) cadere omnia membra.
quod genus est, animo male factum cum perhibetur
aut animam liquisse; ubi iam trepidatur et omnes
extremum cupiunt vitae reprehendere vinclum.
conquassatur enim tum mens animaeque potestas 600
omnis et haec ipso cum corpore collabefiunt;
ut gravior paulo possit dissolvere causa.
quid dubitas tandem quin extra prodita corpus
imbecilla foras in aperto, tegmine dempto,
non modo non omnem possit durare per aevum 605
sed minimum quodvis nequeat consistere tempus?
nec sibi enim quisquam moriens sentire videtur

582 ex l 31: ea OQ 583 animae vis l 31: anima eius OQ
586 anima emanante Wakefield: manant animaeque OQ: manante
anima usque Lachmann 594 velle Lachmann: omnia membra OQ
(ex 596): omnia del. Q corr. 596 trunco add. Lachmann: facie
Brieger: corpore post omnia l 31 597 peribetur Q corr.: peribet Q:
periberet O

ire foras animam incolumem de corpore toto
 nec prius ad iugulum et supera succedere fauces,
 verum deficere in certa regione locatam; 610
 ut sensus alios in parti quemque sua scit
 dissolui. quod si immortalis nostra foret mens,
 non tam se moriens dissolvi conquereretur,
 sed magis ire foras vestemque relinquere, ut anguis.

Denique cur animi numquam mens consiliumque 615
 gignitur in capite aut pedibus manibusve, sed unis
 sedibus et certis regionibus omnibus haeret,
 si non certa loca ad nascendum reddita cuique
 sunt, et ubi quicquid possit durare creatum
 atque ita multimodis partitis artubus esse, 620
 membrorum ut numquam exsistat praeposterus ordo?
 usque adeo sequitur res rem neque flamma creari
 fluminibus solitast neque in igni gignier algor.

Praeterea si immortalis natura animaist
 et sentire potest secreta a corpore nostro, 625
 quinque, ut opinor, eam faciundum est sensibus auctam.
 nec ratione alia nosmet proponere nobis
 possumus infernas animas Acherunte vagari.
 pictores itaque et scriptorum saecula priora
 sic animas intro duxerunt sensibus auctas. 630
 at neque sorsum oculi neque nares nec manus ipsa
 esse potest animae neque sorsum lingua, neque aures;
 haud igitur per se possunt sentire neque esse.

Et quoniam toto sentimus corpore inesse
 vitalem sensum et totum esse animale videmus, 635
 si subito medium celeri praeciderit ictu
 vis aliqua ut sorsum partem secernat utramque,

617 regionibus omnibus] regionibu' pectoris *Lachmann*: .. cor-
 poris *Merrill* post 619 lacunam indicavit *Munro* 620 partitis
Bernays: pertotis *OQ*: perfectis *Lachmann*: alii alia 623 solita
 est l 31: solita *OQ* in igni *Q* corr.: insigni *OQ* 624 immortalis
Q corr.: mortalis *OQ* 628 vagari *Lachmann*: uacare *OQ*: uagare
Q corr. 632 animae *Pius*: anima *OQ* 633 haud igitur *Lach-*
mann: auditum *OQ*: auditu *Havercamp*: haud ita tum *Merrill*

dispertita procul dubio quoque vis animai
 et discissa simul cum corpore disicietur.
 at quod scinditur et partis discedit in ullas, 640
 scilicet aeternam sibi naturam abnuvit esse.
 falciferos memorant currus abscidere membra
 saepe ita de subito permixta caede calentis,
 ut tremere in terra videatur ab artubus id quod
 decidit abscisum, cum mens tamen atque hominis vis 645
 mobilitate mali non quit sentire dolorem
 et simul in pugnae studio quod dedita mens est:
 corpore reliquo pugnam caedesque petessit,
 nec tenet amissam laevam cum tegmine saepe
 inter equos abstraxe rotas falcesque rapaces, 650
 nec cecidisse alius dextram, cum scandit et instat.
 inde alius conatur adempto surgere crure,
 cum digitos agit propter moribundus humi pes.
 et caput abscisum calido viventeque trunco
 servat humi vultum vitalem oculosque patentis, 655
 donec reliquias animai reddidit omnis.
 quin etiam tibi si lingua vibrante minanti
 serpentis cauda procero corpore tutrumque†
 sit libitum in multas partis discidere ferro,
 omnia iam sorsum cernes ancisa recenti 660
 vulnere tortari et terram conspergere tabo,
 ipsam seque retro partem petere ore priorem
 vulneris ardenti, ut morsu premat, icta dolore.
 omnibus esse igitur totas dicemus in illis
 particulis animas? at ea ratione sequetur 665
 unam animantem animas habuisse in corpore multas.
 ergo divisast ea quae fuit una simul cum
 corpore; quapropter mortale utrumque putandumst,

647 simul] semel *Lachmann* 650 rotas *L*: rote *OQ* 657
 minanti *O*: om. *Q*: micanti *Lachmann* 658 serpentis] ser-
 pentem *Marullus* cauda *O corr.*: caude *OQ*: cauda e *Lachmann*
 utrumque *OQ*: utrimque *Lachmann*: truncum *Giussani* 662 seque *L*:
 sequere *OQ* 663 ardenti] ardentem *Brieger* dolore] dolorem
Lachmann

in multas quoniam partis disciditur aequae.

Praeterea si immortalis natura animai 670
constat et in corpus nascentibus insinuatur,
cur super anteactam aetatem meminisse nequimus
nec vestigia gestarum rerum ulla tenemus?
nam si tanto operest animi mutata potestas,
omnis ut actarum exciderit retinentia rerum, 675
non, ut opinor, id a leto iam longius errat;
quapropter fateare necessest quae fuit ante
interiisse et quae nunc est nunc esse creatam.

Praeterea si iam perfecto corpore nobis 680
inferri solitast animi vivata potestas
tum cum gignimur et vitae cum limen inimus,
haud ita conveniebat uti cum corpore et una
cum membris videatur in ipso sanguine cresse,
sed velut in cavea per se sibi vivere solam
convenit, ut sensu corpus tamen adfluat omne. 685
quare etiam atque etiam neque originis esse putandumst
expertis animas nec leti lege solutas.
nam neque tanto opere adnecti potuisse putandumst
corporibus nostris extrinsecus insinuatas—
quod fieri totum contra manifesta docet res. 690
namque ita conexa est per venas viscera nervos
ossaque, uti dentes quoque sensu participantur;
morbus ut indicat et gelidai stringor aquai
et lapis oppressus subsit si frugibus asper—
nec, tam contextae cum sint, exire videntur 695
incolumes posse et salvas exsolvere sese
omnibus e nervis atque ossibus articulisque.
quod si forte putas extrinsecus insinuatam
permanare animam nobis per membra solere,

post 672 interiisse . . . creatam (= 678) habet O, duorum versuum
spatium relinquit Q 674 operest animi Marullus: opere animist
OQ 680 solita animist OQ 684, 685 sic interpunxit Lach-
mann 685 affluat O: affluat Q: versum secl. Lam' inus 690-4
post 685 collocavit Lachmann 694 subsit si A. C. Clark (vid. C. R.
xxv p. 74): subitis e OQ: subiit si e Bernays: subito his e Brieger

tanto quique magis cum corpore fusa peribit. 700
 quod permanat enim dissolvitur, interit ergo.
 dispertitus enim per caulas corporis omnis
 ut cibus, in membra atque artus cum diditur omnis,
 disperit atque aliam naturam sufficit ex se,
 sic anima atque animus quamvis integra recens (in) 705
 corpus eunt, tamen in manando dissoluuntur,
 dum quasi per caulas omnis diduntur in artus
 particulae quibus haec animi natura creatur,
 quae nunc in nostro dominatur corpore nata
 ex illa quae tunc periit partita per artus. 710
 quapropter neque natali privata videtur
 esse die natura animae nec funeris experts.

Semina praeterea linquuntur necne animai
 corpore in exanimo? quod si linquuntur et insunt,
 haud erit ut merito immortalis possit haberi, 715
 partibus amissis quoniam libata recessit.
 sin ita sinceris membris ablata profugit
 ut nullas partis in corpore liquerit ex se,
 unde cadavera racenti iam viscere vermis
 expirant atque unde animantum copia tanta 720
 exos et exsanguis tumidos perfluctuat artus?
 quod si forte animas extrinsecus insinuari
 vermibus et privas in corpora posse venire
 credis nec reputas cur milia multa animarum
 convenient unde una recesserit, hoc tamen est ut 725
 quaerendum videatur et in discrimen agendum,
 utrum tandem animae venentur semina quaeque
 vermiculorum ipsaeque sibi fabricentur ubi sint,
 an quasi corporibus perfectis insinuentur.
 at neque cur faciant ipsae quareve laborent 730

702 dispertitus *Lachmann* : dispertitur *OQ* enim *Pontanus* :
 ergo *OQ* 705 integra recens in *Marullus* : est integra reces *O*
 (recēs *Q*) 710 tunc] tum *ed. Brixiensis* 717 sinceris] sincera
 ex *Faber* 718 ut *ed. Veronensis* : et *OQ* 723 privas in *Ital.* :
 priua si *OQ*

dicere suppeditat. neque enim, sine corpore cum sunt,
 sollicitae volitant morbis alguque fameque.
 corpus enim magis his vitiis adfine laborat
 et mala multa animus contage fungitur eius.
 sed tamen his esto quamvis facere utile corpus 735
 cui subeant; at qua possint via nulla videtur.
 haud igitur faciunt animae sibi corpora et artus.
 nec tamen est utqui perfectis insinuentur
 corporibus; neque enim poterunt subtiliter esse
 conexae neque consensu contagia fient. 740

Denique cur acris violentia triste leonum
 seminium sequitur, vulpes dolus, et fuga cervis
 a patribus datur et patrius pavor incitat artus,
 et iam cetera de genere hoc cur omnia membris
 ex ineunte aevo generascunt ingenioque, 745
 si non, certa suo quia semine seminioque
 vis animi pariter crescit cum corpore quoque?
 quod si immortalis foret et mutare soleret
 corpora, permixtis animantes moribus essent,
 effugeret canis Hyrcano de semine saepe 750
 cornigeri incursum cervi tremaretque per auras
 aeris accipiter fugiens veniente columba,
 desiperent homines, saperent fera saecula ferarum.
 illud enim falsa fertur ratione, quod aiunt
 immortalem animam mutato corpore flecti. 755
 quod mutatur enim dissolvitur, interit ergo.
 traiciuntur enim partes atque ordine migrant;
 quare dissolui quoque debent posse per artus,
 denique ut intereant una cum corpore cunctae.
 sin animas hominum dicent in corpora semper 760
 ire humana, tamen quaeram cur e sapienti

732 algu *Nonius*: algo *OQ* 733 affine *Q* *corr.*: at fine *Q*:
 eefine *O* *corr.* 736 cui *Bernays*: cum *OQ*: cur *Q* *corr.* que *OQ*
 738 utqui *Munro*: ut quicum *OQ* 740 consensu] consensus
Lachmann 742 cervis *ed. Veneta*: ceruos *OQ* 743 *secl. Lach-*
mann 747 quoque *O*: toto *Q* 760 sin *Pontanus*: sic *OQ*

stulta queat fieri, nec prudens sit puer ullus,
 nec tam doctus equae pullus quam fortis equi vis. 764
 scilicet in tenero tenerascere corpore mentem 765
 confugient. quod si iam fit, fateare necessest
 mortalem esse animam, quoniam mutata per artus
 tanto opere amittit vitam sensumque priorem.
 quove modo poterit pariter cum corpore quoque
 confirmata cupitum aetatis tangere florem 770
 vis animi, nisi erit consors in origine prima?
 quidve foras sibi vult membris exire senectis?
 an metuit conclusa manere in corpore putri
 et domus aetatis spatio ne fessa vetusto
 obruat? at non sunt immortalī ulla pericla. 775

Denique conubia ad Veneris partusque ferarum
 esse animas praesto deridiculum esse videtur,
 exspectare immortalis mortalia membra
 innumero numero certareque praeproperanter
 inter se quae prima potissimaque insinuetur; 780
 si non forte ita sunt animarum foedera pacta
 ut quae prima volans advenerit insinuetur
 prima neque inter se contendant viribus hilum.

Denique in aethere non arbor, non aequore in alto
 nubes esse queunt nec pisces vivere in arvis 785
 nec cruor in lignis neque saxis sucus inesse.
 certum ac dispositumst ubi quicquid crescat et insit.
 sic animi natura nequit sine corpore oriri
 sola neque a nervis et sanguine longius esse.
 quod si posset enim, multo prius ipsa animi vis 790
 in capite aut umeris aut imis calcibus esse
 posset et innasci quavis in parte soleret,
 tandem in eodem homine atque in eodem vase manere.
 quod quoniam nostro quoque constat corpore certum
 dispositumque videtur ubi esse et crescere possit 795

763 = 746 *secl. editores*
 alto] salso *Lachmann*
interpunxit Wakefield: alii aliter

764 pullus *L*: paulus *OQ*
 789 longius] longiter *Lambinus*
 quod] quid *Lachmann*

784 in
 790 sic

sorsum anima atque animus, tanto magis infitiandum
totum posse extra corpus durare genique.
quare, corpus ubi interiit, periisse necessest
confiteare animam distractam in corpore toto.
quippe etenim mortale aeterno iungere et una 800
consentire putare et fungi mutua posse
desiperest. quid enim diversius esse putandumst
aut magis inter se disiunctum discrepitansque,
quam mortale quod est immortalis atque perenni
iunctum in concilio saevas tolerare procellas? 805
praeterea quaecumque manent aeterna necessest
aut quia sunt solido cum corpore respuere ictus
nec penetrare pati sibi quicquam quod queat artas
dissociare intus partis, ut materialia
corpora sunt quorum naturam ostendimus ante, 810
aut ideo durare aetatem posse per omnem,
plagarum quia sunt expertia, sicut inanest
quod manet intactum neque ab ictu fungitur hilum,
aut etiam quia nulla loci fit copia circum,
quo quasi res possint discedere dissoluique, 815
sicut summarum summast aeterna, neque extra
quis locus est quo diffugiant neque corpora sunt quae
possint incidere et valida dissolvere plaga.
quod si forte ideo magis immortalis habendast,
quod vitalibus ab rebus munita tenetur, 820
aut quia non veniunt omnino aliena salutis
aut quia quae veniunt aliqua ratione recedunt
pulsa prius quam quid noceant sentire queamus,

*

praeter enim quam quod morbis cum corporis aegret,
advenit id quod eam de rebus saepe futuris 825

805 saevas *Marullus*: saluas *O*: *versum om.* *Q* 806-818 =
v. 351-363 *secl. Lachmann* 809 partis ut (v. 354): partiisset *OQ*
814 fit *Lachmann* (v. 359): sit *OQ* 816 extra *Q corr.*: exire *O*:
ex ira *Q* 820 vitalibus] letalibus *Lambinus* 823 * 824 lacunam
indicavit *Lambinus* 824 morbis *Avancius*: morbist *OQ* aegret
Gifanius: aegrit *OQ*

macerat inque metu male habet curisque fatigat
 praeteritisque male admissis peccata remordent.
 adde furorem animi proprium atque oblivia rerum,
 adde quod in nigras lethargi mergitur undas.

Nil igitur mors est ad nos neque pertinet hilum, 830
 quandoquidem natura animi mortalis habetur.
 et velut anteacto nil tempore sensimus aegri,
 ad confligendum venientibus undique Poenis,
 omnia cum belli trepido concussa tumultu
 horrida contremuere sub altis aetheris oris, 835
 in dubioque fuere utrorum ad regna cadendum
 omnibus humanis esset terraque marique,
 sic, ubi non erimus, cum corporis atque animai
 discidium fuerit quibus e sumus uniter apti,
 scilicet haud nobis quicquam, qui non erimus tum, 840
 accidere omnino poterit sensumque movere,
 non si terra mari miscebitur et mare caelo.
 et si iam nostro sentit de corpore postquam
 distractast animi natura animaeque potestas,
 nil tamen est ad nos qui comptu coniugioque 845
 corporis atque animae consistimus uniter apti.
 nec, si materiem nostram collegerit aetas
 post obitum rursumque redegerit ut sita nunc est
 atque iterum nobis fuerint data lumina vitae,
 pertineat quicquam tamen ad nos id quoque factum, 850
 interrupta semel cum sit repetentia nostri.
 et nunc nil ad nos de nobis attinet, ante
 qui fuimus, (nil) iam de illis nos adficit angor.
 nam cum respicias immensi temporis omne
 praeteritum spatium, tum motus materiai 855
 multimodis quam sint, facile hoc accredere possis,
 semina saepe in eodem, ut nunc sunt, ordine posta

826 macerat *l 31*: maceret *OQ* 835 oris *Gifanius*: auris *O*:
 auras *Q* 844 distracta est *Q corr.*: distractas *OQ* 851 repeten-
 tia *Q*: repentia *O*: retinentia *Avancius* nostri *Pius*: nostris *OQ*
 853 nil *add. Merrill*: nec *Marullus*: neque *Lachmann*

haec eadem, quibus e nunc nos sumus, ante fuisse. [865]
 nec memori tamen id quimus reprehendere mente; [858]
 inter enim iectast vitae pausa vageque 860 [859]
 deerrarunt passim motus ab sensibus omnes. [860]
 debet enim, misere si forte aegreque futurumst, [861]
 ipse quoque esse in eo tum tempore, cui male possit [862]
 accidere. id quoniam mors eximit, esseque probet [863]
 illum cui possint incommoda conciliari, 865 [864]
 scire licet nobis nil esse in morte timendum
 nec miserum fieri qui non est posse neque hilum
 differre an nullo fuerit iam tempore natus,
 mortalem vitam mors cum immortalis ademit.

Proinde ubi se videas hominem indignarier ipsum, 870
 post mortem fore ut aut putescat corpore posto
 aut flammis interfiat malisve ferarum,
 scire licet non sincerum sonere atque subesse
 caecum aliquem cordi stimulum, quamvis neget ipse
 credere se quemquam sibi sensum in morte futurum. 875
 non, ut opinor, enim dat quod promittit et unde,
 nec radicitus e vita se tollit et eicit,
 sed facit esse sui quiddam super inscius ipse.
 vivus enim sibi cum proponit quisque futurum,
 corpus uti volucres lacerent in morte feraeque, 880
 ipse sui miseret; neque enim se dividit illim
 nec removet satis a proiecto corpore et illum
 se fingit sensuque suo contaminat adstans.
 hinc indignatur se mortalem esse creatum
 nec videt in vera nullum fore morte alium se 885
 qui possit vivus sibi se lugere peremptum
 stansque iacentem (se) lacerari urive dolere.

858 [865] *huc revocavit Lachmann* 862 misere si *Pontanus*:
 miserest *OQ* 864 mors *Q* *corr.*: mos *Q*: mox *O* probet *Lach-*
mann: prohibe *OQ* 868 an nullo *Pontanus*: annullo anullo *O*:
 anullo anullo *Q*: anne ullo *Munro* 871 putescat *Avancius*:
 putes *OQ* 873 non *l 31*: no *O*: nos *Q* 880 lacerent *L*:
 iacerent *OQ* 881 diuidit illim *O*: didit illum *Q* 886 qui *l 31*:
 cui *OQ* 887 se *ad. l. l 31* dolere *Mon.*: dolore *O*: dolorem *Q*

T. LVCRETI CARI

nam si in morte malumst malis morsuque ferarum
tractari, non invenio qui non sit acerbum
ignibus impositum calidis torrescere flammis 890
aut in melle situm suffocari atque rigere
frigore, cum summo gelidi cubat aequare saxi,
urgerive superne obtritum pondere terrae.

‘Iam iam non domus accipiet te laeta, neque uxor
optima nec dulces occurrent oscula nati 895
praeripere et tacita pectus dulcedine tangent.
non poteris factis florentibus esse, tuisque
praesidium. misero misere’ aiunt ‘omnia ademit
una dies infesta tibi tot praemia vitae.’
illud in his rebus non addunt ‘nec tibi earum 900
iam desiderium rerum super insidet una.’
quod bene si videant animo dictisque sequantur,
dissoluant animi magno se angore metuque.
‘tu quidem ut es leto sopitus, sic eris aevi
quod superest cunctis privatu’ doloribus aegris. 905
at nos horrifico cinefactum te prope busto
insatiabiliter deflevimus, aeternumque
nulla dies nobis maerorem e pectore demet.’
illud ab hoc igitur quaerendum est, quid sit amari
tanto opere, ad somnum si res redit atque quietem, 910
cur quisquam aeterno possit tabescere luctu.

Hoc etiam faciunt ubi discubuerunt tenentque
pocula saepe homines et inumbrant ora coronis,
ex animo ut dicant ‘brevis hic est fructus homullis;
iam fuerit neque post umquam revocare licebit.’ 915
tamquam in morte mali cum primis hoc sit eorum,
quod sitis exurat miseros atque arida torrat,
aut aliae cuius desiderium insideat rei.

893 obtritum *Pontanus*: obrutum *OQ* 894 iam iam *l 31*:
amiam *O*: uimiam *Q* 901 una] ullum *Giussani* 902 quod *L*:
quo *OQ* 906 cinefactum *Nonius*: cinem factum *OQ* 908 e *Q corr.*:
et *OQ*: ex *Merrill* 914 fructus *l 31*: fluctus *OQ* 917 torrat
O corr. Q: torret *O*: torres *Lachmann*

nec sibi enim quisquam tum se vitamque requirit,
 cum pariter mens et corpūs sopita quiescunt. 920
 nam licet aeternum per nos sic esse soporem,
 nec desiderium nostri nos adfcit ullum.
 et tamen haudquaquam nostros tunc illa per artus
 longe ab sensiferis primordia motibus errant,
 cum correptus homo ex somno se colligit ipse. 925
 multo igitur mortem minus ad nos esse putandumst,
 si minus esse potest quam quod nil esse videmus;
 maior enim turba et disiectus materiali
 consequitur leto nec quisquam expergitus exstat,
 frigida quem semel est vitae pausa secuta. 930

Denique si vocem rerum natura repente
 mittat et hoc alicui nostrum sic increpet ipsa
 'quid tibi tanto operest, mortalis, quod nimis aegris
 luctibus indulges? quid mortem congemis ac fles?
 nam si grata fuit tibi vita anteacta priorque 935
 et non omnia pertusum congesta quasi in vas
 commoda perfluxere atque ingrata interiere,
 cur non ut plenus vitae conviva recedis
 aequo animoque capis securam, stulte, quietem?
 sin ea quae fructus cumque es periere profusa 940
 vitaeque in offensast, cur amplius addere quaeris,
 rursum quod pereat male et ingratum occidat omne,
 non potius vitae finem facis atque laboris?
 nam tibi praeterea quod machiner inveniamque,
 quod placeat, nil est: eadem sunt omnia semper. 945
 si tibi non annis corpus iam marcet et artus
 confecti languent, eadem tamen omnia restant,
 omnia si pergas vivendo vincere saecla,
 atque etiam potius, si numquam sis moriturus,'

919 requirit *l* 29: requiret *OQ* 921 soporem *O*: praemo *Q*
 922 adfcit *Lambinus*: adigit *OQ*: attigit *l* 31 925 colligit] colligat
Winckelmann 928 turba et *Goebel*: turbae *OQ* 935 si grata
Naugerius: gratis *OQ*: gratis fuit (haec) *Lachmann*: gratis anteacta
 fuit *Munro* 941 offensast *cod. Londinensis*: offensost *OQ*: offen-
 sust *Lambinus* 943 facis *Avancius*: iacis *OQ* 945 placeat *L*:
 placet *OQ* 948 pergas *Lambinus*: perges *OQ*

quid respondemus, nisi iustam intendere litem 950
 naturam et veram verbis exponere causam?
 grandior hic vero si iam seniorque queratur [955]
 atque obitum lamentetur miser amplius aequo, [952]
 non merito inclamet magis et voce increpet acri? [953]
 'aufer abhinc lacrimas, balatro, et compesce querelas. 955 [954]
 omnia perfunctus vitae praemia marces.
 sed quia semper aves quod abest, praesentia temnis,
 imperfecta tibi elapsast ingrataque vita
 et nec opinanti mors ad caput adstitit ante
 quam satur ac plenus possis discedere rerum. 960
 nunc aliena tua tamen aetate omnia mitte
 aequo animoque agedum †magnis† concede: necessest.
 iure, ut opinor, agat, iure increpet inciletque.
 cedit enim rerum novitate extrusa vetustas
 semper, et ex aliis aliud reparare necessest: 965
 nec quisquam in barathrum nec Tartara deditur atra.
 materies opus est ut crescant postera saecula;
 quae tamen omnia te vita perfuncta sequentur;
 nec minus ergo ante haec quam tu cecidere, cadentque.
 sic alid ex alio numquam desistet oriri 970
 vitaeque mancipio nulli datur, omnibus usu.
 respice item quam nil ad nos anteacta vetustas
 temporis aeterni fuerit, quam nascimur ante.
 hoc igitur speculum nobis natura futuri
 temporis exponit post mortem denique nostram. 975
 numquid ibi horribile apparet, num triste videtur
 quicquam, non omni somno securius exstat?

Atque ea nimirum quaecumque Acherunte profundo
 prodita sunt esse, in vita sunt omnia nobis.

950 nisi *Marullus*: si *OQ* 952 [955] *huc transposuit Lach-*
mann 955 balatro *Heinsius*: baratre *OQ*: barathrum *Bocke-*
müller: blatero *Merrill* 958 imperfecta *l 31*: imperfecte *OQ* 960
 discedere *L*: dicere *O*: discere *Q* 962 agedum *L*: agendum *OQ*
 magnis *OQ*: magnus *ensor Orellii Ienensis*: ad manis *Bockemüller*:
 gnatis *Bernays*: alii alia 966 deditur *O*: dedit *Q*: decidit *Q corr.*

nec miser impendens magnum timet aere saxum 980
 Tantalus, ut famast, cassa formidine torpens;
 sed magis in vita divum metus urget inanis
 mortalis casumque timent quem cuique ferat fors.
 nec Tityon volucres ineunt Acherunte iacentem
 nec quod sub magno scrutentur pectore quicquam 985
 perpetuam aetatem possunt reperire profecto.
 quamlibet immani proiectu corporis exstet,
 qui non sola novem dispessis iugera membris
 obtineat, sed qui terrai totius orbem,
 non tamen aeternum poterit perferre dolorem 990
 nec praebere cibum proprio de corpore semper.
 sed Tityos nobis hic est, in amore iacentem
 quem volucres lacerant atque exest anxius angor
 aut alia quavis scindunt cuppedine curae.
 Sisyphus in vita quoque nobis ante oculos est 995
 qui petere a populo fascis saevasque securis
 imbibit et semper victus tristisque recedit.
 nam petere imperium quod inanest nec datur umquam,
 atque in eo semper durum sufferre laborem,
 hoc est adverso nixantem trudere monte 1000
 saxum quod tamen (e) summo iam vertice rursum
 volvitur et plani raptim petit aequora campi.
 deinde animi ingratam naturam pascere semper
 atque explere bonis rebus satiareque numquam,
 quod faciunt nobis annorum tempora, circum 1005
 cum redeunt fetusque ferunt variosque lepores,
 nec tamen explemur vitai fructibus umquam,
 hoc, ut opinor, id est, aevo florente puellas
 quod memorant laticem pertusum congerere in vas,
 quod tamen expleri nulla ratione potestur. 1010

983 cuique *O*: cumque *Q* 985 quod *C*: quid *OQ* 988 dis-
 pesis *Turnebus*: dispersis *OQ* 992 est *Q corr.*: es *OQ* 994
 cuppedine *Pontanus*: curpedine *OQ*: turpedine *O corr.*: cupedine
Q corr. 999 sufferre laborem *Q corr.*: laborem sufferre *OQ*
 1001 e *add. Pontanus* 1009 congerere *Q corr.*: cogere *O*:
 congere *Q* 1010 nulla *L*: ulla *OQ*

T. LVCRETI CARI

Cerberus et furiae iam vero et lucis egestas,
Tartarus horriferos eructans faucibus aestus

*

qui neque sunt usquam nec possunt esse profecto.
sed metus in vita poenarum pro male factis
est insignibus insignis, scelerisque luella, 1015
carcer et horribilis de saxo iactu' deorsum,
verbera carnifices robur pix lammina taedae;
quae tamen etsi absunt, at mens sibi conscia factis
praemetuens adhibet stimulos torretque flagellis
nec videt interea qui terminus esse malorum 1020
possit nec quae sit poenarum denique finis
atque eadem metuit magis haec ne in morte gravescant.
hic Acherusia fit stultorum denique vita.

Hoc etiam tibi tute interdum dicere possis
'lumina sis oculis etiam bonus Ancu' reliquit 1025
qui melior multis quam tu fuit, improbe, rebus.
inde alii multi reges rerumque potentes
occiderunt, magnis qui gentibus imperitarunt.
ille quoque ipse, viam qui quondam per mare magnum
stravit iterque dedit legionibus ire per altum 1030
ac pedibus salsas docuit super ire lacunas
et contempsit equis insultans murmura ponti,
lumine adempto animam moribundo corpore fudit.
Scipiadas, belli fulmen, Carthaginis horror,
ossa dedit terrae proinde ac famul infimus esset. 1035
adde repertoires doctrinarum atque leporum,
adde Heliconiadum comites; quorum unus Homerus
sceptra potitus eadem aliis sopitu' quietest.
denique Democritum postquam matura vetustas
admonuit memores motus languescere mentis, 1040

1011 furiae *Q* corr.: funae *OQ* egestas] egenus *Lachmann* post
1012 lacunam indicavi (vid. *C. Q.* xv p. 19), post 1011 *Munro* 1013
qui] haec *Marullus*: quid? *Lachmann* 1016 iactu' deorsum
Lambinus: iactus eorum *OQ* 1017 lammina *Q* corr.: iam mina
OQ 1019 torret] terret *Lachmann*: torquet *Heinsius* 1031 super
ire] superare *L* 1033 fudit *Pontanus*: fugit *OQ* 1038 potitus
l 31: potius *OQ*

sponte sua leto caput obvius obtulit ipse.

ipse Epicurus obit decurso lumine vitae,
qui genus humanum ingenio superavit et omnis
restinxit, stellas exortus ut acrius sol.

tu vero dubitabis et indignabere obire? 1045

mortua cui vita est prope iam vivo atque videnti,
qui somno partem maiorem conteris aevi

et vigilans stertis nec somnia cernere cessas
sollicitamque geris cassa formidine mentem

nec reperire potes tibi quid sit saepe mali, cum 1050

ebrius urgeris multis miser undique curis
atque animi incerto fluitans errore vagaris.'

Si possent homines, proinde ac sentire videntur

pondus inesse animo quod se gravitate fatiget,

e quibus id fiat causis quoque noscere et unde 1055

tanta mali tamquam moles in pectore constet,

haud ita vitam agerent, ut nunc plerumque videmus

quid sibi quisque velit nescire et quaerere semper

commutare locum quasi onus deponere possit.

exit saepe foras magnis ex aedibus ille, 1060

esse domi quem pertaesumst, subitoque <revertit>,

quippe foris nilo melius qui sentiat esse.

currit agens mannos ad villam praecipitanter,

auxilium tectis quasi ferre ardentibus instans;

oscitat extemplo, tetigit cum limina villae, 1065

aut abit in somnum gravis atque oblivia quaerit,

aut etiam properans urbem petit atque revisit.

hoc se quisque modo fugit, at quem scilicet, ut fit,

effugere haud potis est, ingratis haeret et odit

propterea, morbi quia causam non tenet aeger; 1070

1042 obit *l31*: obiit *OQ*: iit *Lachmann* 1044 acrius] aetherius
Lactantius 1050 potes tibi quid *Lachmann*: potest ibi quod *OQ*

1052 animi *Lambinus*: animo *OQ* 1061 quem *Ital.*: per quem
OQ revertit *add. Politianus*: alii *alia* 1063 praecipitanter

L: praecipiter *O*: praecepiter *Q* 1068 fugit at] fugitat *Madvig*
1069 ingratis *Lambinus*: ingratus *OQ*: ingratus *Q* *corr.*

quam bene si videat, iam rebus quisque relictis
 naturam primum studeat cognoscere rerum,
 temporis aeterni quoniam, non unius horae,
 ambigitur status, in quo sit mortalibus omnis
 aetas, post mortem quae restat cumque, manenda. 1075

Denique tanto opere in dubiis trepidare periclis
 quae mala nos subigit vitae tanta cupido?
 certa quidem finis vitae mortalibus adstat
 nec devitari letum pote quin obeamus.
 praeterea versamur ibidem atque insumus usque 1080
 nec nova vivendo procuditur ulla voluptas.
 sed dum abest quod avemus, id exsuperare videtur
 cetera; post aliud, cum contigit illud, avemus
 et sitis aequa tenet vitae semper hiantis.
 posteraque in dubiis fortunam quam vehat aetas, 1085
 quidve ferat nobis casus quive exitus instet.
 nec prorsum vitam ducendo demimus hilum
 tempore de mortis nec delibare valemus,
 quo minus esse diu possimus forte perempti.
 proinde licet quot vis vivendo condere saecula; 1090
 mors aeterna tamen nilo minus illa manebit,
 nec minus ille diu iam non erit, ex hodierno
 lumine qui finem vitae fecit, et ille,
 mensibus atque annis qui multis occidit ante.

1073 temporis aeterni *Pontanus*: aeterni temporis *O corr.* *Q* (aeternitatem *O*) 1075 manenda *Lambinus*: manendo *OQ* 1078 certa quidem *Avancius*: certe equidem *OQ* 1085 fortunam *ed. Aldina*: fortuna *OQ* 1088 delibare *Pontanus*: deliberare *OQ* 1089 possimus *O corr.*: possumus *OQ* forte] sorte *ed. Aldina*: morte *Lambinus* 1090 quot (*vid.* 317): quod *OQ*

T. LVCRETI CARI DE RERV M NATVRA

LIBER QVARTVS

AVIA Pieridum peragro loca nullius ante
trita solo. iuvat integros accedere fontis
atque haurire, iuvatque novos decerpere flores
insignemque meo capiti petere inde coronam
unde prius nulli velarint tempora musae; 5
primum quod magnis doceo de rebus et artis
religionum animum nodis exsolvere pergo,
deinde quod obscura de re tam lucida pango
carmina, musaeo contingens cuncta lepore.
id quoque enim non ab nulla ratione videtur. 10
nam veluti pueris absinthia taetra medentes
cum dare conantur, prius oras pocula circum
contingunt mellis dulci flavoque liquore,
ut puerorum aetas improvida ludificetur
labrorum tenuis, interea perpotet amarum 15
absinthii laticem deceptaque non capiatur,
sed potius tali pacto recreata valescat,
sic ego nunc, quoniam haec ratio plerumque videtur
tristior esse quibus non est tractata, retroque
vulgus abhorret ab hac, volui tibi suaviloquenti 20
carmine Pierio rationem exponere nostram

1-25 = i. 926-950 *uncinis incl. Lachmann* 8 pango l 31 (cf. i. 933):
pando OQ 14 ut Q corr.: et OQ 17 pacto *Lachmann*: atacto
OQ: *alii alia*

et quasi musaeo dulci contingere melle,
 si tibi forte animum tali ratione tenere
 versibus in nostris possem, dum percipis omnem
 naturam rerum ac persentis utilitatem.

25

Sed quoniam docui cunctarum exordia rerum [45]
 qualia sint et quam variis distantia formis [46]
 sponte sua volitent aeterno percita motu, [47]
 quoque modo possit res ex his quaeque creari, [48]
 atque animi quoniam docui natura quid esset 30 [26]
 et quibus e rebus cum corpore compta vigeret
 quove modo distracta rediret in ordia prima,
 nunc agere incipiam tibi, quod vementer ad has res
 attinet, esse ea quae rerum simulacra vocamus;
 quae, quasi membranae summo de corpore rerum 35 [31]
 dereptae, volitant ultroque citroque per auras,
 atque eadem nobis vigilantibus obvia mentis
 terrificant atque in somnis, cum saepe figuras
 contuimur miras simulacraque luce carentum,
 quae nos horrifice languentis saepe sopore 40 [36]
 excierunt, ne forte animas Acherunte reamur
 effugere aut umbras inter vivos volitare
 neve aliquid nostri post mortem posse relinqui,
 cum corpus simul atque animi natura perempta
 in sua discessum dederint primordia quaeque. 45 [41]

Dico igitur rerum effigias tenuisque figuras [42]
 mittier ab rebus summo de corpore rerum, [43]
 quae quasi membranae vel cortex nominandast, 50 [51]
 quod speciem ac formam similem gerit eius imago [52]
 cuiuscumque cluet de corpore fusa vagari. [53]
 id licet hinc quamvis hebeti cognoscere corde. [44]
 principio quoniam mittunt in rebus apertis

26-53 *hunc versuum ordinem restituit Marullus* 28 aeterno *Bent-*
ley (cf. iii. 33): alterno *OQ* 36 dereptae *Q*: direptae *O* 46 ef-
 figias *Lambinus*: effugias *OQ* 47 corpore *Lambinus*: cortice *OQ*
 rerum *Lachmann* (cf. 64): eorum *OQ* 48, 49 [49] [50] = 33, 34
 [29] [30] *secl. Marullus* 50 quae *l 31*: qui *O*: om. *Q* 52 cluet
ed. Brixiensis: cui et *O*: ciuet *Q* 54 mittunt *L*: mittuntur *OQ*

corpora res multae, partim diffusa solute, 55
 robora ceu fumum mittunt ignesque vaporem,
 et partim contexta magis condensaque, ut olim
 cum teretes ponunt tunicas aestate cicadae,
 et vituli cum membranas de corpore summo
 nascentes mittunt, et item cum lubrica serpens 60
 exuit in spinis vestem; nam saepe videmus
 illorum spoliis vepris volitantibus auctas.
 quae quoniam fiunt, tenuis quoque debet imago
 ab rebus mitti summo de corpore rerum.
 nam cur illa cadant magis ab rebusque recedant 65
 quam quae tenuia sunt, hiscendist nulla potestas;
 praesertim cum sint in summis corpora rebus
 multa minuta, iaci quae possint ordine eodem
 quo fuerint et formai servare figuram,
 et multo citius, quanto minus indupediri 70
 pauca queunt et ⟨quae⟩ sunt prima fronte locata.
 nam certe iacere ac largiri multa videmus,
 non solum ex alto penitusque, ut diximus ante,
 verum de summis ipsum quoque saepe colorem.
 et vulgo faciunt id lutea russaque vela 75
 et ferrugina, cum magnis intenta theatri
 per malos vulgata trabesque trementia flutant.
 namque ibi consessum caveai subter et omnem
 scaenai speciem, †patrum matrumque deorum†
 inficiunt coguntque suo fluitare colore. 80
 et quanto circum mage sunt inclusa theatri
 moenia, tam magis haec intus perfusa lepore
 omnia corrident correpta luce diei.

68 eodem *Pontanus*: eorum *OQ* 69 formai *Vossius*: forma *OQ*:
alii alia 71 quae *add. Lachmann*, in *post* sunt *Q corr.* 72 iacere
Q: iacecere *O* ac largiri *Lachmann*: aciergiri *OQ*: ac iaculari
 73 77 flutant *Turnebus*: fluctus *Q*: *om. O* 79 scaenai *Lam-*
binus: scaenai *O*: scaenali *Q* patrum matrumque deorum *OQ*:
 pulcrum variumque decorum *Lachmann*: patrum coetumque decorum
Munro: Parium marmorque deorum *Brieger*: *alii alia* 81 inclusa *Q*:
 inclaustra *O*: his clausa *Giussani* 82 moenia] moenibu' *Munro*

ergo linthea de summo cum corpore fucum
 mittunt, effigias quoque debent mittere tenvis 85
 res quaeque, ex summo quoniam iaculantur utraque.
 sunt igitur iam formarum vestigia certa
 quae vulgo volitant subtili praedita filo
 nec singillatim possunt secreta videri.
 praeterea omnis odor fumus vapor atque aliae res 90
 consimiles ideo diffusae <e> rebus abundant,
 ex alto quia dum veniunt intrinsecus ortae,
 scinduntur per iter flexum, nec recta viarum
 ostia sunt qua contendant exire coortae.
 at contra tenuis summi membrana coloris 95
 cum iacitur, nil est quod eam discerpere possit,
 in promptu quoniam est in prima fronte locata.
 postremo speculis in aqua splendoreque in omni
 quaecumque apparent nobis simulacra, necessest,
 quandoquidem simili specie sunt praedita rerum, 100
 ex <ea> imaginibus missis consistere rerum.
 sunt igitur tenues formae rerum similesque 104
 effigiae, singillatim quas cernere nemo 105
 cum possit, tamen assiduo crebroque repulso
 reiectae reddunt speculorum ex aequore visum,
 nec ratione alia servari posse videntur,
 tanto opere ut similes reddantur cuique figurae.
 Nunc age quam tenui natura constet imago 110
 percipe. et in primis, quoniam primordia tantum
 sunt infra nostros sensus tantoque minora
 quam quae primum oculi coeptant non posse tueri,
 nunc tamen id quoque uti confirmem, exordia rerum
 cunctarum quam sint subtilia percipe paucis. 115
 primum animalia sunt iam partim tantula, quorum

90 aliae *Q* corr.: alia *OQ* 91 e add. *Lambinus* 92 intrin-
 secus *Lambinus*: extrinsecus *OQ* 94 coortae *Lambinus*: coorta
O: coorte *Q* 101 ea add. *Lotze*: alii alia rerum *Lachmann*
 (cf. 49): eorum *OQ* 102, 103 = 65, 66 *secl. editores* 104 formae
 rerum similesque *Purmann*: formarum dissimilesque *OQ*: formarum
 illis similesque *Lachmann* 116 quorum *Purmann*: eorum *OQ*

tertia pars nulla possit ratione videri.
 horum intestinum quodvis quale esse putandumst?
 quid cordis globus aut oculi? quid membra? quid artus?
 quantula sunt? quid praeterea primordia quaeque 120
 unde anima atque animi constet natura necessumst?
 nonne vides quam sint subtilia quamque minuta?
 praeterea quaecumque suo de corpore odorem
 expirant acrem, panaces absinthia taetra
 habrotonique graves et tristia centaurea, 125
 quorum unum quidvis leviter si forte duobus

*

quin potius noscas rerum simulacra vagari
 multa modis multis nulla vi cassaue sensu?

Sed ne forte putes ea demum sola vagari,
 quaecumque ab rebus rerum simulacra recedunt, 130
 sunt etiam quae sponte sua gignuntur et ipsa
 constituuntur in hoc caelo qui dicitur aer,
 quae multis formata modis sublime feruntur [135]
 nec speciem mutare suam liquentia cessant [141]
 et cuiusque modi formarum vertere in oras; 135 [142]
 ut nubis facile interdum concreescere in alto [133]
 cernimus et mundi speciem violare serenam [134]
 aera mulcentis motu. nam saepe Gigantum [136]
 ora volare videntur et umbram ducere late, [137]
 interdum magni montes avulsaue saxa 140 [138]
 montibus anteire et solem succedere praeter, [139]
 inde alios trahere atque inducere belua nimbos. [140]

Nunc ea quam facili et celeri ratione genantur
 perpetuoque fluant ab rebus lapsaque cedant

*

semper enim summum quicquid de rebus abundat 145

118 horum *Nonius*: harum *OQ* 126 * 127 lacunam indicavit
Heinsius 129-142 *uncinis incl. Lachmann* 133-142 hunc
versuum ordinem restituit Lambinus 135 oras *O corr.*: horas *OQ*
 143 genantur *Lambinus*: gerantur *OQ* 144 * 145 lacunam indicavit
Lachmann

quod iaculentur. et hoc alias cum pervenit in res,
 transit, ut in primis vitrum. sed ubi aspera saxa
 aut in materiam ligni pervenit, ibi iam
 scinditur ut nullum simulacrum reddere possit.
 at cum splendida quae constant opposta fuerunt 150
 densaque, ut in primis speculum est, nil accidit horum.
 nam neque, uti vitrum, possunt transire, neque autem
 scindi; quam meminit levor praestare salutem.
 quapropter fit ut hinc nobis simulacra redundant.
 et quamvis subito quovis in tempore quamque 155
 rem contra speculum ponas, apparet imago;
 perpetuo fluere ut noscas e corpore summo
 texturas rerum tenuis tenuisque figuras.
 ergo multa brevi spatio simulacra genuntur,
 ut merito celer his rebus dicatur origo. 160
 et quasi multa brevi spatio summittere debet
 lumina sol ut perpetuo sint omnia plena,
 sic ab rebus item simili ratione necessest
 temporis in puncto rerum simulacra ferantur
 multa modis multis in cunctas undique partis; 165
 quandoquidem speculum quocumque obvertimus oris,
 res ibi respondent simili forma atque colore.
 praeterea modo cum fuerit liquidissima caeli
 tempestas, perquam subito fit turbida foede,
 undique uti tenebras omnis Acherunta rearis 170
 liquisse et magnas caeli complesse cavernas,
 usque adeo taetra nimborum nocte coorta
 impendent atrae formidinis ora superne;
 quorum quantula pars sit imago dicere nemost
 qui possit neque eam rationem reddere dictis. 175
 Nunc age, quam celeri motu simulacra ferantur
 et quae mobilitas ollis tranantibus auras

146 alias] *raras Lotze: certas Brieger: laxas Merrill* 147, 152
 vitrum *Oppenrieder (cf. 602): uestem OQ* 150 opposta *Ital.: op-*
 posita *OQ* 152 possunt] *potis est Lachmann* 159 genuntur
Lambinus: geruntur OQ 166 oris *Q: om. O* 167 ibi *O:*
 sibi *Q* 175 rationem *Ital.: ratione OQ*

reddita sit, longo spatio ut brevis hora teratur,
 in quem quaeque locum diverso numine tendunt,
 suavidicis potius quam multis versibus edam ; 180
 parvus ut est cycni melior canor, ille gruum quam
 clamor in aetheriis dispersus nubibus austri.
 principio persaepe levis res atque minutis
 corporibus factas celeris licet esse videre.
 in quo iam genere est solis lux et vapor eius 185
 propterea quia sunt e primis facta minutis
 quae quasi cuduntur perque aeris intervallum
 non dubitant transire sequenti concita plaga.
 suppeditatur enim confestim lumine lumen
 et quasi protelo stimulator fulgere fulgur. 190
 quapropter simulacra pari ratione necessest
 immemorabile per spatium transcurrere posse
 temporis in puncto, primum quod parvula causa
 est procul a tergo quae provehat atque propellat,
 quod superest, ubi tam volucris levitate ferantur ; 195
 deinde quod usque adeo textura praedita rara
 mittuntur, facile ut quasvis penetrare queant res
 et quasi permanare per aeris intervallum.
 praeterea si quae penitus corpuscula rerum
 ex altoque foras mittuntur, solis uti lux 200
 ac vapor, haec puncto cernuntur lapsa diei
 per totum caeli spatium diffundere sese,
 perque volare mare ac terras caelumque rigare,
 quid quae sunt igitur iam prima fronte parata,
 cum iaciuntur et emissum res nulla moratur ? 205
 nonne vides citius debere et longius ire
 multiplexque loci spatium transcurrere eodem
 tempore quo solis pervulgant lumina caelum ?
 hoc etiam in primis specimen verum esse videtur

178 teratur *Pontanus* : feratur *OQ* 179 numine] momine
Marullus tendunt *Lambinus* : tendit *OQ* 203 caelum] circum
Lachmann 206 nonne *Q* corr. : quo neque *O* : quone *Q*

- quam celeri motu rerum simulacra ferantur, 210
quod simul ac primum sub diu splendor aquai
ponitur, extemplo caelo stellante serena
sidera respondent in aqua radiantia mundi.
iamne vides igitur quam puncto tempore imago
aetheris ex oris in terrarum accidat oras? 215
quare etiam atque etiam mitti fateare necessest
corpora quae feriant oculos visumque lacesant.
perpetuoque fluunt certis ab rebus odores;
frigus ut a fluviis, calor ab sole, aestus ab undis
aequoris exesor moerorum litora circum. 220
nec variae cessant voces volitare per auras.
denique in os salsi venit umor saepe saporis,
cum mare versamur propter, dilutaque contra
cum tuimur misceri absinthia, tangit amaror.
usque adeo omnibus ab rebus res quaeque fluenter 225
fertur et in cunctas dimittitur undique partis
nec mora nec requies interdatur ulla fluendi,
perpetuo quoniam sentimus, et omnia semper
cernere odorari licet et sentire sonare.
- Praeterea quoniam manibus tractata figura 230
in tenebris quaedam cognoscitur esse eadem quae
cernitur in luce et claro candore, necessest
consimili causa tactum visumque moveri.
nunc igitur si quadratum temptamus et id nos
commovet in tenebris, in luci quae poterit res 235
accidere ad speciem quadrata, nisi eius imago?
esse in imaginibus quapropter causa videtur
cernundi neque posse sine his res ulla videri.
- Nunc ea quae dico rerum simulacra feruntur
undique et in cunctas iaciuntur didita partis. 240

210 motu *edd. vett.*: motum *OQ* 211 diu] divo *Q corr.* 216
mitti *Lachmann* (cf. vi. 922): mira *O*: ira *Q*: ita *Q corr.*: post
216 lacunam indicavit *Purmann* 218 fluunt *Lambinus*: fluant *OQ*
240 didita *Pontanus*: dedita *OQ*

verum nos oculis quia solis cernere quimus,
 propterea fit uti, speciem quo vertimus, omnes
 res ibi eam contra feriant forma atque colore.
 et quantum quaeque ab nobis res absit, imago
 efficit ut videamus et internoscere curat. 245

nam cum mittitur, extemplo protrudit agitque
 aera qui inter se cumque est oculosque locatus,
 isque ita per nostras acies perlabitur omnis
 et quasi perterget pupillas atque ita transit.
 propterea fit uti videamus quam procul absit 250 [251]
 res quaeque. et quanto plus aeris ante agitur 250
 et nostros oculos perterget longior aura,

tam procul esse magis res quaeque remota videtur.
 scilicet haec summe celeri ratione geruntur,
 quale sit ut videamus et una quam procul absit. 255
 illud in his rebus minime mirabile habendumst,
 cur, ea quae feriant oculos simulacra videri
 singula cum nequeant, res ipsae perspiciantur.

ventus enim quoque paulatim cum verberat et cum
 acre fluit frigus, non privam quamque solemus 260 [261]
 particulam venti sentire et frigoris eius, [260]
 sed magis unorsum, fierique perinde videmus
 corpore tum plagas in nostro tamquam aliquae res
 verberet atque sui det sensum corporis extra.
 praeterea lapidem digito cum tundimus, ipsum 265
 tangimus extremum saxi summumque colorem,
 nec sentimus eum tactu, verum magis ipsam
 duritiem penitus saxi sentimus in alto.

Nunc age, cur ultra speculum videatur imago
 percipe; nam certe penitus semota videtur. 270
 quod genus illa foris quae vere transpiciuntur,

245 curat] cogit *Lachmann* 246 protrudit *Lambinus*: protudit *O*:
 prodit *Q* 249 perterget (252 *O*): pterget *OQ* 250, 251 *hos*
versus transposuit Marullus 260, 261 *hos versus transposuit Marullus*
 260 privam *Gifanius*: primam *OQ* 267 ipsam *Q* corr.: ipsa *OQ*
 270 semota *Marullus*: remota *O*: remmota *Q*

ianua cum per se transpectum praebet apertum,
 multa facitque foris ex aedibus ut videantur.
 is quoque enim duplici geminoque fit aere visus.
 primus enim citra postis tum cernitur aer, 275
 inde fores ipsae dextra laevaue sequuntur,
 post extraria lux oculos perterget et aer
 alter et illa foris quae vere transpiciuntur.
 sic ubi se primum speculi proiecit imago,
 dum venit ad nostras acies, protrudit agiturque 280
 aera qui inter se cumquest oculosque locatus,
 et facit ut prius hunc omnem sentire queamus
 quam speculum. sed ubi speculum quoque sensimus ipsum,
 continuo a nobis in idem quae fertur imago
 pervenit et nostros oculos reiecta revisit 285
 atque alium prae se propellens aera volvit
 et facit ut prius hunc quam se videamus, eoque
 distare ab speculo tantum semota videtur.
 quare etiam atque etiam minime mirarier est par,

*

illis quae reddunt speculorum ex aequore visum, 290
 aeribus binis quoniam res confit utraque.
 nunc ea quae nobis membrorum dextera pars est,
 in speculis fit ut in laeva videatur eo quod
 planitiem ad speculi veniens cum offendit imago,
 non convertitur incolumis, sed recta retrorsum 295
 sic eliditur, ut siquis, prius arida quam sit
 cretea persona, allidat pilaeve trabive,
 atque ea continuo rectam si fronte figuram
 servet et elisam retro sese exprimat ipsa. [323]
 fiet ita, ante oculus fuerit qui dexter, ut idem 300 [324]
 nunc sit laevus, et e laevo sit mutua dexter.
 fit quoque de speculo in speculum ut tradatur imago,

277 perterget *Lambinus* : pterget *OQ* 283 speculum *Marullus* :
 in speculum *OQ* 284 in idem *Munro* : in eum *OQ* : iterum *Lach-*
mann post 289 lacunam indicavit *Goebel* 290 illis que red-
 dunt *OQ* : illic quor reddant *Munro* 299 elisam *Q corr.* : lisam *OQ*
 299-347 hunc versuum ordinem restituit *Q corr.* 300 ita *Lach-*
mann : ut *OQ*

quinque etiam sex<ve> ut fieri simulacra suerint.
 nam quaecumque retro parte interiore latebunt,
 inde tamen, quamvis torte penitusque remota, 305 [329]
 omnia per flexos aditus educta licebit
 pluribus haec speculis videantur in aedibus esse.
 usque adeo <e> speculo in speculum translucet imago,
 et cum laeva data est, fit rursum ut dextera fiat,
 inde retro rursum redit et convertit eodem. 310 [334]
 quin etiam quaecumque latuscula sunt speculorum
 assimili lateris flexura praedita nostri,
 dextera ea propter nobis simulacra remittunt,
 aut quia de speculo in speculum transfertur imago,
 inde ad nos elisa bis advolat, aut etiam quod 315 [339]
 circum agitur, cum venit, imago propterea quod
 flexa figura docet speculi convertier ad nos.
 indugredi porro pariter simulacra pedemque
 ponere nobiscum credas gestumque imitari
 propterea quia, de speculi qua parte recedas, 320 [344]
 continuo nequeunt illinc simulacra reverti;
 omnia quandoquidem cogit natura referri
 ac resilire ab rebus ad aequos reddita flexus. [347]

Splendida porro oculi fugitant vitantque tueri. [299]
 sol etiam caecat, contra si tendere pergas, 325 [300]
 propterea quia vis magnast ipsius et alte
 aera per purum graviter simulacra feruntur
 et feriunt oculos turbantia composituras.
 praeterea splendor quicumque est acer adurit
 saepe oculos ideo quod semina possidet ignis 330 [305]
 multa, dolorem oculis quae gignunt insinuando.
 lurida praeterea fiunt quaecumque tuentur
 arquati, quia luroris de corpore eorum
 semina multa fluunt simulacris obvia rerum,

303 sexve *Marullus*: sex *OQ*: aut sex *Lachmann* 304 latebunt
Marullus: latebit *OQ* 308 e *add. ed. Aldina* 310 convertit]
 convertitur *Lachmann* 317 flexa *O corr.*: flexea *O*: flex *Q* 321
 nequeunt *Q*: nequeant *O* 334 multa *Q corr.*: mault *O*: mauult *Q*

multaque sunt oculis in eorum denique mixta, 335 [310]
 quae contage sua palloribus omnia pingunt.

E tenebris autem quae sunt in luce tuemur
 propterea quia, cum propior caliginis aer
 ater init oculos prior et possedit apertos,
 insequitur candens confestim lucidus aer 340 [315]
 qui quasi purgat eos ac nigras discutit umbras
 aeris illius. nam multis partibus hic est
 mobilior multisque minutior et mage pollens.
 qui simul atque vias oculorum luce replevit
 atque patefecit quas ante obsederat aer 345 [320]
 (ater), continuo rerum simulacra sequuntur [321]
 quae sita sunt in luce, lacesuntque ut videamus. [322]
 quod contra facere in tenebris e luce nequimus
 propterea quia posterior caliginis aer
 crassior insequitur qui cuncta foramina complet 350
 obsiditque vias oculorum, ne simulacra
 possint ullarum rerum coniecta movere.

Quadratasque procul turris cum cernimus urbis,
 propterea fit uti videantur saepe rotundae,
 angulus obtusus quia longe cernitur omnis 355
 sive etiam potius non cernitur ac perit eius
 plaga nec ad nostras acies perlabitur ictus,
 aera per multum quia dum simulacra feruntur,
 cogit hebescere eum crebris offensibus aer.
 hoc ubi suffugit sensum simul angulus omnis, 360
 fit quasi ut ad torum saxorum structa terantur,
 non tamen ut coram quae sunt vereque rotunda,
 sed quasi adumbratim paulum simulata videntur.

Vmbra videtur item nobis in sole moveri
 et vestigia nostra sequi gestumque imitari; 365

342 illius *l* 31: ullius *OQ* 345 aer *Bernays*: a. er *O*: ater *Q*
 346 ater *add. Bernays* quaedam *post rerum Avancius* 351 que
 uias *Q corr.*: quia *OQ* 352 coniecta *Marullus*: contexta *OQ*
 movere *Bentley*: moueri *OQ* 357 perlabitur *Lambinus*: deria-
 bitur *OQ* 361 torum *l* 31: turnum *OQ* terantur *Munro*:
 tuantur *OQ*: tuamur *Lachmann*

aerà si credis privatum lumine posse
indugredi, motus hominum gestumque sequentem.
nam nil esse potest aliud nisi lumine cassus
aer id quod nos umbram perhibere suemus.
nimirum quia terra locis ex ordine certis 370
lumine privatur solis quacumque meantes
officimus, repletur item quod liquimus eius,
propterea fit uti videatur, quae fuit umbra
corporis, e regione eadem nos usque secuta.
semper enim nova se radiorum lumina fundunt 375
primaque dispereunt, quasi in ignem lana trahatur.
propterea facile et spoliatur lumine terra
et repletur item nigrasque sibi abluit umbras.

Nec tamen hic oculos falli concedimus hilum.
nam quocumque loco sit lux atque umbra tueri 380
illorum est; eadem vero sint lumina necne,
umbraque quae fuit hic eadem nunc transeat illuc,
an potius fiat paulo quod diximus ante,
hoc animi demum ratio discernere debet,
nec possunt oculi naturam noscere rerum. 385
proinde animi vitium hoc oculis adfingere noli.
qua vehimur navi, fertur, cum stare videtur;
quae manet in statione, ea praeter creditur ire.
et fugere ad puppim colles campique videntur
quos agimus praeter navem velisque volamus. 390
sidera cessare aetheriis adfixa cavernis
cuncta videntur, et assiduo sunt omnia motu,
quandoquidem longos obitus exorta revisunt,
cum permensa suo sunt caelum corpore claro.
solque pari ratione manere et luna videntur 395
in statione, ea quae ferri res indicat ipsa.
exstantesque procul medio de gurgite montes
classibus inter quos liber patet exitus ingens,

378 aliud nisi *O corr.*: ali nisi *O*: aliui ni *Q* 378 abluit *ed. Veronen-*
sis: adluit *OQ* 382 que quae *Ital.*: quaeque *OQ* 393 revisunt
O corr.: reuisent *O*: reuisant *Q* 395 videntur *Lachmann*: uidetur
OQ 397. exstantisque *OQ*: exstant usque *Lachmann*

T. LVCRETI CARI

insula coniunctis tamen ex his una videtur.
 atria versari et circumcursare columnae 400
 usque adeo fit uti pueris videantur, ubi ipsi
 desierunt verti, vix ut iam credere possint
 non supra sese ruere omnia tecta minari.
 iamque rubrum tremulis iubar ignibus erigere alte
 cum coepat natura supraque extollere montis, 405
 quos tibi tum supra sol montis esse videtur
 comminus ipse suo contingens fervidus igni,
 vix absunt nobis missus bis mille sagittae,
 vix etiam cursus quingentos saepe veruti.
 inter eos solemque iacent immania ponti 410
 aequora substrata aetheriis ingentibus oris,
 interiectaque sunt terrarum milia multa
 quae variae retinent gentes et saecula ferarum.
 at collectus aquae digitum non altior unum,
 qui lapides inter sistit per strata viarum, 415
 despectum praebet sub terras impete tanto,
 a terris quantum caeli patet altus hiatus;
 nubila despiciere et caelum ut videare videre (et)
 corpora mirando sub terras abdita caelo.
 denique ubi in medio nobis equus acer obhaesit 420
 flumine et in rapidas amnis despeximus undas,
 stantis equi corpus transversum ferre videtur
 vis et in adversum flumen contrudere raptim,
 et quocumque oculos traiecimus omnia ferri
 et fluere assimili nobis ratione videntur. 425
 porticus aequali quamvis est denique ductu
 stansque in perpetuum paribus suffulta columnis,

406 tibi *Naugerius*: ubi *OQ*: ibi *Marullus* 414 conlectus *Lam-*
binus: coniectus *OQ* 418 despiciere] dispicere *Lachmann* caelum]
 caeli *Bergk*: alii alia ut *om. Q* et *add. Bernays* 419 mirando l 31:
 mirande *O*: mirandae *Q*: miraclo *Bernays* caelo] caeli *Bernays*:
locus varie temptatus 421 despeximus l 31: despeximus *OQ* 423
 flumen *O corr.*: fulmen *OQ*

longa tamen parte ab summa cum tota videtur,
 paulatim trahit angusti fastigia coni,
 tecta solo iungens atque omnia dextera laevis 430
 donec in obscurum coni conduxit acumen.
 in pelago nautis ex undis ortus in undis
 sol fit uti videatur obire et condere lumen;
 quippe ubi nil aliud nisi aquam caelumque tuentur;
 ne leviter credas labefactari undique sensus. 435
 at maris ignaris in portu clauda videntur
 navigia aplustris fractis obnitier undae.
 nam quaecumque supra rorem salis edita pars est
 remorum, recta est, et recta superne gubernata.
 quae demersa liquorem obeunt, refracta videntur 440
 omnia converti sursumque supina reverti
 et reflexa prope in summo fluitare liquore.
 raraque per caelum cum venti nubila portant
 tempore nocturno, tum splendida signa videntur
 labier adversum nimbos atque ire superne 445
 longe aliam in partem ac vera ratione feruntur.
 at si forte oculo manus uni subdita subter
 pressit eum, quodam sensu fit uti videantur
 omnia quae tuimur fieri tum bina tuendo,
 bina lucernarum florentia lumina flammis 450
 binaque per totas aedes geminare supellex
 et duplices hominum facies et corpora bina.
 denique cum suavi devinxit membra sopore
 somnus et in summa corpus iacet omne quiete,
 tum vigilare tamen nobis et membra movere 455
 nostra videmur, et in noctis caligine caeca
 cernere censemus solem lumenque diurnum,
 conclusoque loco caelum mare flumina montis
 mutare et campos pedibus transire videmur,

436 at *Q* corr.: a *OO* 437 fractis *l* 31: factas *OO* undae
Lachmann: undas *OO*: undis *Marullus* 440 liquorem *Lachmann*:
 liquore *OO* 446 ac vera *Vossius*: aque *O*: atque *Q* 448 uti
Marullus: ut *OO* 453 suavi devinxit *Q* corr.: suauidet uinxit *O*
 (iunxit *Q*) 456 videmur *Marullus*: uideatur *OO*

Principio auditur sonus et vox omnis, in auris
 insinuata suo pepulere ubi corpore sensum. 525
 corpoream <vocem> quoque enim constare fatendumst
 et sonitum, quoniam possunt impellere sensus.
 praeterea radit vox fauces saepe facitque
 asperiora foras gradiens arteria clamor.
 quippe per angustum turba maiore-coorta 530
 ire foras ubi coeperunt primordia vocum,
 scilicet expletis quoque ianua raditur oris.
 haud igitur dubiumst quin voces verbaque constant
 corporeis e principiis, ut laedere possint.
 nec te fallit item quid corporis auferat et quid 535
 detrahat ex hominum nervis ac viribus ipsi
 perpetuus sermo nigrae noctis ad umbram
 aurorae perductus ab exoriente nitore,
 praesertim si cum summost clamore profusus.
 ergo corpoream vocem constare necessest, 540
 multa loquens quoniam amittit de corpore partem.
 asperitas autem vocis fit ab asperitate [551]
 principiorum et item levor levore creatur. [552]
 nec simili penetrant auris primordia forma, [542]
 cum tuba depresso graviter sub murmure mugit 545 [543]
 et reboat raucum †retro cita† barbara bombum,
 et †validis necti tortis† ex Heliconis
 cum liquidam tollunt lugubri voce querelam.

Hasce igitur penitus voces cum corpore nostro
 exprimimus rectoque foras emittimus ore, 550 [548]
 mobilis articulat verborum daedala lingua [549]
 formaturaque laborum pro parte figurat. [550]

526 corpoream *Ital.*: corporea *OQ* vocem *hic add. Lachmann*:
post enim l31 528 praeterea *O*: propterea *Q* 532 expletis]
 expleti *Purmann* raditur *Q*: reditur *O*: redditur *l31* 542-3
 [551-2] *huc transposuit Lambinus* 543 laevor laevore *Lambinus*:
 levo letiore *OQ* 545 murmure *ed. Brixiensis*: murmura *OQ* 546
 reboat *Q corr.*: reuorat *OQ* retro cita *OQ*: regio cita *Lachmann*:
 Berecynthia *Vossius*: alii alia 547 validis necti tortis *O* (nete
O corr. Q): validis cygni torrentibus *Vossius*: cygni tortis convallibus
Lachmann: gelidis cygni nocte oris *Bernays*: alii alia 550 emit-
 timus *O corr.*: mittimus *OQ* 551 verborum *Lambinus*: ueruorum
OQ

hoc ubi non longum spatiumst unde una profecta
 perveniat vox quaeque, necessest verba quoque ipsa
 plane exaudiri discernique articulatim. 555
 servat enim formaturam servatque figuram.
 at si interpositum spatium sit longius aequo,
 aera per multum confundi verba necessest
 et conturbari vocem, dum transvolat auras.
 ergo fit, sonitum ut possis sentire neque illam 560
 internoscere, verborum sententia quae sit :
 usque adeo confusa venit vox inque pedita.
 praeterea verbum saepe unum perciet auris
 omnibus in populo, missum praeconis ab ore.
 in multas igitur voces vox una repente 565
 diffugit, in privas quoniam se dividit auris
 obsignans formam verbis clarumque sonorem.
 at quae pars vocum non auris incidit ipsas,
 praeterlata perit frustra diffusa per auras.
 pars solidis allisa locis reiecta sonorem 570
 reddit et interdum frustratur imagine verbi.
 quae bene cum videas, rationem reddere possis
 tute tibi atque aliis, quo pacto per loca sola
 saxa paris formas verborum ex ordine reddant,
 palantis comites cum montis inter opacos 575
 quaerimus et magna dispersos voce ciemus.
 sex etiam aut septem loca vidi reddere voces,
 unam cum iaceres : ita colles collibus ipsi
 verba repulsantes iterabant docta referri.
 haec loca capripedes satyros nymphasque tenere 580
 finitimi fingunt et faunos esse loquuntur
 quorum noctivago strepitu ludoque iocanti
 adfirmant vulgo taciturna silentia rumpi
 chordarumque sonos fieri dulcisque querela,

553 una *Bentley* : illa *OQ* 567 verbis] verbi *Lachmann* 568
 incidit] accidit *Lambinus* 570 locis *Q corr.* : loris *OQ* 576 magna
Q corr. : magnas *O* : magnus *Q* 577 vidi reddere *Ital.* : uidere
 odore *OQ* 579 docta *Lachmann* : dicta *OQ* : icta *Bentley* referri]
 referre *Bentley*. 581 faunos *Ital.* : faunes *OQ*

tibia quas fundit digitis pulsata canentum, 585
 et genus agricolum late sentiscere, cum Pan
 pinea semiferi capitis velamina quassans
 unco saepe labro calamos percurrit hiantis,
 fistula silvestrem ne cesset fundere musam.
 cetera de genere hoc monstra ac portenta loquuntur, 590
 ne loca deserta ab divis quoque forte putentur
 sola tenere. ideo iactant miracula dictis
 aut aliqua ratione alia ducuntur, ut omne
 humanum genus est avidum nimis auricularum.

Quod superest, non est mirandum qua ratione, 595
 per loca quae nequeunt oculi res cernere apertas,
 haec loca per voces veniant aurisque lacescant.
 colloquium clausis foribus quoque saepe videmus,
 nimirum quia vox per flexa foramina rerum
 incolumis transire potest, simulacra renutant. 600
 perscinduntur enim, nisi recta foramina tranant,
 qualia sunt vitri, species qua transvolat omnis.
 praeterea partis in cunctas dividitur vox,
 ex aliis aliae quoniam gignuntur, ubi una
 dissiluit semel in multas exorta, quasi ignis 605
 saepe solet scintilla suos se spargere in ignis.
 ergo replentur loca vocibus abdita retro,
 omnia quae circum fervunt sonituque cientur.
 at simulacra viis directis omnia tendunt
 ut sunt missa semel; quapropter cernere nemo 610
 saepta supra potis est, at voces accipere extra.
 et tamen ipsa quoque haec, dum transit clausa (domorum)
 vox obtunditur atque auris confusa penetrat
 et sonitum potius quam verba audire videmur.

Nec, qui sentimus sucum, lingua atque palatum 615

587 velamina *L*: ullamina *QQ* 590 cetera *l 31*: petere *QQ*
 594 auricularum] miraculorum *Bentley* 598 videmus] ubi demus
Lachmann 603 cunctas *Q corr.*: cuncta *QQ* 604 ubi una
Q corr.: ubina *QQ* 608 fervunt *Munro*: fuerunt *QQ*: feriunt
Lachmann 611 saepta *Wakefield*: saepe *QQ*: saepem *Lachmann*
 supra] intra *Lachmann*: ultra *Bernays* 612 domorum *add. Lach-*
mann 615 nec *Marullus*: hoc *QQ*: nunc *Merrill* qui] quis
Marullus

plusculum habent in se rationis plus operaeve.
 principio sucum sentimus in ore, cibum cum
 mandendo exprimimus, ceu plenam spongiam aquai
 siquis forte manu premere ac siccare coepit.
 inde quod exprimimus per caulas omne palati 620
 diditur et rarae per flexa foramina linguae.
 hoc ubi levia sunt manantis corpora suci,
 suaviter attingunt et suaviter omnia tractant
 umida linguae circum sudantia templa.
 at contra pungunt sensum lacerantque coorta, 625
 quanto quaeque magis sunt asperitate repleta.
 deinde voluptas est e suco fine palati;
 cum vero deorsum per fauces praecipitavit,
 nulla voluptas est, dum diditur omnis in artus.
 nec refert quicquam quo victu corpus alatur, 630
 dummodo quod capias concoctum didere possis
 artubus et stomachi umidulum servare tenorem.

Nunc aliis aliis qui sit cibus atque venenum
 expediam, quareve, aliis quod triste et amarumst,
 hoc tamen esse aliis possit perdulce videri. 635
 tantaque (in) his rebus distantia differitasquest,
 ut quod ali cibus est aliis fuat acre venenum.
 test itaque ut† serpens, hominis quae tacta salivis
 disperit ac sese mandendo conficit ipsa.
 praeterea nobis veratrum est acre venenum, 640
 at capris adipēs et coturnicibus auget.
 ut quibus id fiat rebus cognoscere possis,
 principio meminisse decet quae diximus ante,

616 operaeve *Lachmann*: opere *OQ* 621 per flexa *Mon.*: per-
 plexa *OQ* 632 umidulum *Lachmann*: umidum *OQ*: humectum
Pontanus 633 atque venenum *scripsi* ut uideamus *OQ*: unicus
 aptus *Lachmann*: utilis unus *Polle*: alii alia post 633 lacunam
 indicavit *Brieger* 636 in *Nonius*: om. *OQ* differitas-
 quest] differitasque *Nonius* 637 ali *Lachmann*: aliis *O*: alius *Q*
 638 est itaque ut *OQ*: est aliquae ut *Lachmann*: extetque ut *Munro*:
 est ut quae *Brieger*: excetra ut est *Ellis* 641 coturnicibus *O corr.*:
 cocturnicibus *O*: quod turnicibus *Q* 642 ut quibus id *Lambinus*:
 id quibus ut *OQ*

semina multimodis in rebus mixta teneri.
 porro omnes quaecumque cibum capiunt animantes, 645
 ut sunt dissimiles extrinsecus et generatim
 extima membrorum circumcaesura coercet,
 proinde et seminibus constant variante figura.
 semina cum porro distent, differre necessest
 intervalla viasque, foramina quae perhibemus, 650
 omnibus in membris et in ore ipsoque palato.
 esse minora igitur quaedam maioraque debent,
 esse triquetra aliis, (aliis) quadrata necessest,
 multa rotunda, modis multis multangula quaedam.
 namque figurarum ratio ut motusque reposcunt, 655
 proinde foraminibus debent differre figurae,
 et variare viae proinde ac textura coercet.
 hoc ubi quod suave est aliis aliis fit amarum,
 illi, cui suave est, levissima corpora debent
 contractabiliter caulas intrare palati, 660
 at contra quibus est eadem res intus acerba,
 aspera nimirum penetrant hamataque fauces.
 nunc facile est ex his rebus cognoscere quaeque.
 quippe ubi cui febris bili superante coorta est
 aut alia ratione aliquast vis excita morbi, 665
 perturbatur ibi iam totum corpus et omnes
 commutantur ibi positurae principiorum;
 fit prius ad sensum (ut) quae corpora conveniebant
 nunc non convenient, et cetera sint magis apta,
 quae penetrata queunt sensum progignere acerbum. 670
 utraque enim sunt in mellis commixta sapore;
 id quod iam supera tibi saepe ostendimus ante.
 Nunc age quo pacto naris adiectus odoris
 tangat agam. primum res multas esse necessest
 unde fluens volvat varius se fluctus odorum, 675
 et fluere et mitti vulgo spargique putandumst;

648 et] ex *Lachmann* variante *Lachmann*: variantque *OQ* 653
 aliis *om.* *OQ* 659 corpora *Ital.*: corpore *OQ* 660 caulas *Q corr.*:
 caudas *OQ* 662 aspera nimirum *Ital.*: asper animorum *OQ*
 668 ut *add. l 31* 671, 672 post 662 collocavit *Lachmann*

verum aliis alius magis est animantibus aptus
dissimilis propter formas. ideoque per auras
mellis apes quamvis longe ducuntur odore,
vulturiique cadaveribus. tum fissa ferarum 680
ungula quo tulerit gressum promissa canum vis
ducit, et humanum longe praesentit odorem
Romulidarum arcis servator candidus anser.
sic aliis alius nidor datus ad sua quemque
pabula ducit et a taetro resilire veneno 685
cogit, eoque modo servantur saecula ferarum.

Hic odor ipse igitur, naris quicumque lacessit,
est alio ut possit permitti longius alter.
sed tamen haud quisquam tam longe fertur eorum
quam sonitus, quam vox, mitto iam dicere quam res 690
quae feriunt oculorum acies visumque lacessunt.
errabundus enim tarde venit ac perit ante
paulatim facilis distractus in aeris auras;
ex alto primum quia vix emittitur ex re:
nam penitus fluere atque recedere rebus odores 695
significat quod fracta magis redolere videntur
omnia, quod contrita, quod igni collabefacta:
deinde videre licet maioribus esse creatum
principiis quam vox, quoniam per saxea saepta
non penetrat, qua vox vulgo sonitusque feruntur. 700
quare etiam quod olet non tam facile esse videbis
investigare in qua sit regione locatum.
refrigescit enim cunctando plaga per auras
nec calida ad sensum decurrunt nuntia rerum.
errant saepe canes itaque et vestigia quaerunt. 705

Nec tamen hoc solis in odoribus atque saporum
in generest, sed item species rerum atque colores
non ita conveniunt ad sensus omnibus omnes,
ut non sint aliis quaedam magis acria visu.

677 magis est *ed. Brixensis*: et magis est *O*: est magis et *Q*
680 vulturiique *Pontanus*: vulturique *OQ* 696 redolere *O corr.*:
redolere *OQ* 698 creatum *Marullus*: creatam *OQ* 704 calida]
valida *Merrill* decurrunt] decurrit *Giussani* 706-721 *uncinis incl.*
Lachmann

quin etiam gallum, noctem explaudentibus alis 710
 auroram clara consuetum voce vocare,
 noenu queunt rabidi contra constare leones
 inque tueri: ita continuo meminere fugai,
 nimirum quia sunt gallorum in corpore quaedam
 semina, quae cum sunt oculis immissa leonum, 715
 pupillas interfodiunt acremque dolorem
 praebent, ut nequeant contra durare feroces;
 cum tamen haec nostras acies nil laedere possint,
 aut quia non penetrant aut quod penetrantibus illis
 exitus ex oculis liber datur, in remorando 720
 laedere ne possint ex ulla lumina parte.

Nunc age quae moveant animum res accipe, et unde
 quae veniunt veniant in mentem percipe paucis.
 principio hoc dico, rerum simulacra vagari
 multa modis multis in cunctas undique partis 725
 tenvia, quae facile inter se iunguntur in auris,
 obvia cum veniunt, ut aranea bratteaque auri.
 quippe etenim multo magis haec sunt tenvia textu
 quam quae percipiunt oculos visumque lacesunt,
 corporis haec quoniam penetrant per rara cientque 730
 tenvem animi naturam intus sensumque lacesunt.
 Centauros itaque et Scyllarum membra videmus
 Cerbereasque canum facies simulacraque eorum
 quorum morte obita tellus amplectitur ossa;
 omne genus quoniam passim simulacra feruntur, 735
 partim sponte sua quae fiunt aere in ipso,
 partim quae variis ab rebus cumque recedunt
 et quae conflunt ex horum facta figuris.
 nam certe ex vivo Centauri non fit imago,
 nulla fuit quoniam talis natura animantis, 740
 verum ubi equi atque hominis casu convenit imago,

710 quin *O* corr. : quum *O* : quur *Q* 712 rabidi *Wakefield* : rapidi
OQ 719 illis *Q* corr. : ilus *OQ* 730 rara *Marullus* : ara *OQ*
 735 omne genus *Marullus* : omnigenus *OQ* 736 fiunt *Marullus* :
 flunt *O* : fluunt *Q* 740 animantis *Gifanius* : anima *OQ* : animai *L* :
 animalis *Lambinus*

haerescit facile extemplo, quod diximus ante,
 propter subtilem naturam et tenvia texta.
 cetera de genere hoc eadem ratione creantur.
 quae cum mobilitate summa levitate feruntur, 745
 ut prius ostendi, facile uno commovet ictu
 quaelibet una animum nobis subtilis imago ;
 tenvis enim mens est et mire mobilis ipsa.

Haec fieri ut memoro, facile hinc cognoscere possis.
 quatenus hoc simile est illi, quod mente videmus 750
 atque oculis, simili fieri ratione necesse est.
 nunc igitur quoniam docui me forte leonem
 cernere per simulacra, oculos quaecumque lacesunt,
 scire licet mentem simili ratione moveri,
 per simulacra leonem <et> cetera quae videt aequae 755
 nec minus atque oculi, nisi quod mage tenvia cernit.
 nec ratione alia, cum somnus membra profudit,
 mens animi vigilat, nisi quod simulacra lacesunt
 haec eadem nostros animos quae cum vigilamus,
 usque adeo, certe ut videamur cernere eum quem 760
 relictam vitam iam mors et terra potitast.
 hoc ideo fieri cogit natura, quod omnes
 corporis affecti sensus per membra quiescunt
 nec possunt falsum veris convincere rebus.
 praeterea meminisse iacet languetque sopore 765
 nec dissentit eum mortis letique potitum
 iam pridem, quem mens vivum se cernere credit.
 quod superest, non est mirum simulacra moveri
 brachiaque in numerum iactare et cetera membra.
 nam fit ut in somnis facere hoc videatur imago ; 770
 quippe ubi prima perit alioque est altera nata
 inde statu, prior hic gestum mutasse videtur.
 scilicet id fieri celeri ratione putandumst :

752 quoniam docui *Lambinus* : docui quoniam *OQ* leonem *Lach-*
mann : leonem *OQ* 755 leonem *Lachmann* : leonem *OQ* et
add. Marullus 756 atque oculi *Ital.* : oculi atque *OQ* 760 quem
Marullus : que *OQ* 761 relictam *Vossius* : reddita *OQ*

tanta est mobilitas et rerum copia tanta
 tantaque sensibili quovis est tempore in uno 775
 copia particularum, ut possit suppeditare.

Multaque in his rebus quaeruntur multaque nobis
 clarandumst, plane si res exponere avemus.
 quaeritur in primis quare, quod cuique libido
 venerit, extemplo mens cogitet eius id ipsum. 780

anne voluntatem nostram simulacra tuentur
 et simul ac volumus nobis occurrit imago,
 si mare, si terram cordist, si denique caelum?
 conventus hominum pompam convivia pugnās,
 omnia sub verbone creat natura paratque? 785

cum praesertim aliis eadem in regione locoque
 longe dissimilis animus res cogitet omnis.

quid porro, in numerum procedere cum simulacra
 cernimus in somnis et mollia membra movere,
 mollia mobiliter cum alternis bracchia mittunt 790
 et repetunt oculis gestum pede convenienti?

scilicet arte madent simulacra et docta vagantur,
 nocturno facere ut possint in tempore ludos.

an magis illud erit verum? quia tempore in uno,
 quod sentimus, id est, cum vox emittitur una, 795
 tempora multa latent, ratio quae comperit esse,

propterea fit uti quovis in tempore quaeque
 praesto sint simulacra locis in quisque parata:
 tanta est mobilitas et rerum copia tanta.

hoc, ubi prima perit alioque est altera nata 800
 inde statu, prior hic gestum mutasse videtur.

et quia tenvia sunt, nisi quae contendit, acute
 cernere non potis est animus; proinde omnia quae sunt
 praeterea pereunt, nisi (si ad) quae se ipse paravit.
 ipse parat sese porro speratque futurum
 ut videat quod consequitur rem quamque; fit ergo.

791 repetunt] referunt *Lachmann* oculis] ollis *Creech* 795 quod
 sentimus *Lachmann*: consentimus *OQ*: cum sentimus *Munro* 798
 sint *l31*: sin *Q*: in *O* 799-801 = 774, 771, 772 *secl. Lachmann*
 799 est mobilitas (*cf.* 774): mobilitasst *OQ* 804 si ad quae *Brieger*:
 que ex *OQ*: si quae ad *Lachmann*

nonne vides oculos etiam, cum tenvia quae sunt
 cernere coeperunt, contendere se atque parare, 809
 nec sine eo fieri posse ut cernamus acute? 810
 et tamen in rebus quoque apertis noscere possis,
 si non advertas animum, proinde esse quasi omni
 tempore semotum fuerit longeque remotum.
 cur igitur mirumst, animus si cetera perdit
 praeterquam quibus est in rebus deditus ipse? 815
 deinde adopinamur de signis maxima parvis
 ac nos in fraudem induimus frustraminis ipsi.

Fit quoque ut interdum non suppeditetur imago
 eiusdem generis, sed femina quae fuit ante,
 in manibus vir uti factus videatur adesse, 820
 aut alia ex alia facies aetasque sequatur.
 quod ne miremur sopor atque oblivia curant. [826]

Illud in his rebus vitium vehementer avessis ✓ [822]
 effugere, errorem vitareque praemetuenter, [823]
 lumina ne facias oculorum clara creata, 825 [824]
 prospicere ut possimus, et ut proferre queamus ✓ [825]
 proceros passus, ideo fastigia posse
 surarum ac feminum pedibus fundata plicari,
 bracchia tum porro validis ex apta lacertis
 esse manusque datas utraque (ex) parte ministras, ✓ 830
 ut facere ad vitam possemus quae foret usus.
 cetera de genere hoc inter quaecumque pretantur
 omnia perversa praepostera sunt ratione,
 nil ideo quoniam natumst in corpore ut uti
 possemus, sed quod natumst id procreat usum. 835
 nec fuit ante videre oculorum lumina nata
 nec dictis orare prius quam lingua creatast,
 sed potius longe linguae praecessit origo

808 = 804 *secl. editores* 811 *noscere Ital. : nocere OQ* 815
 praeterquam *Avancius* : praeterea quam *OQ* 818 *non ed. Brixien-*
sis : nos *OQ* 820 *vir uti Q corr. : virtuti OQ* 822 [826] *huc*
transtulit Q corr. 823-857 *uncinis incl. edd.* 823 *avessis Munro :*
inesse OQ 824 *errorem vitareque Q corr. : errore multareque OQ*
 826 *possimus] possemus Lachmann* *queamus Lachmann : via OQ*
 830 *ex add. Lachmann* 836 *nata] natum Q corr.*

sermonem multoque creatae sunt prius aures
 quam sonus est auditus, et omnia denique membra 840
 ante fuere, ut opinor, eorum quam foret usus.
 haud igitur potuere utendi crescere causa.
 at contra conferre manu certamina pugnae
 et lacerare artus foedareque membra cruore
 ante fuit multo quam lucida tela volarent, 845
 et vulnus vitare prius natura coegit
 quam daret obiectum parmai laeva per artem.
 scilicet et fessum corpus mandare quieti
 multo antiquius est quam lecti mollia strata,
 et sedare sitim prius est quam pocula natum. 850
 haec igitur possent utendi cognita causa
 credier, ex usu quae sunt vitaeque reperta.
 illa quidem sorsum sunt omnia quae prius ipsa
 nata dedere suae post notitiam utilitatis.
 quo genere in primis sensus et membra videmus; 855
 quare etiam atque etiam procul est ut credere possis
 utilitatis ob officium potuisse creari.

[Illud item non est mirandum, corporis ipsa
 quod natura cibum quaerit cuiusque animantis.
 quippe etenim fluere atque recedere corpora rebus 860
 multa modis multis docui, sed plurima debent
 ex animalibu'. (quae) quia sunt exercita motu,
 multaque per sudorem ex alto pressa feruntur,
 multa per os exhalantur, cum languida anhelant,
 his igitur rebus rarescit corpus et omnis 865
 subruitur natura; dolor quam consequitur rem.
 propterea capitur cibus ut suffulciat artus
 et recreet viris interdatus atque patentem
 per membra ac venas ut amorem obturet edendi.
 umor item discedit in omnia quae loca cumque 870
 poscunt umorem; glomerataque multa vaporis

843 conferre *O* corr. : conserre *OQ* 858-876 *uncinis incl. edd.*
 862 quae *add. Lachmann* 863 *post 864 collocavit Lachmann*

corpora, quae stomacho praebent incendia nostro,
dissipat adveniens liquor ac restinguit ut ignem,
urere ne possit calor amplius aridus artus.
sic igitur tibi anhela sitis de corpore nostro 875
abluitur, sic expletur ieiuna cupido.]

Nunc qui fiat uti passus proferre queamus,
cum volumus, varieque datum sit membra movere,
et quae res tantum hoc oneris protrudere nostri
corporis insuerit, dicam : tu percipe dicta. 880

dico animo nostro primum simulacra meandi
accidere atque animum pulsare, ut diximus ante.
inde voluntas fit ; neque enim facere incipit ullam
rem quisquam, <quam> mens providit quid velit ante.
id quod providet, illius rei constat imago. 885

ergo animus cum sese ita commovet ut velit ire
inque gredi, ferit extemplo quae in corpore toto
per membra atque artus animai dissita vis est.
et facilest factu, quoniam coniuncta tenetur.
inde ea proporro corpus ferit, atque ita tota 890
paulatim moles protruditur atque movetur.

praeterea tum rarescit quoque corpus et aer
(scilicet ut debet qui semper mobilis exstat)
per patefacta venit penetratque foramina largus
et dispergitur ad partis ita quasque minutas 895
corporis. hic igitur rebus fit utrimque duabus,

corpus ut, ac navis velis ventoque, feratur.
nec tamen illud in his rebus mirabile constat,
tantula quod tantum corpus corpuscula possunt
contorquere et onus totum convertere nostrum. 900

quippe etenim ventus subtili corpore tenvis
trudit agens magnam magno molimine navem
et manus una regit quantovis impete euntem

877 queamus *Ital.* : quemus *O* : quiemus *Q* 878 varieque *ed.*
Veronensis : uareque *OQ* : quareve *Merrill* 884 quam *add. ed.*
Brixiensis 885 constat *l 31* : constare *OQ* 890 ferit *Marullus* :
perit *OQ* 896 hic] his *Faber* 897 corpus ut ac *Wakefield* :
corporis ut ac *OQ* (*del. ac Q corr.*) : corpus uti, ut *Lambinus* : corporis
ut *Muretus* : alii alia

atque gubernaculum contorquet quolibet unum,
 multaque per trocleas et tympana pondere magno 905
 commovet atque levi sustollit machina nisu.

Nunc quibus ille modis somnus per membra quietem
 irriget atque animi curas e pectore solvat,
 suavidicis potius quam multis versibus edam;
 parvus ut est cycni melior canor, ille gruum quam 910
 clamor in aetheriis dispersus nubibus austri.
 tu mihi da tenuis auris animumque sagacem,
 ne fieri negites quae dicam posse retroque
 vera repulsanti discedas pectore dicta,
 tutemet in culpa cum sis neque cernere possis. 915
 principio somnus fit ubi est distracta per artus
 vis animae partimque foras eiecta recessit
 et partim contrusa magis concessit in altum.
 dissoluuntur enim tum demum membra fluuntque.
 nam dubium non est, animai quin opera sit 920
 sensus hic in nobis, quem cum sopor impedit esse,
 tum nobis animam perturbatam esse putandumst
 eiectamque foras; non omnem; namque iaceret
 aeterno corpus perfusum frigore leti.
 quippe ubi nulla latens animai pars remaneret 925
 in membris, cinere ut multa latet obrutus ignis,
 unde reconfliari sensus per membra repente
 posset, ut ex igni caeco consurgere flamma?

Sed quibus haec rebus novitas confiat et unde
 perturbari anima et corpus languescere possit, 930
 expediam: tu fac ne ventis verba profundam.
 principio externa corpus de parte necessum est,
 aeriis quoniam vicinum tangitur auris,
 tundier atque eius crebro pulsariet ictu,
 proptereaue fere res omnes aut corio sunt 935
 aut etiam conchis aut callo aut cortice tectae.
 interiorem etiam partem spirantibus aer

905 pondere magno] pondera magna *Lachmann* 907 quietem
Macrobius : quiete *QQ* 936 callo *Q* *corr.* : gallo *QQ*

verberat hic idem, cum ducitur atque reflatur.
 quare utrimque secus cum corpus vapulet et cum
 perveniant plagae per parva foramina nobis 940
 corporis ad primas partis elementaque prima,
 fit quasi paulatim nobis per membra ruina.
 conturbantur enim positurae principiorum
 corporis atque animi. fit uti pars inde animai
 eiciatur et introrsum pars abdita cedat, 945
 pars etiam distracta per artus non queat esse
 coniuncta inter se neque motu mutua fungi;
 inter enim saepit coetus natura viasque;
 ergo sensus abit mutatis motibus alte.
 et quoniam non est quasi quod suffulciat artus, 950
 debile fit corpus languescuntque omnia membra,
 bracchia palpebraeque cadunt poplitesque cubanti
 saepe tamen summittuntur virisque resolvunt.
 deinde cibum sequitur somnus, quia, quae facit aer,
 haec eadem cibus, in venas dum diditur omnis, 955
 efficit. et multo sopor ille gravissimus exstat
 quem satur aut lassus capias, quia plurima tum se
 corpora conturbant magno contusa labore.
 fit ratione eadem coniectus partim animai
 altior atque foras eiectus largior eius, 960
 et divisior inter se ac distractior intust.

Et quo quisque fere studio devinctus adhaeret
 aut quibus in rebus multum sumus ante morati
 atque in ea ratione fuit contenta magis mens,
 in somnis eadem plerumque videmur obire; 965
 causidici causas agere et componere leges,
 induperatores pugnare ac proelia obire,
 nautae contractum cum ventis degere duellum,
 nos agere hoc autem et naturam quaerere rerum

945 eiciatur *Lambinus*: eliciatur *OQ* 952 cubanti] carenti
Nonius: cadenti *Purmann* 959 partim *Lachmann*: parte *OQ*
 961 intust *scripsi*: intus *OQ*: actus *Lachmann*: in test *Munro* 968
 duellum *cod. Bodleianus*: uellum *O*: uelum *Q*: bellum *O corr.*

semper et inventam patriis exponere chartis. 970
 cetera sic studia atque artis plerumque videntur
 in somnis animos hominum frustrata tenere.
 et quicumque dies multos ex ordine ludis
 assiduas dederunt operas, plerumque videmus,
 cum iam destiterunt ea sensibus usurpare, 975
 reliquas tamen esse vias in mente patentis,
 qua possint eadem rerum simulacra venire.
 per multos itaque illa dies eadem obversantur
 ante oculos, etiam vigilantes ut videantur
 cernere saltantis et mollia membra moventis 980
 et citharae liquidum carmen chordasque loquentis
 auribus accipere et consessum cernere eundem
 scaenaique simul varios splendere decores.
 usque adeo magni refert studium atque voluptas,
 et quibus in rebus consuerint esse operati 985
 non homines solum sed vero animalia cuncta.
 quippe videbis equos fortis, cum membra iacebunt,
 in somnis sudare tamen spirareque semper
 et quasi de palma summas contendere viris
 aut quasi carceribus patefactis †saepe quiete† 990
 venantumque canes in molli saepe quiete [999]
 iactant crura tamen subito vocesque repente [991]
 mittunt et crebro redducunt naribus auras,
 ut vestigia si teneant inventa ferarum,
 expergefactive sequuntur inania saepe 995 [994]
 cervorum simulacra, fugae quasi dedita cernant,
 donec discussis redeant erroribus ad se.
 at consueta domi catulorum blanda propago
 discutere et corpus de terra corripere instant 999 [998]

982 consessum *Marullus*: consensum *OQ* 984 voluptas *Lach-*
mann: uoluntas *OQ* 989 palma *Lambinus*: palmas *OQ*: palmis
O corr. 990 saepe quiete *OQ* (*ex* 991 [999]): colligere aestum
Lachmann: velle volare *Munro*: alii alia 991 [999] *huc transtulit*
ed. Aldina 994 [993] *ut* (*cf.* 1002): et *OQ* 996 fugae *Marullus*:
 fuga *OQ* 997 erroribus *Turnebus*: terroribus *OQ* 1000-
 1003 = 992-995 [991-994] *secl. editores*

proinde quasi ignotas facies atque ora tuantur. 1004
 et quo quaeque magis sunt aspera semini- 1005
 tam magis in somnis eadem saevire necessust.
 at variae fugiunt volucres pinnisque repente
 sollicitant divum nocturno tempore lucos,
 accipitres somno in leni si proelia pugn-
 edere sunt persectantes visaeque volantes. 1010
 porro hominum mentes, magnis quae motibus edunt
 magna, itidem saepe in somnis faciuntque geruntque,
 reges expugnant, capiuntur, proelia miscent,
 tollunt clamorem, quasi si iugulentur, ibidem.
 multi depugnant gemitusque doloribus edunt 1015
 et quasi pantheraè morsu saevive leonis
 mandantur magnis clamoribus omnia complent.
 multi de magnis per somnum rebu' loquuntur
 indicioque sui facti persaepe fuere.
 multi mortem obeunt. multi, de montibus altis 1020
 ut qui praecipitent ad terram corpore toto,
 exterrentur et ex somno quasi mentibu' capti
 vix ad se redeunt permoti corporis aestu.
 flumen item sitiens aut fontem propter amoenum
 assidet et totum prope faucibus occupat amnem. 1025
 puri saepe lacum propter si ac dolia curta
 somno devincti credunt se extollere vestem,
 totius umorem saccatum corpori' fundunt,
 cum Babylonica magnifico splendore rigantur.
 tum quibus aetatis freta primitus insinuatur 1030
 semen, ubi ipsa dies membris matura creavit,
 conveniunt simulacra foris e corpore quoque
 nuntia praeclari vultus pulchrique coloris,
 qui ciet irritans loca turgida semine multo,

1011 motibus *Mon.*: montibus *OQ* 1021 qui *O*: quasi *Q*
 1022 exterrentur *ed. Aldina*: exterruntur *OQ*: externantur *Lach-*
mann 1026 puri] pusi *Lambinus*: poti *Merrill* sei *Lachmann*:
 se *OQ* 1033 coloris *O corr.*: colores *OQ* 1034 qui *Lambinus*:
 quae *OQ*

ut quasi transactis saepe omnibu' rebu' profundant 1035
fluminis ingentis fluctus vestemque cruentent.

Sollicitatur id (in) nobis, quod diximus ante,
semen, adulta aetas cum primum roborat artus.
namque alias aliud res commovet atque lacescit ;
ex homine humanum semen ciet una hominis vis. 1040
quod simul atque suis eiectum sedibus exit,
per membra atque artus decedit corpore toto
in loca conveniens nervorum certa cietque
continuo partis genitalis corporis ipsas.
irritata tument loca semine fitque voluntas 1045
eicere id quo se contendit dira libido,
idque petit corpus, mens unde est saucia amore. 1048
namque omnes plerumque cadunt in vulnus et illam
emicat in partem sanguis unde icimur ictu, 1050
et si comminus est, hostem ruber occupat umor.
sic igitur Veneris qui telis accipit ictus,
sive puer membris muliebribus hunc iaculatur
seu mulier toto iactans e corpore amorem,
unde feritur, eo tendit gestitque coire 1055
et iacere umorem in corpus de corpore ductum.
namque voluptatem praesagit muta cupido.

Haec Venus est nobis ; hinc autemst nomen amoris,
hinc illaec primum Veneris dulcedinis in cor
stillavit gutta et successit frigida cura. 1060
nam si abest quod ames, praesto simulacra tamen sunt
illius et nomen dulce obversatur ad auris.
sed fugitare decet simulacra et pabula amoris
absterrere sibi atque alio convertere mentem
et iacere umorem collectum in corpora quaeque 1065
nec retinere, semel conversum unius amore,
et servare sibi curam certumque dolorem.

1035 ut *Marullus* : et *OQ* 1037 in *add. l 31* 1047 (incitat
irritans . . . = 1034) *secl. editores* 1055 feritur *O corr.* : ferit *O* :
territur *Q* 1057 muta *O* : multa *Q* 1058 nomen] momen *Lach-*
mann : numen *Creech* 1059 illaec *O corr.* : ille *O* : illa *Q* 1061
nam si *Q corr.* : namst *OQ* ames] aves *Lachmann*

ulcus enim vivescit et inveterascit alendo
 inque dies gliscit furor atque aerumna gravescit,
 si non prima novis conturbes vulnera plagis 1070
 vulgivagaque vagus Venere ante recentia cures
 aut alio possis animi traducere motus.

Nec Veneris fructu caret is qui vitat amorem,
 sed potius quae sunt sine poena commoda sumit.
 nam certe purast sanis magis inde voluptas 1075
 quam miseris. etenim potiundi tempore in ipso
 fluctuat incertis erroribus ardor amantum
 nec constat quid primum oculis manibusque fruantur.
 quod petiere, premunt arte faciuntque dolorem
 corporis et dentis inlidunt saepe labellis 1080
 osculaque adfligunt, quia non est pura voluptas
 et stimuli subsunt qui instigant laedere id ipsum
 quodcumque est, rabies unde illaec germina surgunt. *fu*
 sed leviter poenas frangit Venus inter amorem
 blandaque refrenat morsus admixta voluptas. 1085
 namque in eo spes est, unde est ardoris origo,
 restingui quoque posse ab eodem corpore flammam.
 quod fieri contra totum natura repugnat;
 unaque res haec est, cuius quam plurima habemus,
 tam magis ardescit dira cuppedine pectus. 1090
 nam cibus atque umor membris assumitur intus;
 quae quoniam certas possunt obsidere partis,
 hoc facile expletur laticum frugumque cupido.
 ex hominis vero facie pulchroque colore
 nil datur in corpus praeter simulacra fruendum 1095
 tenvia; quae vento spes raptast saepe misella.
 ut bibere in somnis sitiens cum quaerit et umor

1068 ulcus *O* corr.: uicus *OQ* 1081 adfligunt *O*: adfigunt *Q*
 1083 illaec germina *amicus quidam Lambini*: illae cermina *O*: ille
 germina *Q* 1085 refrenat *L*: frenat *OQ* 1096 rapta est *Vat.*
 3276: raptat *OQ*: alii alia

non datur, ardorem qui membris stingere possit,
 sed laticum simulacra petit frustra que laborat
 in medioque sitit torrenti flumine potans, 1100
 sic in amore Venus simulacris ludit amantis
 nec satiare queunt spectando corpora coram
 nec manibus quicquam teneris abradere membris
 possunt errantes incerti corpore toto.
 denique cum membris collatis flore fruuntur 1105
 aetatis, iam cum praesagit gaudia corpus
 atque in eost Venus ut muliebria conserat arva,
 adfigunt avide corpus iunguntque salivas
 oris et inspirant pressantes dentibus ora,
 nequiquam, quoniam nil inde abradere possunt 1110
 nec penetrare et abire in corpus corpore toto;
 nam facere interdum velle et certare videntur:
 usque adeo cupide in Veneris compagibus haerent,
 membra voluptatis dum vi labefacta liquescunt.
 tandem ubi se erupit nervis collecta cupido, 1115
 parva fit ardoris violenti pausa parumper.
 inde redit rabies eadem et furor ille revisit,
 cum sibi quid cupiant ipsi contingere quaerunt,
 nec reperire malum id possunt quae machina vincat:
 usque adeo incerti tabescunt vulnere caeco. 1120

Adde quod absumunt viris pereuntque labore,
 adde quod alterius sub nutu degitur aetas.
 labitur interea res et Babylonica fiunt,
 languent officia atque aegrotat fama vacillans.
 †unguentat† et pulchra in pedibus Sicyonia rident 1125
 scilicet et grandes viridi cum luce zmaragdi
 auro includuntur teriturque thalassina vestis

1098 membris *Avancius*: membri *OQ* 1115 conlecta *Lambinus*:
 coniecta *OQ* 1118 quid *Lachmann*: quod *OQ* 1121 vires
Pontanus: utris *OQ* 1123 Babylonica *Pius*: Babylonia *OQ*:
 vadimonia *Marullus* 1124 vacillans *Marullus*: uigillans *OQ* 1125
 unguenta *OQ*: argentum *Lachmann*: huic lenta *Munro*: alii alia

assidue et Veneris sudorem exercita potat.
 et bene parta patrum fiunt anademata, mitrae,
 interdum in pallam atque Alidensia Ciaeque vertunt. 1130
 eximia veste et victu cōvivia, ludi,
 pocula crebra, unguenta coronae sarta parantur,
 nequiquam, quoniam medio de fonte leporum
 surgit amari aliquid quod in ipsis floribus angat,
 aut cum conscius ipse animus se forte remordet 1135
 desidiose agere aetatem lustrisque perire,
 aut quod in ambiguo verbum iaculata reliquit
 quod cupido adfixum cordi vivescit ut ignis,
 aut nimium iactare oculos aliumve tueri
 quod putat in vultuque videt vestigia risus. 1140

Atque in amore mala haec proprio summeque secundo
 inveniuntur; in adverso vero atque inopi sunt,
 prendere quae possis oculorum lumine operto,
 innumerabilia; ut melius vigilare sit ante,
 qua docui ratione, cavereque ne inliciaris. 1145
 nam vitare, plagas in amoris ne iaciamur,
 non ita difficile est quam captum retibus ipsis
 exire et validos Veneris perrumpere nodos.
 et tamen implicitus quoque possis inque peditus
 effugere infestum, nisi tute tibi obviis obstes 1150
 et praetermittas animi vitia omnia primum
 aut quae corpori sunt eius, quam praepetis ac vis.
 nam faciunt homines plerumque cupidine caeci
 et tribuunt ea quae non sunt his commoda vere.
 multimodis igitur pravas turpisque videmus 1155
 esse in deliciis summoque in honore vigere.
 atque alios alii irrident Veneremque suadent
 ut placent, quoniam foedo adfligentur amore,

1130 atque Alidensia] atque alideusia *Lachmann*: ac Melitensia
Lambinus Ciaeque *Lachmann*: chiaque *OQ*: Caeque *Lambinus*
 1131 ludi *O* corr.: luidi *OQ*: lychni *Lachmann* 1141 mala *l* 31:
 male *OQ* 1145 illiciaris *Marullus*: inligniaris *OQ* 1152 aut
Lachmann: ut *OQ* ppetis *O*: precis *Q*: tu petis *Brieger*: si quam
 petis *Lachmann* 1156 deliciis *C*: delictis *OQ*

T. LVCRETI CARI

nec sua respiciunt miseri mala maxima saepe.
 nigra melichrus est, immunda et fetida acosmos, 1160
 caesia Palladium, nervosa et lignea dorcas,
 parvula, pumilio, chariton mia, tota merum sal,
 magna atque immanis cataplexis plenaque honoris.
 balba loqui non quit, traulizi, muta pudens est ;
 at flagrans odiosa loquacula Lampadium fit. 1165
 ischnon eromenion tum fit, cum vivere non quit
 prae macie ; rhadine verost iam mortua tussi.
 at tumida et mammosa Ceres est ipsa ab Iaccho,
 simula Silena ac saturast, labeosa philema.
 cetera de genere hoc longum est si dicere coner. 1170
 sed tamen esto iam quantovis oris honore,
 cui Veneris membris vis omnibus exoriatur :
 nempe aliae quoque sunt ; nempe hac sine viximus ante ;
 nempe eadem facit, et scimus facere, omnia turpi,
 et miseram taetris se suffit odoribus ipsa 1175
 quam famulae longe fugitant furtimque cachinnant.
 at lacrimans exclusus amator limina saepe
 floribus et sertis operit postisque superbos
 unguis amaracino et foribus miser oscula figit ;
 quem si, iam admissum, venientem offenderit aura 1180
 una modo, causas abeundi quaerat honestas,
 et meditata diu cadat alte sumpta querela,
 stultitiaque ibi se damnet, tribuisse quod illi
 plus videat quam mortali concedere par est.
 nec Veneres nostras hoc fallit ; quo magis ipsae 1185
 omnia summo opere hos vitae postcaenia celant
 quos retinere volunt adstrictosque esse in amore,
 nequiquam, quoniam tu animo tamen omnia possis
 protrahere in lucem atque omnis inquirere risus
 et, si bello animos et non odiosa, vicissim 1190

1168 tumida *Bernays* : iamina *OQ* : gemina *Lambinus* : Lamia *Lachmann*
 1170 est si *Q* corr. : esti *OQ* 1174 turpi *Nangerius* :
 turpis *OQ* 1176 longe *l 31* : longi *OQ* 1180 ammissum *Lambinus* : missum *OQ*
 1188 possis *Marullus* : posses *OQ*

praetermittere <et> humanis concedere rebus.

Nec mulier semper ficto suspirat amore
 quae complexa viri corpus cum corpore iungit
 et tenet assuctis umectans oscula labris.
 nam facit ex animo saepe et communia quaerens 1195
 gaudia sollicitat spatium decurrere amoris.

nec ratione alia volucres armenta feraeque
 et pecudes et equae maribus subsidere possent,
 si non, ipsa quod illarum subat ardet abundans
 natura et Venerem salientum laeta retractat. 1200

nonne vides etiam quos mutua saepe voluptas
 vinxit, ut in vinclis communibus excrucientur?
 in triviis quam saepe canes, discedere aventes
 diversi cupide summis ex viribu' tendunt, [1210]
 cum interea validis Veneris compagibus haerent! 1205 [1204]
 quod facerent numquam nisi mutua gaudia nossent [1205]
 quae iacere in fraudem possent vinctosque tenere. [1206]
 quare etiam atque etiam, ut dico, est communi' voluptas. [1207]

Et commiscendo cum semine forte virilem [1208]
 femina vim vicit subita vi corripuitque, 1210 [1209]
 tum similes matrum materno semine fiunt,
 ut patribus patrio. sed quos utriusque figurae
 esse vides, iuxtim miscentis vulta parentum,
 corpore de patrio et materno sanguine crescunt,
 semina cum Veneris stimulis excita per artus 1215
 obvia confligit conspirans mutuus ardor,
 et neque utrum superavit eorum nec superatumst.
 fit quoque ut interdum similes existere avorum
 possint et referant proavorum saepe figuras
 propterea quia multa modis primordia multis 1220

1191 et add. *Marullus* 1199 illarum *Brieger*: illorum *QQ*
 1200 salientum *Marullus*: callentum *O*: sallentum *Q* 1202 vinxit
O corr.: uixit *QQ* 1203 quam *Lachmann*: cum *QQ* 1204 [1210]
huc transposuit Naugerius 1209 virilem *Bruno*: uirilli *O*: uirili *Q*
 1220 multa modis *Lambinus*: multimodis *QQ*

mixta suo celant in corpore saepe parentes,
 quae patribus patres tradunt a stirpe profecta ;
 inde Venus varia producit sorte figuras
 maiorumque refert vultus vocesque comasque ;
 quandoquidem nilo magis haec (de) semine certo 1225
 fiunt quam facies et corpora membraque nobis.
 et muliebre oritur patrio de semine saeculum
 maternoque mares existunt corpore creti.
 semper enim partus duplici de semine constat,
 atque utri similest magis id quodcumque creatur, 1230
 eius habet plus parte aequa ; quod cernere possis,
 sive virum suboles sive muliebris origo.

Nec divina satum genitalem numina cuiquam
 absterrent, pater a gnatis ne dulcibus umquam
 appelletur et ut sterili Venere exigat aevum ; 1235
 quod plerumque putant et multo sanguine maesti
 conspergunt aras adolentque altaria donis,
 ut gravidas reddant uxores semine largo.
 nequiquam divum numen sortisque fatigant.
 nam steriles nimium crasso sunt semine partim 1240
 et liquido praeter iustum tenuique vicissim.
 tenve locis quia non potis est adfigere adhaesum,
 liquitur extemplo et revocatum cedit abortu.
 crassius his porro quoniam concretius aequo
 mittitur, aut non tam prolixo provolat ictu 1245
 aut penetrare locos aequae nequit aut penetratum
 aegre admiscetur muliebri semine semen.
 nam multum harmoniae Veneris differre videntur.
 atque alias alii complent magis ex aliisque
 succipiunt aliae pondus magis inque gravescunt. 1250
 et multae steriles Hymenaeis ante fuerunt

1222 a] ab *Lachmann* 1225 magis] minus *Lambinus* de *add.*
 l 31 1230 quodcumque l 31: quocunque *OQ* 1234 pater a gnatis
Pontanus: praeter agnatis *O*: praeter ac natis *Q* 1243 cedit *Pon-*
tanus: credit *OQ* 1244 his *Lachmann*: hic *OQ*: hinc *Merrill*

pluribus et nactae post sunt tamen unde puellōs
 suscipere et partu possent ditescere dulci.
 et quibus ante domi fecundae saepe nequissent
 uxores parere, inventast illis quoque compar 1255
 natura, ut possent gnatis munire senectam.
 usque adeo magni refert, ut semina possint
 seminibus commisceri genitaliter apta,
 crassaque convenient liquidis et liquida crassis.
 atque in eo refert quo victu vita colatur; 1260
 namque aliis rebus concrescunt semina membris
 atque aliis extendantur tabentque vicissim.
 et quibus ipsa modis tractetur blanda voluptas,
 id quoque permagni refert; nam more ferarum
 quadrupedumque magis ritu plerumque putantur 1265
 concipere uxores, quia sic loca sumere possunt,
 pectoribus positīs, sublatis semina lumbis.
 nec molles opu' sunt motus uxoribus hilum.
 nam mulier prohibet se concipere atque repugnat,
 clunibus ipsa viri Venērem si laeta retractat 1270
 atque exossato ciet omni pectore fluctus;
 eicit enim sulcum recta regione viaque
 vomeris atque locis avertit seminis ictum.
 idque sua causa consuerunt scorta moveri,
 ne complerentur crebro gravidaeque iacerent 1275
 et simul ipsa viris Venus ut concinnior esset;
 coniugibus quod nil nostris opus esse videtur.
 Nec divinitus interdum Venerisque sagittis
 deteriore fit ut forma muliercula ametur.
 nam facit ipsa suis interdum femina factis 1280
 morigerisque modis et munde corpore culto,
 ut facile insuescat <te> secum degere vitam.

1252 post sunt *Lambinus*: possunt *OQ* 1259 crassaque] cras-
 sane *Munro* 1262 aliis *ed. Veronensis*: alii *OQ* 1268 nec *Pon-*
tanus: ne *OQ* 1270 retractat *Q*: retractet *O* 1275 gravidaeque
ed. Brixiensis: grauidaue *OQ* 1281 modis *Pontanus*: moris *OQ*
 1282 te *add. Bernays*: secum nos *Lachmann*

quod superest, consuetudo concinnat amorem ;
nam leviter quamvis quod crebro tunditur ictu,
vincitur in longo spatio tamen atque labascit.
nonne vides etiam guttas in saxa cadentis
umoris longo in spatio pertundere saxa ?

T. LVCRETI CARI
DE RERVM NATVRA

LIBER QVINTVS

Qvis potis est dignum pollenti pectore carmen
condere pro rerum maiestate hisque repertis?
quisve valet verbis tantum qui fingere laudes
pro meritis eius possit qui talia nobis
pectore parta suo quaesita(que) praemia liquit? 5
nemo, ut opinor, erit mortali corpore cretus.
nam si, ut ipsa petit maiestas cognita rerum,
dicendum est, deus ille fuit, deus, inclute Memmi,
qui princeps vitae rationem invenit eam quae
nunc appellatur sapientia, quique per artem 10
fluctibus e tantis vitam tantisque tenebris
in tam tranquillo et tam clara luce locavit.
confer enim divina aliorum antiqua reperta.
namque Ceres fertur fruges Liberque liquoris
vitigeni laticem mortalibus instituisse; 15
cum tamen his posset sine rebus vita manere,
ut fama est aliquas etiam nunc vivere gentis.
at bene non poterat sine puro pectore vivi;
quo magis hic merito nobis deus esse videtur,
ex quo nunc etiam per magnas didita gentis 20
dulcia permulcent animos solacia vitae.

2 maiestate hisque *Lambinus* : maiestatis atque *OQ* 5 que *add.*
O corr. 12 locavit *L* : uocavit *OQ* 14 Ceres *Ital.* : geres *OQ*

Herculis antistare autem si facta putabis,
 longius a vera multo ratione ferere.
 quid Nemeaeus enim nobis nunc magnus hiatus
 ille leonis obsesset et horrens Arcadius sus? 25
 denique quid Cetae taurus Lernaëaque pestis
 hydra venenatis posset vallata colubris?
 quidve tripectora tergemini vis Geryonai

*

tanto opere officerent nobis Stymphala colentes, [30]
 et Diomedis equi spirantes naribus ignem 30 [29]
 Thracis Bistoniasque plagas atque Ismara propter?
 aureaque Hesperidum servans fulgentia mala,
 asper, acerba tuens, immani corpore serpens
 arboris amplexus stirpem quid denique obsesset
 propter Atlanteum litus pelagique severa, 35
 quo neque noster adit quisquam nec barbarus audet?
 cetera de genere hoc quae sunt portenta perempta,
 si non victa forent, quid tandem viva nocerent?
 nil, ut opinor: ita ad satietatem terra ferarum
 nunc etiam scatit et trepido terrore repleta est 40
 per nemora ac montis magnos silvasque profundas;
 quae loca vitandi plerumque est nostra potestas.
 at nisi purgatumst pectus, quae proelia nobis
 atque pericula tumst ingratis insinuandum?
 quantae tum scindunt hominem cuppedinis acres 45
 sollicitum curae quantique perinde timores?
 quidve superbia spurcitia ac petulantia? quantas
 efficiunt clades? quid luxus desidiaeque?
 haec igitur qui cuncta subegerit ex animoque
 expulerit dictis, non armis, nonne decebit 50
 hunc hominem numero divum dignarier esse?

28 * 29 lacunam indicavit Munro 29 [30] hic locavit Munro, post
 31 Lachmann nobis] et aves Lachmann 31 Thracis Munro:
 Thracia OQ: Thracem Lachmann 35 Atlanteum Gifanius: Atia-
 neum O: Atianeam Q pelagique] pelageque Lambinus severa]
 sonora L 38 si L: sed OQ victa Ital.: uincta OQ 44 tumst
 Lachmann: sunt OQ

cum bene praesertim multa ac divinitus ipsis
immortalibu' de divis dare dicta suerit
atque omnem rerum naturam pandere dictis.

Cuius ego ingressus vestigia dum rationes 55
persequor ac doceo dictis, quo quaeque creata
foedere sint, in eo quam sit durare necessum
nec validas valeant aevi rescindere leges,
quo genere in primis animi natura reperta est
nativo primum consistere corpore creta 60
nec posse incolumis magnum durare per aevum,
sed simulacra solere in somnis fallere mentem,
cernere cum videamur eum quem vita reliquit,
quod superest, nunc huc rationis detulit ordo,
ut mihi mortali consistere corpore mundum 65
nativumque simul ratio reddunda sit esse;
et quibus ille modis congressus materiai
fundarit terram caelum mare sidera solem
lunaique globum; tum quae tellure animantes
exstiterint, et quae nullo sint tempore natae; 70
quove modo genus humanum variante loquela
coeperit inter se vesci per nomina rerum;
et quibus ille modis divum metus insinuarit
pectora, terrarum qui in orbi sancta tuetur
fana lacus lucos aras simulacraque divum. 75
praeterea solis cursus lunaeque meatus
expediam qua vi flectat natura gubernans;
ne forte haec inter caelum terramque reamur
libera sponte sua cursus lustrare perennis
morigera ad fruges augendas atque animantis, 80
neve aliqua divum volvi ratione putemus.
nam bene qui didicere deos securum agere aevum,
si tamen interea mirantur qua ratione

53 de *Lambinus*: e *OQ* 61 incolumis *Marullus*: incolumen *O*:
vinculum est *Q* 64 me ante huc add. *Merrill* 70 nullo sint
Q corr.: nullos in *OQ*

quaeque geri possint, praesertim rebus in illis
 quae supera caput aetheriis cernuntur in oris, 85
 rursus in antiquas referuntur religiones
 et dominos acris adsciscunt, omnia posse
 quos miseri credunt, ignari quid queat esse,
 quid nequeat, finita potestas denique cuique
 quam sit ratione atque alte terminus haerens. 90

Quod superest, ne te in promissis plura moremur,
 principio maria ac terras caelumque tuere ;
 quorum naturam triplicem, tria corpora, Memmi,
 tris species tam dissimilis, tria talia texta,
 una dies dabit exitio, multosque per annos 95
 sustentata ruet moles et machina mundi.
 nec me animi fallit quam res nova miraue menti
 accidat exitium caeli terraeque futurum,
 et quam difficile id mihi sit pervincere dictis ;
 ut fit ubi insolitam rem apportes auribus ante 100
 nec tamen hanc possis oculorum subdere visu
 nec iacere indu manus, via qua munita fidei
 proxima fert humanum in pectus templaque mentis.
 sed tamen effabor. dictis dabit ipsa fidem res
 forsitan et graviter terrarum motibus ortis 105
 omnia conquassari in parvo tempore cernes.
 quod procul a nobis flectat fortuna gubernans,
 et ratio potius quam res persuadeat ipsa
 succidere horrisono posse omnia victa fragore.

Qua prius aggrediar quam de re fundere fata 110
 sanctius et multo certa ratione magis quam
 Pythia quae tripode a Phoebi lauroque profatur,
 multa tibi expediam doctis solacia dictis ;
 religione refrenatus ne forte rearis
 terras et solem et caelum, mare sidera lunam, 115
 corpore divino debere aeterna manere,

85 aethereis *Q* corr. : aetheris *OQ* 100 insolitam *Q* corr. : in-
 solitum *OQ* 116 manere *editio Juntina* : meare *OQ*

proptereaue putes ritu par esse Gigantum
 pendere eos poenas immani pro scelere omnis
 qui ratione sua disturbent moenia mundi
 praeclarumque velint caeli restinguere solem 120
 immortalia mortali sermone notantes;
 quae procul usque adeo divino a numine distent,
 inque deum numero quae sint indigna videri,
 notitiam potius praebere ut posse putentur
 quid sit vitali motu sensuque remotum. 125
 quippe etenim non est, cum quovis corpore ut esse
 posse animi natura putetur consiliumque;
 sicut in aethere non arbor, non aequore salso
 nubes esse queunt neque pisces vivere in arvis
 nec cruor in lignis neque saxis sucus inesse. 130
 certum ac dispositumst ubi quicquid crescat et insit.
 sic animi natura nequit sine corpore oriri
 sola neque a nervis et sanguine longius esse.
 quod si posset enim, multo prius ipsa animi vis
 in capite aut umeris aut imis calcibus esse 135
 posset et innasci quavis in parte soleret,
 tandem in eodem homine atque in eodem vase manere.
 quod quoniam nostro quoque constat corpore certum
 dispositumque videtur ubi esse et crescere possit
 sorsum anima atque animus, tanto magis infitiandum 140
 totum posse extra corpus formamque animalem
 putribus in glebis terrarum aut solis (in) igni
 aut in aqua durare aut altis aetheris oris.
 haud igitur constant divino praedita sensu,
 quandoquidem nequeunt vitaliter esse animata. 145
 Illud item non est ut possis credere, sedis
 esse deum sanctas in mundi partibus ullis.
 tenuis enim natura deum longeque remota

117. par *Marullus*: pars *OQ* 122 a numine distent 131: animin-
 bistent *OQ*: a numine distant *Madvig* 123 videri] videntur
Madvig 131 crescat (cf. iii. 787): crescet *OQ* 133 a nervis (cf.
 iii. 789): aruis *OQ* longius] longiter *Lachmann* 142 glebis *Ital.*:
 glebris *OQ* in *add. Ital.*

sensibus ab nostris animi vix mente videtur ;
 quae quoniam manuum tactum suffugit et ictum, 150
 tactile nil nobis quod sit contingere debet.
 tangere enim non quit quod tangi non licet ipsum.
 quare etiam sedes quoque nostris sedibus esse
 dissimiles debent, tenues de corpore eorum ;
 quae tibi posterius largo sermone probabo. 155
 dicere porro hominum causa voluisse parare
 praeclaram mundi naturam proptereaue
 allaudabile opus divum laudare decere
 aeternumque putare atque immortale futurum
 nec fas esse, deum quod sit ratione vetusta 160
 gentibus humanis fundatum perpetuo aevo,
 sollicitare suis ulla vi ex sedibus umquam
 nec verbis vexare et ab imo evertere summa,
 cetera de genere hoc adfingere et addere, Memmi,
 desiperest. quid enim immortalibus atque beatis 165
 gratia nostra queat largirier emolumenti,
 ut nostra quicquam causa gerere aggrediantur?
 quidve novi potuit tanto post ante quietos
 inlicere ut cuperent vitam mutare priorem?
 nam gaudere novis rebus debere videtur 170
 cui veteres obsunt ; sed cui nil accidit aegri
 tempore in anteacto, cum pulchre degeret aevum,
 quid potuit novitatis amorem accendere tali?
 quidve mali fuerat nobis non esse creatis?
 an, credo, in tenebris vita ac maerore iacebat, 175
 donec diluxit rerum genitalis origo?
 natus enim debet quicumque est velle manere
 in vita, donec retinebit blanda voluptas.
 qui numquam vero vitae gustavit amorem
 nec fuit in numero, quid obest non esse creatum? 180

152 quod *Marullus* : quod si *OQ* 154 de] pro *Lambinus* : ut
 corpora *coni. Merrill* 175, 176 post 169 collocavit *Lachmann*, ante 174
Lambinus 175 an *O* : anc *Q* : at *Lachmann* credo] caeca
Bergk : crepera *Munro*

exemplum porro gignundis rebus et ipsa
 notities divis hominum unde est insita primum,
 quid vellent facere ut scirent animoque viderent,
 quove modost umquam vis cognita principiorum
 quidque inter sese permutato ordine possent, 185
 si non ipsa dedit specimen natura creandi?
 namque ita multa modis multis primordia rerum
 ex infinito iam tempore percita plagis
 ponderibusque suis consuerunt concita ferri
 omnimodisque coire atque omnia pertemptare, 190
 quaecumque inter se possent congressa creare,
 ut non sit mirum si in talis disposituras
 deciderunt quoque et in talis venere meatus,
 qualibus haec rerum geritur nunc summa novando.

Quod <si> iam rerum ignorem primordia quae sint, 195
 hoc tamen ex ipsis caeli rationibus ausim
 confirmare aliisque ex rebus reddere multis,
 nequaquam nobis divinitus esse paratam
 naturam rerum: tanta stat praedita culpa.
 principio quantum caeli tegit impetus ingens, 200
 inde avide partem montes silvaeque ferarum
 possedere, tenent rupes vastaeque paludes
 et mare quod late terrarum distinet oras.
 inde duas porro prope partis fervidus ardor
 assiduusque geli casus mortalibus aufert. 205
 quod superest arvi, tamen id natura sua vi
sentibus obducat, ni vis humana resistat
vitai causa valido consueta bidenti
ingemere et terram pressis proscindere aratris.
 si non fecundas vertentes vomere glebas 210
 terraique solum subigentes cimus ad ortus,

182 divis hominum *Munro*: hominum diuis *OQ*: hominum dis
Wakefield 185 sese *ed. Brixiensis*: se *OQ* 186 specimen
Pius: speciem *OQ* 187 multa modis *Lambinus*: multimodis *OQ*
 191 possent *Lachmann* (*cf.* 426): possint *OQ* 193 meatus *l 31*:
 maestus *OQ* 195 si *add. Marullus* 201 avide *Bernays*: auidam
OQ: avidei *Munro* 208 bidenti *Ital.*: dibenti *OQ* 209 aratris
O corr.: atris *O*: *versum om. Q*

sponte sua nequeant liquidas exsistere in auras;
 et tamen interdum magno quaesita labore
 cum iam per terras frondent atque omnia florent,
 aut nimiis torret fervoribus aetherius sol 215
 aut subiti perimunt imbres gelidaeque pruinae,
 flabraque ventorum violento turbine vexant.
 praeterea genus horriferum natura ferarum
 humanae genti infestum terraque marique
 cur alit atque auget? cur anni tempora morbos 220
 apportant? quare mors immatura vagatur?
 tum porro puer, ut saevis proiectus ab undis
 navita, nudus humi iacet, infans, indigus omni
 vitali auxilio, cum primum in luminis oras
 nixibus ex alvo matris natura profudit, 225
 vagituque locum lugubri complet, ut aequumst
 cui tantum in vita restet transire malorum.
 at variae crescunt pecudes armenta feraeque
 nec crepitacillis opus est nec cuiquam adhibendast
 almae nutricis blanda atque infracta loquela 230
 nec varias quaerunt vestis pro tempore caeli,
 denique non armis opus est, non moenibus altis,
 qui sua tutentur, quando omnibus omnia large
 tellus ipsa parit naturaque daedala rerum.
 Principio quoniam terrai corpus et umor 235
 aurarumque leves animae calidique vapores,
 e quibus haec rerum consistere summa videtur,
 omnia nativo ac mortali corpore constant,
 debet eodem omnis mundi natura putari.
 quippe etenim quorum partis et membra videmus 240
 corpore nativo ac mortalibus esse figuris,
 haec eadem ferme mortalia cernimus esse

223 indigus *O corr.*: indignus *OQ* 227 restet transire *L*: re et
 transirest *O* (transire est *Q*) 230 alme *Q corr.*: arme *OQ* 233
 qui] quis *Christ* 239 eodem *Pius*: eadem *O*: edem *Q* 241 nativo
 ac *Lachmann*: natiuom *O*: natiuum *Q*

et nativa simul. quapropter maxima mundi
cum videam membra ac partis consumpta regigni,
scire licet caeli quoque item terraeque fuisse 245
principiale aliquod tempus clademque futuram.

Illud in his rebus ne corripuisse rearis
me mihi, quod terram atque ignem mortalia sumpsi
esse neque umorem dubitavi aurasque perire
atque eadem gigni rursusque augescere dixi, 250
principio pars terrai nonnulla, perusta
solibus assiduis, multa pulsata pedum vi,
pulveris exhalat nebulam nubisque volantis
quas validi toto dispergunt aere venti.
pars etiam glebarum ad diluvium revocatur 255
imbribus et ripas radentia flumina rodunt.
praeterea pro parte sua, quodcumque alit auget,
redditur; et quoniam dubio procul esse videtur
omniparens eadem rerum commune sepulcrum,
ergo terra tibi libatur et aucta recrescit. 260

Quod superest, umorè novo mare flumina fontis
semper abundare et latices manare perennis
nil opus est verbis: magnus decursus aquarum
undique declarat. sed primum quicquid aquai
tollitur in summaque fit ut nil umor abundet, 265
partim quod validi verrentes aequora venti
diminuunt radiisque retexens aetherius sol,
partim quod subter per terras diditur omnis.
percolatur enim virus retroque remanat
materies umoris et ad caput amnibus omnis 270
convenit, inde super terras fluit agmine dulci
qua via secta semel liquido pede detulit undas.

Aera nunc igitur dicam qui corpore toto
innumerabiliter privas mutatur in horas.

245 item *Bentley*: idem *OQ*
251 nonnulla *L*: non ulla *OQ*
redditur] roditur *Marullus*
semel *OQ* 274 oras *OQ*

248 me mihi *Q*: memini *O*
257 alit] alid *Lambinus* 258
272 secta semel *Q* *corr.*: semel secta

semper enim, quodcumque fluit de rebus, id omne 275
 aeris in magnum fertur mare; qui nisi contra
 corpora retribuat rebus recreetque fluentis,
 omnia iam resoluta forent et in aera versa.
 haud igitur cessat gigni de rebus et in res
 reccidere, assidue quoniam fluere omnia constat. 280

Largus item liquidi fons luminis, aetherius sol,
 irrigat assidue caelum candore recenti
 suppeditatque novo confestim lumine lumen.
 nam primum quicquid fulgoris disperit ei,
 quocumque accidit. id licet hinc cognoscere possis, 285
 quod simul ac primum nubes succedere soli
 coepere et radios inter quasi rumpere lucis,
 extemplo inferior pars horum disperit omnis
 terraque inumbratur qua nimbi cumque feruntur;
 ut noscas splendore novo res semper egere 290
 et primum iactum fulgoris quemque perire
 nec ratione alia res posse in sole videri,
 perpetuo ni suppeditet lucis caput ipsum.
 quin etiam nocturna tibi, terrestria quae sunt,
 lumina, pendentes lychni claraeque coruscis 295
 fulguribus pingues multa caligine taedae
 consimili properant ratione, ardore ministro,
 suppeditare novum lumen, tremere ignibus instant,
 instant, nec loca lux inter quasi rupta relinquit.
 usque adeo properanter ab omnibus ignibus ei 300
 exitium celeri celatur origine flammae.
 sic igitur solem lunam stellasque putandumst
 ex alio atque alio lucem iactare subortu
 et primum quicquid flammarum perdere semper:
 inviolabilia haec ne credas forte vigere. 305

Denique non lapides quoque vinci cernis ab aevo,

282 recenti *Q* corr.: regenti *QQ* 288 disperit *Q* corr.: disperis *QQ*
 291 et *Marullus*: ut *QQ* 295 lychni *O* corr.: lyclini *QQ* 296
 caligine] fuligine *Bentley* 297 properant *Marullus*: proferant *QQ*
 300 ab omnibus] obortis *Bruno* 301 celatur *Marullus*: celeratur
QQ 302 putandumst *Lachmann*: putandum *QQ*

non altas turris ruere et putrescere saxa,
 non delubra deum simulacraque fessa fatisci,
 nec sanctum numen fati protollere finis
 posse neque adversus naturae foedera niti? 310
 denique non monumenta virum dilapsa videmus,
 †quaerere proporro sibi cumque senescere credast
 non ruere avulsos silices a montibus altis
 nec validas aevi viris perferre patique
 finiti? neque enim caderent avulsa repente, 315
 ex infinito quae tempore pertolerassent
 omnia tormenta aetatis privata fragore.

Denique iam tuere hoc, circum supraque quod omnem
 continet amplexu terram: si procreat ex se
 omnia, quod quidam memorant, recipitque perempta, 320
 totum nativo ac mortali corpore constat.
 nam quodcumque alias ex se res auget alitque,
 deminui debet, recreari, cum recipit res.

Praeterea si nulla fuit genitalis origo
 terrarum et caeli semperque aeterna fuere, 325
 cur supera bellum Thebanum et funera Troiae
 non alias alii quoque res cecinere poetae?
 quo tot facta virum totiens cecidere neque usquam
 aeternis famae monumentis insita florent?
 verum, ut opinor, habet novitatem summa recensque 330
 naturast mundi neque pridem exordia cepit.
 quare etiam quaedam nunc artes expoliuntur,
 nunc etiam augescunt; nunc addita navigiis sunt
 multa, modo organici melicos peperere sonores.
 denique natura haec rerum ratioque repertast 335

310 foedera *O corr.*: foederant *OQ* 312 quaerere proporro
 sibi cumque senescere credas *OQ*: quaerere proporro sibi sene
 senescere credas *Munro*: quae fore proporro vetitumque senescere
 credas *Lachmann*: aeraque proporro silicumque senescere petras
Ellis: alii alia 318 omnem *Marullus*: omne *OQ* 321 nativo
 ac *Bernays*: natium *OQ* 327 alii *Ital.*: ali *OQ* 331 natura
 est mundi *Marullus*: natura mundist *OQ*

nuper, et hanc primus cum primis ipse repertus
 nunc ego sum in patrias qui possim vertere voces.
 quod si forte fuisse antehac eadem omnia credis,
 sed periisse hominum torrenti saecula vapore,
 aut cecidisse urbis magno vexamine mundi, 340
 aut ex imbribus assiduis exisse rapaces
 per terras amnis atque oppida coperuisse,
 tanto quique magis victus fateare necessest
 exitium quoque terrarum caelique futurum.
 nam cum res tantis morbis tantisque periclis 345
 temptarentur, ibi si tristior incubuisset
 causa, darent late cladem magnasque ruinas.
 nec ratione alia mortales esse videmur,
 inter nos nisi quod morbis aegrescimus isdem
 atque illi quos a vita natura removit. 350

Praeterea quaecumque manent aeterna necessust
 aut, quia sunt solido cum corpore, respuere ictus
 nec penetrare pati sibi quicquam quod queat artas
 dissociare intus partis, ut materiai
 corpora sunt quorum naturam ostendimus ante, 355
 aut ideo durare aetatem posse per omnem,
 plagarum quia sunt expertia, sicut inane est
 quod manet intactum neque ab ictu fungitur hilum,
 aut etiam quia nulla loci fit copia circum,
 quo quasi res possint discedere dissoluique, 360
 sicut summarum summa est aeterna, neque extra
 qui locus est quo dissiliant neque corpora sunt quae
 possint incidere et valida dissolvere plaga.
 at neque, uti docui, solido cum corpore mundi
 naturast, quoniam admixtumst in rebus inane, 365
 nec tamen est ut inane, neque autem corpora desunt,
 ex infinito quae possint forte coorta

339 periisse *l 31*: perisse *OQ* 342 atque *l 31*: at *OQ* 349
 isdem *Pius*: idem *OQ* 359 fit *Lachmann*: sit *OQ* 367 coorta
Marullus: coperta *OQ*

corruere hanc rerum violento turbine summam
aut aliam quamvis cladem importare pericli,
nec porro natura loci spatiumque profundi 370
deficit, exspergi quo possint moenia mundi,
aut alia quavis possunt vi pulsa perire.

haud igitur leti praeclusa est ianua caelo
nec soli terraeque neque altis aequoris undis,
sed patet immani et vasto respectat hiatu. 375

quare etiam nativa necessumst confiteare
haec eadem; neque enim, mortali corpore quae sunt,
ex infinito iam tempore adhuc potuissent
immensi validas aevi contemnere viris.

Denique tantopere inter se cum maxima mundi 380
pugnent membra, pio nequaquam concita bello,
nonne vides aliquam longi certaminis ollis
posse dari finem? vel cum sol et vapor omnis
omnibus epotis umoribus exsuperarint:

quod facere intendunt, neque adhuc conata patrarunt: 385
tantum suppeditant amnes ultraque minantur
omnia diluviare ex alto gurgite ponti,

nequiquam, quoniam verrentes aequora venti
deminuunt radiisque retexens aetherius sol,
et siccare prius confidunt omnia posse 390

quam liquor incepti possit contingere finem.
tantum spirantes aequo certamine bellum
magnis (inter se) de rebus cernere certant,

cum semel interea fuerit superantior ignis
et semel, ut fama est, umor regnarit in arvis. 395

ignis enim superat et lambens multa perussit,
avia cum Phaethonta rapax vis solis equorum
aethere raptavit toto terrasque per omnis.

369 pericli] per ictus *Bruno* 375 immani] immane *Bruno* et
O corr.: e *O*: ac *Q* 383 omnis] amnis *Postgate* 385 patra-
runt *Goebel*: patrantur *QQ* 393 inter se *hic add. Lachmann*,
post de rebus L 396 superat *Lachmann*: superavit *QQ* lam-
bens *Q corr.*: ambens *QQ*: ardens *Polle*: alii alia 397 petontana
rapax *O*: petonta rapax *Q*

at pater omnipotens ira tum percitus acri
 magnanimum Phaethonta repenti fulminis ictu 400
 deturbavit equis in terram, solque cadenti
 obvius aeternam suscepit lampada mundi
 disiectosque redegit equos iunxitque trementis,
 inde suum per iter recreavit cuncta gubernans,
 scilicet ut veteres Graium cecinere poetae. 405

quod procul a vera nimis est ratione repulsum.
 ignis enim superare potest ubi materiali
 ex infinito sunt corpora plura coorta;
 inde cadunt vires aliqua ratione revictae,
 aut pereunt res exustae torrentibus auris. 410

umor item quondam coepit superare coortus,
 ut fama est, hominum vitas quando obruit undis.
 inde ubi vis aliqua ratione aversa recessit,
 ex infinito fuerat quaecumque coorta,
 constiterunt imbres et flumina vim minuerunt. 415

Sed quibus ille modis coniectus materiali
 fundarit terram et caelum pontique profunda,
 solis lunai cursus, ex ordine ponam.
 nam certe neque consilio primordia rerum
 ordine se suo quaeque sagaci mente locarunt 420

nec quos quaeque darent motus pepigere profecto,
 sed quia multa modis multis primordia rerum
 ex infinito iam tempore percita plagis
 ponderibusque suis consuerunt concita ferri
 omnimodisque coire atque omnia pertemptare, 425

quaecumque inter se possent congressa creare,
 propterea fit uti magnum vulgata per aevum
 omne genus coetus et motus experiundo
 tandem convenient ea quae convecta repente
 magnarum rerum fiunt exordia saepe, 430

399 tum l 31: cum OQ 400 fulminis O corr.: fluminis OQ
 405 Graium l 31: gratum OQ 412 vitas Purmann: multas OQ
 undis] urbis Pontanus 428 omne genus Lachmann: omnigenus
 OQ 429 convecta Lachmann: conventa OQ 430 fiunt l 31:
 fluunt OQ

terrai maris et caeli generisque animantum.

Hic neque tum solis rota cerni lumine largo
altivolans poterat nec magni sidera mundi
nec mare nec caelum nec denique terra neque aer
nec similis nostris rebus res ulla videri, 435
sed nova tempestas quaedam molesque coorta
omne genus de principiis, discordia quorum [440]
intervalla vias conexus pondera plagas [441]
concursum motus turbabat proelia miscens, [442]
propter dissimilis formas variasque figuras 440 [443]
quod non omnia sic poterant coniuncta manere [444]
nec motus inter sese dare convenientis. [445]
diffugere inde loci partes coepere paresque [437]
cum paribus iungi res et discludere mundum [438]
membraque dividere et magnas disponere partis, 445 [439]
hoc est, a terris altum secernere caelum,
et sorsum mare, uti secreto umore pateret,
sorsus item puri secretique aetheris ignes.

Quippe etenim primum terrai corpora quaeque,
propterea quod erant gravia et perplexa, coibant 450
in medio atque imas capiebant omnia sedis;
quae quanto magis inter se perplexa coibant,
tam magis expressere ea quae mare sidera solem
lunamque efficerent et magni moenia mundi.
omnia enim magis haec e levibus atque rotundis 455
seminibus multoque minoribu' sunt elementis
quam tellus. ideo per rara foramina terrae
partibus erumpens primus se sustulit aether
ignifer et multos secum levis abstulit ignis,
non alia longe ratione ac saepe videmus, 460
aurea cum primum gemmantis rore per herbas

433 altivolans *Pontanus*: alte volans *OQ* 437-445 *hunc versuum ordinem restituit Reisacker* 437 omne genus de *Lachmann*: omni-
genis e *O*: omnigenus e *Q* 438 vias *Q corr.*: uia *OQ* 445
magnas *Macrobius*: magna *OQ* 447 umore *Q corr.*: umor *OQ*
458 sc *L*: et *OQ*

matutina rubent radiati lumina solis
 exhalantque lacus nebulam fluviiue perennes,
 ipsaque ut interdum tellus fumare videtur;
 omnia quae sursum cum conciliantur, in alto 465
 corpore concreto subtexunt nubila caelum.
 sic igitur tum se levis ac diffusilis aether
 corpore concreto circumdatus undique (flexit)
 et late diffusus in omnis undique partis
 omnia sic avido complexu cetera saepsit. 470
 hunc exordia sunt solis lunaeque secuta,
 interutrasque globi quorum vertuntur in auris;
 quae neque terra sibi adscivit nec maximus aether,
 quod neque tam fuerunt gravia ut depressa sederent,
 nec levia ut possent per summas labier oras, 475
 et tamen interutrasque ita sunt ut corpora viva
 versent et partes ut mundi totius exstent;
 quod genus in nobis quaedam licet in statione
 membra manere, tamen cum sint ea quae moveantur.
 his igitur rebus retractis terra repente, 480
 maxima qua nunc se ponti plaga caerulea tendit,
 succidit et salso suffudit gurgite fossas.
 inque dies quanto circum magis aetheris aestus
 et radii solis cogeant undique terram
 verberibus crebris extrema ad limina in artum, 485
 in medio ut propulsa suo condensa coiret,
 tam magis expressus salsus de corpore sudor
 augebat mare manando camposque natantis,
 et tanto magis illa foras elapsa volabant
 corpora multa vaporis et aeris altaque caeli 490
 densabant procul a terris fulgentia templa.
 sidebant campi, crescebant montibus altis

463 exalantque *OQ*: exalare *Lachmann* 468 flexit *Lachmann*:
 saepsit *OQ* (*ex* 470) 482 salso suffudit *O* *corr.*: salso suffodit *O*:
 salsos offudit *Q* 484 radii *Q*: radiis *O* 485 in artum *Munro*:
 partem *OQ*: raptim *Bentley* 491 densabant] densebant *Lambinus*

ascensus ; neque enim poterant subsidere saxa
nec pariter tantundem omnes succumbere partes.

Sic igitur terrae concreto corpore pondus 495
constitit atque omnis mundi quasi limus in imum
confluxit gravis et subsedit funditus ut faex ;
inde mare inde aer inde aether ignifer ipse
corporibus liquidis sunt omnia pura relictā,
et leviora aliis alia, et liquidissimus aether 500
atque levissimus aerias super influit auras,
nec liquidum corpus turbantibus aeris auris
commiscet ; sinit haec violentis omnia verti
turbini-^{bus}, sinit incertis turbare procellis,
ipse suos ignis certo fert impete labens. 505
nam modice fluere atque uno posse aethera nisu
significat Pontos, mare certo quod fluit aestu
unum labendi conservans usque tenorem.

[Motibus astrorum nunc quae sit causa canamus.
principio magnus caeli si vertitur orbis, 510
ex utraque polum parti premere aera nobis
dicendum est extraque tenere et claudere utrimque ;
inde alium supra fluere atque intendere eodem
quo volvenda micant aeterni sidera mundi ;
aut alium subter, contra qui subvehat orbem, 515
ut fluvios versare rotas atque haustra videmus.
est etiam quoque uti possit caelum omne manere
in statione, tamen cum lucida signa ferantur ;
sive quod inclusi rapidi sunt aetheris aestus
quaerentesque viam circum versantur et ignes 520
passim per caeli volvunt summania templa ;
sive aliunde fluens alicunde extrinsecus aer
versat agens ignis ; sive ipsi serpere possunt
quo cuiusque cibus vocat atque invitat euntis,

500 leviora *Ital.* : levior *OQ* 503 commiscet *Naugerius* : com-
misci *OQ* 507 Pontos *Lachmann* : ponto *OQ* : Ponti *Pontanus*
509-533 *uncinis incl. Lachmann, post 563 collocavit Brieger* 514
aeterni] nocturni *Merrill* 515 qui *Marullus* : quis *OQ* 516
fluvios *Nonius* : fluuius *OQ* 518 lucida *l 31* : lucia *OQ* 521 sum-
mania] immania *Creech*

flammea per caelum pascentis corpora passim. 525
 nam quid in hoc mundo sit eorum ponere certum
 difficile est ; sed quid possit fiatque per omne
 in variis mundis varia ratione creatis,
 id doceo plurisque sequor disponere causas,
 motibus astrorum quae possint esse per omne ; 530
 e quibus una tamen siet hic quoque causa necessest
 quae vegeat motum signis ; sed quae sit earum
 praecipere haudquaquamst pedetemptim progredientis.]

Terraque ut in media mundi regione quiescat,
 evanescere paulatim et decrescere pondus 535
 convenit, atque aliam naturam subter habere
 ex ineunte aevo coniunctam atque uniter aptam
 partibus aeriis mundi quibus insita vivit.
 propterea non est oneri neque deprimit auras ;
 ut sua cuique homini nullo sunt pondere membra 540
 nec caput est oneri collo nec denique totum
 corporis in pedibus pondus sentimus inesse ;
 at quaecumque foris veniunt impostaque nobis
 pondera sunt laedunt, permulto saepe minora.
 usque adeo magni refert quid quaeque queat res. 545
 sic igitur tellus non est aliena repente
 allata atque auris aliunde obiecta alienis,
 sed pariter prima concepta ab origine mundi
 certaue pars eius, quasi nobis membra, videntur.
 praeterea grandi tonitru concussa repente 550
 terra supra quae se sunt concutit omnia motu ;
 quod facere haud ulla posset ratione, nisi esset
 partibus aeriis mundi caeloque revincta.
 nam communibus inter se radicibus haerent
 ex ineunte aevo coniuncta atque uniter apta. 555

528 creatis (cf. 1345): creati *OQ* 530 omne *Marullus*: omnem *OQ*
 531 siet *Lachmann* hic *Bernays*: sit et hae *O*: sit et haec *Q* 532
 vegeat *Gifanius*: uigeat *OQ* 536 subter *l 31*: super *OQ* 545
 magni *Ital.*: magi *OQ* queat *ed. Veronensis*: quaeat *OQ*: aveat
Lachmann: obeat *Munro*: alii alia 549 videntur] videtur *Brieger*
 553 aeriis *Ital.*: aeri *OQ* 555 apta *Pontanus*: aucta *OQ*

nonne vides etiam quam magno pondere nobis
 sustineat corpus tenuissima vis animai
 propterea quia tam coniuncta atque uniter apta est?
 denique iam saltu pernici tollere corpus
 quid potis est nisi vis animae quae membra gubernat? 560
 iamne vides quantum tenuis natura valere
 possit, ubi est coniuncta gravi cum corpore, ut aer
 coniunctus terris et nobis est animi vis?

Nec nimio solis maior rota nec minor ardor
 esse potest, nostris quam sensibus esse videtur. 565
 nam quibus e spatiis cumque ignes lumina possunt
 adicere et calidum membris adflare vaporem,
 nil illa his intervallis de corpore libant
 flammaram, nil ad speciem est contractior ignis.
 proinde, calor quoniam solis lumenque profusum 570 [573]
 perveniunt nostros ad sensus et loca mulcent, [570]
 forma quoque hinc solis debet filumque videri, [571]
 nil adeo ut possis plus aut minus addere, vere. [572]
 lunaque sive notho fertur loca lumine lustrans 575
 sive suam proprio iactat de corpore lucem,
 quidquid id est, nilo fertur maiore figura
 quam, nostris oculis qua cernimus, esse videtur.
 nam prius omnia, quae longe semota tuemur
 aera per multum, specie confusa videntur 580
 quam minui filum. quapropter luna necesse est,
 quandoquidem claram speciem certamque figuram
 praebet, ut est oris extremis cumque notata,
 quantaque quantast, hinc nobis videatur in alto.
 postremo quoscumque vides hinc aetheris ignis; 585
 quandoquidem quoscumque in terris cernimus (ignis),

558 apta *Q* corr.: rapta *OQ* 560 quid *Lambinus*: quis *OQ*
 animae] animi *Lachmann* 564 ardor] ardens *Bockemüller*: alii
 alia 567 adicere *Lambinus*: adlicere *OQ* 568 nil illa his
Bernays: nihil nisi *OQ* libant *Marullus*: librant *OQ* 570 [573]
 huc transtulit *Marullus* 571 mulcent *Lachmann*: fulgent *OQ*:
 tingunt *Lambinus* 572 filumque *Turnebus*: illumque *O*: ilumque *Q*
 574 = 571 (570) secl. editores 581 minui *Bentley*: mi *OQ* 584
 quantaque *Eichstädt*: quanto quoque *OQ* 586 ignes add. *Marullus*

dum tremor <est> clarus, dum cernitur ardor eorum,
perparvum quiddam interdum mutare videntur
alteram utram in partem filum, quo longius absunt:
scire licet perquam pauxillo posse minores
esse vel exigua maiores parte brevique.

590 [594]

[595]

Illud item non est mirandum, qua ratione
tantulus ille queat tantum sol mittere lumen,
quod maria ac terras omnis caelumque rigando
compleat et calido perfundat cuncta vapore.

[590]

[591]

[592]

595 [593]

nam licet hinc mundi patefactum totius unum
largifluum fontem scatere atque erumpere lumen,

597

ex omni mundo quia sic elementa vaporis
undique conveniunt et sic coniectus eorum

600

confluit, ex uno capite hic ut profluat ardor.

nonne vides etiam quam late parvus aquai
prata riget fons interdum campisque redundet?

est etiam quoque uti non magno solis ab igni

aera percipiat calidis fervoribus ardor,

605

opportunos ita est si forte et idoneus aer,

ut queat accendi parvis ardoribus ictus;

quod genus interdum segetes stipulamque videmus
accidere ex una scintilla incendia passim.

forsitan et rosea sol alte lampade lucens

610

possideat multum caecis fervoribus ignem

circum se, nullo qui sit fulgore notatus,

aestifer ut tantum radiorum exaugeat ictum.

Nec ratio solis simplex <et> recta patescit,

quo pacto aestivis e partibus aegocerotis

615

brumalis adeat flexus atque inde revertens

cancris se ut vertat metas ad solstitialis,

587 est add. l 31

588 videntur Q: uidetur O

589 absunt

Lachmann: absit OQ: absint Lambinus

590, 591 [594, 595] huc

transtulit Marullus

596 = 584 secl. editores

599 vaporis

Lambinus: uapore OQ

601 hic] hinc Merrill

605 percipiat

Naugerius: percipiat OQ

609 accidere Q: accedere O

613

aestifer ut tantum l 31: aestiferi utantum Q (utantur C)

614 et

add. Marullus

recta] certa Lambinus

617 cancri se Lachmann:

canceris OQ

lunaque mensibus id spatium videatur obire,
 annua sol in quo consumit tempora cursu.
 non, inquam, simplex his rebus reddita causast. 620
 nam fieri vel cum primis id posse videtur,
 Democriti quod sancta viri sententia ponit,
 quanto quaeque magis sint terram sidera propter,
 tanto posse minus cum caeli turbine ferri.
 evanescere enim rapidas illius et acris 625
 imminui subter viris, ideoque relinqui
 paulatim solem cum posterioribu' signis,
 inferior multo quod sit quam fervida signa.
 et magis hoc lunam : quanto demissior eius
 cursus abest procul a caelo terrisque propinquat, 630
 tanto posse minus cum signis tendere cursum.
 flaccidiore etiam quanto iam turbine fertur
 inferior quam sol, tanto magis omnia signa
 hanc adipiscuntur circum praeterque feruntur.
 propterea fit ut haec ad signum quodque reverti 635
 mobilius videatur, ad hanc quia signa revisunt.
 fit quoque ut e mundi transversis partibus aer
 alternis certo fluere alter tempore possit,
 qui queat aestivis solem detrudere signis
 brumalis usque ad flexus gelidumque rigorem, 640
 et qui reiciat gelidis a frigoris umbris
 aestiferas usque in partis et fervida signa.
 et ratione pari lunam stellasque putandumst,
 quae volvunt magnos in magnis orbibus annos,
 aeribus posse alternis e partibus ire. 645
 nonne vides etiam diversis nubila ventis
 diversas ire in partis inferna supernis?
 qui minus illa queant per magnos aetheris orbis
 aestibus inter se diversis sidera ferri?

At nox obruit ingenti caligine terras, 650

623 sint *Ital.* : in *O* : sin *Q* 629 dimisior *OQ* 632 etiam]
 etenim *Lachmann* 648 illa *l 31* : ille *OQ*

aut ubi de longo cursu sol ultima caeli
 impulit atque suos efflavit languidus ignis
 concussos itere et labefactos aere multo,
 aut quia sub terras cursum convertere cogit
 vis eadem, supra quae terras pertulit orbem. 655

Tempore item certo roseam Matuta per oras
 aetheris auroram differt et lumina pandit,
 aut quia sol idem, sub terras ille revertens,
 anticipat caelum radiis accendere temptans,
 aut quia conveniunt ignes et semina multa 660
 confluere ardoris consuerunt tempore certo,
 quae faciunt solis nova semper lumina gigni;
 quod genus Idacis fama est e montibus altis
 dispersos ignis orienti lumine cerni,
 inde coire globum quasi in unum et conficere orbem. 665
 nec tamen illud in his rebus mirabile debet
 esse, quod haec ignis tam certo tempore possunt
 semina confluere et solis reparare nitorem.
 multa videmus enim, certo quae tempore fiunt
 omnibus in rebus. florescunt tempore certo 670
 arbusta et certo dimittunt tempore florem.
 nec minus in certo dentis cadere imperat aetas
 tempore et impubem molli pubescere veste
 et pariter mollem malis demittere barbam.
 fulmina postremo nix imbres nubila venti 675
 non nimis incertis fiunt in partibus anni.
 namque ubi sic fuerunt causarum exordia prima
 atque ita res mundi cecidere ab origine prima,
 consequae quoque iam redeunt ex ordine certo.

Crescere itemque dies licet et tabescere noctes, 680
 et minui luces, cum sumant augmina noctes,

651 sol ultima *C*: soluet ima *OQ* 656 roseam *Ital.*: rosca *OQ*
 Matuta *Pontanus*: matura *OQ*: natura *Bockemüller* 657 et
O corr.: e *OQ* 667 possunt *Lachmann*: possit *OQ* 675 fulmina
Marullus: flumina *OQ* 679 consequae . . . redeunt *Lachmann*:
 consequiae . . . rerum *OQ*: consequiae . . . suerunt *Merrill*

aut quia sol idem sub terras atque superne
 imparibus currens anfractibus aetheris oras
 partit et in partis non aequas dividit orbem,
 et quod ab alterutra detraxit parte, reponit 685
 eius in adversa tanto plus parte relatus,
 donec ad id signum caeli pervenit, ubi anni
 nodus nocturnas exaequat lucibus umbras.
 nam medio cursu flatus aquilonis et austri
 distinet aequato caelum discrimine metas 690
 propter signiferi posituram totius orbis,
 annua sol in quo concludit tempora serpens,
 obliquo terras et caelum lumine lustrans,
 ut ratio declarat eorum qui loca caeli
 omnia dispositis signis ornata notarunt. 695
 aut quia crassior est certis in partibus aer,
 sub terris ideo tremulum iubar haesitat ignis
 nec penetrare potest facile atque emergere ad ortus.
 propterea noctes hiberno tempore longae
 cessant, dum veniat radiatum insigne diei. 700
 aut etiam, quia sic alternis partibus anni
 tardius et citius consuerunt confluere ignes
 qui faciunt solem certa de surgere parte,
 propterea fit uti videantur dicere verum

*

Luna potest solis radiis percussa nitere 705
 inque dies magis (id) lumen convertere nobis
 ad speciem, quantum solis secedit ab orbi,
 donec eum contra pleno bene lumine fulsit
 atque oriens obitus eius super edita vidit;
 inde minutatim retro quasi condere lumen 710
 debet item; quanto propius iam solis ad ignem

684 et *O* corr.: e *OQ* 692 concludit *Lachmann*: contudit *OQ*
 700 diei *L*: dici *OQ* 704 * 705 lacunam indicavit *Munro*, *versum*
sed. Gifanius, post 714 collocavit *Naugerius* 705 percussa l 31:
 percussa *OQ* 706 id add. *Lachmann*, hinc *Merrill* 708 donec
O corr.: doneque *O*: donique *Q* 711 iam *Marullus*: tam *OQ*

labitur ex alia signorum parte per orbem ;
 ut faciunt, lunam qui fingunt esse pilai
 consimilem cursusque viam sub sole tenere.
 est etiam quare proprio cum lumine possit 715
 volvier et varias splendoris reddere formas.
 corpus enim licet esse aliud quod fertur et una
 labitur omnimodis occursans officiensque
 nec potis est cerni, quia cassum lumine fertur.
 versarique potest, globus ut, si forte, pilai 720
 dimidia ex parti candenti lumine tinctus,
 versandoque globum variantis edere formas,
 donec eam partem, quaecumque est ignibus aucta,
 ad speciem vertit nobis oculosque patentis ;
 inde minutatim retro contorquet et aufert 725
 luciferam partem glomeraminis atque pilai ;
 ut Babylonica Chaldaicum doctrina refutans
 astrologorum artem contra convincere tendit,
 proinde quasi id fieri nequeat quod pugnat uterque
 aut minus hoc illo sit cur amplectier ausis. 730
 denique cur nequeat semper nova luna creari
 ordine formarum certo certisque figuris
 inque dies privos aborisci quaeque creata
 atque alia illius reparari in parte locoque,
 difficilest ratione docere et vincere verbis, 735
 ordine cum ⟨possint⟩ tam certo multa creari.
 it ver et Venus, et Veneris praenuntius ante
 pennatus graditur, Zephyri vestigia propter
 Flora quibus mater praespargens ante viai
 cuncta coloribus egregiis et odoribus opplet. 740
 inde loci sequitur calor aridus et comes una
 pulverulenta Ceres ⟨et⟩ etesia flabra aquilonum.

727 Babylonica l 31: Babylonisa OQ Chaldaicum Avancius :
 Chaldaeum OQ 736 possint add. Lachmann 737 Veneris] veris
 Pontanus 738 Zephyri] Zephyrus Pontanus 742 pulverulenta
 Pontanus: poluerunta O (pul- Q) et add. Marullus

inde autumnus adit, graditur simul Euhius Euan.
 inde aliae tempestates ventique sequuntur,
 altitonans Volturnus et auster fulmine pollens. 745
 tandem bruma nives adfert pigrumque rigorem
 reddit hiemps, sequitur crepitans hanc dentibus albor.
 quo minus est mirum si certo tempore luna
 gignitur et certo deletur tempore rursus,
 cum fieri possint tam certo tempore multa. 750

Solis item quoque defectus lunaeque latebras
 pluribus e causis fieri tibi posse putandumst.
 nam cur luna queat terram secludere solis
 lumine et a terris altum caput obstruere ei,
 obiciens caecum radiis ardentibus orbem ; 755
 tempore eodem aliud facere id non posse putetur
 corpus quod cassum labatur lumine semper ?
 solque suos etiam dimittere languidus ignis
 tempore cur certo nequeat recreareque lumen,
 cum loca praeteriit flammis infesta per auras, 760
 quae faciunt ignis interstingui atque perire ?
 et cur terra queat lunam spoliare vicissim
 lumine et oppressum solem super ipsa tenere,
 menstrua dum rigidas coni perlabitur umbras ;
 tempore eodem aliud nequeat succurrere lunae 765
 corpus vel supra solis perlabier orbem,
 quod radios interrumpat lumenque profusum ?
 et tamen ipsa suo si fulget luna nitore,
 cur nequeat certa mundi languescere parte,
 dum loca luminibus propriis inimica per exit? 770

Quod superest, quoniam magni per caerula mundi 772
 qua fieri quicquid posset ratione resolvi,
 solis uti varios cursus lunaeque meatus
 noscere possemus quae vis et causa cieret, 775

743 euā Q : aeuom O 747 reddit l 31 : redit OQ : prodit Lach-
 mann crepitans l 31 : creditans OQ hanc Q : ac O albor
 Lachmann : algi OQ : algu Wakefield 750 fieri Marullus : fleri
 OQ 753 solis Lambinus : possis OQ 756 eodem (cf. 765) :
 eadem OQ 761 perire Marullus : periri OQ 771 = 764 secl.
 Lambinus

quove modo <possent> offecto lumine obire
 et neque opinantis tenebris obducere terras,
 cum quasi conivent et aperto lumine rursum
 omnia convisunt clara loca candida luce,
 nunc redeo ad mundi novitatem et mollia terrae 780
 arva, novo fetu quid primum in luminis oras
 tollere et incertis crerint committere ventis.

Principio genus herbarum viridemque nitorem
 terra dedit circum collis camposque per omnis,
 florida fulserunt viridanti prata colore, 785
 arboribusque datumst variis exinde per auras
 crescendi magnum immissis certamen habenis.
 ut pluma atque pili primum saetaeque creantur
 quadrupedum membris et corpore pennipotentum,
 sic nova tum tellus herbas virgultaque primum 790
 sustulit, inde loci mortalia saecula creavit
 multa modis multis varia ratione coorta.
 nam neque de caelo cecidisse animalia possunt
 nec terrestria de salsis exisse lacunis.
 linquitur ut merito maternum nomen adepta 795
 terra sit, e terra quoniam sunt cuncta creata.
 multaque nunc etiam existunt animalia terris
 imbribus et calido solis concreta vapore;
 quo minus est mirum si tum sunt plura coorta
 et maiora, nova tellure atque aethere adulta. 800
 principio genus alituum variaequae volucres
 ova relinquebant exclusae tempore verno,
 folliculos ut nunc teretes aestate cicadae
 linquunt sponte sua victum vitamque petentes.
 tum tibi terra dedit primum mortalia saecula. 805
 multus enim calor atque umor superabat in arvis.
 hoc ubi quaeque loci regio opportuna dabatur,

776 possent *add. ed. Brixiensis* 782 tollere et *Pontanus*:
 tolleretur *OQ* crerint *Orelli*: credunt *OQ* 800 maiora *Pontanus*:
 maiore *OQ*

crescebant uteri terram radicibus apti ;
 quos ubi tempore maturo patefecerat aetas
 infantum fugiens umorem aurasque petessens, 810
 convertibat ibi natura foramina terrae
 et sucum venis cogebat fundere apertis
 consimilem lactis, sicut nunc femina quaeque
 cum peperit, dulci repletur lacte, quod omnis
 impetus in mammas convertitur ille alimenti. 815
 terra cibum pueris, vestem vapor, herba cubile
 praebebat multa et molli lanugine abundans.
 at novitas mundi nec frigora dura ciebat
 nec nimios aestus nec magnis viribus auras.
 omnia enim pariter crescunt et robora sumunt. 820

Quare etiam atque etiam maternum nomen adepta
 terra tenet merito, quoniam genus ipsa creavit
 humanum atque animal prope certo tempore fudit
 omne quod in magnis bacchatur montibu' passim,
 aeriasque simul volucris variantibu' formis. 825
 sed quia finem aliquam pariendi debet habere,
 destitit, ut mulier spatio defessa vetusto.
 mutat enim mundi naturam totius aetas
 ex alioque alius status excipere omnia debet,
 nec manet ulla sui similis res : omnia migrant, 830
 omnia commutat natura et vertere cogit.
 namque aliud putrescit et aevo debile languet,
 porro aliud succrescit et <e> contemptibus exit.
 sic igitur mundi naturam totius aetas
 mutat et ex alio terram status excipit alter, 835
 quod tulit ut nequeat, possit quod non tulit ante.

Multaque tum tellus etiam portenta creare
 conatast mira facie membrisque coorta,

809 aetas *Marullus* : aestas *OQ* : aestus *Lachmann* : auctus *Merrill*
 823 animal *Marullus* : anima *OQ* : animas *O corr.* 825 aeriasque
Marullus : aeriaeque *OQ* 833 succrescit *Lachmann* (*in commen-*
tario) : crescit *OQ* : clarescit *Lachmann* e add. *Marullus* 836
 tulit ut *Bentley* : potuit *OQ* : pote uti *Lachmann* nequeat] nequit,
 ut *Munro* 838 facie *l 31* : facit *OQ*

androgynum, interutrasque nec utrum, utrimque remotum,
 orba pedum partim, manuum viduata vicissim, 840
 muta sine ore etiam, sine vultu caeca reperta,
 vinctaque membrorum per totum corpus adhaesu,
 nec facere ut possent quicquam nec cedere quoquam
 nec vitare malum nec sumere quod foret usus.
 cetera de genere hoc monstra ac portenta creabat, 845
 nequiquam, quoniam natura absterruit auctum
 nec potuere cupitum aetatis tangere florem
 nec reperire cibum nec iungi per Veneris res.
 multa videmus enim rebus concurrere debere,
 ut propagando possint procudere saecula; 850
 pabula primum ut sint, genitalia deinde per artus
 semina qua possint membris manare remissis;
 feminaque ut maribus coniungi possit, habere
 mutua qui mutant inter se gaudia uterque.

Multaque tum interiisse animantum saecula necessest 855
 nec potuisse propagando procudere prolem.
 nam quaecumque vides vesci vitalibus auris,
 aut dolus aut virtus aut denique mobilitas est
 ex ineunte aevo genus id tutata reservans.
 multaque sunt, nobis ex utilitate sua quae 860
 commendata manent, tutelae tradita nostrae.
 principio genus acre leonum saevaue saecula
 tutatast virtus, vulpis dolus et fuga cervos.
 at levisomna canum fido cum pectore corda
 et genus omne quod est veterino semine partum 865
 lanigeraeque simul pecudes et bucera saecula
 omnia sunt hominum tutelae tradita, Memmi.

839 androgynum interutraque nec utrum, utrimque *Lachmann* (interutrasque *Munro*): androgynem inter utras nec utramque utrumque *Q* (ut utrunque *O*) 841 muta *Naugerius*: multa *OQ* 844 foret *Lambinus*: uolet *OQ* 846 absterruit *Ital.*: abserruit *O*: abseruit *Q* 850 procudere *Ital.*: procludere *OQ* 852 remissis] remissa *Lachmann* 853 maribus *Ital.*: marius *OQ* 854 mutant *Bernays*: metuent *OQ* 859 tutata *ed. Brixiensis*: tuta *OQ* 863 et *Q*: ut *O* 865 veterino *Nonius*: ueteri non *OQ*

nam cupide fugere feras pacemque secuta
sunt et larga suo sine pabula parta labore,
quae damus utilitatis eorum praemia causa. 870
at quis nil horum tribuit natura, nec ipsa
sponte sua possent ut vivere nec dare nobis
utilitatem aliquam quare pateremur eorum
praesidio nostro pasci genus esseque tutum,
scilicet haec aliis praedae lucroque iacebant 875
indupedita suis fatalibus omnia vinclis,
donec ad interitum genus id natura redegit.

Sed neque Centauri fuerunt, nec tempore in ullo
esse queunt duplici natura et corpore bino
ex alienigenis membris compacta, potestas 880
hinc illinc par, vis ut sat par esse potissit.
id licet hinc quamvis hebeti cognoscere corde.
principio circum tribus actis impiger annis
florete equus, puer haudquaquam; nam saepe etiam nunc
ubera mammaram in somnis lactantia quaeret. 885
post ubi equum validae vires aetate senecta
membraque deficiunt fugienti languida vita,
tum demum puerili aevo florente iuventas
occipit et molli vestit lanugine malas.
ne forte ex homine et veterino semine equorum 890
confieri credas Centauros posse neque esse,
aut rabidis canibus succinctas semimarinis
corporibus Scyllas et cetera de genere horum,
inter se quorum discordia membra videmus;
quae neque florescunt pariter nec robora sumunt 895
corporibus neque prociunt aetate senecta
nec simili Venere ardescunt nec moribus unis
conveniunt, neque sunt eadem iucunda per artus.

868 secuta *Lambinus*: secutae *OQ* 871 nil *Pontanus*: ni *O*:
in *Q* 881 par, vis ut sat par *Giussani*: paruis ut non sit pars *O*
(sat *Q*): partis ut si par *Lachmann*: visque ut non sat par *Munro*:
alii alia 884 nam *Q*: om. *O* 885 lactantia l 31: laetantia
OQ 888 puerili] pueris *Avancius* 889 occipit *Marullus*: officit
OQ: sufficit *Merrill* 892 rabidis *Heinsius*: rapidis *OQ* 896
prociunt *Turnebus*: proficiunt *OQ*

quippe videre licet pinguescere saepe cicuta
 barbigeras pecudes, homini quae est acre venenum. 900
 flamma quidem ⟨vero⟩ cum corpora fulva leonum
 tam soleat torrere atque urere quam genus omne
 visceris in terris quodcumque et sanguinis exstet,
 qui fieri potuit, triplici cum corpore ut una,
 prima leo, postrema draco, media ipsa, Chimaera 905
 ore foras acrem flaret de corpore flammam?
 quare etiam tellure nova caeloque recenti
 talia qui fingit potuisse animalia gigni,
 nixus in hoc uno novitatis nomine inani,
 multa licet simili ratione effutiat ore, 910
 aurea tum dicat per terras flumina vulgo
 fluxisse et gemmis florere arbusta suesse
 aut hominem tanto membrorum esse impete natum,
 trans maria alta pedum nisus ut ponere posset
 et manibus totum circum se vertere caelum. 915
 nam quod multa fuere in terris semina rerum
 tempore quo primum tellus animalia fudit,
 nil tamen est signi mixtas potuisse creari
 inter se pecudes compactaque membra animantum,
 propterea quia quae de terris nunc quoque abundant 920
 herbarum genera ac fruges arbustaque laeta
 non tamen inter se possunt complexa creari,
 sed res quaeque suo ritu procedit et omnes
 foedere naturae certo discrimina servant.

At genus humanum multo fuit illud in arvis 925
 durius, ut decuit, tellus quod dura creasset,
 et maioribus et solidis magis ossibus intus
 fundatum, validis aptum per viscera nervis,
 nec facile ex aestu nec frigore quod caperetur
 nec novitate cibi nec labi corporis ulla. 930

901 vero *add. ed. Juntina*, denique *ante flamma Lachmann* 904
 una *ed. Brixensis* : unam *OQ* 906 foras *Naugerius* : feras *OQ* 914
 ponere *Q corr.* : pondere *OQ* 923 res *Munro* : si *OQ* : vis *Lach-*
mann : sibi *Merrill* 925 at *Lachmann* : et *OQ*

multaque per caelum solis volventia lustra
 vulgivago vitam tractabant more ferarum.
 nec robustus erat curvi moderator aratri
 quisquam, nec scibat ferro molirier arva
 nec nova defodere in terram virgulta neque altis 935
 arboribus veteres decidere falcibu' ramos.
 quod sol atque imbres dederant, quod terra crearat
 sponte sua, satis id placabat pectora donum.
 glandiferas inter curabant corpora quercus
 plerumque; et quae nunc hiberno tempore cernis 940
 arbuta puniceo fieri matura colore,
 plurima tum tellus etiam maiora ferebat.
 multaque praeterea novitas tum florida mundi
 pabula dura tulit, miseris mortalibus ampla.
 at sedare sitim fluvii fontesque vocabant, 945
 ut nunc montibus e magnis decursus aquai
 claru' citat late sitientia saecula ferarum.
 denique nota vagi silvestria templa tenebant
 nympharum, quibus e scibant umori' fluenta
 lubrica proluvie larga lavere umida saxa, 950
 umida saxa, super viridi stillantia musco,
 et partim plano scatere atque erumpere campo.
 necdum res igni scibant tractare neque uti
 pellibus et spoliis corpus vestire ferarum,
 sed nemora atque cavos montis silvasque colebant 955
 et frutices inter condébant squalida membra
 verbera ventorum vitare imbrisque coacti.
 nec commune bonum poterant spectare neque ullis
 moribus inter se scibant nec legibus uti.
 quod cuique obtulerat praedae fortuna, ferebat 960
 sponte sua sibi quisque valere et vivere doctus.

934 molirier *ed. Brixiensis*: mollerier *OQ*: mollirier *O corr.* 941
 arbuta *O corr.*: aruita *OQ* 944 dura *Vat. 3276*: dira *OQ* 947
 claru' citat *Forbiger* late *Bosius*: claricitati a te *OQ*: clarigitat late
Lachmann: alii alia 948 vagi *Lachmann*: uagis *OQ* tenebant]
 petebant *Brieger* 949 umori' *Bentley*: umore *OQ*

et Venus in silvis iungebat corpora amantum ;
 conciliabat enim vel mutua quamque cupido
 vel violenta viri vis atque impensa libido
 vel pretium, glandes atque arbuta vel pira lecta. 965
 et manuum mira freti virtute pedumque
 consectabantur silvestria saecla ferarum
 missilibus saxis et magno pondere clavae ; [975]
 multaque vincebant, vitabant pauca latebris ; [968]
 saetigerisque pares subus silvestria membra 970 [969]
 nuda dabant terrae nocturno tempore capti, [970]
 circum se foliis ac frondibus involventes. [971]
 nec plangore diem magno solemque per agros [972]
 quacrebant pavidī palantes noctis in umbris, [973]
 sed taciti respectabant somnoque sepulti, 975 [974]
 dum rosea facē sol inferret lumina caelo.
 a parvis quod enim consuerant cernere semper
 alterno tenebras et lucem tempore gigni,
 non erat ut fieri posset mirarier umquam
 nec diffidere ne terras aeterna teneret 980
 nox in perpetuum detracto lumine solis.
 sed magis illud erat curae, quod saecla ferarum
 infestam miseris faciebant saepe quietem.
 eiectique domo fugiebant saxea tecta .
 spumigeri suis adventu validique leonis 985
 atque intempesta cedebant nocte paventes
 hospitibus saevis instrata cubilia fronde.
 Nec nimio tum plus quam nunc mortalia saecla
 dulcia linquebant lamentis lumina vitae.
 unus enim tum quisque magis deprensus eorum 990
 pabula viva feris praebebat, dentibus haustus,
 et nemora ac montis gemitu silvasque replebat
 viva videns vivo sepeliri viscera busto.

962 iungebat *L* : lugebat *O* : lucebat *Q* 968 [975] *huc trans-*
posuit Naugerius 970 subus] suibus *C* 971 nuda dabant *Lam-*
binus : nudabant *OQ* 976 rosea *l 31* : rotea *OQ* 979 posset]
 possent *Brieger* 984 eiectique *l 31* : et lectique *O* : electique *Q*
 989 lamentis] labentis *Muretus* : languentis *Merrill* 993 vivo *l 31* :
 uino *OQ*

at quos effugium servarat corpore adeso,
 posterius tremulas super ulcera taetra tenentes 995
 palmas horriferis accibant vocibus Orcum,
 donec eos vita privarant vermina saeva
 expertis opis, ignaros quid vulnera vellent.
 at non multa virum sub signis milia ducta
 una dies dabat exitio nec turbida ponti 1000
 aequora lidebant navis ad saxa virosque.
 hic temere incassum frustra mare saepe coortum
 saevibat leviterque minas ponebat inanis,
 nec poterat quemquam placidi pellacia ponti
 subdola pellicere in fraudem ridentibus undis. 1005
 improba navigii ratio tum caeca iacebat.
 tum penuria deinde cibi languentia leto
 membra dabat, contra nunc rerum copia mersat.
 illi imprudentes ipsi sibi saepe venenum
 vergebant, nunc dant <aliis> sollertius ipsi. 1010

Inde casas postquam ac pellis ignemque pararunt,
 et mulier coniuncta viro concessit in unum

*

cognita sunt, prolemque ex se videre creatam,
 tum genus humanum primum mollescere coepit.
 ignis enim curavit ut alsia corpora frigus 1015
 non ita iam possent caeli sub tegmine ferre,
 et Venus imminuit viris puerique parentum
 blanditiis facile ingenium fregere superbum.
 tunc et amicitiam coeperunt iungere aventes
 finitimi inter se nec laedere nec violari, 1020
 et pueros commendarunt muliebreque saeculum,
 vocibus et gestu cum balbe significarent

994 at] et *Brieger* 995 ulcera *l 31*: uicera *O*: uicerat *Q* 997
 donec *Marullus*: denique *OQ* 1001 lidebant] ledebant *O corr.*:
 laedebant *ed. Aldina* 1002 hic *Lachmann*: nec *OQ*: sed *Lam-*
binus 1003 ponebat *Marullus*: potebas *OQ* 1006 navigii]
 navigiis *Bothe* tum] cum *Munro* 1009 imprudentes *Marullus*:
 prudentes *OQ* 1010 nunc dant aliis *ed. Juntina*: nudant *OQ*:
ali ali 1011 casas *l 31*: cassas *OQ* 1012 * 1013 lacunam
indicavit Marullus 1013 cognita sunt] conubium *Lachmann*: con-
 iugium *Bernays*

imbecillorum esse aequum misererier omnis.
 nec tamen omnimodis poterat concordia gigni,
 sed bona magnaue pars servabat foedera caste; 1025
 aut genus humanum iam tum foret omne peremptum
 nec potuisset adhuc perducere saecula propago.

At varios linguae sonitus natura subegit
 mittere et utilitas expressit nomina rerum,
 non alia longe ratione atque ipsa videtur 1030
 protrahere ad gestum pueros infantia linguae,
 cum facit ut digito quae sint praesentia monstrent.
 sentit enim vis quisque suas quoad possit abuti.
 cornua nata prius vitulo quam frontibus exstent,
 illis iratus petit atque infestus inurget. 1035
 at catuli pantherarum scymnique leonum
 unguibus ac pedibus iam tum morsuque repugnant,
 vix etiam cum sunt dentes unguisque creati.
 alituum porro genus alis omne videmus
 fidere et a pinnis tremulum petere auxiliatum. 1040
 proinde putare aliquem tum nomina distribuisse
 rebus et inde homines didicisse vocabula prima,
 desiperest. nam cur hic posset cuncta notare
 vocibus et varios sonitus emittere linguae,
 tempore eodem alii facere id non quisse putentur? 1045
 praeterea si non alii quoque vocibus usi
 inter se fuerant, unde insita notities est
 utilitatis et unde data est huic prima potestas,
 quid vellet facere ut sciret animoque videret?
 cogere item pluris unus victosque domare 1050
 non poterat, rerum ut perdiscere nomina vellent.
 nec ratione docere ulla suadereque surdis,

1023 omnis *Marullus*: omni *QQ* 1025 caste *l 31*: casti *QQ*
 1032 monstrent *Marullus*: monstret *QQ* 1033 vis] vim *ed.*
Brixienensis suas *Müller*: suam *QQ* quoad *Lambinus* (*in commen-*
tario): quod *QQ* 1035 infestus *Q*: infessus *O* 1038 etiam
Marullus: iam *O*: tiam *Q* 1039 porro *ed. Juntina*: proporro *QQ*
 1040 pinnis *Q*: pennis *O* 1048 utilitatis *Marullus*: utilitas *QQ*

quid sit opus facto, facilest; neque enim paterentur
nec ratione ulla sibi ferrent amplius auris
vocis inauditos sonitus obtundere frustra. 1055
postremo quid in hac mirabile tantoperest re,
si genus humanum, cui vox et lingua vigeret,
pro vario sensu varia res voce notaret?
cum pecudes mutae, cum denique saecula ferarum
dissimilis soleant voces variasque ciere, 1060
cum metus aut dolor est et cum iam gaudia gliscunt.
quippe etenim licet id rebus cognoscere apertis.
irritata canum cum primum magna Molossum
molliā ricta fremunt duros nudantia dentis,
longe alio sonitu rabie restricta minantur, 1065
et cum iam latrant et vocibus omnia complent.
at catulos blande cum lingua lambere temptant
aut ubi eos iactant pedibus morsuque petentes
suspensis teneros imitantur dentibus haustus,
longe alio pacto gannitu vocis adulant, 1070
et cum deserti baubantur in aedibus aut cum
plorantes fugiunt summisso corpore plagas.
denique non hinnitus item differre videtur,
inter equas ubi equus florenti aetate iuvenus
pinnigeri saevit calcaribus ictus amoris 1075
et fremitum patulis sub naribus edit ad arma,
et cum sic alias concussis artubus hinnit?
postremo genus alituū variaequae volucres,
accipitres atque ossifragae mergique marinis
fluctibus in salso victum vitamque petentes, 1080
longe alias alio iaciunt in tempore voces,
et cum de victu certant praedaeque repugnant.

1053 facilest *Lachmann*: facile si *QQ* 1058 varia *Bentley*:
uarias *QQ* 1062 id *Gifanius*: in *QQ* 1064 fremunt *Marullus*:
premunt *QQ* 1065 alio *l 31*: alia *QQ* restricta *Lachmann*:
stricta *QQ* minantur *Pontanus*: minatur *QQ* 1067 at] et *Lach-*
mann 1068 iactant *Naugerius*: lactant *QQ* petentes *l 31*:
potentes *QQ* 1071 deserti baubantur *L*: desertibus aubantur *QQ*
1072 plorantis *O corr.*: florantis *QQ* 1076 sub] ubi *Lachmann*
1082 praedaeque *O corr. L*: predataque *QQ*: praedaeque *Avancius*

et partim mutant cum tempestatibus una
 raucisonos cantus, cornicum ut saecula vetusta
 corvorumque greges ubi aquam dicuntur et imbris 1085
 poscere et interdum ventos aurasque vocare.

ergo si varii sensus animalia cogunt,
 muta tamen cum sint, varias emittere voces,
 quanto mortalis magis aequumst tum potuisse
 dissimilis alia atque alia res voce notare ! 1090

Illud in his rebus tacitus ne forte requiras,
 fulmen detulit in terram mortalibus ignem
 primitus, inde omnis flammarum diditur ardor.
 multa videmus enim caelestibus incita flammis
 fulgere, cum caeli donavit plaga vapore. 1095

et ramosa tamen cum ventis pulsa vacillans
 aestuat in ramos incumbens arboris arbor,
 exprimitur validis extritus viribus ignis,
 emicat interdum flammai fervidus ardor,
 mutua dum inter se rami stirpesque teruntur. 1100

quorum utrumque dedisse potest mortalibus ignem.
 inde cibum coquere ac flammae mollire vapore
 sol docuit, quoniam mitescere multa videbant
 verberibus radiorum atque aestu victa per agros.

Inque dies magis hi victum vitamque priorem 1105
 commutare novis monstrabant rebus et igni
 ingenio qui praestabant et corde vigeant.
 condere coeperunt urbis arcemque locare
 praesidium reges ipsi sibi perfugiumque,
 et pecus atque agros divisere atque dedere 1110
 pro facie cuiusque et viribus ingenioque ;
 nam facies multum valuit viresque vigeant.
 posterius res inventast aurumque repertum,

1084 ut *Naugerius* : et *OQ* 1090 res *L* : re *OQ* 1091-1160 *uncinis incl. edd.* 1094 incita *Marullus* : insita *OQ* : inlita *Lachmann*
 1095 vapore *Lachmann* : uaporis *OQ* 1096 et *Marullus* : ut *OQ*
 1099 emicat] et micat *Marullus* 1105 hi victum *Naugerius* : in-
 uictum *OQ* 1106 rebus et igni] rebus benigni *Lachmann* : rebus
 et ipsi *Merrill* 1110 pecus *Lachmann* : pecudes *OQ* 1112
 vigeant] vigentes *Faber* : vigorque *Lachmann*

quod facile et validis et pulchris dempsit honorem;
 divitioris enim sectam plerumque sequuntur 1115
 quamlibet et fortes et pulchro corpore creti.
 quod siquis vera vitam ratione gubernet,
 divitiae grandes homini sunt vivere parce
 aequo animo; neque enim est umquam penuria parvi.
 at claros homines voluerunt se atque potentis, 1120
 ut fundamento stabili fortuna maneret
 et placidam possent opulenti degere vitam,
 nequiquam, quoniam ad summum succedere honorem
 certantes iter infestum fecere viai,
 et tamen e summo, quasi fulmen, deicit ictos 1125
 invidia interdum contemptim in Tartara taetra;
 invidia quoniam, ceu fulmine, summa vaporant [1131]
 plerumque et quae sunt aliis magis edita cumque; [1132]
 ut satius multo iam sit parere quietum [1127]
 quam regere imperio res velle et regna tenere. 1130 [1128]
 proinde sine incassum defessi sanguine sudent, [1129]
 angustum per iter luctantes ambitionis; [1130]
 quandoquidem sapiunt alieno ex ore petuntque
 res ex auditis potius quam sensibus ipsis,
 nec magis id nunc est neque erit mox quam fuit ante. 1135

Ergo regibus occisis subversa iacebat
 pristina maiestas soliorum et sceptrum superba,
 et capitis summi praeclarum insigne cruentum
 sub pedibus vulgi magnum lugebat honorem;
 nam cupide conculcatur nimis ante metutum. 1140
 res itaque ad summam faecem turbasque redibat,
 imperium sibi cum ac summatum quisque petebat.
 inde magistratum partim docuere creare
 iuraque constituere, ut vellent legibus uti.

1116 creti l 31: certi OQ 1122 placidam possent *Ital.*: placida
 possunt OQ 1124 certantes iter *Marullus*: certantesque inter O
 (inter om. Q) 1127-1132 *hunc versuum ordinem restituit Munro*
 1128 [1132] aliis *Lambinus*: altis OQ 1141 redibat l 31: recidat Q:
 recidit O 1142 petebat O *corr.*: patebat OQ

nam genus humanum, defessum vi colere aevum, 1145
 ex inimiciis languebat; quo magis ipsum
 sponte sua cecidit sub leges artaque iura.
 acrius ex ira quod enim se quisque parabat
 ulcisci quam nunc concessumst legibus aequis,
 hanc ob rem est homines pertaesum vi colere aevum. 1150
 inde metus maculat poenarum praemia vitae.
 circumretit enim vis atque iniuria quemque
 atque, unde exortast, ad eum plerumque revertit,
 nec facilest placidam ac pacatam degere vitam
 qui violat factis communia foedera pacis. 1155
 etsi fallit enim divum genus humanumque,
 perpetuo tamen id fore clam diffidere debet;
 quippe ubi se multi per somnia saepe loquentes
 aut morbo delirantes protraxe ferantur
 et celata (diu) in medium peccata dedisse. 1160

Nunc quae causa deum per magnas numina gentis
 pervulgarit et ararum compleverit urbis
 suscipiendaque curarit sollemnia sacra,
 quae nunc in magnis florent sacra rebu' locisque,
 unde etiam nunc est mortalibus insitus horror 1165
 qui delubra deum nova toto suscitatur orbi
 terrarum et festis cogit celebrare diebus,
 non ita difficilest rationem reddere verbis.
 quippe etenim iam tum divum mortalia saecula
 egregias animo facies vigilante videbant 1170
 et magis in somnis mirando corporis auctu.
 his igitur sensum tribuebant propterea quod
 membra movere videbantur vocesque superbas
 mittere pro facie praeclara et viribus amplis.
 aeternamque dabant vitam, quia semper eorum 1175
 suppeditabatur facies et forma manebat,

1145 vi colere *l 31*: vicere *O*: vigere *Q* 1152 vis *C*: ius *OQ*
 1160 diu *add. Marullus*, mala *Lachmann*, tot *Merrill*

et tamen omnino quod tantis viribus auctos
 non temere ulla vi convinci posse putabant.
 fortunisque ideo longe praestare putabant,
 quod mortis timor haud quemquam vexaret eorum, 1180
 et simul in somnis quia multa et mira videbant
 efficere et nullum capere ipsos inde laborem.
 praeterea caeli rationes ordine certo
 et varia annorum cernebant tempora verti
 nec poterant quibus id fieret cognoscere causis. 1185
 ergo perfugium sibi habebant omnia divis
 tradere et illorum nutu facere omnia flecti.
 in caeloque deum sedis et templa locarunt,
 per caelum volvi quia nox et luna videtur,
 luna dies et nox et noctis signa severa 1190
 noctivagaeque faces caeli flammaeque volantes,
 nubila sol imbres nix venti fulmina grando
 et rapidi fremitus et murmura magna minarum.

O genus infelix humanum, talia divis
 cum tribuit facta atque iras adiunxit acerbas! 1195
 quantos tum gemitus ipsi sibi, quantaque nobis
 vulnera, quas lacrimas peperere minoribu' nostris!
 nec pietas ullast velatum saepe videri
 vertier ad lapidem atque omnis accedere ad aras
 nec procumbere humi prostratum et pandere palmas 1200
 ante deum delubra nec aras sanguine multo
 spargere quadrupedum nec votis nectere vota,
 sed mage pacata posse omnia mente tueri.
 nam cum suspicimus magni caelestia mundi
 templa super stellisque micantibus aethera fixum, 1205
 et venit in mentem solis lunaeque viarum,
 tunc aliis oppressa malis in pectora cura
 illa quoque expergefatum caput erigere infit,

1178 ulla *ed. Brixensis* : illa *OQ* 1184 varia *Ital.* : uarias *OQ*
 1189 nox] sol *Lambinus* : lux *Lachmann* 1198 ullast velatum *Lac-*
tantius : ulla velatumst *OQ* 1203 pacata *ed. Juntina* : placata *OQ*

T. LVCRETI CARI

nequae forte deum nobis immensa potestas
 sit, vario motu quae candida sidera verset. 1210
 temptat enim dubiam mentem rationis egestas,
 ecquaenam fuerit mundi genitalis origo,
 et simul ecquae sit finis, quoad moenia mundi
 solliciti motus hunc possint ferre laborem,
 an divinitus aeterna donata salute 1215
 perpetuo possint aevi labentia tractu
 immensi validas aevi contemnere viris.
 praeterea cui non animus formidine divum
 contrahitur, cui non correpunt membra pavore,
 fulminis horribili cum plaga torrida tellus 1220
 contremit et magnum percurrunt murmura caelum?
 non populi gentesque tremunt, regesque superbi
 corripunt divum percussi membra timore,
 nequid ob admissum foede dictumve superbe
 poenarum grave sit solvendi tempus adultum? 1225
 summa etiam cum vis violenti per mare venti
 induperatorem classis super aequora verrit
 cum validis pariter legionibus atque elephantis,
 non divum pacem votis adit ac prece quaesit
 ventorum pavidus paces animasque secundas, 1230
 nequiquam, quoniam violento turbine saepe
 correptus nilo fertur minus ad vada leti?
 usque adeo res humanas vis abdita quaedam
 obterit et pulchros fascis saevasque securis
 proculcare ac ludibrio sibi habere videtur. 1235
 denique sub pedibus tellus cum tota vacillat
 concussaeque cadunt urbes dubiaeque minantur,
 quid mirum si se temnunt mortalia saecula
 atque potestates magnas mirasque relinquunt
 in rebus viris divum, quae cuncta gubernent? 1240

1214 solliciti *Bentley*: et taciti *OQ* 1220 fulminis *Marullus*:
 fulmini *OQ* 1224 nequid *Lachmann*: nequod *OQ* 1225 adultum
Lachmann: adauctum *OQ*: adactum *Pontanus* 1226 summa *l 31*:
 summe *O*: summet *Q* 1229 adit ac prece *l 31*: adita prece *O*
 (praece *Q*)

Quod superest, aes atque aurum ferrumque repertumst
 et simul argenti pondus plumbique potestas,
 ignis ubi ingentis silvas ardore cremarat
 montibus in magnis, seu caeli fulmine misso,
 sive quod inter se bellum silvestre gerentes 1245
 hostibus intulerant ignem formidinis ergo,
 sive quod inducti terrae bonitate volebant
 pandere agros pinguis et pascua reddere rura,
 sive feras interficere et ditescere praeda.
 nam fovea atque igni prius est venarier ortum 1250
 quam saepire plagis saltum canibusque ciere.
 quidquid id est, quacumque e causa flammeus ardor
 horribili sonitu silvas exederat altis
 ab radicibus et terram percoxerat igni,
 manabat venis ferventibus in loca terrae 1255
 concava conveniens argenti rivus et auri,
 aeris item et plumbi. quae cum concreta videbant
 posterius claro in terra splendere colore,
 tollebant nitido capti levique lepore,
 et simili formata videbant esse figura 1260
 atque lacunarum fuerant vestigia cuique.
 tum penetrabat eos posse haec liquefacta calore
 quamlibet in formam et faciem decurrere rerum
 et prorsum quamvis in acuta ac tenvia posse
 mucronum duci fastigia procudendo, 1265
 ut sibi tela parent, silvasque ut caedere possint
 materiemque dolare et levia radere tigna
 et terebrare etiam ac pertundere perque forare.
 nec minus argento facere haec auroque parabant
 quam validi primum violentis viribus aeris, 1270
 nequiquam, quoniam cedebat victa potestas,

1241 aes atque *Marullus*: aequae *OQ* 1243 ingentis *Ital.*:
 gentis *OQ* 1244 caeli *Q*: caelo *O* 1253 altis *O corr.*: ? alas *O*:
 altas *Q* 1254 ab *ed. Juntina*: a *OQ* 1258 terra *Lachmann*:
 terras *OQ*: terris *Lambinus* 1259 capti *l 31*: capiti *OQ* 1260
 videbant *Ital.*: uidebat *OQ* 1266 ut *Lachmann*: et *OQ* 1267
 dolare et levia *Marullus*: dolaret levare ac *OQ*: alii alia

nec poterant pariter durum sufferre laborem.
 nam fuit in pretio magis ⟨aes⟩ aurumque iacebat
 propter inutilitatem hebeti mucrone retusum.
 nunc iacet aes, aurum in summum successit honorem. 1275
 sic volvenda aetas commutat tempora rerum.
 quod fuit in pretio, fit nullo denique honore;
 porro aliud succedit et ⟨e⟩ contemptibus exit
 inque dies magis appetitur floretque repertum
 laudibus et miro est mortalis inter honore. 1280

Nunc tibi quo pacto ferri natura reperta
 sit facilest ipsi per te cognoscere, Memmi.
 arma antiqua manus ungues dentesque fuerunt
 et lapides et item silvarum fragmina rami,
 et flamma atque ignes, postquam sunt cognita primum. 1285
 posterius ferri vis est aerisque reperta.
 et prior aeris erat quam ferri cognitus usus,
 quo facilis magis est natura et copia maior.
 aere solum terrae tractabant, aereque belli
 miscebant fluctus et vulnera vasta serebant 1290
 et pecus atque agros adimebant. nam facile ollis
 omnia cedebant armatis nuda et inerma.
 inde minutatim processit ferreus ensis
 versaque in opprobium species est falcis aenae,
 et ferro coepere solum proscindere terrae 1295
 exaequataque sunt creperi certamina belli.
 et prius est armatum in equi conscendere costas
 et moderarier hunc frenis dextraque vigere
 quam biiugo curru belli temptare pericla.
 et biiugos prius est quam bis coniungere binos 1300
 et quam falciferos armatum escendere currus.
 inde boves lucas turrito corpore, taetras,
 anguimanus, belli docuerunt vulnera Poeni

1272 poterant] poterat *Lambinus* 1273 nam] tum *Lachmann*
 aes *add. l. 31* 1278 e *add. ed. Brixienensis* 1285 flamma atque
 Q *corr.*: flammatque OQ 1294 ahenae *Ital.*: athenae O: athene Q
 1300 biiugos *Faber*: biiugo OQ 1302 lucas Q *corr.*: cas OQ
 taetras *Lachmann*: tetras OQ

sufferre et magnas Martis turbare catervas.
 sic alid ex alio peperit discordia tristis, 1305
 horribile humanis quod gentibus esset in armis,
 inque dies belli terroribus addidit augmen.

Temptarunt etiam tauros in moenere belli
 expertique sues saevos sunt mittere in hostis.
 et validos partim prae se misere leones 1310
 cum doctoribus armatis saevisque magistris
 qui moderarier his possent vinclisque tenere,
 nequiquam, quoniam permixta caede calentes
 turbabant saevi nullo discrimine turmas,
 terrificas capitum quatientes undique cristas, 1315
 nec poterant equites fremitu perterrita equorum
 pectora mulcere et frenis convertere in hostis.
 irritata leae iaciebant corpora saltu
 undique et adversum venientibus ora petebant
 et nec opinantis a tergo deripiebant 1320
 deplexaeque dabant in terram vulnere victos,
 morsibus adfixae validis atque unguibus uncis.
 iactabantque suos tauri pedibusque terebant
 et latera ac ventris hauribant subter equorum
 cornibus et terram minitanti mente ruebant. 1325
 et validis socios caedebant dentibus apri
 tela infracta suo tingentes sanguine saevi,
 permixtasque dabant equitum peditumque ruinas. 1329
 nam transversa feros exhibant dentis adactus 1330
 iumenta aut pedibus ventos erecta petebant,
 nequiquam, quoniam ab nervis succisa videres
 concidere atque gravi terram consternere casu.
 siquos ante domi domitos satis esse putabant,
 effervescere cernebant in rebus agundis 1335

1307 belli *Ital.* : bellis *OQ* 1310 partim] Parthi *C* 1319 pete-
 bant *Vat.* 640: patebant *OQ* 1320 deripiebant *O* : diripiebant *Q*
 1323 suos] sues *Q corr.* 1325 mente] fronte *Lachmann* 1328
 in se fracta suo tingentes sanguine tela *om. Mon.* 1330 dentis
 adactus *Marullus* : dentis adauctus *Q* : dentibus adauctus *O*

vulneribus clamore fuga terrore tumultu,
 nec poterant ullam partem reducere eorum;
 diffugiebat enim varium genus omne ferarum;
 ut nunc saepe boves lucae ferro male mactae
 diffugiunt, fera facta suis cum multa dedere. 1340
 si fuit ut facerent. sed vix adducor ut, ante
 quam commune malum fieret foedumque, futurum [1343]
 non quierint animo praesentire atque videre; [1342]
 et magis id possis factum contendere in omni,
 in variis mundis varia ratione creatis, 1345
 quam certo atque uno terrarum quolibet orbi.
 sed facere id non tam vincendi spe voluerunt,
 quam dare quod gernerent hostes, ipsique perire,
 qui numero diffidebant armisque vacabant.

Nexilis ante fuit vestis quam textile tegmen. 1350
 textile post ferrumst, quia ferro tela paratur,
 nec ratione alia possunt tam levia gigni
 insilia ac fusi radii scapique sonantes.
 et facere ante viros lanam natura coegit
 quam muliebre genus; nam longe praestat in arte 1355
 et sollertius est multo genus omne virile;
 agricolae donec vitio vertere severi,
 ut muliebribus id manibus concedere vellent
 atque ipsi pariter durum sufferre laborem
 atque opere in duro durarent membra manusque. 1360

At specimen sationis et insitionis origo
 ipsa fuit rerum primum natura creatrix,
 arboribus quoniam bacae glandesque caducae
 tempestiva dabant pullorum examina subter;
 unde etiam libitumst stirpis committere ramis 1365
 et nova defodere in terram virgulta per agros.
 inde aliam atque aliam culturam dulcis agelli

1340 facta] fata *Q* corr. 1341-6 *secl. Munro*, 1344-6 *Lachmann*
 1343 ante 1342 posuit *Lachmann* 1361 at *Q* corr. : a *QQ*

temptabant fructusque feros mansuescere terra
 cernebant indulgendo blandeque colendo.
 inque dies magis in montem succedere silvas 1370
 cogebant infraque locum concedere cultis,
 prāta lacus rivos segetes vinetaque laeta
 collibus et campis ut haberent, atque olearum
 caerula distinguens inter plaga currere posset
 per tumulos et convallis camposque profusa; 1375
 ut nunc esse vides vario distincta lepore
 omnia, quae pomis intersita dulcibus ornant
 arbustisque tenent felicibus obsita circum.

At liquidas avium voces imitarier ore
 ante fuit multo quam levia carmina cantu 1380
 concelebrare homines possent aurisque iuvare.
 et zephyri, cava per calamorum, sibila primum
 agrestis docuere cavas inflare cicutas.
 inde minutatim dulcis didicere querelas,
 tibia quas fundit digitis pulsata canentum, 1385
 avia per nemora ac silvas saltusque reperta,
 per loca pastorum deserta atque otia dia.
 haec animos ollis mulcebant atque iuvabant 1390
 cum satiate cibi; nam tum sunt omnia cordi.
 saepe itaque inter se prostrati in gramine molli
 propter aquae rivum sub ramis arboris altae
 non magnis opibus iucunde corpora habebant,
 praesertim cum tempestas ridebat et anni 1395
 tempora pingebant viridantis floribus herbas.
 tum ioca, tum sermo, tum dulces esse cachinni
 consuerant. agrestis enim tum musa vigebat;
 tum caput atque umeros plexis redimire coronis
 floribus et foliis lascivia laeta monebat, 1400
 atque extra numerum procedere membra moventis

1368 terra] terram *Lachmann* 1386 reperta] repertas *Bocke-*
müller: alii alia 1388-1389 = 1454, 1455 *secl. Lachmann*
 1391 post tum *Lambinus* haec inserunt omnia] otia *Faber*: carmina
Lachmann 1393 propter aquae *O corr.*: proptercaque *OQ* 1397
 ioca 131: loca *OQ* 1400 monebat 131: mouebat *OQ*

duriter et duro terram pede pellere matrem ;
 unde oriebantur risus dulcesque cachinni,
 omnia quod nova tum magis haec et mira vigeant.
 et vigilantibus hinc aderant solacia somno, 1405
 ducere multimodis voces et flectere cantus
 et supera calamos unco percurrere labro ;
 unde etiam vigiles nunc haec accepta tuentur
 et numerum servare genus didicere, neque hilo
 maiorem interea capiunt dulcedini' fructum 1410
 quam silvestre genus capiebat terrigenarum.
 nam quod adest praesto, nisi quid cognovimus ante
 suavius, in primis placet et pollere videtur,
 posteriorque fere melior res illa reperta
 perdit et immutat sensus ad pristina quaeque. 1415
 sic odium coepit glandis, sic illa relictā
 strata cubilia sunt herbis et frondibus aucta.
 pellis item cecidit vestis contempta ferinae ;
 quam reor invidia tali tunc esse repertam,
 ut letum insidiis qui gessit primus obiret, 1420
 et tamen inter eos distractam sanguine multo
 disperiisse neque in fructum convertere quisse.
 tunc igitur pelles, nunc aurum et purpura curis
 exercent hominum vitam belloque fatigant :
 quo magis in nobis, ut opinor, culpa resedit. 1425
 frigus enim nudos sine pellibus excruciabat
 terrigenas ; at nos nil laedit veste carere
 purpurea atque auro signisque ingentibus apta,
 dum plebeia tamen sit quae defendere possit.
 ergo hominum genus incassum frustra laborat 1430
 semper et (in) curis consumit inanibus aevum,
 nimirum quia non cognovit quae sit habendi

1405 somno] somni *Lambinus*
 recens *Munro* : genis *Everett*
 dulcedini' *Lambinus* : dulcedine *QQ*
 ferina *QQ* 1419 tunc *editio Brixiensis* : nunc *QQ*
 rigentibus *Jortin* (*apud Wakefield*)

1409 genus] sonis *Lachmann* :
 1410 maiorem *l 31* : maiore *QQ*
 1418 ferinae *ed. Juntina* :
 1428 ingentibus]
 1431 in *add. l 31*

finis et omnino quoad crescat vera voluptas.
 idque minutatim vitam provexit in altum
 et belli magnos commovit funditus aestus. 1435

At vigiles mundi magnum versatile templum
 sol et luna suo lustrantes lumine circum
 perdocuere homines annorum tempora verti
 et certa ratione geri rem atque ordine certo.

Iam validis saepti degebant turribus aevum 1440
 et divisa colebatur discretaque tellus ;
 tum mare velivolis florebat †propter odores†
 auxilia ac socios iam pacto foedere habebant,
 carminibus cum res gestas coepere poetae
 tradere ; nec multo priu' sunt elementa reperta. 1445
 propterea quid sit prius actum respicere aetas
 nostra nequit, nisi qua ratio vestigia monstrat.

Navigia atque agri culturas moenia leges
 arma vias vestis (et) cetera de genere horum,
 praemia, delicias quoque vitae funditus omnis, 1450
 carmina picturas, et daedala signa polire,
 usus et impigrae simul experientia mentis
 paulatim docuit pedetemptim progredientis.
 sic unumquicquid paulatim protrahit aetas
 in medium ratioque in luminis erigit oras. 1455
 namque alid ex alio clarescere corde videbant,
 artibus ad summum donec venere cacumen.

1442 tum] iam *Lachmann* propter odores *OQ*: puppibus et res
Lachmann: puppibus ; urbes *Munro*: alii alia 1449 et add l 31
 1451 polire l 31: polito *OQ* 1456 corde videbant] conveniebat
Lachmann: et ordine debet *Munro*: cordi' videbant *Polle*

T. LVCRETI CARI DE RERVM NATVRA

LIBER SEXTVS

PRIMAE frugiparos fetus mortalibus aegris
 dididerunt quondam praeclaro nomine Athenae
 et recreaverunt vitam legesque rogarunt,
 et primae dederunt solacia dulcia vitae,
 cum genuere virum tali cum corde repertum, 5
 omnia veridico qui quondam ex ore profudit ;
 cuius et extincti propter divina reperta
 divulgata vetus iam ad caelum gloria fertur.
 nam cum vidit hic ad victum quae flagitat usus
 omnia iam ferme mortalibus esse parata 10
 et, proquam possent, vitam consistere tutam,
 divitiis homines et honore et laude potentis
 adfluere atque bona gnatorum excellere fama,
 nec minus esse domi cuiquam tamen anxia corda,
 atque animi ingratis vitam vexare (sine ulla) 15
 pausa atque infestis cogi saevire querelis,
 intellegit ibi vitium vas efficere ipsum
 omniaque illius vitio corrumpier intus
 quae collata foris et commoda cumque venirent ;

4 solacia *L* : solaci *OQ* 7 extincti *Marullus* : extincta *OQ*
 11 possent] posset *Lachmann* 13 excellere *Marullus* : excolere *O* :
 excollere *Q* 14 corda *Marullus* : cordi *OQ* 15 sine ulla *Munro* :
 querellis *O* : querelis *Q* (ex 16) 16 pausa atque] passimque *Lach-*
mann cogi *Lambinus* : coget *OQ* querelis] periclis *Lachmann*
 17 vas *Marullus* : fas *OQ*

partim quod fluxum pertusumque esse videbat, 20
 ut nulla posset ratione explerier umquam;
 partim quod taetro quasi conspurcare sapore
 omnia cernebat, quaecumque receperat, intus.
 veridicis igitur purgavit pectora dictis
 et finem statuit cuppedinis atque timoris 25
 exposuitque bonum summum quo tendimus omnes
 quid foret, atque viam monstravit, tramite parvo
 qua possemus ad id recto contendere cursu,
 quidve mali foret in rebus mortalibu' passim,
 quod fieret naturali varieque volaret 30
 seu casu seu vi, quod sic natura parasset,
 et quibus e portis occurri cuique deceret,
 et genus humanum frustra plerumque probavit
 volvere curarum tristis in pectore fluctus.
 nam veluti pueri trepidant atque omnia caecis 35
 in tenebris metuunt, sic nos in luce timemus
 interdum, nilo quae sunt metuenda magis quam
 quae pueri in tenebris pavitant finguntque futura.
 hunc igitur terrorem animi tenebrasque necessest
 non radii solis nec lucida tela diei 40
 discutiant, sed naturae species ratioque.
 quo magis inceptum pergam pertexere dictis.

Et quoniam docui mundi mortalia templa
 esse ⟨et⟩ nativo consistere corpore caelum,
 et quaecumque in eo fiunt fierique necessest, 45
 pleraque dissolui, quae restant percipe porro;
 quandoquidem semel insignem conscendere currum

*

ventorum existant, placentur, ⟨et⟩ omnia rursum

28 recto *O corr.*: recta *OQ* 30 fieret *Susius*: fuerit *OQ* 32
 et *l 31*: e *OQ* 34 volvere *ed. Veronensis*: uolner e *OQ* 44 et
add. l 31 45 fierique] fateare *Lachmann* 47 * 48 lacunam
indicavit Bernays 48 existant *Bernays*: exirtant *OQ*: ex ira ut
Munro et *addidi*: ut *Munro* omnia] omina *Munro* alii alia:
locus valde incertus

quae fuerint sint placato conversa furore,
 cetera, quae fieri in terris caeloque tuentur 50
 mortales, pavidis cum pendent mentibu' saepe,
 et faciunt animos humilis formidine divum
 depressosque premunt ad terram propterea quod
 ignorantia causarum conferre deorum
 cogit ad imperium res et concedere regnum. 55
 nam bene qui didicere deos securum agere aevum,
 si tamen interea mirantur qua ratione 58
 quaeque geri possint, praesertim rebus in illis 60
 quae supera caput aetheriis cernuntur in oris,
 rursus in antiquas referuntur religiones
 et dominos acris adsciscunt, omnia posse
 quos miseri credunt, ignari quid queat esse,
 quid nequeat, finita potestas denique cuique 65
 quam sit ratione atque alte terminus haerens ;
 quo magis errantes caeca ratione feruntur.
 quae nisi respuis ex animo longeque remittis
 dis indigna putare alienaque pacis eorum,
 delibata deum per te tibi numina sancta 70
 saepe oberunt ; non quo violari summa deum vis
 possit, ut ex ira poenas petere imbibat acris,
 sed quia tute tibi placida cum pace quietos
 constitues magnos irarum volvere fluctus,
 nec delubra deum placido cum pectore adibis, 75
 nec de corpore quae sancto simulacra feruntur
 in mentis hominum divinae nuntia formae,
 suscipere haec animi tranquilla pace valebis.
 inde videre licet qualis iam vita sequatur.
 quam quidem ut a nobis ratio verissima longe 80
 reiciat, quamquam sunt a me multa profecta,

49 fuerint] *fortasse* *furerent* (*vid. C. Q. xv p. 21*): *furore Lambinus* :
favore OQ 51 *mentibus Q corr.* : *montibus OQ* 56, 57 = 90,
 91 = i 153, 154 *secl. Bentley* 66 *ratione O corr.* : *rationi OQ*
 68 *longeque O corr.* : *longique OQ* *remittis l 31* : *remitti OQ*
 71 *oberunt Wakefield* : *oderunt OQ* 72 *ex ira Marullus* : *exire OQ*
 73 *quietos Marullus* : *quietus OQ* 74 *fluctus l 31* : *fletus OQ* 76
feruntur ed. Brixiensis : *fuerunt OQ*

multa tamen restant et sunt ornanda politis
 versibus; est ratio caeli (species)que tenenda,
 sunt tempestates et fulmina clara canenda,
 quid faciant et qua de causa cumque ferantur; 85
 ne trepides caeli divisis partibus amens,
 unde volans ignis pervenerit aut in utram se
 verterit hinc partem, quo pacto per loca saepta
 insinuarit, et hinc dominatus ut extulerit se:
 quorum operum causas nulla ratione videre 90
 possunt ac fieri divino numine rentur.
 tu mihi supremas praescripta ad candida calcis
 currenti spatium praemonstra, callida musa
 Calliope, requies hominum divumque voluptas,
 te duce ut insigni capiam cum laude coronam. 95

Principio tonitru quatiuntur caerula caeli
 propterea quia concurrunt sublime volantes
 aetheriae nubes contra pugnantibu' ventis.
 nec fit enim sonitus caeli de parte serena,
 verum ubicumque magis denso sunt agmine nubes, 100
 tam magis hinc magno fremitus fit murmure saepe.
 praeterea neque tam condenso corpore nubes
 esse queunt quam sunt lapides ac ligna, neque autem
 tam tenues quam sunt nebulae fumique volantes;
 nam cadere aut bruto deberent pondere pressae 105
 ut lapides, aut ut fumus constare nequirent
 nec cohibere nives gelidas et grandinis imbris.
 dant etiam sonitum patuli super aequora mundi,
 carbasus ut quondam magnis intenta theatri
 dat crepitum malos inter iactata trabesque, 110
 interdum perscissa furit petulantibus auris
 et fragilis (sonitus) chartarum commeditatur.
 id quoque enim genus in tonitru cognoscere possis,
 aut ubi suspensam vestem chartasque volantis

83 caelis (caeli *Avancius*) speciesque *ed. Brixiensis*: caelisque *OQ*:
alii alia 87 pervenerit (*ex 383*): pervenerat *O*: pervenere *Q*
 90, 91 = 56, 57 = i 153, 154 *secl. Munro* 92 calcis *Turnebus*:
 callis *OQ* 102 nubes *l 31*: nure *OQ* 103 lapides *Q corr.*:
 pepides *OQ* ligna *ed. Veronensis*: iigna *O*: igna *Q*: tigna *Q corr.*
 112 sonitus *add. l 31*

verberibus venti versant planguntque per auras. 115
 fit quoque enim interdum (ut) non tam concurrere nubes
 frontibus adversis possint quam de latere ire
 diverso motu radentes corpora tractim,
 aridus unde auris terget sonus ille diuque
 ducitur, exierunt donec regionibus artis. 120

Hoc etiam pacto tonitru concussa videntur
 omnia saepe gravi tremere et divulsa repente
 maxima dissiluisse capacis moenia mundi,
 cum subito validi venti collecta procella
 nubibus intorsit sese conclusaque ibidem 125
 turbine versanti magis ac magis undique nubem
 cogit uti fiat spisso cava corpore circum,
 post ubi comminuit vis eius et impetus acer,
 tum perterricrepto sonitu dat scissa fragorem.
 nec mirum, cum plena animae vesicula parva 130
 saepe ita dat parvum sonitum displosa repente.

Est etiam ratio, cum venti nubila perflant,
 ut sonitus faciant. etenim ramosa videmus
 nubila saepe modis multis atque aspera ferri;
 scilicet ut, crebram silvam cum flamina cauri 135
 perflant, dant sonitum frondes ramique fragorem.
 fit quoque ut interdum validi vis incita venti
 perscindat nubem perfringens impete recto.
 nam quid possit ibi flatus manifesta docet res,
 hic, ubi lenior est, in terra cum tamen alta 140
 arbusta evolvens radicibus haurit ab imis.
 sunt etiam fluctus per nubila, qui quasi murmur
 dant in frangendo graviter; quod item fit in altis
 fluminibus magnoque mari, cum frangitur aestus.
 fit quoque, ubi e nubi in nubem vis incidit ardens 145

115 planguntque *Pontanus*: planguentque *O*: plaguentque *Q* 116
 ut *add. l 31* 118 corpora *Gronovius*: corpore *OQ* 120 ex-
 ierunt *Vat. 1706*: exierum *OQ* 124 collecta *O corr.*: concollecta
OQ 128 conminuit? *O prim. man.*: commouit *O corr.*: comunuit *Q*
 129 scissa *Bernays*: missa *OQ*: fissa *Lachmann* 131 parvum]
 magnum *Vossius*: torvum *Munro*: alii alia 141 evolvens *O corr.*:
 uoluens *OQ* 144 aestus *l 31*: aest *OQ*: aestu *Q corr.*

fulminis ; haec multo si forte umore recepit
 ignem, continuo magno clamore trucidat ;
 ut calidis candens ferrum e fornacibus olim
 stridit, ubi in gelidum propere demersimus imbrem.
 aridior porro si nubes accipit ignem, 150
 uritur ingenti sonitu succensa repente ;
 lauricomos ut si per montis flamma vagetur
 turbine ventorum comburens impete magno ;
 nec res ulla magis quam Phoebi Delphica laurus
 terribili sonitu flamma crepitante crematur. 155
 denique saepe geli multus fragor atque ruina
 grandinis in magnis sonitum dat nubibus alte.
 ventus enim cum confercit, franguntur in artum
 concreti montes nimborum et grandine mixti.

Fulgit item, nubes ignis cum semina multa 160
 excussere suo concursu ; ceu lapidem si
 percutiat lapis aut ferrum ; nam tum quoque lumen .
 exsilit et claras scintillas dissipat ignis.
 sed tonitrum fit uti post auribus accipiamus,
 fulgere quam cernant oculi, quia semper ad auris 165
 tardius adveniunt quam visum quae moveant res.
 id licet hinc etiam cognoscere, caedere si quem
 ancipiti videas ferro procul arboris auctum,
 ante fit ut cernas ictum quam plaga per auris
 det sonitum, sic fulgorem quoque cernimus ante 170
 quam tonitrum accipimus, pariter qui mittitur igni
 e simili causa, concursu natus eodem.

Hoc etiam pacto volucris loca lumine tingunt
 nubes et tremulo tempestas impete fulgit.
 ventus ubi invasit nubem et versatus ibidem 175
 fecit ut ante cavam docui spissescere nubem,
 mobilitate sua fervescit ; ut omnia motu
 percalefacta vides ardescere, plumbea vero

146, 147 sic interpunxit Merrill 147 ut post continuo add. Lam-
 binus trucidat] trucidet ed. Juntina 149 propere Marullus :
 propter OQ 151 repente l 31 : recente OQ 153 turbine Q corr. :
 turne OQ 165 fulgere Q corr. : fugere OQ 168 ancipiti l 31 :
 ungapiti OQ 172 c O : et Q

glans etiam longo cursu volvenda liquescit.
 ergo fervidus hic nubem cum perscidit atram, 180
 dissipat ardoris quasi per vim expressa repente
 semina quae faciunt nictantia fulgura flammae;
 inde sonus sequitur qui tardius adficit auris
 quam quae perveniunt oculorum ad lumina nostra.
 scilicet hoc densis fit nubibus et simul alte 185
 exstructis aliis alias super impete miro;
 ne tibi sit frudi quod nos inferne videmus
 quam sint lata magis quam sursum exstructa quid exstent.
 contemplator enim, cum montibus assimilata
 nubila portabunt venti transversa per auras, 190
 aut ubi per magnos montis cumulata videbis
 insuper esse aliis alia atque urgere superne
 in statione locata sepultis undique ventis.
 tum poteris magnas moles cognoscere eorum
 speluncasque velut saxis pendentibu' structas 195
 cernere, quas venti cum tempestate coorta
 complerunt, magno indignantur murmure clausi
 nubibus in caveisque ferarum more minantur;
 nunc hinc nunc illinc fremitus per nubila mittunt
 quaerentesque viam circum versantur et ignis 200
 semina convolvunt (e) nubibus atque ita cogunt
 multa rotantque cavis flammam fornacibus intus,
 donec divulsa fulserunt nube corusci.

Hac etiam fit uti de causa mobilis ille
 devolet in terram liquidi color aureus ignis, 205
 semina quod nubis ipsas permulta necessust
 ignis habere; etenim cum sunt umore sine ullo,
 flammeus (est) plerumque colos et splendidus ollis.
 quippe etenim solis de lumine multa necessest

179 liquescit *Pontanus*: quiescit *OQ* 180 perscidit *l 31*. per-
 scindit *OQ* 183 adficit *Bentley*: adlicit *OQ* 188 sint *Marullus*:
 sit *OQ* 191 cumulata *Q corr.*: culata *OQ* 192 superne
Bentley: superna *OQ* 201 e *add. L* 205 color *Servius*:
 calor *OQ* 208 flammeus est *l 31*: flameusque *O*: flammeus *Q* 209
 etenim *Q corr.*: enim *OQ*

concupere, ut merito rubeant ignisque profundant. 210
 hasce igitur cum ventus agens contrusit in unum
 compressitque locum cogens, expressa profundunt
 semina quae faciunt flammae fulgere colores.
 fulgit item, cum rarescunt quoque nubila caeli.
 nam cum ventus eas leviter diducit euntis 215
 dissoluitque, cadant ingratis illa necessest
 semina quae faciunt fulgorem. tum sine taetro
 terrore et sonitu fulgit nulloque tumultu.

Quod superest, 〈quali〉 natura praedita constant 220
 fulmina, declarant ictus et inusta vaporis
 signa notaeque gravis halantis sulphuris auras.
 ignis enim sunt haec non venti signa neque imbris.
 praeterea saepe accendunt quoque tecta domorum
 et celeri flamma dominantur in aedibus ipsis.
 hunc tibi subtilem cum primis ignibus ignem 225
 constituit natura minutis mobilibusque
 corporibus, cui nil omnino obsistere possit.
 transit enim validum fulmen per saepta domorum,
 clamor ut ac voces, transit per saxa, per aera,
 et liquidum puncto facit aes in tempore et aurum, 230
 curat item vasis integris vina repente
 diffugiant, quia nimirum facile omnia circum
 collaxat rareque facit lateramina vasis
 adveniens calor eius et insinuatus in ipsum
 mobiliter soluens differt primordia vini. 235
 quod solis vapor aetatem non posse videtur
 efficere usque adeo pollens fervore corusco.
 tanto mobilior vis et dominantior haec est.

Nunc ea quo pacto gignantur et impete tanto
 fiant ut possint ictu discludere turris, 240

210 rubeant *l 31*: iubeant *OQ* 216 ingratis *Pius*: ingratus *OQ*
 218 sonitu *Vat. 1954*: sonis *OQ* 219 quali *add. Lambinus* 220
 ictus *l 31*: ictu *OQ*: alii alia 221 auras *Mon.*: auris *OQ* 223
 saepe *Vossius*: se *OQ* 226 mobilibusque *ed. Aldina*: montibusque
OQ 231 ut *post item inseruit Lambinus* 234 et *Lachmann*: ut
OQ 237 pollens *Lambinus*: tellens *OQ*: pellens *Munro*

disturbare domos, avellere tigna trabesque,
 et monumenta virum commoliri atque †cieret†,
 exaniniare homines, pecudes prosternere passim,
 cetera de genere hoc qua vi facere omnia possint,
 expediam, neque <te> in promissis plura morabor. 245

Fulmina gignier e crassis alteque putandumst
 nubibus exstructis ; nam caelo nulla sereno
 nec leviter densis mittuntur nubibus umquam.
 nam dubio procul hoc fieri manifesta docet res ;
 quod tunc per totum concrescunt aera nubes, 250
 undique uti tenebras omnis Acherunta reamur
 liquisse et magnas caeli complesse cavernas.
 usque adeo taetra nimborum nocte coorta
 impendent atrae formidinis ora superne,
 cum commoliri tempestas fulmina coeptat. 255
 praeterea persaepe niger quoque per mare nimbus,
 ut picis e caelo demissum flumen, in undas
 sic cadit effertus tenebris procul et trahit atram
 fulminibus gravidam tempestatem atque procellis,
 ignibus ac ventis cum primis ipse repletus, 260
 in terra quoque ut horrescant ac tecta requirant.
 sic igitur supera nostrum caput esse putandumst
 tempestatem altam. neque enim caligine tanta
 obruerent terras, nisi inaedificata superne
 multa forent multis exempto nubila sole ; 265
 nec tanto possent venientes opprimere imbri,
 flumina abundare ut facerent camposque natare,
 si non exstructis foret alte nubibus aether.
 hic igitur ventis atque ignibus omnia plena
 sunt ; ideo passim fremitus et fulgura fiunt. 270
 quippe etenim supra docui permulta vaporis

241 tigna *Lambinus*: om. O: igna Q: ligna O corr.: signa Q corr.
 242 commoliri] demoliri *Marullus* ciere OQ: cremare *Munro*:
alii alia 245 te add. l 31 246 gignier *Marullus*: gignie OQ
 crassis *Marullus*: classis OQ 250 tunc] tum *Lachmann* 257
 demissum flumen *ed. Juntina*: dimissum fulmen OQ 258 effertus
Lachmann: et fertus OQ 269 plena l 31: plana OQ

semina habere cavas nubis et multa necessest
 concipere ex solis radiis ardoreque eorum.
 hoc ubi ventus eas idem qui cogit in unum
 forte locum quemvis, expressit multa vaporis 275
 semina seque simul cum eo commiscuit igni,
 insinuatus ibi vertex versatur in arto
 et calidis acuit fulmen fornacibus intus.
 nam duplici ratione accenditur, ipse sua cum
 mobilitate calescit et e contagibus ignis. 280
 inde ubi percaluit venti vis (et) gravis ignis
 impetus incessit, maturum tum quasi fulmen
 perscindit subito nubem, ferturque coruscis
 omnia luminibus lustrans loca percitus ardor.
 quem gravis insequitur sonitus, displosa repente 285
 opprimere ut caeli videantur templa superne.
 inde tremor terras graviter pertemptat et altum
 murmura percurrunt caelum; nam tota fere tum
 tempestas concussa tremit fremitusque moventur.
 quo de concussu sequitur gravis imber et uber, 290
 omnis uti videatur in imbrem vertier aether
 atque ita praecipitans ad diluvium revocare:
 tantus discidio nubis ventique procella
 mittitur, ardenti sonitus cum provolat ictu.
 est etiam cum vis extrinsecus incita venti 295
 incidit in calidam maturo fulmine nubem; *celum*
 quam cum perscidit, extemplo cadit igneus ille
 vertex quem patrio vocitamus nomine fulmen.
 hoc fit idem in partis alias, quocumque tulit vis.
 fit quoque ut interdum venti vis missa sine igni 300
 igniscat tamen in spatio longoque meatu,
 dum venit, amittens in cursu corpora quaedam

272 habere *Pontanus*: haecdere *OQ* 277 arto *Lachmann*: alto
OQ 281 venti vis et gravis ignis *Bentley*: grauis uenti uis igni *OQ*
 286 videantur] videatur *Munro* 288 fere] furit *Merrill* 290 con-
 cussu *Q corr.*: concussas *O*: concussus *Q* 291 uti *Pontanus*: ut
OQ 292 revocare] revocari *Bentley* 296 calidam *Bernays*:
 ualida *O*: ualidam *Q* fulmine *Marullus*: culmine *OQ* 298
 patrio *l 31*: spatio *O*: expatio *Q*: Latio *Q corr*

grandia quae nequeunt pariter penetrare per auras ;
 atque alia ex ipso corradens aere portat
 parvula quae faciunt ignem commixta volando ; 305
 non alia longe ratione ac plumbea saepe
 fervida fit glans in cursu, cum multa rigoris
 corpora dimittens ignem concepit in auris.
 fit quoque ut ipsius plagae vis excitet ignem,
 frigida cum venti pepulit vis missa sine igni, 310
 nimirum quia, cum vementi perculit ictu,
 confluere ex ipso possunt elementa vaporis
 et simul ex illa quae tum res excipit ictum ;
 ut, lapidem ferro cum caedimus, evolat ignis,
 nec, quod frigida vis ferrist, hoc setius illi 315
 semina concurrunt calidi fulgoris ad ictum.
 sic igitur quoque res accendi fulmine debet,
 opportuna fuit si forte et idonea flammis.
 nec temere omnino plane vis frigida venti
 esse potest, ea quae tanta vi missa supernest, 320
 quin, prius in cursu si non accenditur igni,
 at tepefacta tamen veniat commixta calore.

Mobilitas autem fit fulminis et gravis ictus,
 et celeri ferme percurrunt fulmina lapsu,
 nubibus ipsa quod omnino prius incita se vis 325
 colligit et magnum conamen sumit eundi,
 inde ubi non potuit nubes capere impetis auctum,
 exprimitur vis atque ideo volat impete miro,
 ut validis quae de tormentis missa feruntur.
 adde quod e parvis et levibus est elementis, 330
 nec facilest tali naturae obsistere quicquam.
 inter enim fugit ac penetrat per rara viarum,
 non igitur multis offensibus in remorando

308 concepit *l 31*: concipit *OQ* 309 ipsius *Marullus*: ipsis *OQ*
 315 illi *Lachmann*: ille *OQ* 320 ea *Lachmann*: ex *OQ* tanta
 vi missa *l 31*: tantaumissa *OQ* 321 cursu si *l 31*: cursus *OQ* 322
 calore *Ital.*: colore *OQ*¹ 324 *secl. Brieger* et *Marullus*: at *OQ*
 percurrunt *Lachmann*: percunt *OQ*: pergunt *O corr.*: alii alia

turbine caelesti subito correptus et igni? 395
 cur etiam loca sola petunt frustra que laborant?
 an tum brachia consuescunt firmantque lacertos?
 in terraque patris cur telum perpetiuntur
 obtundi? cur ipse sinit neque parcat in hostis?
 denique cur numquam caelo iacit undique puro 400
 Iuppiter in terras fulmen sonitusque profundit?
 an simul ac nubes succedere, ipse in eas tum
 descendit, prope ut hinc teli determinet ictus?
 in mare qua porro mittit ratione? quid undas
 arguit et liquidam molem camposque natantis? 405
 praeterea si vult caveamus fulminis ictum,
 cur dubitat facere ut possimus cernere missum?
 si nec opinantis autem vult opprimere igni,
 cur tonat ex illa parte, ut vitare queamus,
 cur tenebras ante et fremitus et murmura concit? 410
 et simul in multas partis qui credere possis
 mittere? an hoc ausis numquam contendere factum,
 ut fierent ictus uno sub tempore plures?
 at saepe numero factum fierique necessest,
 ut plueret in multis regionibus et cadere imbris, 415
 fulmina sic uno fieri sub tempore multa.
 postremo cur sancta deum delubra suasque
 discutit infesto praeclaras fulmine sedis
 et bene facta deum frangit simulacra suisque
 demit imaginibus violento vulnere honorem? 420
 altaque cur plerumque petit loca plurimaque eius
 montibus in summis vestigia cernimus ignis?
 Quod superest, facilest ex his cognoscere rebus,
 presteras Grai quos ab re nominatarunt,
 in mare qua missi veniant ratione superne. 425
 nam fit ut interdum tamquam demissa columna

401 Iuppiter in terras *Q* *corr.* : Iuppiterras *O* (Iupi- *Q*) 402 eas
 tum *Lambinus* : aestum *QQ* 406 vult *Q* *corr.* : iuuuit *O* : uiuit *Q*
 421 loca *Q* *corr.* : ioca *QQ* eius *Lachmann* : plus *QQ* 426 tam-
 quam *l 31* : tam cum *QQ*

in mare de caelo descendat, quam freta circum
 fervereunt graviter spirantibus incita flabris,
 et quaecumque in eo tum sint deprensa tumultu
 navigia in summum veniant vexata periculum. 430

hoc fit ubi interdum non quit vis incita venti
 rumpere quam coepit nubem, sed deprimit, ut sit
 in mare de caelo tamquam demissa columna,
 paulatim, quasi quid pugno bracchique superne
 coniectu trudatur et extendatur in undas ; 435

quam cum discidit, hinc prorumpitur in mare venti
 vis et fervorem mirum concinnat in undis.
 versabundus enim turbo descendit et illam
 deducit pariter lento cum corpore nubem ;
 quam simul ac gravidam detrusit ad aequora ponti, 440
 ille in aquam subito totum se immittit et omne
 excitat ingenti sonitu mare fervere cogens.

fit quoque ut involvat venti se nubibus ipse
 vertex corradens ex aere semina nubis
 et quasi demissum caelo presterat imitetur. 445

hic ubi se in terras demisit dissoluitque,
 turbinis immanem vim provomit atque procellae.
 sed quia fit raro omnino montisque necessest
 officere in terris, apparet crebrius idem
 prospectu maris in magno caeloque patenti. 450

Nubila concrescunt, ubi corpora multa volando
 hoc supero in caeli spatio coiere repente
 asperiora, moris quae possint indupedita
 exiguis tamen inter se compressa teneri.
 haec faciunt primum parvas consistere nubis ; 455
 inde ea comprehendunt inter se conque gregantur
 et coniungendo crescunt ventisque feruntur

428 incita *l 31* : lacita *OQ* 430 veniant *Lachmann* : ueniunt *OQ*
 440 detrusit *Lambinus* : detruit *OQ* : detrudit *O corr.* 447 procellae
l 31 : procellat *OQ* 449 officere *l 31* : officeret *OQ* 452 supero
Lachmann : super *OQ* coiere *l 31* : coire *OQ* 453 moris
Lachmann : modis *OQ* 454 compressa *Marullus* : compressa *OQ*
 456 ea] haec *Lachmann*

usque adeo donec tempestas saeva coortast.
 fit quoque uti montis vicina cacumina caelo
 quam sint quoque magis, tanto magis edita fument 460
 assidue fulvae nubis caligine crassa
 propterea quia, cum consistunt nubila primum,
 ante videre oculi quam possint tenvia, venti
 portantes cogunt ad summa cacumina montis.
 hic demum fit uti turba maiore coorta 465
 et condensa queant apparere et simul ipso
 vertice de montis videantur surgere in aethram.
 nam loca declarat sursum ventosa patere
 res ipsa et sensus, montis cum ascendimus altos.
 praeterea permulta mari quoque tollere toto 470
 corpora naturam declarant litore vestes
 suspensae, cum concipiunt umoris adhaesum.
 quo magis ad nubis augendas multa videntur
 posse quoque e salso consurgere momine ponti;
 nam ratio consanguineast umoribus omnis. 475
 praeterea fluviis ex omnibus et simul ipsa
 surgere de terra nebulas aestumque videmus,
 quae velut halitus hinc ita sursum expressa feruntur
 suffunduntque sua caelum caligine et altas
 sufficiunt nubis paulatim conveniundo. 480
 urget enim quoque signiferi super aetheris aestus
 et quasi densendo subtextit caerula nimbis.
 fit quoque ut hunc veniant in caelum extrinsecus illa
 corpora quae faciunt nubis nimbosque volantis.
 innumerabilem enim numerum summamque profundi 485
 esse infinitam docui, quantaque volarent
 corpora mobilitate ostendi quamque repente

460 quoque] quaeque *C* 461 fulvae] furvae *Bentley* 465 turba
 maiore *Marullus*: turbam mor *O*: turbamur *Q* 466 condensa
 queant apparere *Lachmann*: condensatque arta parere *OQ* 467
 videantur *l 31*: uideatur *OQ* 468 loca *l 31*: lo *OQ* 469 sensus
Avancius: sensum *OQ* 473 quo *Mon.*: quod *OQ* 474 con-
 surgere momine *l 31*: consurgerem homine *OQ* 475 consanguineast
Vossius: consanguinea se *OQ* omnis] ollis *Lachmann* 483 hunc
O (*cf.* ii 1097): huc *Q* illa *l 31*: illi *O*: ille *Q*

immemorabile ⟨per⟩ spatium transire solerent.
 haud igitur mirumst si parvo tempore saepe
 tam magnis †montis† tempestas atque tenebrae 490
 coperiant maria ac terras impensa superne,
 undique quandoquidem per caulas aetheris omnis
 et quasi per magni circum spiracula mundi
 exitus introitusque elementis redditus exstat.

Nunc age, quo pacto pluvius concreseat in altis 495
 nubibus umor et in terras demissus ut imber
 decidat, expediam. primum iam semina aquai
 multa simul vincam consurgere nubibus ipsis
 omnibus ex rebus pariterque ita crescere utrumque,
 et nubis et aquam quaecumque in nubibus exstat, 500
 ut pariter nobis corpus cum sanguine crescit,
 sudor item atque umor quicumque est denique membrīs.
 concipiunt etiam multum quoque saepe marinum
 umorem, veluti pendentia vellera lanae,
 cum supera magnum mare venti nubila portant. 505
 consimili ratione ex omnibus amnibus umor
 tollitur in nubis. quo cum bene semina aquarum
 multa modis multis convenere undique adaucta,
 confertae nubes ⟨umorem⟩ mittere certant
 dupliciter; nam vis venti contrudit et ipsa 510
 copia nimborum turba maiore coacta
 urget ⟨et⟩ e supero premit ac facit effluere imbris.
 praeterea cum rarescunt quoque nubila ventis
 aut dissolvuntur, solis super icta calore,
 mittunt umorem pluvium stillantque, quasi igni 515
 cera super calido tabescens multa liquecat.
 sed vemens imber fit, ubi vementer utraque
 nubila vi cumulata premuntur et impete venti.

488 per *add. Pontanus* 490 montis *OQ*: nim̃bis *Lachmann*:
 monstris *Merrill*: tam magnae molis *Bernays*: montibu' tam magnis
Munro 491 coperiant] coperiunt *Lachmann* 509 umorem
Munro: ui uenti *OQ* (ex 510): alii alia 511 maiore *Marullus*:
 inore *OQ* 512 urget et e *O corr.*: urgete *Q*: urgite *O*: urget de
Lachmann 516 cera *l 31*: tela *OQ*

at retinere diu pluviae longumque morari
 consuerunt, ubi multa cientur semina aquarum 520
 atque aliis aliae nubes nimbiue rigantes
 insuper atque omni vulgo de parte feruntur,
 terraque cum fumans umorem tota redhalat.
 hic ubi sol radiis tempestatem inter opacam
 adversa fulsit nimborum aspergine contra, 525
 tum color in nigris existit nubibus arcis.

Cetera quae sursum crescunt sursumque creantur,
 et quae concrescunt in nubibus, omnia, prorsum
 omnia, nix venti grando gelidaeque pruinae
 et vis magna geli, magnum duramen aquarum, 530
 et mora quae fluvios passim refrenat aventis,
 perfacilest tamen haec reperire animoque videre
 omnia quo pacto fiant quareve creentur,
 cum bene cognoris elementis reddita quae sint.

Nunc age quae ratio terrai motibus exstet 535
 percipe. et in primis terram fac ut esse rearis
 subter item ut supera ventosis undique plenam
 speluncis multosque lacus multasque lacunas
 in gremio gerere et rupis deruptaque saxa;
 multaque sub tergo terrai flumina tecta 540
 volvere vi fluctus summersaque saxa putandumst.
 undique enim similem esse sui res postulat ipsa.
 his igitur rebus subiunctis suppositisque
 terra superne tremit magnis concussa ruinis,
 subter ubi ingentis speluncas subruit aetas; 545
 quippe cadunt toti montes magnoque repente
 concussu late disserpunt inde tremores.
 et merito, quoniam plaustri concussa tremescunt

519 retinere *O* corr.: retineret *OQ*: remanere *Bernays* 520
 cientur *Wakefield*: fientur *OQ* 523 redhalat *Vossius*: redralat *OQ*
 524 inter *L*: ime *O*: inte *Q* 531 aventis *O* corr.: auintis *OQ*:
 euntis *Q* corr. 533 fiant *Marullus*: fluant *O*: fluuant *Q* 536
 terram *l 31*: terras *OQ* 537 supera *Avancius*: super *OQ* ven-
 tosis *Wakefield*: ventis *OQ* 541 summersaque saxa *l 31*: summer-
 sosca *OQ* 542 esse sui *ed. Aldina prima*: esse ui *OQ* 548
 plaustri *Lachmann*: plaustris *OQ*

tecta viam propter non magno pondere tota,
 nec minus exsultant res dupuis† cumque viai 550
 ferratos utrimque rotarum succutit orbis.
 fit quoque, ubi in magnas aquae vastasque lacunas
 gleba vetustate e terra provolvitur ingens,
 ut iactetur aquae fluctu quoque terra vacillans ;
 ut vas interdum non quit constare, nisi umor 555
 destitit in dubio fluctu iactarier intus.

Praeterea ventus cum per loca subcava terrae
 collectus parte ex una procumbit et urget
 obnixus magnis speluncas viribus altas,
 incumbit tellus quo venti prona premit vis. 560
 tum supera terram quae sunt exstructa domorum
 ad caelumque magis quanto sunt edita quaeque,
 inclinata minent in eandem prodita partem
 protractaeque trabes impendent ire paratae.
 et metuunt magni naturam credere mundi 565
 exitiale aliquod tempus clademque manere,
 cum videant tantam terrarum incumbere molem !
 quod nisi respirent venti, vis nulla refrenet
 res neque ab exitio possit reprehendere euntis.
 nunc quia respirant alternis inque gravescunt 570
 et quasi collecti redeunt ceduntque repulsi,
 saepius hanc ob rem minitatur terra ruinas
 quam facit ; inclinatur enim retroque recellit
 et recipit prolapsa suas in pondera sedis.
 hac igitur ratione vacillant omnia tecta, 575
 summa magis mediis, media imis, ima perhilum.

Est haec eiusdem quoque magni causa tremoris,

550 es dupuis *OQ* : et ubi lapi' *Lachmann* : ut scrupus *Munro* : res
 ut lapi' *Bockemüller* : alii alia viai *Lachmann* : uim *OQ* 554 vacil-
 lans *Q* corr. : uacillas *OQ* 555 interdum *Lachmann* : inter *OQ* :
 alii alia 563 minent] meant *Lachmann* : tument *Munro* : alii alia
 568 venti, vis *Marullus* : uentis *OQ* 574 pondera *Q* : pondere *O*

ventus ubi atque animae subito vis maxima quaedam
 aut extrinsecus aut ipsa tellure coorta
 in loca se cava terrai coniecit ibique 580
 speluncas inter magnas fremit ante tumultu
 versabunda(que) portatur, post incita cum vis
 exagitata foras erumpitur et simul altam
 diffindens terram magnum concinnat hiatum.
 in Syria Sidone quod accidit et fuit Aegi 585
 in Peloponneso, quas exitus hic animai
 disturbat urbis et terrae motus obortus.
 multaque praeterea ceciderunt moenia magnis
 motibus in terris et multae per mare pessum
 subsedere suis pariter cum civibus urbes. 590
 quod nisi prorumpit, tamen impetus ipse animai
 et fera vis venti per crebra foramina terrae
 dispertitur ut horror et incutit inde tremorem;
 frigus uti nostros penitus cum venit in artus,
 concutit invitos cogens tremere atque movere. 595
 ancipiti trepidant igitur terrore per urbis,
 tecta superne timent, metuunt inferne cavernas
 terrai ne dissoluat natura repente,
 neu distracta suum late dispanadat hiatum
 atque suis confusa velit complere ruinis. 600
 proinde licet quamvis caelum terramque reantur
 incorrupta fore aeternae mandata saluti;
 et tamen interdum praesens vis ipsa pericli
 subdit et hunc stimulum quadam de parte timoris,
 ne pedibus raptim tellus subtracta feratur 605
 in barathrum rerumque sequatur prodita summa
 funditus et fiat mundi confusa ruina.

[Principio mare mirantur non reddere maius

582 que *add. l 31* 586 quas *Avancius*: qua *O*: que *Q* 588
 ceciderunt *Mon.*: cecideret *O*: caecideret *Q* 589 pessum *Q corr.*:
 possum *OQ* 594 uti *Q corr.*: ut in *OQ* 600 adque *Lachmann*:
 idque *OQ* complere *O corr.*: comple *OQ* 604 subdit *O*: sub-
 dita *Q* 605 subtracta *L*: substructa *OQ* 608-638 *hos versus*
uncinis inclusit Lachmann

naturam, quo sit tantus decursus aquarum,
 omnia quo veniant ex omni flumina parte. 610
 adde vagos imbris tempestatesque volantis,
 omnia quae maria ac terras sparguntque rigantque;
 adde suos fontis; tamen ad maris omnia summam
 guttai vix instar erunt unius adaugmen;
 quo minus est mirum mare non augescere magnum. 615
 praeterea magnam sol partem detrahit aestu.
 quippe videmus enim vestis umore madentis
 exsiccare suis radiis ardentibu' solem:
 at pelage multa et late substrata videmus.
 proinde licet quamvis ex uno quoque loco sol 620
 umoris parvam delibet ab aequore partem;
 largiter in tanto spatio tamen auferet undis.
 tum porro venti quoque magnam tollere partem
 umoris possunt verrentes aequora, ventis
 una nocte vias quoniam persaepe videmus 625
 siccati mollisque luti concrescere crustas.
 praeterea docui multum quoque tollere nubis
 umorem magno conceptum ex aequore ponti
 et passim toto terrarum spargere in orbi,
 cum pluit in terris et venti nubila portant. 630
 postremo quoniam raro cum corpore tellus
 est, et coniunctast, oras maris undique cingens,
 debet, ut in mare de terris venit umor aquai,
 in terras itidem manare ex aequore salso;
 percolatur enim virus retroque remanat 635
 materies umoris et ad caput amnibus omnis
 confluit, inde super terras redit agmine dulci
 qua via secta semel liquido pede detulit undas.]

Nunc ratio quae sit, per fauces montis ut Aetnae

609 naturam *Pontanus*: natura *OQ* 616 magnam sol *Pontanus*:
 sol magnam *OQ* 624 aequora, ventis *Lachmann*: aequora uenti
OQ: aequora ponti *L* 629 orbi *Marullus*: orbis *OQ* 632 maris
Q corr.: magis *OQ* 638 detulit *O corr.*: tulit *OQ*

expirent ignes interdum turbine tanto, 640
 expediam. neque enim mediocri clade coorta
 flammea tempestas Siculum dominata per agros
 finitimis ad se convertit gentibus ora,
 fumida cum caeli scintillare omnia templa
 cernentes pavida complebant pectora cura, 645
 quid moliretur rerum natura novarum.

Hisce tibi in rebus latest alteque videndum
 et longe cunctas in partis dispiciendum,
 ut reminiscaris summam rerum esse profundam
 et videas caelum summai totius unum 650
 quam sit parvula pars et quam multesima constet
 nec tota pars, homo terrai quota totius unus.
 quod bene propositum si plane contueare
 ac videas plane, mirari multa relinquo.
 numquis enim nostrum miratur siquis in artus 655
 accepit calido febrim fervore coortam
 aut alium quemvis morbi per membra dolorem?
 obturgescit enim subito pes, arripit acer
 saepe dolor dentis, oculos invadit in ipsos,
 existit sacer ignis et urit corpore serpens 660
 quamcumque arripuit partem, repitque per artus,
 nimirum quia sunt multarum semina rerum,
 et satis haec tellus morbi caelumque mali fert,
 unde queat vis immensi procreare morbi.
 sic igitur toti caelo terraeque putandumst 665
 ex infinito satis omnia suppeditare,
 unde repente queat tellus concussa moveri
 perque mare ac terras rapidus percurrere turbo,
 ignis abundare Aetnaeus, flammescere caelum.
 id quoque enim fit et ardescunt caelestia templa 670
 et tempestates pluviae graviore coortu

641 mediocri clade *Vossius*: media grecia de *OQ* 642 flammea
Nonius: flamme *O*: flammae *Q* 648 dispiciendum *L*: despicien-
 dum *OQ* 653 propositum *Q corr.*: propositus *OQ* plane *Q corr.*:
 plani *OQ* 663 morbi] nobis *Lambinus*: orbi *Lachmann*

sunt, ubi forte ita se tetulerunt semina aquarum.

‘at nimis est ingens incendi turbidus ardor.’

scilicet et fluuius, qui visus maximus ei

qui non ante aliquem maiorem vidit, et ingens 675

arbor homoque videtur, et omnia de genere omni

maxima quae vidit quisque, haec ingentia fingit,

cum tamen omnia cum caelo terraque marique

nil sint ad summam summai totius omnem.

Nunc tamen illa modis quibus irritata repente 680

flamma foras vastis Aetnae fornacibus efflet,

expediam. primum totius subcava montis

est natura, fere silicum suffulta cavernis.

omnibus est porro in speluncis ventus et aer.

ventus enim fit, ubi est agitando percitus aer. 685

hic ubi percaluit calefecitque omnia circum

saxa furens, qua contingit, terramque, et ab ollis

excussit calidum flammis velocibus ignem,

tollit se ac rectis ita faucibus eicit alte.

fert itaque ardorem longe longeque favillam 690

differt et crassa volvit caligine fumum

extruditque simul mirando pondere saxa ;

ne dubites quin haec animai turbida sit vis.

praeterea magna ex parti mare montis ad eius

radices frangit fluctus aestumque resorbet. 695

ex hoc usque mari speluncae montis ad altas

perveniant subter fauces. hac ire fatendumst

*

et penetrare mari penitus res cogit aperto

atque efflare foras ideoque extollere flammam

saxaque subiectare et harenae tollere nimbos. 700

in summo sunt vertice enim crateres, ut ipsi

674 qui visus] quivis est *Bentley*: qui visu est *Merrill* 676 omni

Ital.: omnis *OQ* 683 fere silicum *O corr.*: feres illi cum *OQ*

687 contingit *l 31*: contigit *OQ* 690 itaque *Heinsius*: itque *OQ*

695 resorbet *l 31*: resoluet *OQ* 697 * 698 *lacunam indicavit Munro*

698 aperto] aperta *Brieger* 701 vertice enim *Turnebus*: uerticeni

O: uertigeni *Q*

nominitant; nos quod fauces perhibemus et ora.

Sunt aliquot quoque res quarum unam dicere causam
non satis est, verum pluris, unde una tamen sit;
corpus ut exanimum siquod procul ipse iacere 705
conspicias hominis, fit ut omnis dicere causas
conveniat leti, dicatur ut illius una.

nam neque eum ferro nec frigore vincere possis
interiisse neque a morbo neque forte veneno,
verum aliquid genere esse ex hoc quod contigit ei 710
scimus. item in multis hoc rebus dicere habemus.

Nilus in aestatem crescit campisque redundat
unicus in terris, Aegypti totius annis.
is rigat Aegyptum medium per saepe calorem,
aut quia sunt aestate aquilones ostia contra, 715

anni tempore eo qui etesiae esse feruntur,
et contra fluvium flantes remorantur et undas
cogentes sursus replent coguntque manere.
nam dubio procul haec adverso flabra feruntur
flumine, quae gelidis ab stellis axis aguntur. 720

ille ex aestifera parti venit annis ab austro,
inter nigra virum percocto saecula colore
exoriens penitus media ab regione diei.
est quoque uti possit magnus congestus harenae
fluctibus adversis oppilare ostia contra, 725

cum mare permotum ventis ruit intus harenam;
quo fit uti pacto liber minus exitus annis
et proclivis item fiat minus impetus undis.
fit quoque uti pluviae forsitan magis ad caput ei
tempore eo fiant, quod etesia flabra aquilonum 730

nubila coniciunt in eas tunc omnia partis.
scilicet ad mediam regionem eiecta diei
cum convenerunt, ibi ad altos denique montis

705 iacere *l 31*: iaceret *QQ* 708 neque *l 31*: que *QQ* 710
verum *Marullus*: utrum *QQ* contigit ei *Vossius*: contioitel *O*:
contioite *Q* 716 qui etesiae *Ital.*: quietes ire *QQ*: qui ethesie
Q corr. 719 flabra *l 31*: flabro *QQ* 727 annis] anni *Marullus*
730 quod *Marullus*: quo *QQ*

contrusae nubes coguntur vique premuntur.

forsitan Aethiopum penitus de montibus altis 735
crescat, ubi in campos albas descendere ningues
tabificis subigit radiis sol omnia lustrans.

Nunc age, Averno tibi quae sint loca cumque lacusque
expediam, quali natura praedita constant.

principio, quod Averno vocantur nomine, id ab re 740
impositumst, quia sunt avibus contraria cunctis,

e regione ea quod loca cum venere volantes,
remigi oblatae pennarum vela remittunt
praecipitesque cadunt molli cervice profusae
in terram, si forte ita fert natura locorum, 745

aut in aquam, si forte lacus substratus Avernist.
is locus est Cumas apud, acri sulphure montes
oppleti calidis ubi fumant fontibus aucti;

est et Athenaeis in moenibus, arcis in ipso
vertice, Palladis ad templum Tritonidis almae, 750
quo numquam pennis appellunt corpora raucae
cornices, non cum fumant altaria donis.

usque adeo fugitant non iras Palladis acris
pervigili causa, Graium ut cecinere poetae,
sed natura loci opus efficit ipsa suapte. 755

in Syria quoque fertur item locus esse videri,
quadrupedes quoque quo simul ac vestigia primum
intulerint, graviter vis cogat concidere ipsa,
manibus ut si sint divis mactata repente.

omnia quae naturali ratione geruntur, 760

et quibus e fiant causis apparet origo;
ianua ne tpoteist Orci regionibus esse
credatur, post hinc animas Acheruntis in oras
ducere forte deos manis inferne reamur,

736 descendere *Lambinus*: decedere *OQ* 740 quod] quo *Lach-*
mann 743 remigi *Lachmann*: remigio *OQ*: remigii *Marullus*
746 substratus *ed. Brixensis*: subiratus *OQ* Avernist *Munro*:
Auerni *OQ* 747 is *O*: his *O* acri sulphure *Salmasius*: ecri
suiper *OQ* 755 opus] hoc opus *Avancius*: ope sufficit *Munro*:
prius *Merrill* 762 poteis *OQ*: potius *l 31*: Puteis *Lachmann*:
forte his *Munro*: alii alia 764 inferne *Lambinus*: inferna *OQ*

naribus alipedes ut cervi saepe putantur 765
 ducere de latebris serpentina saecula ferarum.
 quod procul a vera quam sit ratione repulsum
 percipe; nam de re nunc ipsa dicere conor.

Principio hoc dico, quod dixi saepe quoque ante,
 in terra cuiusque modi rerum esse figuras; 770
 multa, cibo quae sunt, vitalia, multaque, morbos
 incutere et mortem quae possint accelerare.
 et magis esse aliis alias animantibus aptas
 res ad vitae rationem ostendimus ante
 propter dissimilem naturam dissimilisque 775
 texturas inter sese primasque figuras.

multa meant inimica per auris, multa per ipsas
 insinuant naris infesta atque aspera †tactu†,
 nec sunt multa parum tactu vitanda neque autem
 aspectu fugienda saporeque tristia quae sint. 780

Deinde videre licet quam multae sint homini res
 acriter infesto sensu spurcaeque gravesque;
 arboribus primum certis gravis umbra tributa
 usque adeo, capitis faciant ut saepe dolores,
 siquis eas subter iacuit prostratus in herbis. 785
 est etiam magnis Heliconis montibus arbor
 floris odore hominem taetro consueta necare.
 scilicet haec ideo terris ex omnia surgunt,
 multa modis multis multarum semina rerum
 quod permixta gerit tellus discretaque tradit. 790
 nocturnumque recens extinctum lumen ubi acri
 nidore offendit naris, consopit ibidem,
 concidere et spumas qui morbo mittere suevit.
 castoreoque gravi mulier sopita recumbit
 et manibus nitidum teneris opus effluit ei, 795

768 de re om. O 771 quae Wakefield: eque OQ 777 auris
 Marullus: auras OQ 778 tactu OQ: adactu Lachmann: iactu
 Munro: tractu Polle: alii alia 780 tristia l 31: tristitia OQ 788
 ideo terris Marullus: indeotris OQ 791 acri Lambinus: acris OQ
 793 spumas G: pumos OQ

tempore eo si odoratast quo menstrua solvit.
 multaque praeterea languentia membra per artus
 solvunt atque animam labefactant sedibus intus.
 denique si calidis etiam cunctere lavabris
 plenior et fueris, solio ferventis aquai 800
 quam facile in medio fit uti des saepe ruinas!
 carbonumque gravis vis atque odor insinuat
 quam facile in cerebrum, nisi aquam praecepimus ante!
 at cum membra domus percepit †fervida servist†,
 tum fit odor vini plagae mactabilis instar. 805
 nonne vides etiam terra quoque sulphur in ipsa
 gignier et taetro concrescere odore bitumen;
 denique ubi argenti venas auriue sequuntur,
 terrai penitus scrutantes abdita ferro,
 qualis exspiret Scaptensula subter odores? 810
 quidve mali fit ut exhalent aurata metalla!
 quas hominum reddunt facies qualisque colores!
 nonne vides audisve perire in tempore parvo
 quam soleant et quam vitae copia desit,
 quos opere in tali cohibet vis magna necessis? 815
 hos igitur tellus omnis exaestuat aestus
 exspiratque foras in apertum promptaque caeli.

Sic et Aversa loca alitibus summittere debent
 mortiferam vim, de terra quae surgit in auras,
 ut spatium caeli quadam de parte venenet; 820
 quo simul ac primum pennis delata sit ales,
 impediatur ibi caeco correpta veneno,
 ut cadat e regione loci, qua derigit aestus.
 quo cum corrui, hic eadem vis illius aestus
 reliquias vitae membris ex omnibus aufert. 825

800 et fueris *Wakefield*: efflueris *OQ*: et laveris *Lachmann* 803
 aquam *l 31*: aqua *OQ* 804 domus *Vat. 3276*: domnus *OQ*: hominis
Lambinus fervida servis *O*: fervida fervis *Q*: fervida febris *Lam-*
binus: fervida sorbus *Ellis*: fervidior vis *Lachmann*, servidu', nervis
Munro 805 vini] viri *Pius* 808 argenti *l 31*: argento *OQ*
 813 audisve *l 31*: audire *OQ* 815 necessis *Lachmann*: necessest *OQ*
 817 apertum *Q*: aperta *O* 818 et] ea *Lachmann* alitibus
Q corr.: malitibus *OQ*: halitibus *Bergh*

T. LVCRETI CARI

quippe etenim primo quasi quendam conciet aestum.
posterior fit uti, cum iam cecidere veneni
in fontis ipsos, ibi sit quoque vita vomenda
propterea quod magna mali fit copia circum.

Fit quoque ut interdum vis haec atque aestus Averni 830
aera, qui inter avis cumquest terramque locatus,
discutiat, prope uti locus hic linquatur inanis.
cuius ubi e regione loci venere volantes,
claudicat extemplo pinnarum nîsus inanis
et conamen utrimque alarum proditur omne. 835
hic ubi nixari nequeunt insistereque alis,
scilicet in terram delabi pondere cogit
natura, et vacuum prope iam per inane iacentes
dispergunt animas per caulas corporis omnis.

*

frigidior porro in puteis aestate fit umor, 840
rarescit quia terra calore et semina siquae
forte vaporis habet proprii, dimittit in auras.
quo magis est igitur tellus effeta calore,
fit quoque frigidior qui in terrast abditus umor.
frigore cum premitur porro omnis terra coitque 845
et quasi concrescit, fit scilicet ut coeundo
exprimat in puteos si quem gerit ipsa calorem.

Esse apud Hammonis fanum fons luce diurna
frigidus et calidus nocturno tempore fertur.
hunc homines fontem nimis admirantur et acri 850
sole putant subter terras fervere raptim,
nox ubi terribili terras caligine textit.
quod nimis a verast longe ratione remotum.
quippe ubi sol nudum contractans corpus aquai
non quierit calidum supera de reddere parte, 855

832 hic *Mon.*: hinc *OQ* linquatur *l 31*: linquitur *O*: linquit *Q*
839 * 840 *schedam unam intercidisse probavit Lachmann* 841 *rare-*
scit Lambinus: arescit *OQ* si quae *Lachmann*: si qua *OQ* 842
proprii *Bernays*: propriac *O*: proprie *Q*: propere *L* 846 *ut*
coeundo *Lambinus*: in quo eundo *O*: in coeundo *Q*: in coeundo *ut*
Merrill 851 *raptim Lambinus*: partim *OQ*

cum superum lumen tanto fervore fruatur,
 qui queat hic subter tam crasso corpore terram
 percoquere umorem et calido satiare vapore?
 praesertim cum vix possit per saepta domorum
 insinuare suum radiis ardentibus aestum. 860

quae ratio est igitur? nimirum terra magis quod
 rara tepet circum fontem quam cetera tellus
 multaque sunt ignis prope semina corpus aquai.
 hoc ubi roriferis terram nox obruit umbris,
 extemplo penitus frigescit terra coitque. 865

hac ratione fit ut, tamquam compressa manu sit,
 exprimat in fontem quae semina cumque habet ignis,
 quae calidum faciunt laticis tactum atque vaporem.
 inde ubi sol radiis terram dimovit obortus
 et rarefecit calido gliscente vapore, 870

rursus in antiquas redeunt primordia sedis
 ignis et in terram cedit calor omnis aquai.
 frigidus hanc ob rem fit fons in luce diurna.
 praeterea solis radiis iactatur aquai
 umor et in lucem tremulo rarescit ab aestu; 875
 propterea fit uti quae semina cumque habet ignis
 dimittat; quasi saepe gelum, quod continet in se,
 mittit et exsolvit glaciem nodosque relaxat.

Frigidus est etiam fons, supra quem sita saepe
 stuppa iacit flammam concepto protinus igni, 880
 taedaeque consimili ratione accensa per undas
 collucet, quocumque natans impellitur auris.
 nimirum quia sunt in aqua permulta vaporis
 semina de terraque necessest funditus ipsa
 ignis corpora per totum consurgere fontem 885

857 subter. *Marullus*: super *OQ* 858 satiare *Vat. 1954*: soclare
OQ 862 tepet *Lachmann*: tenet *O*: tene *Q* 864 umbris
Marullus: undis *OQ* 865 penitus *Lachmann*: sonitus *OQ* 868
 vaporem] saporem *Lachmann* 870 gliscente *Wakefield*: miscente
OQ 877 dimittat *C*: demittat *OQ* 878 nodosque *Vat. 3276*:
 nobosque *OQ*: nouosque *O corr.* 879 frigidus *l 31*: frigus *OQ*

et simul exspirare foras exireque in auras,
 non ita multa tamen, calidus queat ut fieri fons.
 praeterea dispersa foras erumpere cogit
 vis per aquam subito sursumque ea conciliari.
 quod genus endo marist Aradi fons, dulcis aquai 890
 qui scatit et salsas circum se dimovet undas ;
 et multis aliis praebet regionibus aequor
 utilitatem opportunam sitientibu' nautis,
 quod dulcis inter salsas intervomit undas.
 sic igitur per eum possunt erumpere fontem 895
 et scatere illa foras in stuppam semina ; quae cum
 conveniunt aut in taedai corpore adhaerent,
 ardescunt facile extemplo, quia multa quoque in se
 semina habent ignis stuppae taedaeque latentis.
 nonne vides etiam, nocturna ad lumina linum 900
 nuper ubi extinctum admoveas, accendier ante
 quam tetigit flammam, taedamque pari ratione ?
 multaque praeterea prius ipso tacta vapore
 eminus ardescunt quam comminus imbuat ignis.
 hoc igitur fieri quoque in illo fonte putandumst. 905
 Quod superest, agere incipiam quo foedere fiat
 naturae, lapis hic ut ferrum ducere possit,
 quam Magneta vocant patrio de nomine Grai,
 Magnetum quia fit patriis in finibus ortus.
 hunc homines lapidem mirantur ; quippe catenam 910
 saepe ex anellis reddit pendentibus ex se.
 quinque etenim licet interdum plurisque videre
 ordine demisso levibus iactarier auris,
 unus ubi ex uno dependet subter adhaerens
 ex alioque alius lapidis vim vinclaque noscit : 915

888 praeterea] propterea *Lachmann* 889 conciliari *Lambinus* :
 conciliare *OQ* 890 marist Aradi *Bernays* : maris parat *OQ* 892
 et] fert *Merrill* praebet *l 31* : praeter *OQ* 896 quae *ed. Veronensis* :
 que *OQ* : quo *Lachmann* 897 in tedai corpore *Vossius* : indeda
 corpora *OQ* 899 latentis *Bernays* : tenentes *OQ* : tepentis *Lach-*
mann 908 quam *O* : quae *Q* : quem *Q corr.* 912 quinque
Q corr. : qui neque *OQ* 913 demisso] demissos *Lambinus*

usque adeo permananter vis pervalet eius.

Hoc genus in rebus firmandumst multa prius quam
ipsius rei rationem reddere possis,
et nimium longis ambagibus est adeundum ;
quo magis attentas auris animumque reposco. 920

Principio omnibus ab rebus, quascumque videmus,
perpetuo fluere ac mitti spargique necessest
corpora quae feriant oculos visumque lacesant.
perpetuoque fluunt certis ab rebus odores ;
frigus ut (a) fluviis, calor ab sole, aestus ab undis 925
aequoris exesor moerorum litora propter.
nec varii cessant sonitus manare per auris.
denique in os salsi venit umor saepe saporis,
cum mare versamur propter, dilutaque contra
cum tuimur misceri absinthia, tangit amaror. 930 [934]
usque adeo omnibus ab rebus res quaeque fluenter [935]
fertur et in cunctas dimittitur undique partis [930]
nec mora nec requies interdatur ulla fluendi, [931]
perpetuo quoniam sentimus, et omnia semper [932]
cernere odorari licet et sentire sonare. 935 [933]

Nunc omnes repetam quam raro corpore sint res
commemorare ; quod in primo quoque carmine claret.
quippe etenim, quamquam multas hoc pertinet ad res
noscere, cum primis hanc ad rem protinus ipsam,
qua de disserere aggredior, firmare necessest 940
nil esse in promptu nisi mixtum corpus inani.
principio fit ut in speluncis saxa superna
sudent umore et guttis manantibu' stillent.
manat item nobis e toto corpore sudor,
crescit barba pilique per omnia membra, per artus. 945
diditur in venas cibus omnis, auget alitque

916 pervalet] pervolat *Turnebus* 925 a (vid. iv. 216) om. *OQ*
927 auris] auras *OQ* 930-935 hunc versuum ordinem restituit
Lachmann 937 claret l 31: clare *OQ* 941 mixtum corpus
ed. Brixiensis: corpus mixtum *OQ* 942 superna] superne *Lachmann*

corporis extremas quoque partis unguiculosque.
 frigus item transire per aes calidumque vaporem
 sentimus, sentimus item transire per aurum
 atque per argentum, cum pocula plena tenemus. 950
 denique per dissaepta domorum saxea voces
 pervolitant, permanat odor frigusque vaporque
 ignis, qui ferri quoque vim penetrare suevit,
 denique qua circum caeli lorica coercet,

*

morbida visque simul, cum extrinsecus insinuatur, 955
 et tempestates terra caeloque coortae,
 in caelum terrasque remotae iure facessunt;
 quandoquidem nil est nisi raro corpore nexum.

Huc accedit uti non omnia, quae iaciuntur
 corpora cumque ab rebus, eodem praedita sensu 960
 atque eodem pacto rebus sint omnibus apta.
 principio terram sol excoquit et facit are,
 at glaciem dissolvit et altis montibus altas
 exstructas(que) nives radiis tabescere cogit.
 denique cera liquefit in eius posta vapore. 965
 ignis item liquidum facit aes aurumque resolvit,
 at coria et carnem trahit et conducit in unum.
 umor aquae porro ferrum condurat ab igni,
 at coria et carnem mollit durata calore.
 barbigeras oleaster eo iuvat usque capellas, 970
 effluat ambrosia quasi vero et nectare tinctus;
 qua nil est homini quod amariu' frondeat esca.
 denique amaracinum fugitat sus et timet omne
 unguentum; nam saetigeris subus acre venenumst,

954 caeli] coli *L*: corii *l 31*: colli *ed. Brixensis*: corpus *Marullus*:
 Galli *Lachmann* post 954 lacunam indicavit *Brieger* 956 tem-
 pestates *Avancius*: tempestatem *OQ*: tempestate *Lachmann* coor-
 tae *Avancius*: coorta *OQ* 957 iure *Q*: iurae *O*: iura *Lachmann*
 958 corpore nexum] corpori' nexu *Lachmann* 962 sol *Q* *corr.*:
 quo *OQ* 964 que *add. l 31* nives] ningues *Merrill* 971 am-
 brosia *Marullus*: ambrosias *OQ*: alii alia vero] vere *Lachmann*
 972 amarius *l 31*: marius *OQ* frondeat esca *Lachmann*: fronde ac
 excet *O* (extet *Q*)

quod nos interdum tamquam recreare videtur. 975
 at contra nobis caenum taeterrima cum sit
 spurcicies, eadem subus haec iucunda videtur,
 insatiabiliter toti ut volvantur ibidem.

Hoc etiam superest, ipsa quam dicere de re
 aggredior quod dicendum prius esse videtur. 980
 multa foramina cum variis sint reddita rebus,
 dissimili inter se natura praedita debent
 esse et habere suam naturam quaeque viasque.
 quippe etenim varii sensus animantibus insunt,
 quorum quisque suam proprie rem percipit in se. 985
 nam penetrare alio sonitus alioque saporem
 cernimus e sucis, alio nidoris odores.
 praeterea manare aliud per saxa videtur, 990 [991]
 atque aliud lignis, aliud transire per aurum, [992]
 argentoque foras aliud vitroque meare. [993]
 nam fluere hac species, illac calor ire videtur, [994]
 atque aliis aliud citius transmittere eadem. [995]
 scilicet id fieri cogit natura viarum 995 [996]
 multimodis varians, ut paulo ostendimus ante, [997]
 propter dissimilem naturam textaque rerum. [998]

Quapropter, bene ubi haec confirmata atque locata
 omnia constiterint nobis praeposta parata,
 quod superest, facile hinc ratio reddetur et omnis 1000
 causa patefiet quae ferri pelliciat vim.
 principio fluere e lapide hoc permulta necessest
 semina sive aestum qui discutit aera plagis,
 inter qui lapidem ferrumque est cumque locatus.
 hoc ubi inanitur spatium multusque vacefit 1005
 in medio locus, extemplo primordia ferri
 in vacuum prolapsa cadunt coniuncta; fit utqui

977 iucunda C: ciuunda O: inunda Q 988, 989 = 995, 996 *secl.*
editores 991 lignis Wakefield: ignis OQ: tignis l 31 997 (990)
huc transposuit Lambinus 1001 pelliciat vim l 31: perliceatum O:
 peliciatum Q 1006 ferri l 31: ferrae O: ferre Q 1007 utqui]
 utque Marullus

anulus ipse sequatur eatque ita corpore toto.
 nec res ulla magis primoribus ex elementis
 indupedita suis arte conexa cohaeret 1010
 quam validi ferri natura et frigidus horror.
 quo minus est mirum, quod ducitur ex elementis,
 corpora si nequeunt e ferro plura coorta
 in vacuum ferri, quin anulus ipse sequatur ;
 quod facit, et sequitur, donec pervenit ad ipsum 1015
 iam lapidem caecisque in eo compagibus haesit.
 hoc fit idem cunctas in partis, unde vaccefit
 cumque locus, sive e transverso sive superne
 corpora continuo in vacuum vicina feruntur.
 quippe agitantur enim plagis aliunde nec ipsa 1020
 sponte sua sursum possunt consurgere in auras.
 huc accedit item, quare queat id magis esse,
 haec quoque res adiumento, motusque iuvatur,
 quod, simul a fronte est anelli rarior aer
 factus inanitusque locus magis ac vacuatus, 1025
 continuo fit uti qui post est cumque locatus [1033]
 aer a tergo quasi provehat atque propellat. [1026]
 semper enim circumpositus res verberat aer ; [1027]
 sed tali fit uti propellat tempore ferrum, [1028]
 parte quod ex una spatium vacat et capit in se. 1030 [1029]
 hic, tibi quem memoro, per crebra foramina ferri [1030]
 parvas ad partis subtiliter insinuatus [1031]
 trudit et impellit, quasi navem velaque ventus. [1032]
 denique res omnes debent in corpore habere
 aera, quandoquidem raro sunt corpore et aer 1035
 omnibus est rebus circumdatus appositusque.
 hic igitur, penitus qui in ferrost abditus aer,

1009 ex *add. Q corr.* 1011 natura et *Wakefield*: naturae *OQ*
 1012 ducitur *Lachmann*: dicitur *OQ* ex elementis *secl. Bernays*
 1013 e *Q*: te *O* 1018 e *l 31*: et *OQ* 1023 motusque *Brieger*:
 motusque *OQ*: alii aliter explicant 1025 magis *C*: magnis *OQ* 1026
 [1033] huc transposuit *ed. Aldina prima* 1027 aer a tergo *Marullus*:
 erat ergo *OQ* 1033 ventus *Pius*: uentis *OQ*

sollicito motu semper iactatur eoque
 verberat anellum dubio procul et ciet intus ;
 scilicet ille eodem fertur quo praecipitavit 1040
 iam semel et partem in vacuum conamina sumpsit.

Fit quoque ut a lapide hoc ferri natura recedat
 interdum, fugere atque sequi consueta vicissim.
 exsultare etiam Samothracia ferrea vidi
 et ramenta simul ferri furere intus aenis 1045
 in scaphiis, lapis hic Magnes cum subditus esset :
 usque adeo fugere a saxo gestire videtur.
 aere interposito discordia tanta creatur
 propterea quia nimirum prius aestus ubi aeris
 praecepit ferrique vias possedit apertas, 1050
 posterior lapidis venit aestus et omnia plena
 invenit in ferro neque habet qua tranet ut ante.
 cogitur offensare igitur pulsareque fluctu
 ferrea texta suo ; quo pacto respuit ab se
 atque per aes agitatur, sine eo quod saepe resorbet. 1055

Illud in his rebus mirari mitte, quod aestus
 non valet e lapide hoc alias impellere item res.
 pondere enim fretae partim stant ; quod genus aurum ;
 et partim raro quia sunt cum corpore, ut aestus
 pervolet intactus, nequeunt impellier usquam ; 1060
 lignea materies in quo genere esse videtur.
 interutrasque igitur ferri natura locata
 aeris ubi accepit quaedam corpuscula, tum fit,
 impellant ut eam Magnesia flumine saxa.

Nec tamen haec ita sunt aliarum rerum aliena, 1065
 ut mihi multa parum genere ex hoc suppeditentur
 quae memorare queam inter se singlariter apta.
 saxa vides primum sola colescere calce.
 glutine materies taurino iungitur una,

1040 ille *Lachmann* : illo *Q* : om. *O* 1059 et *Lachmann* : at
O corr. *Q* : ad *O* 1064 eam *Marullus* : eum *OQ* flumine *L* :
 flumina *OQ* 1067 singlariter *l 31* : singulariter *OQ* apta *l 31* :
 aptam *OQ* 1068 vides *Pontanus* : uide *OQ* 1069, 1074 una]
 uno *Lachmann*

ut vitio venae tabularum saepius hiscant 1070
 quam laxare queant compages taurea vincla.
 vitigeni latices aquai fontibus audent
 misceri, cum pix nequeat gravis et leve olivum.
 purpureusque color conchyli iungitur una
 corpore cum lanae, dirimi qui non queat usquam, 1075
 non si Neptuni fluctu renovare operam des,
 non, mare si totum velit eluere omnibus undis.
 denique non auro res aurum copulat una
 aerique <aes> plumbo fit uti iungatur ab albo?
 cetera iam quam multa licet reperire? quid ergo? 1080
 nec tibi tam longis opus est ambagibus usquam,
 nec me tam multam hic operam consumere par est,
 sed breviter paucis praestat comprehendere multa.
 quorum ita texturae ceciderunt mutua contra,
 ut cava convenient plenae haec illius illa 1085
 huiusque inter se, iunctura haec optima constat.
 est etiam, quasi ut anellis hamisque plicata
 inter se quaedam possint coplata teneri;
 quod magis in lapide hoc fieri ferroque videtur.

Nunc ratio quae sit morbis aut unde repente 1090
 mortiferam possit cladem conflare coorta
 morbida vis hominum generi pecudumque catervis,
 expediam. primum multarum semina rerum
 esse supra docui quae sint vitalia nobis,
 et contra quae sint morbo mortique necessest 1095
 multa volare. ea cum casu sunt forte coorta
 et perturbarunt caelum, fit morbidus aer.
 atque ea vis omnis morborum pestilientiaque
 aut extrinsecus ut nubes nebulaeque superne
 per caelum veniunt, aut ipsa saepe coortae 1100

1078 non auro res *Faber*: res auro *O*: non res auro *Q* 1079 aeri-
 que aes *Lambinus*: aeraque *OO* 1083 praestat *Q*: restat *O*
 1089 fieri *l 31*: ferri *OO* 1091 cladem *Q corr.*: gradem *O*:
 cradem *Q* 1099 extrinsecus *Q*: intrinsecus *O* 1100 coortae
Lachmann: coorta *OO*

de terra surgunt, ubi putorem umida nactast
 intempestivis pluviisque et solibus icta.
 nonne vides etiam caeli novitate et aquarum
 temptari procul a patria quicumque domoque
 adveniunt ideo quia longe discrepant res? 1105
 nam quid Brittannis caelum differre putamus,
 et quod in Aegypto est qua mundi claudicat axis,
 quidve quod in Ponto est differre, et Gadibus atque
 usque ad nigra virum percocto saecula colore?
 quae cum quattuor inter se diversa videmus 1110
 quattuor a ventis et caeli partibus esse,
 tum color et facies hominum distare videntur
 largiter et morbi generatim saecula tenere.
 est elephas morbus qui propter flumina Nili
 gignitur Aegypto in media neque praeterea usquam. 1115
 Atthide temptantur gressus oculique in Achaeis
 finibus. inde aliis alius locus est inimicus
 partibus ac membris: varius concinnat id aer.
 proinde ubi se caelum, quod nobis forte alienum,
 commovet atque aer inimicus serpere coepit, 1120
 ut nebula ac nubes paulatim repit et omne
 qua graditur conturbat et immutare coactat,
 fit quoque ut, in nostrum cum venit denique caelum,
 corrumpat reddatque sui simile atque alienum.
 haec igitur subito clades nova pestilitasque 1125
 aut in aquas cadit aut fruges persidit in ipsas
 aut alios hominum pastus pecudumque cibatus,
 aut etiam suspensa manet vis aere in ipso
 et, cum spirantes mixtas hinc ducimus auras,
 illa quoque in corpus pariter sorbere necessest. 1130
 consimili ratione venit bubus quoque saepe
 pestilitas et iam pigris balantibus aegror.

1106 Brittannis] Britanni *Munro* 1109 colore *l 31*: calore *OQ*
 1115 Aegypto *l 31*: Aegypta *O*: egypta *Q* 1119 alienum *O corr.*:
 aelenum *OQ* 1121 ut *Pontanus*: ue *OQ* 1122 graditur *l 31*:
 graditus *OQ* conturbat *l 31*: conturbas *O*: cum turbas *Q* 1124
 reddatque *l 31*: reddetque *OQ* 1132 balantibus *l 31*: calantibus *OQ*

nec refert utrum nos in loca deveniamus
 nobis adversa et caeli mutemus amictum,
 an caelum nobis ultro natura †corruptum† 1135
 deferat aut aliquid quo non consuevimus uti,
 quod nos adventu possit temptare recenti.

Haec ratio quondam morborum et mortifer aestus
 finibus in Cecropis funestos reddidit agros
 vastavitque vias, exhausit civibus urbem. 1140
 nam penitus veniens Aegypti finibus ortus,
 aera permensus multum camposque natantis,
 incubuit tandem populo Pandionis omni.
 inde catervatim morbo mortique dabantur.
 principio caput incensum fervore gerebant 1145
 et duplices oculos suffusa luce rubentis.
 sudabant etiam fauces intrinsecus atrae
 sanguine et ulceribus vocis via saepta coibat.
 atque animi interpret manabat lingua cruore
 debilitata malis, motu gravis, aspera tactu. 1150
 inde ubi per fauces pectus complerat et ipsum
 morbida vis in cor maestum confluxerat aegris,
 omnia tum vero vitae claustra lababant.
 spiritus ore foras taetrumolvebat odorem,
 rancida quo perolent proiecta cadavera ritu. 1155
 atque animi prorsum vires totius (et) omne
 languebat corpus leti iam limine in ipso.
 intolerabilibusque malis erat anxius angor
 assidue comes et gemitu commixta querela.
 singultusque frequens noctem per saepe diemque 1160
 corripere assidue nervos et membra coactans
 dissolvebat eos, defessos ante, fatigans.
 nec nimio cuiquam posses ardore tueri

1135 corruptum *OQ* : corruptum *l 31* : coortum *Lachmann* : alii alia
 1138 aestus *Macrobius* : ae *OQ* 1139 Cecropis *l 31* : Cecropit *OQ*
 1143 omni *Marullus* : omnem *O* : omne *Q* 1148 ulceribus *O corr.* :
 uiceribus *O* : uisceribus *Q* cohibat *Macrobius* : coibet *OQ* 1156
 et *add. l 31*, tum *post* prorsum *Wakefield*

corporis in summo summam fervere partem,
 sed potius tepidum manibus proponere tactum 1165
 et simul ulceribus quasi inustis omne rubere
 corpus, ut est per membra sacer dum diditur ignis.
 intima pars hominum vero flagrabat ad ossa,
 flagrabat stomacho flamma ut fornacibus intus.
 nil adeo posses cuiquam leve tenveque membris 1170
 vertere in utilitatem, at ventum et frigora semper.
 in fluvios partim gelidos ardentia morbo
 membra dabant nudum iacentes corpus in undas.
 multi praecipites lymphis putealibus alte [1178]
 inciderunt ipso venientes ore patente : 1175 [1174]
 insedabiliter sitis arida, corpora mersans, [1175]
 aequabat multum parvis umoribus imbrem. [1176]
 nec requies erat ulla mali: defessa iacebant [1177]
 corpora. mussabat tacito medicina timore,
 quippe patentia cum totiens ardentia morbis 1180
 lumina versarent oculorum expertia somno.
 multaque praeterea mortis tum signa dabantur,
 perturbata animi mens in maerore metuque,
 triste supercilium, furiosus vultus et acer,
 sollicitae porro pleneque sonoribus aures, 1185
 creber spiritus aut ingens raroque coortus,
 sudorisque madens per collum splendidus umor,
 tenvia sputa minuta, croci contacta colore
 salsaque, per fauces rauca vix edita tussi.
 in manibus vero nervi trahere et tremere artus 1190
 a pedibusque minutatim succedere frigus
 non dubitabat. item ad supremum denique tempus
 compressae nares, nasi primoris acumen
 tenve, cavati oculi, cava tempora, frigida pellis

1165 potius *Marullus* : iotius *O* : totius *Q* 1171 vertere in *Lam-*
binus : uerteret *OQ* at *Lachmann* : ad *OQ* 1174 [1178] *huc*
transposuit Naugerius 1174 lymphis *l 31* : nymphis *OQ* 1176
 mersans *O* : inerrans *Q* 1178 mali *Macrobius* : mari *OQ* 1186
 spiritus *Macrobius* : spiritum *OQ* 1187 humor *Macrobius* : umum
OQ 1189 rauca] raucas *Macrobius*

duraque, in ore truci rictum, frons tenta tumebat. 1195
 nec nimio rigida post artus morte iacebant.
 octavoque fere candenti lumine solis
 aut etiam nona reddebant lampade vitam.
 quorum siquis, ut est, vitarat funera leti,
 ulceribus taetris et nigra proluvie alvi 1200
 posterius tamen hunc tabes letumque manebat,
 aut etiam multus capitis cum saepe dolore
 corruptus sanguis expletis naribus ibat :
 huc hominis totae vires corpusque fluebat.
 profluvium porro qui taetri sanguinis acre 1205
 exierat, tamen in nervos huic morbus et artus
 ibat et in partis genitalis corporis ipsas.
 et graviter partim metuentes limina leti
 vivebant ferro privati parte virili,
 et manibus sine nonnulli pedibusque manebant 1210
 in vita tamen, et perdebant lumina partim :
 usque adeo mortis metus his incesserat acer.
 atque etiam quosdam cepere obliviam rerum
 cunctarum, neque se possent cognoscere ut ipsi.
 multaque humi cum inhumata iacerent corpora supra 1215
 corporibus, tamen alituum genus atque ferarum
 aut procul absiliebat, ut acrem exiret odorem,
 aut, ubi gustarat, languebat morte propinqua.
 nec tamen omnino temere illis solibus ulla
 comparebat avis, nec tristia saecula ferarum 1220
 exhibant silvis. languebant pleraque morbo
 et moriebantur. cum primis fida canum vis
 strata viis animam ponebat in omnibus aegre ;
 extorquebat enim vitam vis morbida membris.
 incommitata rapi certabant funera vasta. 1225

1195 in ore *Nonius* trucei *Munro* : inhoretiacet *O* : inoretiacet *Q* :
 inhorrescens *Rutgers* rictum *Lambinus* : rectum *OQ* tumebat
Heinsius : mebat *OQ* : alii alia 1196 rigida] rigidi *Lachmann*
 1199 ut est] vix *Lachmann* : ibei *Munro* : iam *Merrill* 1204 huc]
 hac *Faber* 1205 qui *Lambinus* : cul *OQ* 1212 his *Mon.* : iis *OQ*
 incesserat *Lambinus* : incusserat *O* : incuserat *Q* 1217 exiret *ed.*
Brixensis : exciret *OQ* 1220 nec tristia *Macrobius* : nectia *O* :
 noctia *Q* 1221 exhibant *O* : exicbant *Q* 1225 alii alio transtulerunt

nec ratio remedi communis certa dabatur ;
 nam quod ali dederat vitalis aeris auras
 volvere in ore licere et caeli templa tueri,
 hoc aliis erat exitio letumque parabat.
 illud in his rebus miserandum magnopere unum 1230
 aerumnabile erat, quod ubi se quisque videbat
 implicitum morbo, morti damnatus ut esset,
 deficiens animo maesto cum corde iacebat,
 funera respectans animam amittebat ibidem.
 quippe etenim nullo cessabant tempore apisci 1235
 ex aliis alios avidi contagia morbi,
 lanigeras tamquam pecudes et bucera saecula. [1245]
 idque vel in primis cumulabat funere funus. [1237]
 nam quicumque suos fugitabant visere ad aegros, [1238]
 vitae nimium cupidos mortisque timentis 1240 [1239]
 poenibat paulo post turpi morte malaque, [1240]
 desertos, opis expertis, incuria mactans. [1241]
 qui fuerant autem praesto, contagibus ibant [1242]
 atque labore, pudor quem tum cogeabat obire [1243]
 blandaque lassorum vox mixta voce querelae. 1245 [1244]
 optimus hoc leti genus ergo quisque subibat.

*

inque aliis alium, populum sepelire suorum
 certantes : lacrimis lassi luctuque redibant ;
 inde bonam partem in lectum maerore dabantur.
 nec poterat quisquam reperiri, quem neque morbus 1250
 nec mors nec luctus temptaret tempore tali.

Praeterea iam pastor et armentarius omnis
 et robustus item curvi moderator aratri
 languebat, penitusque casa contrusa iacebant
 corpora paupertate et morbo dedita morti. 1255
 exanimis pueris super exanimata parentum

1235 apisci *l* 31 : apiscit *OO* 1237 [1245] *huc transposuit Bentley*
 1239 visere *l* 31 : ut saere *O* : ut sere *Q* 1241 poenibat *Turnebus* :
 poenibus et *O* : poenibus at *Q* 1246 * 1247 *lacunam indicavit Munro*
 1249 in lectum *Marullus* : iniectum *OO* 1250 morbus *l* 31 : morbo *OO*

corpora nonnumquam posses retroque videre
 matribus et patribus natos super edere vitam.
 nec minimam partem ex agris is maeror in urbem
 confluit, languens quem contulit agricolarum 1260
 copia conveniens ex omni morbida parte.
 omnia complebant loca tectaque; quo magis aestu
 confertos ita acervatim mors accumulabat.
 multa siti prostrata viam per proque voluta
 corpora silanos ad aquarum strata iacebant 1265
 interclusa anima nimia ab dulcedine aquarum,
 multaque per populi passim loca prompta viasque
 languida semanimo cum corpore membra videres
 horrida paedore et pannis cooperta perire
 corporis inlue, pelli super ossibus una, 1270
 ulceribus taetris prope iam sordeque sepulta.
 omnia denique sancta deum delubra replebat
 corporibus mors exanimis onerataque passim
 cuncta cadaveribus caelestum templa manebant,
 hospitibus loca quae complerant aedituentes. 1275
 nec iam religio divum nec numina magni
 pendebantur enim: praesens dolor exsuperabat.
 nec mos ille sepulturae remanebat in urbe,
 quo prius hic populus semper consuerat humari;
 perturbatus enim totus trepidabat, et unus 1280
 quisque suum pro re (compostum) maestus humabat.
 multaque (res) subita et paupertas horrida suasit.
 namque suos consanguineos aliena rogorum
 insuper exstructa ingenti clamore locabant
 subdebantque faces, multo cum sanguine saepe 1285
 rixantes potius quam corpora desererentur.

1259 is maeror *Munro*: meroris *O*: maeroris *Q* 1262 com-
 plebant *Lambinus*: condiebant *OQ* aestu *Marullus*: aestus *O*:
 estus *Q*: astu *Lachmann*: artus *Merrill* 1264 prostrata] protracta
Lachmann 1265 iacebant *ed. Veronensis*: tacebant *OQ* 1270
 pelli *Lachmann*: pellis *OQ* 1271 sorde] sordi *Lambinus* 1274
 manebant *C*: manebat *O*: manebit *Q*: tenebat *Lachmann* 1279
 quo prius *Q*: huc pius *O* 1281 conpostum *add. Lachmann*: alii
 alia 1282 res *add. C*, vis *l 31* 1285 faces *l 31*: fauces *OQ*

OXFORD CLASSICAL TEXTS

All volumes are also on sale interleaved with writing-paper and
bound in stout cloth: prices on application

April 1921

OXFORD
AT THE CLARENDON PRESS
LONDON EDINBURGH GLASGOW NEW YORK
TORONTO MELBOURNE CAPE TOWN BOMBAY
OXFORD UNIVERSITY PRESS
HUMPHREY MILFORD

Greek

All prices are net.

Paper Covers. Cloth. India Paper.

eschylus.	A. SIDGWICK.	Ed. 2.	3s. 6d.	4s. 6d.	6s.
ntoninus.	J. H. LEOPOLD	3s.	4s.	6s.
pollonius Rhodius.	R. C. SEATON	3s.	4s.	6s.
ristophanes.	F. W. HALL, W. M. GELDART			10s. 6d.
I. Ach., Eq., Nub., Vesp., Pax, Aves.	Ed. 2.	3s. 6d.	4s. 6d.	6s.
II. Lys., Thesm., Ran., Eccl., Plut. fr.	Ed. 2.	3s. 6d.	4s. 6d.	6s.
ristotle.	I. BYWATER, F. G. KENYON					
	De Arte Poetica.	Ed. 2	2s.	3s.	
	Ethica	4s.	5s.	7s. 6d.
	Athen. Resp.	2s. 6d.	3s. 6d.	
ucolici Graeci.	U. v. WILAMOWITZ-MOELLENDORFF.			3s.	4s.	6s.
emosthenes.	S. H. BUTCHER			15s.
I. Orationes I-XIX	4s. 6d.	5s. 6d.	
II. i. Orationes XX-XXVI	3s. 6d.	4s. 6d.	
uripides.	G. G. A. MURRAY			15s.
I. Cyc., Alc., Med., Heracl., Hip., Andr., Hec.	3s. 6d.	4s. 6d.	} 10s. 6d.
II. Suppl., Herc., Ion, Tro., El., I. T.	Ed. 3	3s. 6d.	4s. 6d.	
III. Hel., Phoen., Or., Bacch., Iph. Aul., Rh.	3s. 6d.	4s. 6d.	
ellenica Oxyrhynchia cum Theopompi et				4s. 6d.	5s. 6d.	
Cratippi fragmentis.	B. P. GRENFELL, A. S. HUNT			
erodotus.	K. HUDE.	I (Books I-IV).	Ed. 2.	4s. 6d.	5s. 6d.	} 15s.
		II (Books V-IX).	4s. 6d.	5s. 6d.	
omer. I-II. Iliad.	D. B. MONRO, T. W. ALLEN.	I-XII		3s.	4s.	} 8s. 6d.
		Books XIII-XXIV.	Ed. 3.	3s.	4s.	
III-IV. Odyssey.	T. W. ALLEN.	Books I-XII.	3s.	4s.	} 8s. 6d.
		Books XIII-XXIV.	Ed. 2.	3s.	4s.	
V. Hymns, etc.	T. W. ALLEN	4s. 6d.	5s. 6d.	7s. 6d.
yperides.	F. G. KENYON	3s. 6d.	4s. 6d.	
nginus.	A. O. PRICKARD	2s. 6d.	3s. 6d.	
rsias.	K. HUDE	3s. 6d.	4s. 6d.	6s.
ato.	J. BURNET.	(India Paper I-III, 20s. IV-V, 20s.)				
I. Euth., Apol., Crit., Ph.; Crat., Tht., Soph., Polit.	Ed. 2.	6s.		7s. 6d.	10s.	
II. Par., Phil., Symp., Phdr.; Alc. I, II, Hipp., Am.	Ed. 2.	6s.		7s. 6d.	10s.	
II. Thg., Chrm., Lch., Lys.; Euthd., Prot., Gorg.,	} 6s.	7s. 6d.	10s.			
Men.; Hp., Ma. et Min., Io, Mnx.						
V. Clit., Rep., Tim., Critias	7s.	8s. 6d.	10s.		
Republic separately (4to with margin, 12s. 6d.)	6s.	7s. 6d.	8s. 6d.		
Clit., Tim., Crit.	2s. 6d.				
V. Part i. Minos, Leges I-VIII	} 8s.	9s. 6d.	15s.		
Part ii. Lges IX-XII, Ep., Epp., Def., Spuria					
Separately: Tetr. i; Ap. and Men.; Tetr. v.	each	2s. 6d.				
	Tetr. vi	4s.	5s.			
eophrasti Characteres.	H. DIELS	3s. 6d.	4s. 6d.	
ucydides.	H. STUART JONES.	Bks. I-IV; V-VIII.				
Ed. 2	each	3s. 6d.	4s. 6d.	[together 10s. 6d.]
igicorum Fragmenta Papyracea.	A. S. HUNT.			3s.	4s.	
nophon.	E. C. MARCHANT.	I-III and IV-V				[each 15s. 21s.]
		I-V			
I. Historia Graeca, Ed. 2, and III. Anabasis	each	3s.	4s.		
II. Libri Socratici and IV. Institutio Cyri	each	3s. 6d.	4s. 6d.		

Latin

All prices are net.

Paper Covers. Cloth. India Pa

Asconius.	A. C. CLARK	3s. 6d.	4s. 6d.	
Caesar, Commentarii.	R. L. A. DU PONTET			10s.
Bellum Gallicum		2s. 6d.	3s. 6d.	
Bellum Civile		3s.	4s.	
Catullus.	R. ELLIS	2s. 6d.	3s. 6d.	
With Tibullus and Propertius				10s. 6
Cicero, Epistulae.	L. C. PURSER			21s.
I. ad Fam.		6s.	7s. 6d.	
II. ad Att., Pars i (1-8), Pars ii (9-16)		each 4s. 6d.	5s. 6d.	
III. ad Q. F., ad M. Brut., Fragm.		3s.	4s.	
Orationes.	A. C. CLARK and W. PETERSON.			
Rosc. Am., I. Pomp., Clu., Cat., Mur., Cael. CLARK	3s.	4s. }	21s.	
Pro Milone, Caesarianae, Philippicae. CLARK. Ed. 2	3s.	4s. }		
Verrinae. PETERSON. Ed. 2.	4s.	5s. }		
Quinct., Rosc. Com., Caec., Leg. Agr., Rab. Per-	3s.	4s. }	18s. 6	
duell., Flacc., Pis., Rab. Post. CLARK				
Post Reditum, De Domo, Har. Resp., Sest., Vat.,	3s.	4s. }		
Prov. Cons., Balb. PETERSON				
Tull., Font., Sull., Arch., Planc. Scaur. CLARK	2s. 6d.	3s. 6d. }		
Rhetorica.	A. S. WILKINS			10s.
I. De Oratore		3s.	4s.	
II. Brutus, etc.		3s. 6d.	4s. 6d.	
Horace.	E. C. WICKHAM. Ed. 2. H. W. GARROD .	3s.	4s.	6s.
Isidori Etymologiae.	W. M. LINDSAY. Two vols.	18s.	20s.	25s.
Livy.	R. S. CONWAY and C. F. WALTERS. Books I-V.	4s.	5s.	7s. 6
	Books VI-X.	5s.	6s.	7s. 6
Lucretius.	C. BAILEY	3s.	4s.	6s.
Martial.	W. M. LINDSAY	6s.	7s. 6d.	10s.
Nepos.	E. O. WINSTEDT	2s.	3s.	
Ovid.	S. G. OWEN. Tristia, Epistulae ex Ponto, etc.	3s.	4s.	
Persius and Juvenal.	S. G. OWEN. Ed. 2.	3s.	4s.	6s.
Phaedrus, Fabulae.	J. P. POSTGATE	5s.	6s.	
Plautus.	W. M. LINDSAY. I. Amph.—Merc.	6s.	7s. 6d. }	16s.
	II. Miles—fragm.	6s.	7s. 6d. }	
Propertius.	J. S. PHILLIMORE. Ed. 2. (I.P., see Catullus)	3s.	4s.	
Statius				12s.
Silvae.	J. S. PHILLIMORE. Ed. 2.	3s. 6d.	4s. 6d.	
Thebais and Achilleis.	H. W. GARROD	6s.	7s. 6d.	
Tacitus				16s.
Annales.	C. D. FISHER	6s.	7s. 6d.	10s.
Historiae.	C. D. FISHER	4s.	5s.	7s. 6
Opera Minora.	H. FURNEAUX	2s.	3s.	
Terence.	R. Y. TYRRELL	3s. 6d.	4s. 6d.	7s. 6
Tibullus.	J. P. POSTGATE. Ed. 2. (I.P., see Catullus.)	2s.	3s.	
Virgil.	Sir ARTHUR HIRTZEL	3s. 6d.	4s. 6d.	6s.
Appendix Vergiliana.	R. ELLIS	4s.	5s.	

The Oxford Greek Testament, 5s. net (I. P. 7s. 6d. n.); Dr. Souter's Pocket Lex to the above, 3s. 6d. net (I. P. 5s. n.); The New Testament in Latin, 3s. (I. P. 4s. 6d. net). See also the General Catalogue.


DATE DUE

GAYLORD			PRINTED IN U.S.A.

GAYLORD

PRINTED IN U S.A.

BOSTON COLLEGE



3 9031 01145464 2

208188

PA6105

.S8L8

208188

Author Lucretius Carus, Titus.

Title

De Rerum nature; libri sex
recognovit brevique adnotat-
ione critica instruxit Cyrillus
Bailey: editio altera

PA

6105

.S8

L8

LUCRETIVS

Bapst Library

Boston College

Chestnut Hill, Mass. 02167

